



LA

GENERATION

DE L'HOMME,

ET

LE TEMPLE DE

L'ÂME:


AVEC

*Autres œuvres Poétiques extraites de
l'Esculape de René Bretonnayau Mé-
decin, natif de Vernantes en Anjou.*

A PARIS,

Pour Abell'Angelier, au premier pil-
lier de la grand' salle du Palays.

M. D. LXX XIII.



LES TRAICTEZ CONTENYS
EN CEST OEUVRE.

- La Generation de l'homme.* { *L'effort de Venus.*
 { *L'Arc de Cupidon.*
 { *La Generation.*
- La Conception de l'homme & de la sterilité, des causes d'icelle
& de sa curation.*
- Le Temple de l'ame.*
- La Fabrique de l'Oeil.*
- Le Cœur ou le Soleil du petit monde, où il y a un ample Discours
des Pouls & du ris.*
- Le Foyè, ou le temple de Nature humaine.*
- Le Phrenetique, & sa cure.*
- Le Melancholique, & sa cure.*
- La Pierre, & sa cure.*
- La Colique, & sa cure.*
- Les Gouttes.*
- Des Hemorrhoides, & leur cure.*
- La decoration ou embellissement de la face, des dents & des
mains, avec un ample discours sur lesdites mains.*
- Le Singe.*



A MONSIEVR DES PRVNEAVS,
CHAMBELLAN ET CONSEILLER
des affaires & conseils de son Altesse.



MONSIEVR, les faueurs & bien-
faits que j'ay tant de fois receu
de vous (que le temps, absence,
ne distance de lieux n'efface-
ront iamais du tableau de ma
memoire) me rendent mainte-
nant si hardy que de m'adresser
à vous si priuémēt, & faire cō-
me ceux, qui ne se cognoissans
assez dignes de se presenter à
Dieu, pour luy offrir leurs vœuz & deuotions, le font faire
par personnes sacrees, pures, & ordonnees à ceste saincte
office: Car ne m'osant, à cause de ma petitesse & deffiance
de moy mesme, presenter hardiment avec mes oblations
au plus grand & heroïque Seigneur, plus sage & prudent
Prince que la terre porte, ie me retire & adresse à vous cō-
me à l'vn des plus parfaits & accomplis gentilshommes
que ie cognoisse, pour offrir en mon nom vn temple que
sept ans y a j'ay basty, & maintenant ie consacre & dedie
à son Altesse, voüant par mesme moyen le reste de ma vie
& labeur à son seruice: vous assurant, que s'il daigne par
vostre moyen seulemēt abaisser sa veuë pour le regarder:

ie seray si satisfait & content, que j'auray bien desormais le courage d'entreprendre vn œuure de plus forte alene, & de plus grande estoffe, pour, selon ma puissance, celebrer les loüanges, & rédre ses vertus immortelles. Et comme le sacrifice fait, l'offrande demeure à celuy qui l'a faite & presentee, cest œuure vous demeurera comme vn acte public, pour porter tesmoignage à la posterité que vous estes celuy à qui ie me sens le plus obligé & redevable, & pour vne eternelle memoire de vos vertus & merites. Et vous disant à Dieu. Je vous baise humblement les mains.

Vostre tres-humble & tres-obeissant seruiteur

R. Bretonnayau M.



A MONSEIGNEUR LE DUC,
F I L S D E F R A N C E, E T F R E R E H
vnique du Roy.



*Tousiours le grand Achill' contre Ilion ne s'arme,
Il domte au son du luth son ire quelque fois:
Alexandre tousiours n'a au dos le harnois,
Il lit de son Homere aucunes fois le carme,*

*La belle Omphale sçait faire oublier l'alarme
Au grand Tirintien, qui s'accorde à sa voix:
Et François vostre ayeul, le plus grand de nos Rois,
Ore le sçauant prise, & ore le gendarme.*

*Tousiours le grand Cesar, le plus grand des Romains
Au meurtre des vaincus n'ensanglante ses mains
Pour escrire ses faits il se donne relasche.*

*Vous qui le plus grand Prince estes de l'Vniuers,
Ennuyé des combats, ne desdaignez mes vers:
Qui ne fait qu'une chose à la longue il s'en fasche.*



A N A I S T R E O V B I E N E S T R E .

Ἔἰς τὸν Ἀσκληπιῶν τῷ ἔλλογιματάτῃ ἰατροῦ Κυρίῃ Ρένάτῃ Ἀσκληπιῶ
 τῷ Βροτοναίῳ Κελτικοῖς ἑυθμοῖς ξυγγραφέντα ἐκ τῶν Κοιν-
 τῶ Σερωῶ ἰατρικῶν παροφυεμάτων.

Εμπεδοκλῆς φύσεως μυθήριον Ἐλλάδι γράφας
 Ἡρωϊκοῖσι σίχρῃσι Σικελὸς ἐξάνυσεν.
 Ὑ΄σερον ὡς Ἰταλοῖς Λουκρήτιος, ὡς δὲ κ' ἰατροῖς
 Πολλὰ νοσηματικῶν δείξε Σερωὸς ἄκη:
 Νῦν δὲ Βροτοναῖος γ' ὑπερηκότασε Ρ'ένάτος
 Σίκελον Ἐμπεδοκλῆ τοῖς γαλαταῖσι γράφας.
 Καὶ Λουκρήτιον αὐτὸν ἐνίκησ' ἠδὲ Σερωῶν
 Εὖτ' Ἀσκληπιῶ ἢ τένομα δῶκε βίβλας.
 Καίτερ' ἐπιπλάσει τ' Σερωῶ το βιβλίον αὐτῷ
 Χρῶμιλος, οἷα μίτω, εἰς ἀλύτων μυχάτῃς,
 Καὶ φυσικοῦς γὰ τραγῶν ἀφορισμῶς ἰατρικουσε
 Καὶ Ζεῦξας ἰατρῶν τοῖς φυσικοῖσι νόμοις.

Eadem latinis versibus.



Iculus argiuo naturæ mystica docto
 Herois cecinit versibus Empedocles.
 Romulidis uti mox Lucretius, utque Serenus
 Antidotis morbos quosque fugare docens:
 Ast hodie Gallis Brotonaus Iatrica pangit,
 Haud dubiè Siculo doctius Empedocle.
 Quin & eidem cedant Lucretius atque Serenus,
 Dum canit Asclepi pharmaca Phœbigenæ.

Quamquam ritè sinas, perdocte Serene latentes,
Auspitio penetret carminis ille tui,
Et phisicos referet sensus placitísque Lycæi
Conciliat canonas $\omega\rho\acute{o}\xi\epsilon\nu\omicron\varsigma$ Hippocratis.

Petri Morelli Lochibellicen.

Τὴ αὐτῆ εἰς τὸν αὐτὸν.

Χρήσιμα πολλὰ χροφῖ Ἰωποκρατίτις, καὶ πολλὰ Γαλιωσ,
Πολλὰ τ' ἐν Αἰγίνῃσι, Παῦλε, πόλεασι χροφῖ.

Α'λλὰ σκοτηνὰ χροφῶν λαοῖσι νοήματα τοῖων
Πᾶσι πέλει, κ' ἰατροῖσι ἔμβαστα ἔητὰ μόνοις.

Τοῖς λοχίοισι δ' ἑμοῖσι γαλατῶν ἐνὶ τέμπεισιν ἔσιν
Ἡ δέσιν εἰς ἰατροὺς χροφῖσιμα πολλὰ μὲν.

Καὶ Γαλατῶν φωνῆ πολλ' ὠφελιμῶτα χροφῖεν,
Τοῖς τ' ἰατροῖσι σοφοῖσι ἔμβαστα, τοῖς τελαοῖσι.

Αἴνετόσ δ' οὐδ' ἔσαι τὸ χροφῖσιμον ἠδέε μίξας

Πᾶσι Βροτωναὸς τοῖς Λυκαβασί χρόνσ.

Eadem latinis versibus.

VILIA Hippocrates scripsisti, túque Galene,
Ægineráque tu plurima Paule prius:
Talia sed cunētis populis obscura fuere

Quæ medicis solis peruia nempe forent.

At Lochijs, positę quæ sunt vbi Galica tempe

Dulcia vir sapiens miscuit vtilibus.

Vtilia ille quidem Galatôn idiomate scripsit,

Non medicis solis peruia, sed populo.

Ergo Brotonaus qui miscuit vtile dolci,

Laudibus hinc omni tempore dignus erit.



SONNET DE M. BOVCHART,
A L'AVTHEVR.



*Astir vn temple en l'ame, en dresser la structure,
En pourtraire le plant & son lineament,
C'en est vn œuure d'hōme, ains de Dieu seulement
Qui monstre ce miracle en l'ordre de Nature.*

*Quand doncq' tu nous fais voir la docte Architecture
D'un si parfait ouurage orné tant richement
De tes vers, ce n'est toy, ains vn Demon vrayment,
Qui tels secrets descouure en si rare facture.*

*Mais exprimant de l'ame au vif les passions,
Ses diuers mouuemens, toutes ses fonctions,
Quelle est sa sympathie avec le corps terrestre:*

*Quelle est sa conuenance en nombre & qualitez
Avec tout l'vniuers, & autres facultez,
Ny toy, ny Démon parle, ains l'Autheur de tout estre.*

Christus quò me vocat.



LA GENERATION DE L'HOMME
EXTRAITE DE L'ESCVLAPE
DE R. B. A. M.

Le fort de Venus.



*Enus fille du ciel esclose deffoubz l'onde
De la vieille Amphitride escumeuse & fe-
conde,
Et toy son fils sans yeux, neantmoins iuste
archer,*

Dont le coup peut des Cieux iusqu'aux Enfers toucher :

Car des Enfers aux cieux y a-il creature

Qui ne se sente au vif de ta viue poincture?

Conduysez moy tous deux, Venus & Cupidon:

Venus par ton Estoyle, Amour par ton brandon,

Affin que i entre és lieux soubz vostre belle adresse

Où vous estes cogneuz, seul Dieu, seule Deesse,

Le dy, ce que pas vn n'a dit au parauant

Et le fort de la mere, & le traict de l'enfant:

De la mere & du fils ie chante la puissance.

Dont toute chose en vie a tiré sa naissance.

C'est de ton germens sein que decoule, ô Cypris,

Cest humeur escumant tout bouillonnant d'espris,

Qu'il estuue inspirez de l'amour, affin d'estre

Le chant-moyte leuain de tout ce qui doit naistre.

S'il vous plaist vous logez les hommes dans les cieux:

LA GENERATION

Vous mettez pair à pair les hommes & les dieux:
 Ou que vous deux soyez de vostre compagnie
 La peine, le soucy, la tristesse est banie.
 L'esperance vous suit, & le contentement:
 Desirable loyer du desireux amant:
 La beauté, la verdeur, le printemps, la iunesse,
 Suiuent mignardement les pas de leur deesse:
 Le ris, le passetemps, la volupté, le ieu,
 Suiuent mignardement les traces de leur Dieu.
 O Venus toute chose agree en ta presence!
 O amour toute chose ennuye en ton absence!
 Vous semez les desirs, qui me meinent diuers
 Composent opposez l'accord de l'uniuers:
 Qui lotissent le monde, ainsi que seurs & freres,
 Contraires assignez sur partages contraires,
 Ou, par vous deputez: & qui haut, & qui bas
 De ce grand tout ensemble ils tiennent les estats:
 Ils font mouuoir les cieux & deffous eux i accoyse
 Des mutins elemens l'inacroiſſable noyse.
 Ils font ensemble l'air & la terre loger:
 Ils font ensemble l'eau, & le feu se ranger,
 Appaisant du Caos le non appaisé trouble,
 De la femme & de l'homme ils font vn homme double,
 Que reuiuant és cieux, ils rendent immortel
 En lieu qu'il ne pourroit en soy mesme estre tel.
 Versent en l'air en l'eau sur terre le breuage
 Qui enforcele tout d'une amoureuse rage,
 Forcent les corps se ioindre & s'entreseparer,
 Que tour à tour la mort en fin doit separer,
 R'engendrent les enfans que le pere deuore,

Le pere en ses enfans resuscitent encore.
 C'est c'est d'amour la force, & la necessité,
 Qui les hommes renferme au clos d'une cité?
 Qui vagants çà & là, comme animaux sauvages,
 Les soumet sous laloy des iustes mariages:
 Qui deux corps vagabonds assemble en un seul corps,
 Qui de bestes les rend hommes doux & accorts,
 Leur oysive raison d'un long sommeil reueille,
 Et les yeux leur debande, & leur perce l'oreille,
 A guise leurs esprits à rechercher, comment
 Ils feront desormais pour viure heureusement,
 C'est Venus, c'est de toy, qu'autre ny porte enuie
 Que ce qui est & vit, tient son estre & sa vie:
 O le plus grand des Dieux, petit Dieu Cupidon,
 C'est de toy seul qu'il doibt recognoistre ce don.
 La cause & l'entretien ta mere & toy vous estes
 Des champs, de l'eau, de l'air & des voustes celestes:
 Et tout ainsi qu'au monde il n'y a rien de vain,
 Au monde il n'y a rien qui de vous ne soit plein,
 Fay moy donques, Venus, fay moy, deesse, escorte:
 Fay moy donques, amour, fay moy trouuer la porte
 Du sejour de ta mere, & costoyant voz pas.
 Par vous deux adressé ie ne m'esgare pas.

Audelà les confins du Thracien Boree,
 Où toute heureuse vit la gent hyperboree,
 Entre deux monts iumeaux rondement blanchissans,
 Mais commençans ensemble, ensemble finissans,
 A l'albastre de qui la nege porte enuie
 Au dessous d'une mer blanchissamment unie,
 Ou si c'est vne pleine, vne pleine de laict.

LA GENERATION

*S'esleue mollement un petit moncelet
 Sur la cyme du quel l'estroict d'une antre s'ouure.
 Que l'ombrage venant des deux montagnes couure.
 Ce Tertre escartelé dure en toute saison
 Mignonnement touffu d'un verdoyant gazon
 Fleury de cent couleurs, espes d'herbe menüë,
 Renaisante plus dru, plus elle est retonduë
 De pasquerette blanche, & de iaune soucy,
 De cornue ancholie, & de pensée aussi,
 De muguet a la fleur ensemble iaune & pale
 Et de tant d'autres fleurs que Nature y estale.
 Le ver Assirien n'a le brin si subtil,
 Que l'herbe foisonnante en ce tertre fertile.
 La chaleur de l'esté iamais ne l'a fanie:
 La froideur de l'hyuer iamais ne l'a ternie:
 L'autun n'y a soufflé, ny le ciel courroucé
 Effroyable ny a iamais son feu lancé.
 Philomene tousiours son Itis y sospire:
 Et tousiours s'y esgaye un gracieux zephire:
 Des douceurs, Iupiter ravi d'un lieu si beau.
 Ore en semblance d'homme, ore en guise d'oyseau,
 Souuent en masque y vient, & beste ayme mieux estre.
 Que Dieu pour visiter ce Paradis terrestre.
 Et ce lieu luy plaist tant qu'il se transforme encor,
 Pour venir l'arroser, en belles gouttes d'or
 I'ay veu, i'ay veu souuent sa main leuée & preste,
 A elancer son traict, guignant l'inique teste:
 Il n'eut si tost son œil vers ce Tempé tourné,
 Qu'il defronce son front, son bras n'a plus tonné.
 Et à fin que tousiours à l'arroser on pene,*

Il l'a commis en garde au dieu de Lampfacene,
 Qui roide & fort s'employe à le bien cultiuer
 Le iour comme la nuict, l'esté comme l'uyer.
 De façon que iamais sans façon il ne reste,
 De façon qu'il reçoit vne façon celeste,
 En sorte qu'il n'y a ny Deesse ny Dieu
 Qui frians, allechez, des plaisirs de ce lieu,
 Ne quittent l'ambrosie, & le diuin breuuage,
 Pour y faire le moys quelque pelerinage.
 Diane mesme y vient, & non pas si souuent,
 A cause des Siluains, qui la vont poursuivant
 Et des dieux corne piedz hantans ceste contree,
 Elle honteuse a peur d'en estre rencontrée,
 Mais, ô Dieu qu'est-ce cy! ah qu'est-ce que ie sens?
 Qui rauisseur m'enleue & desrobbe à mes sens?
 Qui embrase mon ame, & quelle vertu forte,
 Mais quelle douce erreur! hors de moy me transporte?
 Quelle est ceste fureur qui trouble mon repos?
 Qui est ce feu qui vient me cendroyer les os?
 Qui succe ma moielle, & mes venes deseché?
 Qui dedans le gosier mes parolles empesche?
 Quelle poison me charme, & quel nouueau desir,
 Me vient estrangement les entrailles saisir?
 Tout beau, qui que tu sois, si rude ne me mene
 Ie te suy de bon gré, i'ayme bien ceste pene.
 Ah! ie me pasmé d'aize, & mon ame qui sort
 N'a plus n'a plus regret à son corps demy mort.
 C'est c'est ie ne scay quoy, c'est vne ioye extreme
 Qui m'affolle & chatouille & rauist en moy mesme.
 Si n'aperçoy-ie rien, fantome que veux-tu?

LA GENERATION

*Ah! ie sens bien que c'est, une estrange vertu,
 Un enforcelement qui part de ceste roche,
 Attirant doux celuy qui doucement s'aprophe
 De ce mont Iumelet: ainsi qui nage en l'eau
 De la font Salmacide eprouue son cerueau.
 Hautain s'alliener, & tandis qu'il se pasme
 Et son hidre & sa voix changer en homme-femme.
 Aussi quiconque touche ou voit ce petit mont,
 Gros, touffu, rebondy, long, estroictement rond,
 D'inuisibles liens, sans voir, se sent estreindre
 Et de donner dedans sans contrainte contraindre.
 Tout ainsi que le fer de l'amiable effort
 De l'Emant est tiré, comme l'Emant du Nord:
 Et l'ambre reluyfant qui de la paille approche,
 De la paille amoureux à la paille s'accroche.*

*Celuy que le destin fauorable elira,
 Pour entrer le premier sagement il ira
 Que, ny lasche ny prompt, doucement il s'auance
 De degré en degré, à la perceuerance
 On cognoistra celuy qui merite obtenir
 Le bien où l'on ne doibt aysément paruenir.
 Qui monte vn coup dessus la montagne fenduë
 Sans peine il faucera la porte deffenduë.
 Si degré tu ne peux entrer, il faut vser
 Alors de violence, & les portes briser,
 Au rebours des enfers qui s'ouurent à toute heure
 Pour y descendre, mais il faut qu'on y demeure,
 Iamais on ne reuiet depuis que l'on est mort:
 D'icy plus aysément, que l'on n'entre on ressort.
 Vous y trouuez d'abord la Nympe Clytoride.*

S'offrant d'un gracieux accueil, pour estre guide
 Aux nouveaux pelerins, qui deuots sont venuz
 Humblement presenter leur seruice à Venus.
 Vierge, que bien souuent dans les épais boccages
 Importunent d'amour les Satires sauvages.
 Et qui, pour s'exempter de l'impudique fort
 De ces importuns faict sa retraicte en ce fort.
 Mais quoy, si le mal-heur contre nous se despite
 On a beau le fuir, iamais on ne l'euite:
 Où plus seure la Nymphé esperoit se loger
 C'est où elle retombe en un plus grand danger:
 Pource qu'un torrent d'eau au pres d'elle s'amasse
 Qui dessus elle ainsi qu'un flot de mer repasse:
 Et desgorge d'amont aueque force bruit
 D'un cours impetueux par la bonde s'enfuit.
 Qui passe outre audeffoubs de ceste Ecluse ondeuse.
 Vers le commencement de ceste voute creuse
 Trouue l'Hymen nocier de myrte couronné,
 Et de force amoureux dançans enuironné
 Tous chantants son triumphe, Echo tous les escoute,
 Et doublant Hymené faict retentir la vouste.
 Icy regne ce Dieu, pere du genre humain,
 Qui tenant vne torche ardente d'une main,
 De l'autre sur l'entrée estend un luyfant voyle,
 Ouurage deslié tracé dessus la toyle,
 Où son patron Minerue Artiste auoit compris
 Quand elle eut sur Aracné sur la gaze le pris.
 Qui de force ce pas aura faict entreprise,
 Il faut qu'il ait bon cœur, il faut, il faut qu'il brise,
 Le Ré dioneen, & roide pour suiuant.

LA GENERATION

De tester & de pied entre, & gaigne le deuant.
 A bon droit de celuy qui recule on se moque,
 Qui veut manger la noix, il faut rompre la coque,
 Qui veut cueillir la fleur du rosier le plus franc,
 Face estat que l'espine il teindra de son sang,
 Quand ce ré est brizé bien aisément on entre,
 Sans nouvelle rencontre, au profond de cest antre
 Basty à la rustique, aspre inegalement,
 Ainsi que l'ébaucha rude, sans ornement
 Le rude naturel d'une façon tirée
 Au patron, sur le corps de l'esponge alterée,
 Ou bien du Tuffe blanc, que la lune d'un feu,
 Malade en sa couleur, a miné peu à peu.
 Deux mesmes fois autant en sa longueur d'espace
 Y a, que sa rondeur vne fois en compasse.
 Tel est de ce Canal l'ouurage, qui au fond
 Se restrecist, & qui se va finir en rond.
 Comme le fruiçt sacré de l'arbre de Dodone?
 Qui aux humains responce en leurs affaires donne.
 De cest antre la fin est le commencement,
 Pour entrer de ce pas en l'autre bastiment
 Basty d'un mesme ouurier, mais different d'ouurage
 Comme de ces deux corps, est different l'usage
 Qui a faict cestuy-cy au patron de sa main
 Dont, ayant les doigts ioincts, il tira le dessein
 L'arrondissant au tour, où par le dessus s'ante
 Les cornes vers le ciel, vne lune croissante.
 Encor n'est-il à bout quiconques a faussé
 Les gardes des deux Ponts du Cyprien fossé,
 Il faut marcher plus outre, & Erenfler son courage,

Pour de l'arriere fort enfoncer le passage:
 Dur, aspre, inaccessible, & qui n'est pas gaigné
 Qu'apres maint' dure alarme, apres maint coup donné.
 C'est doncques là dedans, où il faut que tu donnes
 Ains que victorieux la retraicte tu sonnes.
 L'entrée en est estroite, & si iuste se ioinct,
 Qu'on ozeroit iurer qu'il n'y en auroit point.
 Il y en a pourtant, elle s'ouure assez grande
 A qui large y reprend l'humour qu'elle demande
 Par le fond du Canal approchant de l'endroit
 Qui se va finissant en vn petit destroit
 On entre en ceste chambre, & comme l'on arrose,
 Les gonds de quelque porte auant bien long temps close
 D'un huile coulant doux, celui de mesme oindra
 Les gonds de cest huisset, qui entrer y voudra.
 Il faut doncques y verser d'abord telle rosee:
 Car ceste chambre veut souuent estre arrosée.
 Du caue interieur tout l'espace compris
 Entre le bas estage & le vousté lambris,
 Va s'ouurant peu à peu de sorte que le feste
 Est plus large beaucoup, que n'est pas tout le reste:
 Les murs en sont de iaspe, & mouchetez de blanc
 De venes parsemez, mais plus rouge que sang
 Pour fillé merueilleux de mille fils, & mille
 Dont trauersent les uns ceste trame subtile
 Et les autres vont droit, & les plus desliés
 Aux droicts & trauersiers obliques sont liés.
 Ce plancher est pigné de points dorez sans nombre,
 Perçant l'obscurité de cest estage sombre.
 Comme la nuit on voit tant de flambeaux aux cieux

LA GENERATION

Percer le bandeau noir qui umbrage noz yeux.
 L'admirable artizan de son art la merueille
 Admirable tirant vne trace vermeille
 Trace du haut en bas, droicte par le milieu
 Interieurement a my party ce lieu,
 Egallant ces deux corps d'hostel, par ceste ligne
 Que l'une à droicte & l'autre à gauche il en assigne
 Exterieurement, où se voit paroissant
 Le cerne my courbé de l'argent croissant.
 Deux boules on peut voir admirablement ioinctes
 Haut, d'un costé & d'autre aux deux lumieres poinctes:
 Ouvrage merueilleux: ces globes eleuez
 Solides par dehors, & par dedans cauez
 S'emplissent lentement d'humidité fertile
 Qui par moyens secrets en leur ventre distille,
 Et qui apres auoir un temps determiné,
 Dans ces deux petits ronds tiedement seiourné,
 Va perdant sa couleur sanglancement vermeille,
 Prêt la blâche, aux vaisseaux qui l'engendrent, pareille.
 De liquide se faiçt humeur glayreux & lent
 Petillant, fretillant, plein desprit chatouillant,
 Enrageant de sortir, d'une façon secrette
 Luy aux champs, de nature impatient, se iette
 Comme Iris se descharge, à l'heure que son sein
 D'humeur puisé la terre elle ressent trop plein
 Par des tuyaux expres, qui mille fois embrassent
 Ces ballons pleins de germe, autant de fois retracent
 D'un trac desia tracé mille & mille retours.
 Retissant à l'entour autant de las d'amours
 Que donne de baisers au cheſne le lierre

Quand amoureuxment de cent bras il le serre:
 Ce conduit tourne ainsi tant qu'à la fin rempant
 A la mode qu'on voit se frizer le serpent,
 Pour regaigner son fort, à l'une & l'autre corne
 De la chambre dorée, en biais il se borne
 Y versant une escume aussi blanche que lait.
 Dont tout le genre humain fut fait, & se refait.
 Mais tout beau c'est assez il faut faire icy pose,
 Le prescheur est fascheux qui ne dict qu'une chose,
 Et le chantre qui n'a qu'une sorte de son.
 Merite seulement le pris d'une chanson.
 Disons l'effort de Mars au fort de la deesse
 Quittons les partimens de ceste forteresse
 Reservables à dire au long, un autre iour
 Pour dire cependant l'Arc & les traicts d'amour.

SONNET.

MOn du Perron qui fais l'amour aux doctes sœurs,
 Voire plus volontiers que Venus. Cytheree?
 Combien qu'aucunefois ton ame enamouree
 Ou homme tu n'es pas, gouste de ses douceurs,
 Pour cent mille plaisirs pour autant de faueurs
 Dont ma Muse a esté par la tienne honorée.
 Comme pourra la tienne estre rememoree
 Par la mienne qui n'a merité tant d'honneurs.
 Je n'ay que te donner, s'il ne te plaist de prendre
 Cest Arc que tu pourras encontre celle tendre
 Qui à ton vueil rebelle obeir ne voudra.
 S'il aduient qu'au combat elle soit la plus forte

LA GENERATION

Dufort que ie deseigne hardy gaigne la porte
Soys seur, qu'à toy se rendre humble & douce viendra.

L'ARC D'AMOUR.



Ars, que diuers tu es, qui ne veux, ny peux
viure

Un seul iour en repos, de ton mestier deli-
ure,

Tant tu as le repos, & la paix en horreur,

Tant grand amy tu es de Bellone ta sœur,
Plustost Mars, tu serois à toy mesme contraire
Si contre vn estranger guerre tu ne peux faire:
Plustost contre l'amour tu t'arme audacieux,
Contre amour le tiran des hommes & des Dieux
Et sa mere Ericine, ô la belle vaillance
Se prendre à vne femme, attaquer vne enfance!
De faict, ce Dieu mutin ennemy de la paix,
Pour ce faict enrroller entre ses plus beaux faicts,
Un iour, qu'elle n'y pensoit, oza bien entreprendre.
Assaillir de Venus le fort, & le surprendre:
Encor qu'il sceust tres-bien que peu la force y vait
Ny composition, alarme, ny assault
Voire du Turc l'armee y fust toute assemblée:
De la penser auoir par surprise ou emblee
Seroit trop presumer, puisqu'ordonné il est,
Du destin eternal par immuable arrest
Que nul la forteresse à Cyprine vouee
Ne peut forcer, s'il n'a l'arc & fleche fée
De son fils l'archerot, comme il falloit auoir

La verge d'or, affin d'entrer au seiour noir
 De la basse Iunon. Adonc ce Dieu superbe
 Espie un iour Cypris estenduë sur l'herbe,
 Vn sommeil gracieux de son sein haletant;
 Maint souspir amoureux de l'estomac flottant,
 Par le corail vermeil de sa bouche diuine
 Agitoit les deux monts de sa blanche poitrine:
 Les Zephires mollets frisottoient ses cheueux:
 Et moitement versoient le sommeil dans ses yeux:
 Faisoient bouffer encor' par leur halene douce.
 Son cresse floflottant, que maint sanglot repousse
 Faisant voir au trauers durant ce doux sommeil
 Tout ce qui plus agree à un amoureux ceil.
 Amour nud & grasset, enfant portant des ailes
 Tout teint de la couleur des flammesches vermeilles
 Dormoit dans le gyron de sa mere estendu.
 Son arc est prest de luy à un arbre pendu
 Et son carquoys garny, Mars tant seulement veille
 Pour les armes embler d'amour qui trop sommeille.
 Qui marchant à grand pas, isnellement, sans bruit
 Pille l'arc, puys soudain comme un larron s'enfuit.
 Le voyci de retour, monstrant l'arc prest à tendre.
 Et la mere d'amour il somme de le rendre,
 Comme les autres arcs cest arc n'est pas luné,
 Ny de l'os Indien par les bouts encorné
 Comme les autres traicts n'est faite sa sagette:
 Sa corde n'est aussi comme les autres faite:
 Il ne tire de loing, ainsi que l'arc turquoys
 Ou l'arc d'une Amazone, errante par les bois:
 Ou bien comme celuy qu'és monts Diane porte.

LA GENERATION

Il se courbe, il se bande, il tire en ceste sorte.

D'un rameau trauesant vn arbrier plein de næuz
 Un cordage descend, d'un de ces troncs vereux
 Une autre corde encor l'accompagne gauchere:
 De ces arbres encor, mais de la part contraire,
 Autres deux sont naissans, qui d'un oblique pas
 Se viennent recouurer egalement en bas,
 En bas se rencontrant l'une en l'autre se lasse
 D'innombrables chesons l'une dans l'autre passe
 S'entragrassant font mile & mile tortillons,
 Mile anneaux, mile næuz, mile ronds demi-ronds,
 Sur les deux caneuats, de sur la double gaze,
 Qui deux spheriques corps enuelope & enlasse,
 Cordant un ceinturon semblable au demy-ceinct
 Qu'à l'entour de ses reins la Cytheride a ceinct:
 Ou au collier doré, que richement se tordre
 On voit autour du col des cheualiers de l'ordre.

De ces quatre cordons, chasque couple pareil
 D'en haut iusques en bas, est gros d'honneur vermeil,
 Blanchissant peu à peu à mesure qu'il coule
 Et descend pour s'espandre en la iumelle boule,
 Ou lentement glissant par des canaux petits
 S'acheue de blanchir dans ces tournans tortils.
 C'est icy l'arsenal le lieu où se reserre,
 Ceste munition pour la future guerre,
 Où les preparatifs pour combatre se font.

En chasque costé, pend à chasque las un rond
 Qui chassant plein d'esprits toutes matieres froides.
 Ainsi qu'un contrepoix, bandé fermes & roïdres.
 Deux petits nerfs tendus, qui se reflechissans;

Vont, pour se retrouver en bas, où finissans
 Tendent deux arcelets dont les bouts se reprennent,
 Que deux robustes yeux fermes ensemble estreignent.
 Ces petits nerfs voustez n'en font plus icy qu'un,
 Icy se reuestant font l'agueduc commun,
 Où le traict ferme & rond gros & roidde se dresse,
 Pour donner droict au but où son archer l'adresse.
 Aussi tost que ce traict est roidde decoché.
 Esclatté du canon où il estoit caché,
 L'arc lasche se debande, & de rechef se bande,
 Si l'apprehension de l'archer le commande
 Le rouet, les ressorts, sont des esprits ardans,
 Vifs, legers, remuans, qui fretillent dedans.
 Le qualibre n'est gros, de pres il touche & frappe,
 Ainsi que le bidet qu'on porte sous la cappe.
 Ne pense pas qu'amour se soit accoustumé
 De tirer d'un long traict, comme luy emplumé,
 Ou d'un meurtrier plombet, qui avec bruit & flame
 D'un acier bien trempé un corselet entame.
 Cestuy-cy n'est de mesme, as-tu quelquefois veu,
 Tempester l'Ocean contre soy-mesme esmeu,
 Comme vague apres vague, un gros mons d'eaux approche
 La greue sablonneuse heurtant contre vne roche,
 S'espandre, & creuasser, apres soy delaisant
 Sur la rade un long trac d'escume blanchissant.
 A ceste chose icy semblable est la matiere
 De ceste humidité, qui bouillonnant legere
 Impetueusement & sans son coup faillir
 Part de l'arc, duquel Mars vient le fort assaillir
 De Cypris, qu'il surpront endormie & seulette,

LA GENERATION

Foulant le bel esmail de l'herbe verdelette.

Or amour qui s'estoit le premier eueillé
 N'a si tost apperceu qu'on a son arc volé:
 Plus viste que le vent qu'il vole apres plein d'ire,
 Mais ne l'a ce pendant à sa mere oze dire.
 Mais des armes d'amour se presentant armé,
 A la mere d'amour de se rendre sommé.
 Gracieux, il la prie, humain la flatte & presse,
 De remettre en sa main elle & sa forteresse,
 Que doux il luy sera, si douce entre ses bras,
 Elle se vient ietter, quelle n'attende pas
 Que par force & rigueur rebelle il la surmonte.
 Elle de ses propos ne faict ny ne tient conte,
 Ains contre luy proteste entier garder l'honneur
 Du fort, où de son sexe est enclos le bon heur,
 Et de mourir plustost, si mourir peut Deesse,
 Que viure, & de ce fort ne viure plus maistresse.
 S'asseurant que dez lors qu'il luy sera rendu
 Que son honneur plus cher que sa vie est perdu.
 Mars s'en rit, & ne fait responce à ses reproches.
 Foiblette se defend, fier il faict ses approches,
 Il campe, il se retranche, & d'un bras couroucé
 Les defences renuerse, il gangne le fossé.
 Coup sur coup, choc sur choc, & pres apres sa flescche
 Delasche, le mur bransle, il tombe, il y a bresche.
 Ils sont, ils sont aux mains, Mars l'assaut redoublant
 Saute sur le rampart deffoubs ses pieds tremblant
 Si dru, tire & menu, que par mainte secouffe
 Son Arc las deuient lasche, & se vuide sa trouffe,
 Victorieux il entre haultain & triomphant

Et prend à sa mercy & la mere & l'enfant.

SONET.

Depalme qui la palme as docte merité
 Entre les bons esprits ô l'Ame de mon Ame
 Penses-tu qu'il y ait entre l'homme & la femme,
 A dire, & que Nature ait à l'un plus esté
 Qu'à l'autre fauorable! & qu'à l'un ait osté
 Pour le donner à l'autre ainsi que l'on la blame,
 Et qu'en auançant l'un, l'autre blesse & entame,
 Ainsi qu'une maratre vsant de cruauté.
 Non, ce n'est pas cela, mais dans soy l'une couure
 Et cache ce que l'autre hors de son corps decouure,
 La femme est le dedans, & l'homme est le dehors,
 Comme qui sans argent sa bourse vuide tourne,
 Ou qui cent fois sa robbe en ces troubles retourne,
 Refait ce qu'il defait, ce n'est tousiours qu'un corps.



DE LA GENERATION DE L'HOMME.



VS QUES icy lizeur sous la plaisante
 feinte
 D'un fort, & d'un Archer i ay la forme
 depeincte
 Des membres naturels, qui fertilement
 pleins
 Repeuplent l'un & l'autre Hemisphere d'humains

LA GENERATION

C'est affin que la femme, encore qu'elle sache
 Que c'est, en me lisant, modeste ne se fasche,
 Et que la fille aussi, qui ja s'en doute bien,
 Feigne honteusement de n'y entendre rien.
 Or sans dissimuler à chanter ie m'appreste
 Ce qui ne fera point rougir la femme honneste,
 Ny le teint virginal, la generation
 De l'homme, & les moyens de sa conception:
 Vn secret, qui contraint, tant il est admirable,
 Ceux qui en Dieu creance ont cōme en vne fable
 Confesser grumelant que nul autre a esté
 De ce bel œuure autheur, que la diuinité.
 Tient moy donques la main, à moy pauure, qui aulse
 Chanter tes sacremens, ô la premiere cause
 Et puis qu'en ta faueur i'ay cest œuure entrepris,
 Fay qu'en la bonne part mon bon vouloir soit pris.

Pour, suiuant le decret des hautes destinees
 Creer autant de corps, que d'ames ordonnees
 D'eternité y a, pour iceux animer
 Deux sexes furent faiçts, qui enclins à aymer
 Du ciel y sont forcez, non pas pour satisfaire
 A leurs appetits, mais pour fournir & parfaire
 Nombre d'hommes certain: Quand doncq' proche est le iour
 Et le moment que naître vn homme doit son tour,
 A l'un & l'autre sexe il prent certaine enuie
 Se coupplant se refaire & se remettre en vie
 Quand il est question creer vn corps nouveau.
 Verser l'ame immortelle en vn mortel vaisseau
 Faiçt de chair & de nerfs, d'os, de vene & d'artere:
 Quand il est question ce grand chef d'œuure faire

A son facteur semblable, où les compartimens
 Des hauts cieus sont compris, & des bas elemens:
 Ou en petit volume est pourtraite du monde
 Sans qu'il y manque rien, l'uniuerselle ronde.
 Quand entreprendre il faut cest œuure nompareil,
 Iupiter tous les dieux appelle à son conseil,
 Les puissances du ciel à ce diuin colloque
 Pour prendre leur aduis, toutes ensemble euoque.
 Il est donc arresté d'une commune voix
 Qu'il faut qu'un homme naisse, & que tous à la fois,
 Ils en auront le soing, & chacun d'eux encore,
 Puis qu'en terre il est seul qui, deuot, les adore.
 De chasque ciel errant que l'esprit eternel
 Tant qu'en clos il sera au ventre maternel,
 Chacun son moys entier assiste, favorable
 A l'esprit createur de ce corps admirable.
 Comme encor' il doit faire apres qu'il sera né
 Tant que vieil il arriue au lieu predestiné,
 Quand la fiere Atropos viendra trancher la trame
 De ses iours tous contez, pour au ciel rendre l'ame.
 Quand doncq' chacun eut dit ce que dire a voulu,
 De l'assemblee diuine en fin est resolu
 Qu'amour encarquelé s'en ira viste en terre,
 Aussi tost faict que dit, il y vole grand erre:
 Le voycy, il y est, il y cherche deux corps
 Pareils de meurs, d'humeurs, & de mesmes accords,
 De volonté pareille & d'une mesme espece,
 C'est assez seulement s'ils sont diuers de sexe.
 Si de tels il rencontre ensemble, il les reioint,
 Des deux il n'en faict qu'un, & les adiuste au point

LA GENERATION

Qu'estoit au premier temps le premier Androgynne,
Cest amoureux accord, par la chaste Lucine
Ferme est ratifié, qui les reli si fort

Que rien ne les pourra separer que la mort.

Mais quoy, tairay-ie les mignotises molles
Les begayants baisers, les flatteuses paroles,
L'amoureuse accolade, & les atouchements
De ceste r'union les muets truchements.

Ie n'en parle donc plus, mais ne faut que me taize

Qu'estant en ceste Ectase au milieu de ceste aize,

De bon heur, de plaisir, & de ioye comblez,

Des foyes, des cerueaux, & des cœurs assemblez

De ces deux corps en vn, en vn instant distile

La creme du pur sang, vn demeurant vtile

Que chasque membre à part laisse dernièrement

Ne le pouuant tourner en son nourrissement.

Comprendre ie ne puis, comme il se puisse faire

Que ce germon errant par la veine & l'artere,

Par le solide nerf, passe tout au trauers

Des os, de toutes parts de l'humain vniuers,

Tant que par les canaux, que la nature perce,

Expressement, affin que chasque moytié verse

L'une dans l'autre, & l'autre en soymesme cela,

Que le disert Gregoys iadis sperme appella,

Dans l'amarry se rendre, & s'y face vn melange

Qui ores en femelle, ore en masse se change,

Mais est-ce point l'esprit des venes, & des nerfs

Des arteres, mouuant ce petit vniuers,

En qui diuinement des membres est gardee,

Pour l'espece engarder vne eternelle idee.

Qui en ceste secouſſe amoureuse agitè
 Par ces tuyaux eſtroits chaut humide eſt iettè
 Au fond de la matrice, avec la geniture
 Durant que la meſlée amoureuſement dure!
 Ou ſans trop curieux chercher la lance au loing
 Engendré eſt deſia l'homme dans le teſmoing
 Du germe, dont il a toutes les vouſtes pleines
 Par ſa propriété tirant des groſſes venes
 Du ſang, que ceſtes cy des moindres ont tiré
 L'epes & le plus gros, & le mieux epuré
 Tout plein d'eſprits fumeux, les moindres d'une ſuite
 Des autres reſuccant inſqu'à la plus petite
 Succent de tout le corps: ainſi par les petits
 Les teſmoings ſont ſaoulants leur propres appetits
 Tant que gros & remplis de l'eſcume animée,
 Ne demandent ſinon qu'une partie aymee
 Qui deſcharger les vueille, on ſe ſent lors ſaiſir
 Par le germe agitè d'un mutuel plaiſir
 Qui tant plus ſoudain ſort, par plus eſtroicte voye
 Plus extreme ſe ſent des accouplez la ioye,
 La ſemence de l'homme eſt comme un maiſtre expert,
 Qui comme d'un outil de ſoy-meſme ſe ſert,
 Il donne la façon, le traiçt, la forme & l'ame,
 La matiere & le corps eſt celle de la femme
 Des germes melangez qui chaut & ſec ſera
 Comme le plus puiſſant un maſle engendrera.
 Il auient autrement, ſi la ſemence eſt froide
 Pouſſer ell ne peut hors, n'eſtant pas aſſez roide,
 Les membres vergongneux, l'imagination
 Qui plus forte ſera en la conception.

LA GENERATION.

Qui au champ naturel iette plus de semence,
 Imprime au fruit futur sa naïue semblance,
 Comme en un champ fertile, qui selon sa saison
 Du laboureur reçoit l'opportune façon.
 A lors que ceste graine est chaudement semee
 Dans un corps bien aymé d'une personne aymee,
 Nature son giron gloutte & friande estend
 Pour là y receuoir la semence, s'epend,
 Tant grande de sortir ell' a d'un corps enuie,
 Comme si ia auoit entendement & vie,
 Pour dans un autre entrer, qui de pareil desir
 La vient loing au deuant auident saisir:
 Comme tire le cerf par sa puissante halene
 De son trou le serpent, qui porte la dent plene
 Du venin dont il s'arme, esperant se vanger
 De cil, qui le contraint de son fort desloger:
 Ainsi par l'amarry, qui iamais assouuie
 N'est qu'en ce passetemps la semence est rauie,
 Qui superbe d'auoir le gage desiré,
 A son embouchement tout soudain reserré
 Soubs si seurs cadenas, soubs vne clef si forte
 Qu'il ne faut auoir peur que de neuf mois en sorte.
 Comme un singe en roué, qui ses petits estreinct
 Ceste conception serre, amasse & contrainct
 Et si bien la retient, l'environne & l'embrasse,
 Qu'il ne reste rien vague en l'interieur espace.
 Ceste matiere molle & trop liquide encor
 Doit plus ferme arrester le Dieu du siecle d'or
 Qui par son froid regard, & par sa secheresse
 La fixe peu à peu, & caille plus épesse

Elle s'eschauffe ia par la vertu du feu,
 Qui muable & actif se retire au milieu
 De ceste paste informe, or long temps ne peut estre
 Le chaut, sans quelque humeur, matiere pour le paistre,
 Le chaut qui simplement n'est qu'une qualité
 Ne subsiste s'il n'est sur quelque corps porté.
 De ceste chaleur doncq' & de la masse tendre
 L'esprit qui doit mouler ceste masse s'engendre,
 Qui desia la sousleue ainsi qu'enfler on voit
 La graine que la terre en son ventre conçoit,
 Comme dans le tinel la vandange escachee,
 Petille, escume & boust par la chaleur cachee:
 Qui parauant estoit ainsi escume & boust
 Le germe en la matrice aussi fort que le moust
 Comme l'enfant qui souffle en l'onde sauonnee
 Faint maint' bulle eleuer l'une apres l'autre nee.
 Cest esprit qui se brouille egaleement meslé
 Presqu'en faict tout autant en ce corps ampoullé.
 Ayant doncq' engroissé bourbour soufflant ce germe,
 Son siege y establit, au beau milieu s'enferme,
 Naturel instrument, ouurier ingenieur,
 Et du beau chariot de l'ame gouverneur,
 D'elle le lieutenant, tant qu'entiere & bien saine
 Maintenir se pourra ceste machine humaine,
 Mais en besongne il va si lent, & par degrés
 Si petits, qu'à grand peine on y voit ses progrès
 Qui buffe un petit feu trop fort l'esteint & gaste,
 Qui veut bien s'auancer ne faut pas qu'il se haste
 Ne pense ce qu'on voit blanc, humide, escumant,
 Que ce soit, ce qu'on voit, c'est l'homme entierement:

LA GENERATION

Comme en vn petit grain, en la greffe qu'on ante,
 Toute entiere y est l'herbe, entiere y est la plante:
 Desia confusément ventre, pieds, teste & mains,
 Et du corps le surplus peut estre au sperme humain,
 Et de fait y sera, alors que les puissances
 L'esprit suscitera, faisant hors des semences
 Les membres comparoir, comme le fruit qui vient
 Du poyrier, dedans soy toute l'arbre contient,
 Et de chasque partie, & le traict, & la forme:
 Ainsi le double outil, qui la semence forme
 Est de l'homme le fruit, dont vn autre viendra
 Tout pareil & semblable à qui l'engendrera,
 Et de mesme nature, & lequel plus ressemble
 A l'un des deux parents, qui plus, conioincts ensemble
 De sa part y a mis: L'esprit prent doncq' l'impur,
 Pour vn voile en ourdir, qui subtil blanc & dur,
 A la tayë est egal qu'on voit tenure s'estendre
 Subtilement au tour d'un œuf mollet & tendre,
 Ou ressemblant la peau qui sur le laiçt durcist
 Ou le ré delié que l'Idmonide tist:
 Comme dans vne escorce en l'agnelette ronde
 Cest esprit s'enveloppe, & sa masse feconde
 De peur qu'elle inconstante ainsi qu'eau n'escoulast
 Et luy plus inconstant vn vent ne s'enuolast.
 Uray est que la membrane en laquelle est couuerte
 Ceste humaine semonce est quelque peu ouuerte,
 A fin que cest esprit pour son feu temperer
 Peust sans cesse de l'air la fraischeur respirer.
 A pres que cest ouurier, d'une tissure ferme
 Son pavillon eut faiçt, où venteux il s'enferme

Soufflant

Soufflant fist eleuer l'ampoule pour le cœur
 Droit au milieu du corps, en l'endroiçt le plus seur
 Et le plus honorable, où il est ainsi comme
 Un Roy, pour commander à l'Empire de l'homme.
 Se tournant vers la droite à force de souffler,
 Il y faict pour le foye vne autre bulle enfler,
 Pour la troisiésme fois resoufflant enfle celle
 Qui doit seruir plus clere à bastir la ceruelle:
 C'est esprit artizan d'un propre mouuement
 En six iours auança ce beau commencement.

Il faut que çà & là en la terre parente
 La grene que l'on seme, & que l'arbre qu'on plante
 Iette profondement racines, autrement
 Secheroit languissant à faute d'aliment.
 Ainsi nostre Embrion, que la grece me preste
 Ce mot pour ceste fois, quatre racines iette.
 Du mitan de son corps, si d'enhaut iusqu'en bas.
 Tu le veux mesurer, à un iuste compas:
 Pour l'esprit, double artere, & pour le sang, deux venes,
 Qui sont vermeillement d'esprit & de sang plenes:
 Ces quatre conduicts ioinçts, & le vase vrinal,
 Les racines du corps, composent le canal
 Du nombril, par lequel la benine nature
 A son fruiçt auancé donne la nourriture.
 Desia par le trauers du voile transparent,
 Comme par un cristal l'enfant est apparent,
 Dans sa sueur nageant, ce qui faict que la mere
 Porte neuf mois entiers sa charge plus legere:
 Car des plus merueilleux, estre si fort contraint,
 Estre plongé dans l'eau, & ne se noyer point.

LA GENERATION

Puisqu'en ces premiers iours il n'a plaisir ny pene
 Sans sentir, sans mouuoir, sans poulx, & sans halene,
 Sans boire & sans manger sinon par le nombril,
 Que faict-il là dedans, & comment y vit-il?
 Vit-il ny plus ny moins que l'herbe, & que la plante,
 Qui est par sa racine en la terre viuante:
 Mais viure y pourroit-il comme vn glyron dormant
 Sans sentir sans mouuoir, or qu'il ait sentiment.

Puisqu'au nombril ie suis, Muse, par ton escorte
 Maintenant paruenu, comme vn prouerbe porte,
 Nombril que le bon temps de Saturne ancien
 Croyoit auoir esté l'androgine lien,
 Accouplant deux à deux au temps du meilleur âge
 Le genre humain heureux, s'il eust esté bien sage,
 S'il ne se fust bandé contre le ciel puissant
 Qui le fendit en deux son orgueil punissant,
 Laisant en deux moytiez la cicatrice en signe
 De la punition dont il estoit bien digne.
 Paracheuons le donc, tandis qu'à l'enfançon
 Nature est empeschée à luy donner façon,
 Et la grace me fay que tost fin puisse prendre
 L'œuure que trop hardy tu me fis entreprendre.

A donc ce long Canal hors du ventre sortant,
 Tire vers l'estomac à la gauche montant
 Iusque dessus l'espaule, & de là continué
 Par derriere le col à l'autre espaule nué,
 Ce tortueux conduit, bouche & main de l'enfant,
 S'elargissant en rond ses quatre vaisseaux fend
 En huit, ces huit en seze, & tant de fois se fendent
 Qu'infinis vers le dos à l'amary se rendent

Sans point s'entreuescher, or qu'epez & menuz
 Ils frayent long chemin, à la fin paruenuz
 Aux creux cotylidons, aux boytelettes rondes,
 Dont pignez sont les corps des matrices fecondes
 S'attachent y sappants leur musequins petits,
 Et y saoullent neuf moys leur gloutons appetits.
 L'artere y suit l'artere & la vene en son ordre
 Y va sans s'egarer, sa coupelette mordre,
 Du foye rougissant les vns tirent l'humour
 Ainsi que la sang sue, & les autres du cœur:
 Ainsi que la ventouze, vne subtile essence
 Des membres maternels la plus pure substance
 Dedans la mere on trouue autant de gobelets.
 Que l'on conte au nombril de double cauelets;
 Par l'artere & la vene, & du cœur & du foye
 Vient sa prouision, mais par diuerse voye.

La vene qui estoit iumelle par dehors,
 Sera desormais simple entrant au fonds du corps
 De l'enfant, & passant par sous le foye porte,
 La viande vermeille à la grand vene porte.
 L'artere se fourchant vers l'un & l'autre flanc
 La grand artere emplist de l'arterien sang:

A fin que ces vaisseaux, qui sans nombre s'attachent
 Au dos de lamary, ne se rompent ou laschent
 Pleins d'esprit, pleins de sang, primes & deliez,
 Celuy qui les a faits les a aussi liez
 En les entretissant sur vne piece ronde,
 D'un sang brun & caillé, qu'on appelle seconde,
 Et pour estre plus fort ils furent renforcez
 Sur ceste grosse chair de neuz entrelassez.

LA GENERATION

*La nombrillere masse accomplie & parfaicte
 Fut par trois fois trois iours, par l'esprit Architecte,
 Au dixiesme il couurit le germe my-formé,
 Et ceste clere tante où il s'est enfermé
 D'une autre toile encor mole, luy sante, & forte,
 Telle que le Flament de la Holande aporte,
 Tissuë artistement, d'ouurier Assirien,
 Et precieusement teinte au fard Tyrien,
 Chorion appellée, en ceste secondine
 Sur le cler Amnion l'enfant faict son urine
 Le temps que prisonnier de la matrice il est
 Par l'Aqueduc passant, par le nombril, qui naist
 Du fond de la vessie, ô prudente nature
 Que grand soing tu as eu de nostre geniture.
 Bien scauois que salee & acre estoit son eau,
 Que son corps delicat, se couuroit d'une peau
 Telle qu'il n'y a rien plus douillet ne plus tendre,
 Ainsi tu le voulus de luy mesme deffendre
 Rengeant tout cest amas d'ondes à l'enuiron
 De la clere agnelette, & sous le chorion.*

*L'esprit au mesme temps qu'à ces toiles besongne
 Estant en plus d'un lieu du principal se songne,
 Les trois ampoules forme imitant le maçon,
 Qui deuant qu'eleuer le corps d'une maison
 Pose le fondement & le feuure commence
 Par l'Ossec le nauire ains qu'en bastir la pance,
 De l'edifice humain le fondement tresseur
 Est le cerueau, le foye & la pinne du cœur,
 La du foye apparent ~~est~~ de la part plus bossuë
 Vne vene languette & greslette est issuë,*

La moytié monte en haut, & l'autre en bas descend,
 Et l'une & l'autre encor les membres traufferant,
 Par tant & tant de fois s'entremeslant se lasse,
 Qu'on diroit qu'un filé ce corselet enchasse.
 Du tronc qui vient du fond du foye maint ruisseau
 En file mille fois le long entre boyau,
 L'artere naist du cœur, de sa puissance plene
 Qui par tout accompaigne & suit sa seur la vene,
 Les nerfs tant les moteurs que les auteurs des sens
 Sont du chef souuerain couple à couple naissans
 De trente & quatre næux poignans comme vne espine.
 Mains fils deçà delà tirent leur origine
 Sur le col nouailleux l'os du crane caué
 Percé par sept endroits est hautain esleué.
 On apperçoit les os des cuisses & des hanches,
 Des iambes & des bras, qui sont comme des branches,
 De ceste humeur planté, & des mains & des pieds
 Et des costes aux os de l'estomach liez.
 Ces ossets façonnez tous de diuerse sorte
 Sont ensemble attachez, sont d'une liaison forte.
 Mainte membrane icy blanchissante apparoit
 Par dessus le sur-cœur, le mol poulmon ia croist
 Qui venteus prend & rend par fois alternatiue
 Le frais, pour venteler le cœur affin qu'il viue.
 Desia la rate enflee on y commence à voir
 Qui grande, ainsi qu'on dit, est du ris le manoir.
 Desia les deux rongnons on peut bien recognoistre
 Aux flancs, l'un à la dextre & l'autre à la senestre,
 Des cuisses au milieu sous le ventre & plus bas,
 On entreuoit cela qui ne se nomme pas.

LA GENERATION

*Vn peu plus bas encor, où ce petit corps s'ouure
 Commence vn long boyau qu'une grand taye couure,
 Si tressubtilement que l'on peut clerement
 Au trauers remarquer son entortillement.
 Comme de l'estomach au portier il s'attache,
 Et comme l'estomach soubs le foye se cache:
 On entreuoit aussi les aneaux demironds
 Par où l'air & la voix sortent hors des poulmons:
 Et leur entremilieu: on n'y voit l'œsophage
 Ny du gargareon l'anelé cartilage:
 La langue outre les dents dans le palais estroit
 Prisonniere on n'y voit, ny du petit destroit
 Tant de façons d'outils, dont la voix est formee
 Et les mets creancez, car sa bouche est fermee:
 Le front qui quelque iour, or seure, ore doux
 Se doit manifester, les sourcils au dessoubs
 Se lunent esleuez, & la molle paupiere
 De l'œil plus precieux cille encor sa lumiere.
 Le nez plus eminent s'y voit ja pertuysé
 Où Momus le moqueur son enseigne a posé.
 Voy la iouë au dessoubs, siege de honte honneste,
 Les aureilles encor au costé de la teste,
 Et la leure bessonne; ou le ris son seiour
 Faira dore snauant, compagnon de l'amour,
 Le petit mentonnet, le col & la poitrine,
 L'espaule & les costez & le ventre & l'eschine,
 Et tant d'autres encor seulement commencez,
 Par ordre & par compas on y voit agencez:
 Ainsi s'en vont formez de ceste creature
 Les rudes premiers traictz du pinceau de nature*

Tendant vn cuir autour si luisant, qu'au trauers
 On pourroit bien nombrer tous les membres diuers
 Blancs & bourrus encor, & de mesme substance
 Des deux principes ioints qui causent leur essence:
 Le seul foye au costé, d'où naist premierement
 Le desir amoureux, paroist vermeillement.

Ce petit corsillon dont les membres ie conte
 Non plus qu'une formis grandelette ne monte,
 Tel en quarante iours il est, si c'est vn fils,
 Si c'est une fillette adioustez y en dix.

Or il commence à viure ainsi comme la beste
 Encore qu'à noz sens il soit peu manifeste,
 Comme vn croissant d'un iour esclaire l'uniuers
 Ce corps est esclairé par les rayons des nerfs.
 Un moys entier y a, quelques iours d'auantage
 Que l'esprit formateur est apres cest ouurage
 Lequel iusqu'à ceste heure a esté gouuerné.
 Par le vieillard faucheur du ciel le fils ené.
 Ore par l'influence à Iupin assignee,
 Aux membres tous tracez nourriture est donnee,
 De nourriture encor n'auoit point eu besoin
 Ce tendrelet tendron, son esprit n'auoit soin
 Que de mouler sa forme aux membres plus commode,
 Longue, ronde, ou courbee, ou platte, ou d'autre mode.
 Il n'a tracé encor que le lineament,
 Pour tantost luy donner son dernier ornement,
 Comme vn peintre sçauant, vray singe de nature,
 Qui deuant que coucher la plus viue peinture
 Auecques le creon desseigne vn premier traict,
 Pour la derniere main mettre sur son pourtraict.

LA GENERATION

Doncq par la double vene, & par la double artere
 L'enfant par le nombril attire de sa mere,
 Le corps de l'amary de cent bouches sucçant,
 L'esprit viuifiant, & le sang nourrissant:
 L'un s'en va droit au cœur, & l'autre droit au foye,
 Du corps garde-manger, l'un & l'autre r'enuoye
 Ses mets assaisonnez, par les conduits espars,
 La vie, & la viande au corps de toute pars.
 Ainsi le suc vermeil en quelque part qu'il aille,
 Autour des filamens des muscles il se caille
 Par leur viue chaleur, car le froid estranger
 De nature, le sang en chair ne peut figer,
 Les arteres, les nerfs, les venes entrelasse
 D'une baveuse chair, en comblant chaque espace
 D'une lente gelee, & les membres diuers
 S'en vont par le menu de leur caillé couuerts.
 Chaque partie encor, comme elle est noble ou vile
 Se contente d'auoir sa portion utile:
 Comme vn maistre d'hostel faict sa prouision
 De viures pour fournir vne grande maison.
 Seruiteurs & enfans n'assied à mesme table
 Selon que chacun est plus ou moins honorable,
 Il doit assoir ses plats, l'un haut & l'autre bas
 Ainsi que l'intestin le cœur seruy n'est pas,
 La vene, comme vn nerf, l'artere ne demande
 Du cartilage dur, ny de l'os la viande.

Son moys achue icy le Dieu pere du iour,
 Apres luy voicy Mars, qui controlle à son tour
 Brillant comme l'esclair, haste l'esprit maneuure
 Et de son feu luy ayde à recuire son œuure

Raffermissit ce tendron, tout glaireux & mollet,
 Il desèche le nerf encore tendrelet,
 Les membres il roiddist, foibles, baueux, & moittes,
 Il endurecist les os, les enchasse en leurs boites,
 Le cuir il repolist, attache aux boits des doigts
 Les ongles renaiſsans des souspiraux estroicts,
 De la teste, & du cuir, poil & cheueux il pouſſe.
 C'est c'est lors que l'enfant faict à sa mere grouſſe
 Mal au cœur, qu'en ses flancs elle sent foiblement,
 S'il luy doit naiſtre un fils le premier tremblement:
 Si c'est vne femelle, en nature vne faute,
 Or que nee elle croiſſe en quatorze ans si haute
 Faite d'un germe froid humidement ſuiuant,
 La cocourde ventruë où il n'y a que vent
 Croiſt plus ſoudainement que la plante tortuë,
 Dont le ius les tyrans de l'ame humaine tuë.
 Si tost ell' ne ſe meut, le grain lent à leuer
 De terre, hors de terre eſt viſte à ſeſleuer.

En ſon quatrieſme il entre adonq' ſa place d'õne
 L'odrifen guerrier au beau fils de Latone
 Qui voit tout, & par qui peut la terre tout voir.
 Il prepare le corps, pour, digne recevoir
 Sainctement, purement comme en un temple honneſte.
 L'ame, ſouſſee de Dieu, Creature ceſte:
 De tapis precieux, ainſi ſon palais tend
 Le vaſſal, pour loger, ſon ſeigneur qu'il attend.
 O prophane moqueur, qui a pris tant d'audace
 Que la deſauouer, fuy fuy, & luy ſay place:
 Vn iour mort tu croiras, ce que viuant n'as creu,
 Quand viuant tu mourras ſans mourir dans le feu.

LA GENERATION

Là où le chancre ardent pressant sous sa poitrine,
 Le ciel pers, paresseux de ses huit pieds chemine,
 Que la lune, qui tient en sa subiection
 Les points & les momens de la conception,
 Dardant ses froids aspects sur toute chose humide
 Par les pentes des cieus variablement guide
 Pres du chemin luyfant, que Iunon, de son lait
 Au trauers de l'azur du Zodiaque à fait.
 A l'endroit où Phœbus, tourne voyfin de l'ourse,
 La bride à ses coursiers, & arreste leur course,
 Pour venir luire à ceux par un mesme chemin
 Qui sont sous l'autre bord du grand Baudrier diuin:
 De mon entendement haut esleuant la veüe
 Je voy les cieus ouuerts, ie voy vne ame esleüë,
 Partir, fendre le vague, aütant, ou plus soudain
 Que chet la nuit l'estoile au trauers du serain.
 Je la voy à regret vers la terre descendre,
 Je la voy s'arrester pres du lyon, pour prendre
 Vn breuage oubliëux, lequel luy est donné
 Dans vne couppe d'or, du pere deux fois né.
 Chanceler ie la voy, ie voy, bons dieux, qu'elle entre
 Au sepulchre d'un corps, où l'on l'enferme, au centre
 Du cœur qui iustement tient du corps le milieu,
 Par le commandement de son pere & son Dieu,
 Du cœur qui est à l'ame vne eternelle sphere,
 S'épand par tout le corps la viuante lumiere
 Comme du clair soleil de l'uniuers le cœur,
 Par l'uniuers s'espand la vitale vigueur:
 Mais si obscurément comme dormante ou yure
 De l'oubly qu'elle a beu, qu'on ne la croiroit viure,

Humainement encor, car plus ne luy souuient
 De son pays natal, du ciel doù elle vient.
 Pendant son corps proffite, & plus sec il se forme,
 Pour estre à son usage utilement conforme.

Après Phœbus le blond Venus entre en quartier,
 Qui ce diuin pourtrait mignarde un moys entier,
 Destrempe les couleurs pour peindre ceste image,
 Luy assure la grace, atise son visage,
 Luy redresse la taille, & verse dans ses yeux
 Mille raiz, mille traits, mille attraits gracieux,
 Luy aligne le nez, & les deux leures closes
 Remplit d'ambre & de musq, de coral & de roses:
 Luy allonge les doigts, & luy blanchit la main,
 Et d'amour luy ambraze & le flanc & le sein.
 Cypris a faict son tour, au Cilenien ore
 Maistre és arts, porte-paix, que l'Arcadie adore,
 Pour faire aussi le sien, est escheu l'autre moys,
 La langue luy desnoue, il entonne la voix,
 Il luy ouure les sens, luy donne l'œil modeste,
 Et à la passion accommode le geste,
 Luy a dessus le front mis la seuerité,
 Et dessus le sourcil assis la grauité,
 Le visage assuré, luy faict la bouche ronde
 Pour estre en ses discours & disert & faconde.

Du septiesme croissant soubs plus heureux aspect,
 Fourny s'en va l'enfant, l'ouurage est pres que faict.
 Le huictiesme, qui est de tous les moys le pire
 En mal heure appartient au tyrannique Empire
 De ce resueur Saturne, Astre malicieux,
 Sceleste, & non celeste ains forbani des cieux.

LA GENERATION

Les enfans qu'en ce moys, ô mal piteux, fais naistre
Faux dieu, mägeur d'enfans, c'est pour tō vêtre paistre.

Au contraire celuy heureux & fortuné
Qui est le moys d'apres, né, sous son fils ené:
Car tresbon, trespuissant, tresdoux tresdebonnaire
De l'homme autant amy, qu'ennemy est son pere.
Pour bening luy monstrer un traict de sa bonté,
Toute la court celeste a la natiuité
De ce bel animal, qui diuin luy ressemble,
Pour sa couche honorer, derechef il assemble,
Affin que favorable, ils viennent receuoir
L'enfant comme un fruit meur de l'arbre prest à choir,
De peur qu'il ne se blesse en tombant mol & tendre,
Chacun un membre en prêt pour sauueur, le deffendre.

Le poupin ja neuf moys dans le ventre pressé,
Racourci, recourbé, accrouppy, ramassé,
Des coudes repliez qui a ses aines touche,
Et de ses genoux baise & ses yeux & sa bouche
Les fesses des talons hauts la teste tenant,
La face vers les reins de sa mere tournant,
Ainsi amoncelé, court-tenu, il s'ennuye,
D'autre & plus libre il a, & d'autre vie enuie.
Il s'estend, il s'allonge, il tremousse, il tressaut,
La teste il vire en bas, & les deux pieds en haut:
Il petille, il regimbe, il s'esbranle, il se tourne,
Il rompt le voile blanc, qui l'affuble & contourne.
Il se bande & roidist, lors les nœuz nombrillers
Du corps de l'amarry se rompent par milliers.
Adoncq' hausse son cry la pauurette, qui tordre,
Sent ses reins, & ses flancs trescruellement mordre.

Voyla vn torrent d'eaux deborde de son corps
 Signe que le voicy prest à sortir de hors.
 Luy à teste baissée, hurte la porte humaine
 Poussant faict son passage & soulage la peine
 De sa mere qui pleure, & trauaille criant,
 Et Lucine à son aide importune en priant.
 Durant ce long trauail, le grand os iliaque
 Du sacré se separe, en se separant craque.
 En fin passant le chef par le sentier glissant
 Tombe, comme vn fruiçt meur, au monde gemissant:
 Commençant, malheureux, le terrestre voyage
 Par larmes & par cris, s'acochant au passage
 Laisse arriere son faix l'un & l'autre manteau,
 Ainsi que le serpent laisse sa vieille peau
 Frayant l'estroit pertuis, qui l'estreint & le presse
 Auecque sa vieille peau despouille sa vieillesse.

Or me dy maintenant, puisque l'homme ainsi naist,
 Si nature maratre ou bien mere luy est.

Cy gist pouret & nud sans habits & sans armes,
 A qui les pieds & mains seruēt moins que les larmes,
 Prisonnier de nature, honteusement souillé,
 De fortune le ieu de misere comblé,
 Qui l'amende pleurant fait d'estre né au monde.
 Une bouteille encor, qui s'eleue sur l'onde,
 Une ombre seulement d'un songe d'une nuict,
 Une fueille, qui mene au vent vn petit bruit,
 Une fumée, vn rien à qui tout fait la guerre.

Cy gist qui commander doit le ciel & la terre,
 Qui le ciel & la terre en son estre comprend
 Animal qui des cieux son origine prend:

LA GENERATION

*Maistre de sa fortune & l'honneur de nature,
 Monarque souuerain de toute creature,
 Le lieutenant de Dieu en terre, & vif pourtraict
 Sa maison, & son temple & chesd'œuvre parfaict,
 Qui seul par sa raison, de l'ame la main dextre
 De tous les animaux sans raison se faict maistre.*

*Cependant tous les Dieux attendent le moment
 Prefix par le destin à cest acouchement.*

*A doncq' chacun s'y trouue avecque sa puissance
 Bien heurant de son mieux du mignon la naissance..*

A Saturne est escheu le haut gouvernement.

De la ferme memoire & de l'entendement.

Du feu de l'estomach les parties secrettes,

La rate, & la vessie à ce Dieu sont suiettes,

Les nerfs autheurs des sens, l'ogs & rōds, durs & froids

L'aureille-droite encor, par ou la docte voix

Glisse dans le cerueau, & qui faict l'homme sage,

Iupiter vient apres qui luy aprent l'usage

Des sciences, des arts, deffoubz Saturne appris,

Et pource l'autre aureille en sa tutelle a pris.

Au foye auquel amour au sang bouillant reside,

Pour l'amour de l'amour amoureux il preside:

Le ventre, l'intestin, les costés & le flanc

Contregarde, & l'esprit brouillé parmy le sang,

Et le penil honteux, & le nombril encore

Qu'au temple Hammonien le Lybien adore :

La main dextre il maintient, le bras robuste & fort,

Qui tout faict, du grand Dieu porte le passeport:

Mars gouuerne du fiel la verdoyant colere

Les eschenaux veneus & des roignons le paire:.

Et le dos espineux, de Pithon le vainqueur
 Le pere de la vie est la garde du seur,
 Comme il est l'œil du ciel & du beau iour le pere,
 L'œil dextre, qu'il regist, est du corps la lumiere,
 Et des os la moielle, un sang recuit & blanc,
 Merite avecq' le rable estre encor de ce rang.
 L'amoureuse caresse, & môle conuoytise
 Les desirs, l'appetit qu'amour souffle & attize
 Es membres par lesquels de ses flammes epoints
 Les membres du grand tout & du petit sont ioints.
 Les gestes muguetans, les baisers de la bouche
 Par lesquels l'ame à l'ame amoureuxment touche
 Sont de Venus les droits, l'homicide d'Argus
 A la langue fournist de propos, qui aigus
 Penetrent iusqu'à l'ame, il est tuteur & guide
 Des ventres du cerueau, de la ceruelle humide.
 C'est cet ingenieur habilement menant
 La main à la besongne, & le pied cheminant,
 L'autre œil, du plus bas ciel, qui changeant nous regarde,
 Comme Appollon du droit, de l'autre œil est la garde
 Les honneurs seigneurie estrangement diuers.
 Croissant selon qu'il croist par les deux uniuers,
 Il euante aux poulmons la chaleur importune,
 Les ongles & le poil sont vassaux de la lune.
 A la misericorde humble ployer tu dois
 Les genous, à Minerue on consacre les doigts.
 Mesmes les animaux, dont la ceinture large
 Du ciel est emallée, ont de noz corps la charge
 Le chef est au belier par les cornes tortis,
 Le col sent du taureau la celeste vertu.

LA GENERATION

Faut qu'à chasque beffon, chasque bras obeisse:
 La poitrine est la part de la lente escreuisse,
 L'espaule, & l'estomac sont membres du Lion,
 La vierge tient les reins en sa subiection,
 Le fessier pour garënd prent l'ardente balance,
 Des aynes le scorpion entreprend la deffence,
 Les cuisses à Chyron appartiennent de droiçt,
 Et les genous sont deuz au Capricorne froid,
 Les iambes ont l'appuy du verseau Ganimede,
 Chasque pied de l'enfant chasque poisson possede.
 Qui plus les Elemens luy prestent leurs faueurs,
 A la langue Neptune a donné les faueurs
 En huiçt goust differens, au nez il donne encore
 Le flair, dont les senteurs il discerne & odore,
 Les yeux tiennent du feu leur illustre flambeau
 Sans lequel n'y a rien en ce monde de beau.
 En vain tant de couleurs porteroient toutes choses
 Si l'homme taupe auoit les deux paupieres closes:
 L'air frappé par le son, & le son refrappant
 Le tambour qui au fond de l'oreille s'épend,
 Le martelet mouuant qui sur l'enclume donne
 Est cause que la voix dans l'oreille resonne,
 Par tout le corps diffus est de l'attouchement.
 Le sens ressortissant du plus bas element
 Entre le froid & chaut, du sec & du liquide
 Entre l'aspre & le dur du rare & du solide
 Arbitre sans faueur & faitç que l'animal,
 Pour son estre garder, suit le bien, fuit le mal.

Or voy-tu comme l'homme est conceu dans le ventre
 Comme il y est formé, comme en ce monde il entre,

Miserable

*Miserable par pleurs sa vie commençant
Comme les immortels luy assistent naissant,
Comme les elements aydent à le parfaire.
Si tout est doncq' pour luy qui luy sera contraire.*



DE LA CONCEPTION ET STERILITE DE L'HOMME ET DE LA femme & les moyens d'y remedier.



O M M E cil qui proiecte un petit bastiment,

*Auant que de ietter le premier fondement
A part soy faict estat d'une somme qu'il
pense*

*Pouuoir bien aysément fournir à la depence
D'estoffe, & de façons, iectant & reiectant,
Sans faillir, celuy semble, est son conte arrestant
Ses moyens, sa puissance à sa bourse il mesure
Et qu'en sa bourse y a pour y fournir, s'assure.
La matiere s'amasse, on ne chomme d'ouuiers,
Ia les os de la terre on tire par quartiers,
On les charrie & taille, & voit on ia la pierre,
Assise rang à rang s'esleuer hors de terre.
On voit desia le plant au lineau mesuré*

DE LA CONCEPTION

Peu à peu se haussant demy presque emmuré,
 Que le voyla content! à la fin il s'aïse
 De calculer combien desia monte la mise.
 Et ce qu'il reste à mettre, ô qu'il est estonné
 De se voir de si loing de son conte elongné,
 Deceu d'outre moytié il trouue somme toute
 Que cil conte deux foys, qui cõte sans son hoste.
 Ny plus ny moins que luy ie me trouue surpris,
 Qui pensois estre à bout de mon œuure entrepris:
 Car plus auant ie vay, & plus il se presente
 De matiere à chanter, qui veut que ie la chante.
 Quoy? reprẽdray ie doncq' ce tãt fascheux subiect,
 Qui enseigne aux humains cõme l'hõme se faiçt,
 N'en sçait on pas assez, il ne faut rien dependre,
 Ne faut estre escolier, pour ce mestier apprendre:
 Il n'y a rien de plus naturel, & souuent
 Plus y est l'apprentif, que le maïstre sçauant: (me
 Iay peur, iay peur aüssi que quelqu'un ne me bla-
 Si, babillard, ie dy les secrets de la femme.
 Si ce qu'en grecon diçt, en Latin, si françois
 Ie parle ouuertement, ô quiconque tu soys
 Qui trouue scrupuleux mon emprise mauuaise,
 Si tu as des enfans tu en parle à ton aise,
 Un chacun n'en a pas qui en voudroit auoir:
 Trouue-tu doncq' mauuais s'il desire sçauoir
 Les moyens de les faire, & moy, qui en suis maïstre
 Si, qui faire n'en peut, ie façonne & adextre?
 O malheure-ux vicillard, qui courbe & tout tremblant
 N'as point qui te soustienne, & qui te ressemblant
 T'ayme, serue & honore, & comme la Ciconge

Te rende en ta vieillesse une pareille songne:
 Qui travaille pour toy, & te nourrisse lors
 Que les nerfs sont usez de ton impuissant corps.
 He! quel grief creue-cœur, quand en l'ame dolente
 Le mourable vieillard pense, & se represente,
 Que ceux qui heritiers doiuent s'es biens auoir
 Voudroient ia prest à mettre en la terre le voir:
 Quel creue-cœur-encor' quand le bon homme pense
 S'il ne se haste assez qu'on cherche qui l'auance.
 Mais les enfans bien nez, bien nourris, genereux,
 De voir leur geniteurs se reputent heureux.
 Vesquissent-ils autant que de Lamech le pere,
 Et le pere qui voit l'enfant son deuoir faire
 N'a regret en sa vie, & laisse volontiers
 Son nom & sa richesse à si bons heritiers.
 Et bien, tu me diras qu'il y a de la peine:
 Mais a-on rien pour rien en la misere humaine?
 Enfans les faut nourrir, enseigner, eleuer,
 Nourris, instruiets & grands leur faut party trouuer,
 S'ils meurent, quel regret, ou bien quelque vn varie
 De l'ancestre vertu seduit par compaignie,
 Et ce qu'à grand sueurs a le pere arrangé
 Se voit en moins d'un rien, d'un rien ne-vaut mangé.
 Quelle incommodité, fol, qui enfans desire.
 Et semble que quelque vn ait eu raison de dire
 Que n'auoir point d'enfans est un bien incognu,
 Ce qu'a Antomedon par ses vers soustenu.
 Heureux celuy, dit-il, qui ne doit nulle chose,
 Plus heureux est encor' qui femme point n'espose:
 Plus que ces deux heureux est, qui n'a point d'enfans.

DE LA CONCEPTION

Mais cil qui se marie hors de son meilleur sens
 Est plus heureux que tous, si sa femme au suaire
 Il voit ayant receu d'elle un riche douaire.
 Il laisse du noçage & maint & maint danger
 Où l'on peut escheoir quand force est s'y ranger:
 En parle qui voudra, la balance l'emporte
 Du costé des enfans qui sont de bonne sorte:
 O qui se veut lier par ce nœud gordien
 Quittant sa liberté pour ne viure plus sien
 Tant que pourra durer sa vie instable & breue,
 Sçache qu'il n'y a Roy qui de ce le releue.
 Sçache que dès le iour que tu és attaché,
 Qu'entretenir te faut ce bisserre marché.
 Quiconque donq tu soys, qui libre t'y vas prendre,
 Ce que faire tu dois ie te veux faire entendre:
 Voy ce qui est graué a Delphe en lettres d'or
 C'est qu'il te faut cognoistre, & esprouuer encore
 Quelle est ta suffisance, entrer en ce voyage
 Et puis s'en repentir n'est pas faict d'homme sage:
 Pour ce faire on est sage ou iamais à trente ans
 Fort, & beau pour creer de forts & beaux enfans.
 Qui le manger & boire as quitté pour la chasse,
 Tu cerche curieux des chiens de bonne race,
 Et pour estre tenu des plus braues guerriers
 Pour braue te monter de beaux & forts coursiers:
 Tout expres tu nourris vne belle caualle
 Pour un iour en auoir race à la mere egale:
 Et nous d'extraction immortelle cognuz
 De faire beaux enfans ne seront nous soigneux:
 Qui se veut marier qu'il s'apparie à celle

A qui ioindre il se veut, de taille haute & belle,
 Frais, allegre, dispos, le morne & le trop gras
 Allumera le four, & n'y fournira pas.
 Bien flanqué, bien planté sur vne cuisse ronde,
 Le dos large & quarré, le foy du corps responde
 A ses extremitéz, le visage gentil
 Sur tout bien assorty du principal outil.
 Qu'il cõsidere apres quelle est l'humeur maistrresse
 Le sang humide & chaut cause en l'ame allegresse
 Et au corps la vigueur entretient l'en bon point,
 Et de ris & de rose il destrempe le teinct,
 Et fait qu'au bon vouloir le pouuoir soit de mesme:
 Mais sec est le colere, audacieux & blesme
 Entreprenant bien plus qu'effectuer ne peut.
 Et le melancholique ne le peut ny le veut,
 Brun-obscur est son teint, son œil triste regarde:
 Le froid pituiteux a la couleur blaffarde,
 Pareseux & grossier, est de complexion.
 Qu'il met plus qu'il ne veut à execution.
 Enquerir ne se doit, cil qui femme demande,
 Si elle est de maison, de race & de biens grande,
 Ou noble ou roturiere: Amour qui n'a point d'yeux
 Pour le regard des biens s'accommode en tous lieux.
 Si doit il voir bien clair pour choisir vne fille,
 Nourrie honnestement, d'honorable famille.
 A seize ans, sur le point que l'on dit d'enrager,
 Lors que molle on la peut à son plaisir ranger:
 Plus ieune ell ne seroit assez forte ny sage
 Pour endurer d'un homme, entendre à un mesnage,
 Ce n'est qu'un mol tendron & si ne pourroit pas,

DE LA CONCEPTION

Concevoir des enfans en un aage si bas.

Si quelqu'un elle en fait, ne t'attens pas qu'il viue :

S'il vit, il sera foible, & la mere lassive.

Attens-la doncq' à croistre, & que l'aage accompli

A l'esprit & au corps ayt formé le ply:

En la proportion des membres gist la grace.

Ne la prens pas aussi trop maigre ny trop grasse,

Pour au large loger dans elle baux enfans.

Qu'elle ait la hanche large & amples les deux flancs,

Le ventre rondelet sur le deuant s'amasse

Le reste rebondy, la cuisse grosse & grasse,

Et du nombril en bas soit l'en-bon-point fourny,

La poitrine bien large, & sus l'iuoire vny

L'un & l'autre teton a s'enfler ia commence

Rondement eminent, laissant vne distance

De quatre doigts entr'eux, main grande & pieds petits,

Vne greue semblable à celle de Tetis:

Ny trop grosse, ny mince, ains plainement charnuë,

Telle Venus estoit quand Paris la vit nuë.

Le plus ou moins se loge entre le trop & peu,

Ou tu peux estre au large à la choisir receu.

Celle qui a le teinct brunet est la plus franche,

La noire est un peu dure, & molasse est la blanche:

La rousse, ce dit-on, est trop ardente au ieu,

Doncq' pour ne t'esgarer suy le trac du milieu.

Fuy fuy comme un aspic celle qui en la teste,

Endiablément porte vne horrible tempeste.

Colere, audacieuse, hagarde fierement,

Par deuers elle auoir vent le commandement,

Et celle là qui iure, & qui porte le garbe.

D'un homme, & qui de l'homme, homasse, porte-barbe:
 Qui a deux sourcils noirs, ainçois qui n'en a qu'un,
 Qui sur l'un & l'autre œil se rebourse commun:
 D'une Etique elancee, auare & chiche-face
 Il ne faut esperer iamais voir de la race.
 Sotte ie ne la veux, & si ie veux encor
 Qu'ell commence à sentir d'amour les flesches d'or:
 Doucettelement accorte, & sans fard amoureuse,
 A prise honnestement, sans malice & sans ruse,
 Au menage nourrie, & bien heureux sera
 Qui de telle pucelle vne femme fera,
 Et bien heureuse celle à nulle autre seconde
 Qu'un si heureux mary fera mere feconde.
 Et tous les deux encor en leur vieillesse heureux
 Ayant pleine maison d'enfans & de neueux.
 Prends là, si tu la trouue, assurement pucelle,
 En la foy des parens il la faut croire telle.
 Et trop ne rechercher ce qu'on ne veut trouuer.
 Ainsi l'ené d'Aymon ne voulut esprouuer
 Le vase enforcelé, de sa Clarice aymee,
 Hazarder curieux la chaste renommee:
 Mais si d'un importun ie m'en voyois pressé,
 Ie luy diray comment il en fera l'essay.
 Quand au premier assaut, qui furieux se donne,
 A la bresche ia faicte, & qui ia s'abandonne
 En fauçant la carriere, & combattant en flanc,
 Vierge ell'est s'il y a effusion de sang.
 Si pressant le bouton de sa blanche mammelle
 En faicte iallir le laiçt, elle n'est plus pucelle,
 Et s'ila fraize entee au tetin rondelet

DE LA CONCEPTION

Est fraische, & n'est changé son beau teint vermeillet.
 En la couleur du dueil ou bien en la tanee,
 C'est signe que la fille est pucelle donnée.
 Si celle qui n'aguere auoit le front hautain
 L'œil gayement assure, mais que le lendemain
 Elle marche honteuse, & vermeillement teinte,
 On a depuis donné à son honneur atteincte.
 Ou si le bout du nez mollement vous pressez,
 Et ses tendrons vnis vous trouuez diuisez,
 Qui aduient aussi tost que la fille s'oublie,
 C'est signe quell' a faict l'amoureuse folle.
 Si compassant du col blanc comme laiçt caillé
 La rondeur iustement avecque vn long filé,
 Du sommet au menton, si la longueur excède,
 De recouurer sa perte il n'y a plus remede.
 Du bois de T'aprobane odorant, noir, amer,
 Qu'on luy face la poudre en vn breuage, humer,
 La vierge est par embas contrainte de la rendre
 Avecque vn bruit siffant, qu'aygu se fait entendre
 Trauersant lieux serrez: ces lieux mesme enfumez,
 De pareille briséeés charbons allumez,
 Feront la mesme preuue, & cest herbage mesme.
 Soubs la robe fumant, fera la vierge blesme.
 Si de la graine noire au pourpié moitte & froid
 Du large glouteron, si la fille reçoit
 Soubs elle les parfums, & que son eau recelle,
 Prends la moy hardiment, ie la pleuis pucelle.
 Et le gayet Anglois luisant leger & noir,
 Soubs la fille bruslant monstre icy son pouuoir,
 Au nez & à la bouche enuoyant sa fumee.

La fille a faict le saut, ia elle est entamee
 Si ceste pierre mesme en poussiere elle prend
 Et retienne son eau, bon tesmoignage rend
 De sa virginité, si encor on luy baille
 L'ambre blanc: la sueur de ce Dieu qui travaille
 En vn seul iour courrant de l'uniuers le tour.
 Tour à tour compassant & la nuict & le iour,
 Pour à tous esclairer, ceste sueur iettee
 Dessus les flots salez nuict & iour agittee
 Se vient rendre à la fin aux riues d'Aquilon,
 Faict les mesmes effects, pris au ius d'un bouillon.
 Comme on dit que l'eymant, de qui la force donte,
 La dureté du fer, peut faire rendre conte
 A la femme espousee, en secret estant mis,
 Soubs l'oreiller dormeux, si ell' a des amis,
 Ou si d'un seul mary, & sans plus se contente:
 Si elle est impudique en dormant s'espouuante,
 Millefantomes voit pres à venger le tort
 Quell' a planté ribaude au front de son consort:
 Elle se iette en place, & fuit comme insensee
 La couche qu'adultere elle a tant offensee.
 Mais si tout au contraire elle est femme de bien,
 Et n'ait fausé la foy du coniugal lien,
 Tatonnant amoureuse, & sans qu'elle s'esueille
 Embrasse son demy, qui pres d'elle sommeille.
 Ell' est vierge esprouuee, il reste seulement,
 De l'espouser pour viure ensemble heureusement,
 Pour vne femme en faire, & de leur mariage,
 On puisse voir vn iour soudre vn fecond lignage.
 Or laissez de par Dieu aller les combatans,

DE LA CONCEPTION

Fachez qu'ils n'employent mieux à bien faire leur t.
 Equippez de tous poincts, & ne se voulans feindre,
 Pour aux prises venir, ne cherchent qu'à se ioinde.
 D'une main trop hardie il taste audacieux
 Où elle est moins couuerte: & les yeux par les yeux
 Jusques au vif atteints, de l'un à l'autre attirent
 Par les raiꝝ opposez que bandez ils se tirent
 Les ames, l'un de l'autre, & ne font qu'un de deux
 Une chair & un corps de soy-mesme amoureux.
 Il luy succe, il luy mord & la leure & la bouche,
 Au tetin qui resiste il dresse l'escarmouche.
 Honteuse ell se fache & braue se defend,
 L'un redouble ses coups, l'autre au double les rend.
 La voyla d'un seul coup à ses pieds renuersee
 Et luy & luy dessus, il l'embrasse pressee,
 Et tasche tant qu'il peut gangner le petit fort,
 Elle tant qu'elle peut repousse son effort.
 Et refuse à se rendre apres mainte escarmouche,
 Apres auoir donné & rendu mainte touche.
 Apres mille baisers en cent lieux imprimez
 Egallement aymans, egallement aymez,
 Entr'eux encor egaux d'armes & de courage
 On ne cognoist encor qui aura l'aduantage:
 L'aleine leur defaut, en fin recreuz & las,
 Haletans & suans posent les armes bas.
 Mais pour reprendre aleine, à fin que de plus belle
 Ils recommencent fraiꝝ autre cargue nouvelle.

Tout beau, tout beau enfans vous voulez vous tuer?
 Il vaut mieux pour long temps voz coups continuer.
 Aller plus doucement, qui doit long chemin faire,

Compasser, pour durer, luy faut son ordinaire.
 En vain le laboureur ensemence ses champs,
 Qui les renuerse apres par les coutres trenchans,
 Il faut, pour rapporter que la terre seiourne,
 Aussi en vain le faict qui soudain y retourne.

Mignonne qui a-il? vous auez mal au cœur,
 Et quoy, vous pallissez, & changez de couleur
 Depuis vn mois ou deux, a petite friande,
 Vous auez, trop friande aymé ceste viande:
 Vostre sac est donc plein: c'est c'est à ceste fois;
 Que sentirez le mal appellé de neuf mois.
 Il vous est tres-bien pris d'auoir esté bien sage,
 Et que n'aeuz esté trop hastiue en dommage,
 Bien tost y eust paru: le voulez-vous nier.
 A ceux, qui mieux que vous entendent ce mestier,
 Si vous en faudra-il vn iour rendre bon conte.
 Qui a-il, vous pleurez dequoy auez vous honte,
 Pourquoi le cachez-vous, desrobé ne l'aeuz:
 Et bien, vous estes grosse & si ne le scauez.
 Or ie m'en vay vous dire vn à vn chaque signe
 Par lequel que la femme est grosse, ie diuine.

Si quand du sacré couple, apres l'autre retour,
 Ou sur la fin des mois, ce petit traistre amour
 Transforme les amans en l'Androgine mesme,
 En leur conionction si le plaisir extreme
 Les transporte plus haut mile-fois que les cieux
 Et les rend plus contans mile-fois que les dieux.
 Ceste ecthase durant, si la moytié fenduë,
 Ensemble rend & prend l'influence espanduë,
 Et comme vne sansue auarement succant

DE LA CONCEPTION

Ceste douceur sucree est de son corps versant.
 Dans soy en l' instant mesme vne seconde pluye
 Si l'oste retiré, n'a besoin qu'on l'essuye,
 S'il retourne ioyeux du trac qu'il a tracé,
 Si le chemin est sec par où il a passé
 Et le fond plus profond, si serrement se ferme,
 Que ce qu'on y a mis estroittement enferme.
 Si du val des amours les esleuez coustaux
 Aux pleines d'alentour auallez sont egaux,
 Et tout ce long destroit par où on entre au centre,
 De l'abisme caché dessous le petit ventre
 Se raccourcist estroit, & se serre si court,
 Si par la mesme on sent un ventelet qui court,
 Et chatouille facheux: si les membres extremes
 Deuiennent cependant, & plus froids & plus blefmes,
 Et si vers le nombril en dedans retiré:
 De trenchants eguillons le ventre est martiré:
 Et si lors qu'elle attend que son moys refleurisse,
 Le sein luy enfle & croisse, & semble qu'il s'emplisse
 Du sang rouge-blanchy, mais sans s'en trouuer mal,
 Et si de son fourrier ne voit plus le signal
 De peu de cas s'effroye, vne obscure berlue
 Luy met un noir bandeau au trauers de sa veuë
 L'œil s'enfonce en sa couche & le blanc apparent
 N'est plus blanc, ains se dore & s'elargist plus grand.
 Mais la prunelle au fur appetisse son cerne
 Luy manquant cest esprit, qui l'esclere & gouuerne:
 Son regard est changé, de doux, de gracieux,
 En un lustre terny tristement soucieux,
 Et les contours batuz, & la peau qui les couure

Plombine se relasche & pesamment s'ouure:
 En nul lieu, nul repos elle ne peut auoir,
 Des yeux, du nez, du col les venes se font voir
 Grosses de sang meurtry, si sa bouche est ouuerte
 On voit deffous la langue vne raynette verte.
 Et dans la bouche source vne fontaine d'eau,
 Son teint tout tacheté, qui fut iadis si beau,
 Toute chose luy tasche & tousiours la moleste.
 Mal de dents, d'estomac & de reins & de teste,
 Vers le sixiesme moys l'un & l'autre teton
 S'enflant s'enorgueillist, & le petit bouton
 Qui sur le demy rond de sa pomme ne bouge
 De la couleur de sang se teint, & deuiet rouge:
 Du col ioint à sept næuz à demy cercles ronds
 Faiçt pour faire mouuoir la teste & les poumons,
 Le deuant est en feu qui le visage embraze:
 Mais oppositement elle sent vne glace,
 Et petit à petit s'amortist le desir
 Du ieu où elle a pris n'aguiere grand plaisir,
 Ou, c'est ie m'en desdy, quand moins est assouuie
 Au passe-temps d'amour de se iouer. l'enuie
 Un appetit la tient qu'on dit propre à l'oyseau
 Qui langard defya d'Apollon le troupeau
 Cerchant en mille lieux quelque chose qu'il mange.
 L'appetit de l'enceinte est mesme ou plus estrange,
 Ore aigre, ore salé, terre, cendre, charbon,
 Tout est bon à son goust, sinon ce qui est bon.
 Mais voyant à souhait la chose appetissee
 Sa desdaigneuse faim est aussi tost passée.
 Vers le troisiesme moys ce fol degoust aduient

DE LA CONCEPTION

Quand le petit se meut, & le cheueu luy vient.
 Mais il est plus estrange, & beaucoup plus enorme
 Quand dans la Caguerote vne fille se forme:
 Facile à s'esioir, & pronte à se fascher,
 Le cœur luy bababat sous le tetin gaucher:
 L'artere qui le suit au bras foible se pousse,
 L'estomac bondissant maints routs aigres repousse,
 Et vomit la viande, elle sent son cerueau
 Se tournant viruolter, s'elle boit vin sans eau
 L'aschement se trainant aux reins, & à la hanche.
 Et en l'aine elle sent ne sçay quoy qui la tranche:
 Par fois vn froid frisson luy court par le milieu
 Du corps, & le milieu des aines est en feu,
 Cuysses & iambe luy enfle, & contre sa coustume
 Mainte varice noire accompagne l'enflume.
 En somme tout son corps s'effemine pesant,
 L'asche s'appesantist mol, bouffe, palissant,
 Nonchalante, est le iour à demy endormie,
 Mais la nuict tenebreuse, & des songes l'amie,
 Repose sans repos tousiours en resuassant
 Qu'elle voit ne sçait qui l'estomac luy pressant
 Qui le ventre luy ouure, & la gorge luy serre,
 En sursaut se reueille & s'elance par terre,
 Toute tremblante crie, & si grande est sa peur
 Qu'asseurer ne se peut, tousiours luy frappe au cœur
 La vision terrible, & ce qui plus l'effroye,
 C'est qu'elle croit son songe estre vne chose vraye.
 Quant à l'eau que l'enceinte en sa grossesse faict
 Blanche, clere, ou rougeatre, il n'y faut prendre effect;
 Moins aux bourres qu'on voit sur le milieu se pendre

Moins au points vagabonds qu'on voit monter, descendre,
 Ce sont des signes faux (bien que l'eau qu'elle rendra
 Goutte à goutte bouillante en passant luy oindra).
 C'est une piperie, une trompeuse monstre,
 C'est un leure à nyais, deviner par rencontre .
 Quand le ventre s'avance, & les reins & le sein
 Il ne faut plus douter que le sac ne soit plein:
 Si une nuit entiere és ondes de la femme
 On fait tremper d'erein une mincette lame,
 Ou l'eguille lingere, & que maints petits ronds
 Au matin Imprimez on voye és environs ,
 Vn homme est commencé, si elle est verte grise
 Leurs coups sont boufferots , la prefeure n'est prise,
 Si le ius du chardon verdoyant, elle boit .
 Si tost apres le rend, certes elle conçoit,
 Ou que de l'eau miellee elle boiue, couchée,
 Si la nuit en dormant elle sent la tranchee ,
 Elle est grosse, ou si close, on encense son bas.
 Et que l'odeur en vienne au nez, grosse n'est pas.
 Pour mieux t'en assurer mange du beurre, ou tette
 Vne femme laquelle vn enfant masle alette
 Si elle routte apres, ces routs seront tesmoings
 Qu'elle est grosse d'un fils, ou d'une fille au moins:
 Broye du bel anis la douce-amere graine
 Et qu'en s'allant coucher en eau clere la prenne
 Si dormant elle sent d'une demangeison
 Chatouiller son nombril, c'est de fille ou garçon,
 Ce sont signes communs, mais chante en qu'elle sorte
 On sçait si c'est un fils & non fille quell porte.
 Au visage riant , au port brusque & gaillard

DE LA CONCEPTION

*A l'œil viuement gay, d'amiable regard,
 Et à la droicte iouë où le vermillon flambe,
 Et si au demarcher elle auance la iambe
 Et s'appuy' de la main de ce mesme costé,
 Et si dans le flanc droit est le petit porté,
 Et si vers le nombril le ventre en rond s'aguysé,
 Si on voit que la groisse à la mere ne nuise,
 Si le teinct du visage est vermeillement net,
 Et si du blanc tetin le rouge boutonnet
 Court & droict se retrouffe & teint de couleur noire
 Enté mignonnement sur la boule d'iuoire,
 Et si le tetin droit est plus ferme & plus grand,
 Et d'ouë premier saillir on voit le sang ia blanc,
 De ce costé encor' si l'artere & la vene
 Refrappe plus gaillarde & ondoye plus plene:
 Si à quatre fois dix son ventre sent mouuoir,
 Si sur la glace encor d'acier ou d'un miroir
 Elle expose son laict au plus grand œil du monde
 Et luisant qu'il se muë en vne perle ronde.
 S'elle le verse en l'eau, sa forme il retiendra,
 Si du sel elle y met, il ne se dissoudra,
 Si au fond il descend, sans que par l'eau s'epanche
 (Si c'est fille, sur l'eau nage la goutte blanche)
 Si secret tu as mis soubs le mol oreiller
 Le persil funeral, si à son reueiller
 Prends y garde soigneux, le premier qu'elle nomme
 Est femme, sera fille, vn fils, si c'est vn homme.
 Fay de son eau garder dans vn bocal boufché,
 Où les cheueux orins de Phæbus n'ont touché,
 Passez-la, si tu voys vne bande infinie*

D'animaux, dont iadis fut l'Egypte pauc
 Hardiment tu diras qu'elle a dedans les flancs
 Un masle, s'ils sont rous, femelle, s'ils sont blancs,
 De l'herbe qui tres-bonne est à la femme en couche,
 La poussiere, & l'ouurage à la mielliere mousche
 Ensemble enuelopez dedans vn floe laineux
 Fourrez dans le canal du membre vergongneux,
 Sa saline est douçatre, estant d'un masle mere
 Si c'est d'une femelle au goust elle est amere.

D'autres signes entens qui desires sçauoir
 Si ta femme epouzee est propre à conceuoir.
 Les cheueux de Crocus en sa saline bronille,
 Le grand coing de son œil de ce melange mouille:
 Si de cest oignement le flair au nez paruient
 A la bouche le goust, c'est à toy seul qu'il tient,
 Si par bas elle cache au soir quand on se couche
 La gousse d'un chef d'ail, si au reueil sa bouche
 En emprunte le goust, & si son nez le sent
 Elle a le naturel à conceuoir puissant.
 Et si du souffre vif on detrempe en son onde,
 Et les vers si soient mis, ie la tiens pour feconde.
 Son eau chascun à part rende dans vn vaisseau,
 Face tremper neuf iours du froment dans son eau,
 De celui dont le grain au dedans de ce terme
 Germera plantureux, aussi sera le germe.
 De ce corps mi-party de ceste lyaison
 Chasque part dans son eau face tremper du son
 Neuf iours s'entre suiuant, le son où la vermine
 Premier s'acueillera, n'innoquera Lucine.
 Quel'un & l'autre encor aille son eau versant

DE LA CONCEPTION

Sur la chaste laittuë, ou mauue verdissant,
 De qui premier le plant se séchera, enseigne
 Qu'il n'a dequoy payer, ou bien qu'elle est brehaigne.
 Qu'on face encor le grain d'orge aux epis quarrez,
 Tremper en l'onde immonde en vaisseaux separez,
 Cil, du quel en dix iours ne germera la graine
 Infecond bat à froid, & seme sur l'arene.
 Si deffoubs elle encor quelqu'un est allumant
 Les thresors de Saba, de son habilement.
 Au tour d'elle estendu iusque en terre couuerte,
 Si l'aromatique entre où elle est plus ouuerte,
 Et trauersant son corps paruienne iusqu'en haut
 Ala bouche & au nez, ce n'est point son deffaut.
 Il n'en reste plus qu'un, pour fournir ceste preuue:
 Le ramolly galban qu'en la Surie on treuue.
 Couuert d'un drap de soye & mis dans le conduit
 Du laberint d'amours l'espace d'une nuit,
 Si au matin l'odeur gaigne du coprs le feste,
 Que la faute n'est point en la femme i'atteste.
 O qui au plus bas ciel d'un variable cours,
 Change de nom, de face, & d'humeur tous les iours:
 Qui secourable assiste aux femmes en gesine,
 Secoure moy aussi, & m'inspire Lucine:
 Et me d'y ie te pry l'occasion, pourquoy
 L'homme deuiet sterile, ô deesse, dy moy
 Pourquoi la femme encor, iadis grand vitupere,
 Ne merite, & ne doit porter le nom de mere,
 Dont tous deux mal-heureux couchez dans le cercueil
 N'ont qui les yeux leur ferme & qui d'eux porte dueil.
 O bons Dieux, qu'en voyci se presentans en somme

Du costé de la femme, & de la part de l'homme:
 Est-ce point que l'esprit trop grossier ne comprend
 Combien des iouissants le doux plaisir est grand,
 Et ne l'imaginant n'en face pas grand conte,
 Que l'aprehension n'est soudaine ny pronte.
 Pour du plaisir qui s'offre aller viste aduertir
 Le cœur, qu'il face encor son propre esprit partir,
 Et descendre leger là bas tirer l'oreille
 A la cupidité qui paresse & sommeille.
 Seroit-ce point aussi quelque longue langueur
 Des membres gouuerneurs, du cerueau & du cœur!
 De là forge du sang, de la chair qui escure:
 Des humeurs la fondree epeusement obscure,
 Des coulours iumeaux, succant de tout le corps
 L'onde meslée au sang, pour la verser dehors?
 Du ventre cuisinier, où premier s'assaisonne
 Le viure, que nature à chasque membre ordonne:
 Car du sang la semence est la meilleure part,
 Part, qui de toutes parts des membres se depart:
 Des membres officiers, comme sueur subtile,
 Mais du foye & du cœur epeusement distile,
 Le souuerain cerueau y enuoy le leuain,
 Qui fait la paste enfler pour faire vn œuure humain.
 A doncques si tarie est des membres l'essence
 Il n'en vient rien qui vaille, qu'une vaine semence.
 Ou du quadruple sang seroit-ce le deffaut
 Qui est trop froid, trop sec, trop humide ou trop chaud?
 Mais en seroit point cause vn grand feu qui s'allume
 Estrangement sieureux qui le gastè & consume,
 Ou que perclus & froids les semenciers vaisseaux

DE LA CONCEPTION

Soient bouschez, ou bien pleins de vents, de sable ou deaux?
 Ou qu'il n'y a point d'huyle en la vitale lampe,
 Ou l'humeur abondant l'esteint & la destrempe,
 Que la grande iunesse & la vieillesse aussi
 Ne peuuent pas fournir à ces despens icy?
 La ieunesse est semblable aux moites marescages,
 Le vieillard est cassé à septante ans aux gages.
 Cil qui non par amour, ains par force se ioinct
 Sans plaisir mutuel, forceur n'engendre point.
 C'est d'amour seulement la feconde puissance,
 Qui rend de bon rapport l'un & l'autre semence,
 Pourueu qu'il soit réglé au compas de raison:
 Infecund est l'amour qui est hors de saison.
 L'importun, l'ehonté & de façon estrange,
 Est cil qui suit de pres vne longue vuidange,
 Ou de sang, ou de ventre, ou de sueurs encor
 Qui pillent des esprits le naturel thresor.
 Qui sous Saturne est né (telle est sa destinée)
 De son sang, de son corps ne verra point lignee.
 On dit que l'air trop chaut, trop froid ou bien mal sain,
 Le trauail excedant, les veilles & le bain,
 Boire d'autant, si froid, que la raison s'y noye,
 Manger trop de fruiçts cruds, qu'une soudaine ioyë,
 Et que long temps ieußner, de crainte auoir le cœur
 Amerement serré, estouffé de frayeur,
 Qu'un courroux, qu'un chagrin, qui soy-mesme deuore,
 Brule ou glace le germe, & si l'esteinct encore.
 Et que qui couperroit l'un & l'autre canal
 Par où du chef descend cest esprit animal,
 Et par où monte au chef la vapeur qui sommeille

De matiere chargez: cachez dessous l'oreille,
 On n'engendreroit plus le principe fecond
 De nostre estre doit estre, un grain de gresle rond,
 Vn humeur reluisant & qui dans l'eau ne fonde,
 Et qui ne perde rien de sa perlette ronde:
 Flairant comme la fleur des palmes triomphans,
 Qui tel l'a, ne faudra iamais à faire enfans.
 Au contraire celuy est vainement sterile
 Qui defaut ou abonde ou trop moitte distile,
 Ou froidement coulant, ou autrement gasté,
 Veut de l'esprit ouurier, qui son humidité
 A sa poste gouuerne: où la celeste flamme
 Manque pour l'auier, pour y susciter l'ame.
 Ou que la gaine n'est propre pour le consteau,
 Le manche à la cognee, & l'espee au fourreau,
 Si l'un & l'autre egal ne se proportionne,
 Quand ce vient sur la fin, que le grand coup se donne.
 Si la rencontre n'est en un point concurrent,
 Quand vainqueurs & vaincuz l'un à l'autre se rend.
 Si l'un est paresseux & l'autre trop se haste,
 Le leuain euanté ne peut enfler la paste.
 Et or que de bien faire ils ayent la volonté
 De se monstrier vaillans d'un courage indomté,
 Les deux petits adioincts, où ceste humeur s'engendre
 Apres l'auoir receu, ne le veulent plus rendre:
 Ou ne peuuent d'autant, ou ils sont empeschez,
 Ou d'un humeur estrange estroictement bouchez:
 Ou qu'ils sont trop vsez par le long exercice,
 Qu'ils ont fait, en faisant à leur maistre seruice.
 Ils sont desormais las, egrenez, epuysez,

DE LA CONCEPTION

Ils n'ont plus de pouuoir, de volonté assez,
 Et le magicien qui à la noire bande
 Des immondés esprits execrable commande,
 Ne peut-il pas malin, pour enfans n'auoir point
 En nouant desnouer ce que Dieu a conioinct.
 Qui accroire nous faict qu'une personne nee
 Sous le sterile aspect d'un astre infortunee,
 N'est bon pour ce metier! & veut qu'assuietty
 Soit le pouuoir des cieux à cest un my-party.
 Vne autre se fachant de se voir tousiours grosse,
 Pour pouuoir reposer essaye toute chose,
 Dans la peau d'Acteon porte à son col pendus
 Les vermisseaux trouuez és phalanges fendus:
 L'autre de peur qu'ell'a de mourir en sa couche
 Et si veut nonobstant que son mary la touche,
 Porte dedans un cuir la sterile amary
 De celle que Iupin a de son laiët nourry,
 Ou attache à son col du gé de pierre noire,
 Ou dans un autre cuir le double genitoire
 Du fonin cauteleux sur le nombril se pend,
 De la beste ennemie au venimeux serpent
 A son fenestre pied le foye elle se lie,
 De la fiere atalante horreur de Getulie,
 Trespuissant est le suin en iuoire enboité,
 En sa matrice pris, sur la femme porté.
 L'autreen du cuir encor, tient la graine cachee,
 Premièrement qu'elle ait sa nourrice touchee,
 De la femme insensee au porc arcadien,
 Pour la pendre à son col auèques un lien,
 Fait de ce mesme cuir, si la graine incensee

Est avecque le laiçt d'une anesse brassée,
 Ou bien d'une iument un poulain alaittant,
 Sois du lierre lascif le grain noir adioustant.
 L'autre porte vne dent de la bouche elochée
 D'enfant qui n'ait encor sa grand mere touchée,
 Richement mise en œuure en un doigt de la main,
 Ou de la forte epurge elle double le grain
 Tant de fois qu'elle entend n'estre plus en gesine,
 Et le porte secrette, en vne secondine,
 Et cherche l'herbe encor dont le fleuron vermeil
 Imite le scorpion, & le cours du soleil.
 Les fumees du lieure à la pate veluë,
 Et l'asperge ramee à la ré cheueluë,
 Cache dedans son sein, & le cetrac cueilly
 La nuit que la clairté de la lune a failly,
 S'applique sur le ventre & la rattelle encore
 D'un sterile mulet, & quelque autre deuore
 Les ongles d'une mule apres que bien menu
 Le feu en cendre a mis l'ongle du pied cornu.
 Vne autre tous les iours boit l'onde mareschale,
 Ou bien le peuplier blanc certains moys elle auale.
 Ou le suc de Cirrhene humie en ceste liqueur,
 Qui fist des Indiens le cuyssé-né vainqueur:
 Ou, mange un an entier l'iuressé coriandre.
 Qui engroisser ne veut, doit autant de grains prandre
 De l'herbe que Bacchus couronne triomphant,
 Que de iour le veut faire & ne veut faire enfant.
 Et qui d'un mulet hongre ayme beaucoup mieux boire,
 Que d'estre mere encor le fecond genitoire.
 Qui du fiel de Torpille a sa honte frotté,

DE LA CONCEPTION

Aura beau se iouer, rien n'y sera gasté.
L'autre la pierre Onite au col porte pendüe,
Pour estre des dangers d'auorter defendüe.
Qui du violier blanc a les semences beu,
Folastre hardiment, ce ne fera que ieu.
Un autre ayant esté de son homme acollée,
Tout aussi tost boira la pressure caillee.
Du pelaud pied-bourru: Celle-là ne conçoit
Qui boit du vin où trempe un barbeau vif, qui boit
La graine qu'on recherche en vain dans la fugere,
Où du saux gaste fruits, ne veut pas estre mere.
Non plus que celle-la qui sterile se rend,
Prenne du cheure feuil, qui la sciue se prend
Où elle peut atteindre, & fueille & fruit ensemble,
Trente sept iours durant du lierre qui luy semble
Arbre tant amoureuse ambrassant ses voyzins
Si la femme purgée hūme & boit ses raisins
Peut coucher de son reste: & la rouille enfumée
Du fer victorieux infecōde est hūmée.
Si du sang qui au cours des lunes se conduit,
Est le mont de Venus vermeillement enduict,
Et si tout aussi tost qu'elle se sent deliure,
Fourre les fleurs du chou qui garde qu'on s'en yure,
Dans sa creuse valee, & pousse là dedans,
Du poiure oriental les grains noirs & mordans,
Sans danger se ioura, si la semence est beuë
De l'anis, de la chanure aux larrons bien congñue.
Si du glayeul on prend le dernier des oignons,
Et des satyrions les flettris compagnons,
Et les vermissaux pris dedans la tige creuse;

Du perfil mortuaire amortit qui en vſe.
 Comme celuy qui eſt eſ carrieres trouué,
 Contre ceſte tranchee, eſt ſecours eſprouué.
 Somme tout ce que ſert à reſerrer la playe,
 Simple ou bien compoſé verd & ſec elle employe
 Juſtement diſpenſez: un peſſaire en fait-on
 Pareil, non pas ſi gros ne ſi long, au baton.
 Dont le dieu des iardins enormement menace
 Les larrons qui d'entrer chez luy prennent l'audace:
 Ou les arrondiſſant comme des petits pois,
 Les pouſſent au dedans au declin de leur moyſ,
 Ou du cedre la gomme entre l'eſcorce encloſe,
 Qui au temps mange-tout pres qu'immortel s'oppoſe.
 Si l'un & l'autre ſexe vne fois en eſt oinct,
 Ils les faut laiſſer faire, ils n'engendreront point.
 Qui en eau & en ſel trempe ſon caducee,
 Il ne perd que ſa peine, & ſon huyle verſee.
 Que ſi le laboureur & ſes deux bœufs conioints,
 Du camphre oriental & d'opion ſont oinct:
 Si du plus chaſt' ozier, de l'enuque laittuë,
 De la folle humie-baue ou bien de la ciguë
 De la nymphe & du plant qui ſemble aux corps humains,
 Comme dit Pitagor' ſ'il auoit bras & mains,
 Les ius ſont reſpanduz dedans ceſte ualee,
 Nul fruit n'y produira la ſemence geee.
 Il aduient quelque fois que le fond eſt fertile,
 Mais c'eſt le laboureur qui a faute d'outil,
 D'une bonne charruë, & d'un ſoc fort & roide,
 Dont la trempe ne ſoit trop chaude, ny trop froide:
 Ou l'acier n'a eſté eſpargnement batu,

DE LA CONCEPTION

Qui n'est trop deslié, biaisant, ny tortu,
 Ny trop gros ny trop court, qui iusques au fond touche,
 Qui le sillon ouurant redoublé ne reboufche:
 Qui enrouillé n'est point faute d'estre exercé,
 Ny pour trop l'exercer le fil n'a point usé.
 Car si le laboureur est poltron & bisongne,
 Iamais iamais n'ira droitement en besongne.
 Ses bœufs à la charruë attelez deux à deux,
 (Icy doit la charruë aller deuant les bœufs)
 Tousiours seront forbeuz plus maigre & plus lasches,
 Plus secz plus alouis que ne sembloient les vaches
 Du songe de Pharaon, de chancres, de tumeurs,
 Et d'ulceres couuerts, plains de tristes humeurs.
 Debiffez, ecloppez, & tout leur attelage,
 Cassé, brisé, rompu, mal duit au labourage.
 Si les grains que l'on doit esprendre sur les champs,
 Sont bruslez, empirez, euantez & meschans,
 En vain bonne est la terre, en vain on la façonne
 Si la semence aussi qu'on y esprend n'est bonne.
 Que sert tant d'ambageois, celuy qu'on n'entend point,
 Et parle, ne dist rien: il faut venir au point.
 D'autant que les tesmoins (c'est ainsi que ie nomme
 La part qui certifie à l'homme qu'il est homme)
 Aux masles plus parfaits furent donnez des cieux,
 Pour plus sainement viure, ou bien pour valoir mieux.
 Mais plus expréz, affin que l'homme que consomme
 Le temps, l'excez, le sort, rengendre l'homme en l'homme.
 Pour perpetuer l'homme, & que par la vertu
 Propre au frere besson triplement reuestu,
 La matiere de l'homme & se cuise & se forme,

Et moule en la iettant sur la diuine forme.
 S'il faut, lors qu'il l'eslance exerçant ce mestier,
 Vrayment on peut bien dire, il n'est pas bon ouurier.
 Que sa mine n'est pas d'une loyale estoffe,
 Ou qu'il tient au fourneau qui trop ardent l'eschauffe,
 Et la brusle & dissipe. On cognoist cest humeur
 Quand deuant la saison, ains que l'aage soit meur,
 Il commence à quester, que sa nature encline
 A frequenter les monts, & forests d'Ericine,
 Si son petit limier dès aussi tost qu'il sent,
 La beste, son gybier, la teste il va dressant,
 Et desloge soudain (il ne sçauroit pas viure,
 Sans chasser vn seul iour) pour sa proye poursuiure.
 Sa course a-il parfaict, c'est à recommencer,
 Actif, penible & saffre, il ne se peut lasser:
 Tout prest à redresser, tant il est chaut & vifte,
 Cherche s'il trouuera vne autre beste au gyste.
 Tant il a le nez bon, le muffle gros & droit,
 Impatient au chaut il dure mieux au froid.
 Ne demande qu'ou est-ce, & rebours se herisse
 D'un poil espez & noir au ventre & à la cuisse,
 Que si on le manie, on sent vne chaleur,
 Qui tesmoigne qu'il a la hardiesse au cœur:
 Qui avecq tel limier en quelque bon lieu chasse,
 De masles comme luy, il peuplera sa race.
 Mais deuant qu'il arriue à sa froide saison,
 Blanche deuient sa barbe & son cheueu grison,
 Pour auoir esté aspre à monter sur la bresche,
 Son acre ardent humeur se tarist & dessèche,
 Au rebours de celuy que nature a faict froid,

DE LA CONCEPTION

Qu'on recognoist au flanc qu'il a vuide & estroict.
 Il a foibles les reins, & la cuisse auallee,
 Endormy, paresseux, l'aine & la qu' pelee.
 Ou quelque poils follets blanchissent à l'entour
 De ces deux œufs iumeaux qui seruent à l'amour,
 Et dont furent eclos & l'un & l'autre frere,
 Qui esleuez aux cieux l'un apres l'autre eclaire.
 Celuy qui fut icy commis pour cultiuier
 L'adonien iardin, honteux n'ose leuer
 Les yeux pour voir sa proye or' qu'ell' luy face teste,
 Pour celle le villain n'en leuera la teste.
 S'il luy faut labourer vne corué fera,
 Sa graine froïde-humide, ou point ne germera,
 Ou si pour la bonté du fond elle n'est morte,
 Tout le fruiçt qu'elle rend à la mere rapporte.

Or quelque fois aussi & plus souuent il tient,
 Au moule qui mal faitç ne reçoit ny retient
 Du fondeur la matiere, ou qu'estroicte est l'entree
 De la basse goulette, ou qu'il s'est rencontrée
 Vne haye au passage au trauers du canal,
 Signe qu'encor entier est le ceint virginal.
 Ou quelque vent repousse ou quelque rages d'ondes, no il en
 Qui descend amassé és abismes profondes.
 Vn cal, vne verrue vne tumeur souuent
 Engarde qu'on n'y peut entrer assez auant.
 Dix mille autres dangers assiegent ceste voye,
 Vn chancre & un abces, vne bossse, vne playe,
 Vne pierrëuse roche, vn humeur epeffi,
 Ou quelque cicatrice, ou vne vlcere aussi,
 Ou bien de ce vaisseau la force est affoiblie,

Qui ne peut retenir, ou c'est qu'elle s'oublie,
 Ou qu'au dedans n'y a endroit (tant tout est plein)
 Pour serrer seulement un petit de leuain:
 Ou que de ce destroit trop courte est l'enceleure,
 Où qu'on n'y entre point que par oblique alleure,
 Où qu'un gouffre on rencontre amplement si ouuert
 Que tout ce qu'on y iette y fond, s'abisme & perd.
 Ou que ceste emboucheure, ô bien estrange chose!
 Est par trop restrecie, ou entierement close
 Où que ce pas peut estre, assez ne baaille pas,
 Pressé entre les os & un ventre trop gras:
 Ou bien que ceste place ait esté recognüe
 Ains que de son auril la fleur eust esté venüe
 Ou que long temps depuis & des dents & du flux
 De l'une & l'autre bouche elle ne marque plus.
 Seroit ce point aussi que la semence y brule
 Comme en un champ que fend l'ardente canicule,
 La main de qui voudra de pres s'en approcher
 Ce chaleureux excès peut cognoistre au coucher,
 Qui le germeux humeur tarist, dissipe & seche
 D'un poil noir & rebours le tour de ceste breche.
 De la cuisse au nombril espés est remparé
 L'un & l'autre estomach affamé, alteré:
 L'un sans cesse importun à s'abreuer demande,
 L'autre moins soul que las baille apres la viande
 Tousiours preste à le faire, & se mouue soudain
 Si tost que le penser en a fait le dessein.
 Barbue, audacieuse & saffre & cholérique
 Qui pour vne parole au centuple replique,
 Brauement parle gros, le demarcher gaillard

DE LA CONCEPTION

Fait penser qu'il y a sous sa robe un soudard.
 Aussi a elle peu de cela qu'ont les femmes,
 Sans ordre & sans mesure ardent plus que les flammes
 Qui la brule & la pique, ou noir il a passé
 Comme une froide bize a le bord creuassé.
 La terre sablonneuse, encor' qu'on la façonne
 Sans saueur, sans humeur ne rēd ce qu'on luy dōne.
 Celle qui au contraire est de qualibre froid,
 A de son cabinet l'embouchement estroict,
 Fâcheuse, & des plaisirs amoureux ennemie,
 Gourds a les flancs & l'aine & la cuysse endormie,
 Plus froide qu'un glaçon & plus dure que fer,
 Tous les brandōs d'amour ne pourroient l'eschauser:
 Feins qu'elle s'y accorde, elle s'aquitte lasche
 Tellement quellement du plaisir qui la fâche,
 Que longue à peine acheue, & si tout est perdu,
 Ce peu qu'en fin finale elle a d'elle rendu,
 Et ce quell' à receu qui faict leuer la paste.
 En l'attendant s'euante, & refroidy se gaste.
 Palles en sont les fleurs, qui ne produisent fruict,
 Ainçois ny fruit ny fleurs trop froide ne produit,
 Et l'endroit que nature a deffendu qu'on voye
 Est nud, ou reuestu d'un brim plus prim que soyē,
 D'un peu de poil folet ressemblant au cotton,
 Qui blondoye à l'entour des pommes de Cydon..
 La froide humide semble à la terre trempée,
 Qui a du laboureur l'esperance trompee,
 Comme par trop de playe est le grain suffoqué,
 Ainsi maint homme en fin se retrouue moqué
 Qui pensoit au gasteau auoir trouuē la febue,

Epouzant vne fille ou vne riche veue
 Auecq beaucoup de biens qu'il n'a pas amassé
 De saint pris il se trouue auoir fol epouzé
 Vne mauuaise bague, vne rossé si molle,
 Si froide quell le noye & morfond si l'acolle.
 S'il leue en ce terroir, voi-cy vn torrent d'eau
 Emporte la semence & rince son vaisseau,
 Et plus que tous les moys, des moys vne abondance
 Debauche, gaste & rompt l'œuure qui se commence:
 Et pour le moindre effort par cest egoust penchant
 L'homme à demy-formé s'ecoule s'epanchant,
 Le faisant à regret, & si souuent le faire
 Luy fait vn tres-grand bien & ne luy est contraire.
 La femme qui engendre enfans fecondement
 Debile viura moins, mais bien plus seinement
 Que celle qui ne vit de soy onques portee,
 Qui viura longuement, mais non pas si haittee.
 Euite en cest endroit l'excez plus qu'un rochere
 Qui traistre en l'eau se cache, en fin il couste cher.
 Vn coup d'extrordinaire est plus que vingt segnees:
 Et plus que vingt encor bien proportionnées.
 Quand aux causes c'est faict. Ores disons comment
 De la conception s'oste l'empeschement,
 Disons comme chacun, non à chacune cause
 A quelque vnes, si, les remedes oppose,
 Ce qui deffaut remettre, oster le superflus
 On ne peut pas tousiours, on ne retourne plus
 De ce qu'on a esté encore vne fois estre:
 Et l'art tousiours n'est pas de la nature maistre.
 Celuy & celle doncq que Iunon a menée

DE LA CONCEPTION

*Au penible menage, & qui ia mainte annee
 Ont ensemble passé sans voir de leur lignee,
 Sçachent que sans amour, amour n'engendre rien,
 Et qu'amour est d'amour l'emant & le lien:
 Qu'il n'y a philtre aucun qui plus fort nous prouoque
 D'aymer que voir s'aymer d'un amour reciproque.
 Ayme doncq' ô quiconque ayme auoir des enfans,
 Le soulas, le baston, l'appuy des vieilles gens,
 D'un amour bien réglé, car l'ardemment extreme
 (Tel que celuy duquel on dict que la femme ayme)
 Ne dure, & gaste tout, se trouuer volontiers
 A l'assignation, qui ne demande un tiers
 A la succession, pour son semblable faire
 Qu'à la necessité beaucoup plus necessaire.
 L'un ny l'autre ne soit enormément ventru:
 Car deuant que soit faict l'un ou l'autre est recreu,
 Et pansus ne pourroient comodement se ioinde,
 Et ce que chascun d'eux contribu' seroit moindre.
 Qu'ils soient de mesme trempé uniz temperement,
 Ou l'un contraire à l'autre appointez iustement:
 Non en pareil excez, non d'un humeur egale
 S'accomplit & parfaict la couche coningale.
 Suffize seulement qu'un soit froid, l'autre chaut:
 Ce qu'au mary abonde, en la femme deffaut,
 L'humidité, le sec, l'autre intemperature.
 Engendrent mariez vne tierce nature.*

*Sus doncq' donne dedans & ne t'amuse à voir
 Au ciel un poinct choisi pour faire conceuoir,
 Et, de peur d'y faillir n'observer l'influence
 Propre pour retenir & ietter la semence:*

Ce n'est que temps perdu, seulement aye esgard
 D'estre fauorizé du lunaire regard
 Qui conduit ceste affaire, ou soit que ta femelle
 Fleurisse ou bien conçoie, ou nourrisse dans elle
 Le germe ia conçu & desia retenu.
 Ou soit qu'il soit neuf moys au ventre entretenu,
 C'est cest astre qui fait germer que le champ ouure
 Pour englouttir le grain du semeur qui le couure.
 Le temp plus opportun qu'il faict bon embrasser
 Pour vne creature humainement brasser,
 Est lors que ta moytié à passer fleur commence,
 Ou bien au mesme instant qu'à reſteuir s'auance.
 (Le champ au parauant ne voudroit pas s'ouurir,
 Et tandis qu'il est moitte on ne le doit couurir)
 Pourueu que ceste fleur vermeillement rougisse,
 Et qui ny plus ny moins qu'il en faut ne fleurisse.
 Vous estes trop fascheux, attendez au reueil
 Que le soupper sera recuit par le sommeil,
 Que depuis la minuiet iusqu'à ce que l'aurore
 Laisſant Titan au lict le monde recolore:
 L'un & l'autre s'accointe en tel estat vnis,
 De mesme volonté, reposez, bien garnis,
 Si toute la matiere est dans le moule entrée,
 Voy-la vn enfant faict ou deux, d'une ventree.
 Si le petit mignon, dont le nom est honteux,
 Est paresseux, retif, lasche, flaque ou boyteux,
 Si qu'il ne puisse entrer en la place rendüe
 Par composition, competemment fendüe,
 Plus barbare serois qu'un Scite la moytié
 Si de son pauure cas ie n'auois point pitié.

DE LA CONCEPTION

*Si ie ne pense à ceux qui d'un failly courage
 Ne peuuent accomplir la loy du mariage.
 Courage donc ami, si l'infame sorcier
 A ton nerf cauerneux sceu par charmes lier,
 Par un desastre sort, & qu'enuieux t'empesche
 D'entrer tout d'un plein saut en l'amoureuse breche:
 Non, ne le doute point, marche maugré ses dents,
 Despitant son pouuoir hardy donne dedans.
 Ou inuoque celuy, que deuant que tu fusses
 Auoit predestiné qu'un tel party tu eussés,
 Et qui le mariage a sur terre ordonné
 A fin que l'homme fust d'une ayde accompagné.
 Ou par dedans l'aneau duquel ta fiancee
 Fut solennellement faicte ton espousee.
 Passe l'eau de ton corps, le nœuz sera lasché,
 Qui au milieu de l'eau t'a de boire empesché.
 Est-ce faute d'humeur qui chaleureux l'estende,
 Et de l'esprit archer qui ne l'enfle ny bande.
 Pour tout chaut le lancer iusqu'au fond roiddemët:
 Ou c'est hueur venteur bouillonnant, escumant,
 Qui tout en eau se tourne & n'a plus qui le guyde,
 Par son canon molasse & sans plaisir se vuide.
 Or d'autāt que Venus, comme on dict se morfond
 Si Ceres compagnie & Bachus, ne luy font,
 Et pourautant qu'aussi la belle Dioneë,
 L'entretien des humains; est de l'escume née,
 Il nous la faut nourrir de pareil aliment
 Qu'elle fut engendree en nous premierement.
 Que nostre patient en tous ses repas vse
 De viande qui soit chaude, humide, venteuse:*

De volaille priuée à la friande chair,
 Ou de celle qui va és montagnes nicher:
 Mais sans aucune aigreur, car tout ce qui est aigre
 Cause qu'on ne peut estre en ce duel allegre.
 Des passereaux lascifs mange la chair, les œufs
 De la pute perdris, & du coq orgueilleux
 Le paillard genitoire, & les enfans deuore
 De l'oyseau cyprien, & ceux du lieure encore.
 La loutre chair-poysson, le poulpe poisson-chair,
 D'eau douce est cestuy-là, cestuy-cy de la mer:
 Et l'huistre au beau sourcil, & tout le coquilage
 Qui en flots salez flotte, ou en l'eau douce nage.
 La seche qui se sauue en son sang noircissant,
 La truffe sans racine & sans branche naissant,
 Et le fruit vendangé, qui la liqueur apporte
 Qui l'honneur merité sur les liqueurs emporte:
 Et le bled qui merite entre les blez le pris,
 Estant cuit, puis mangé, le grain mondé du ris
 Aueq' chair de mouton, aueq' le lait de vache
 Estant pris qui dormoit reueille, & le destache:
 Et l'Espagnole carde, & le cice amoureux,
 La pastenade blanche au goust plus sçauoureux,
 La femme songe-creux du refort la racine,
 Le pourreau, le naueau, la Rabe Limousine,
 Les appetits gaillards, la ciboule, & l'ougnon,
 Au combat vigoureux rendent le compaignon.
 Mais de Crocus le blond que la tresse y soit iointe,
 Et le poiure Indien en eguise la pointe:
 Le fruit du chastaigrier de herissons armé,
 Et du pin montagnard de Berecinthe aymé,

DE LA CONCEPTION

Du Pontique coudrier, d'amandier, qui le porte
 Fait en cœur, & la fueille à la langue rapporte,
 La racine odorante à la brune couleur
 De l'estoylé chardon, & des palmes la fleur,
 Le nasitord brulant, qui l'esprit morne cueille,
 Et l'herbe d'Irion aux roquettes pareille,
 Les roquettes encor, le piquant seneué,
 Ce pauvre petit haire ont souuent releué.
 Le pouliot gentil, l'herbe à Mercure aymee,
 Et l'autre qui du feu ardente est surnommee,
 Du rosmarin les fleurs, les semences du lin,
 Et la fueille & la fleur du cecropien thim,
 De l'herbe du serpent les racines plus tendres,
 La racine du tam cuite dessous les cendres,
 Et l'herbe qui se faict d'une epee appeller,
 Auecque celle-là qui faict le lait cailler.
 Comme son nom le porte, & le ius de la mente,
 Et de l'anis fueillu la semence odorante,
 Le plaisant Aphrodit cent racines portant,
 Et le giroffle encor de tous le mieux sentant,
 Et de miles couleurs le diuers fasiol
 Iettant en toutes parts leurs housinettes molles:
 L'ail à la forte odeur, & la bouche piquant,
 La seche coriandre aiouste quant & quant,
 D'asperges les tendrons, de l'orobe la graine,
 Et du lierre tortu qui serpentant se traine
 La semence enperlée, & les racines boy
 Du plant qui fut grand prestre en l'ancienne loy:
 L'escorce de Citron à la couleur orine,
 Et la fille de Phorque eschangee en racine,

Fleurissant trois fois l'an, le dodonean Guy
 Engendré sur le chesne à Iupiter amy,
 S'il s'en trouue, y soit mis, le costus arabique,
 Au defaut du costus, la racine angelique:
 Encor y adiouster il faut les poiures longs,
 Des maris paresseux amoureux aiguillons.
 Le lezard niliac, dont mainte escaille blanche
 Emaille tout le dos, & qu'une ligne tranche
 De la queuë à la teste, on mange de la chair,
 De peur que le galand ne vienne à reboucher.
 Qui la honte du cerf n'a honte en du vin boire,
 Et des satyrions le plus gros genitoire
 Dedans le laiçt bouilly, & celuy du regnard,
 En la lice amoureuse il peut courir gaillard.
 Mets-y l'ortie encor, & tant, desquels le conte
 Ma memoire confond & ma langue surmonte,
 Cruz ou cuits en du laiçt, à part ou meslangez,
 Verds ou secs, mis en poudre, ou beuz ou bien mangez
 En sucre fin confis, ou en vin qu'on doit prendre
 Pour l'arc de Cupidon faire bander & tendre,
 Les vns, pour les garder, il faut, pour les confire
 Au doux suc de la canne indienne recuire,
 Ainsi du calicut le gingembre estrange,
 Tousiours verd se concerue pour tout verd le manger.
 Et de la galanga, racine aussi estrange,
 Pour vn pareil effect la confiture on mange:
 Et celle du rouseau on prent encor ainsi,
 Et l'herbe toute entiere au beau fenail marin.
 Et celle dont Venus sa tresse blonde peigne,
 Et l'artichaut lascif, dont la fleur nous enseigne

DE LA CONCEPTION

La saison qu'il fait bon de ses amours iouir,
 Quand sa pomme s'ouurant on voit espanouir:
 Et celle dont la graine est semblable à la queue
 Du scorpion cruel qui traistrement nous tue.
 Et le doux baselic, qui son nom grec à pris:
 Car des bonnes odeurs il emporte le pris.
 Si faut-il qu'en se rang honorable soit mise
 Celle qui appellee est du nom d'Arthemise:
 De la grande ferule on fait cuire le cœur,
 Pour estre en la mangeant en ce duel vainqueur.
 Du pistache Persan le fruit fait comme larmes
 Est propre pour donner les nocturnes alarmes.
 Et le fruit rougissant du iuiube espineux
 Rend l'homme plus gaillard en la guerre des deux.
 D'un bouc à longue barbe, à la teste ramee,
 Du sang pour cest effect soit la poudre humee.
 La gresse de pourceau immonde, & de cinq œufs
 Des lubriques pigeons engloutir les moyeus,
 La chair des escargots fils d'eau douce en vin boire,
 Et d'un asne pesant le dextre genitoire,
 Ou celui du cheual des narines fumant,
 Ou la moille des os d'un sanglier escumant:
 Et le muffle & le pied prendre du crocodile,
 Au mestier amoureux red l'homme plus habille.
 Faut boire apres manger, mais de l'eau garde toy,
 Qui du saint mariage accompli veut la loy.
 Le vin y sert bien mieux, dont la douceur vermeille
 Peut, mais tout d'un costé, faire abbaïsser l'aureille.
 Dont la douce framboise au membre geniteur
 Soudain se communique & fait reprendre cœur.

Quiconque en veut sçauoir d'auantage, qu'il aille
 Des femmes l'emprunter que ce défaut traueille,
 Pour trop long n'ennuyer celuy qui me lira:
 Ce qui est bon à l'un à l'autre seruira.
 Qu'il se serre les flancs doucement sans estreincte,
 D'une bande de soye en escarlate teincte:
 Et quelques iours se passe à sa femme toucher,
 Qu'il s'en aille à cheual mille plaisirs chercher,
 Sur les eaus, dans les boys, à la pesche, à la chasse:
 Que jamais vng plaisir ne le soule ny lasse.
 Puyz retourne chez luy, le souper soit exquis,
 Les metz pour l'amour faire expressement requis:
 Que sa femme se monstre amoureusement folle
 S'en aillent d'un accord presser la plume molle.
 Qu'ilz dorment tant que l'ourse ait faict vng demi-tour,
 Adoncques reueillez qu'ils deuissent d'amour.
 Redorment là dessus, tant que l'aube vermeille
 A refaire l'amour encore les reueille.
 Si lors son arc ne bande, & n'enfonce le blanc,
 D'aller en ceste guerre il est deormais franc.
 Qu'il prenne moderé vn folatre exercice,
 Qu'il se frotte les reins, les aines & la cuisse,
 Sa bouche vno pient respire souüement.
 Que l'air soit embaumé de son habillement,
 De ses gands parfumez, qu'en son lict, qu'en sa chambre,
 La cassolette y fume odeur de musq & d'ambre.
 L'entretien soit d'amour, & tousiours soit lesant
 Ouide ou Amadis de l'amour deuissant.
 Qu'il frequente les ieux esquels on represente
 Les doux contantemens d'un amant, d'une amante.

DE LA CONCEPTION

Qu'aux belles il se iouë, euitant le danger
 Que la sienne à vne autre il ne vienne à changer,
 Qu'il espargne son sang pour vn meilleur affaire:
 La purge des humeurs est à l'amour contraire.
 Contre l'ennemy froid qu'il garnisse le cœur
 De l'huyleuse storax, de la souëue liqueur
 Qui vient du double mont où Apollon preside,
 Et dans les beaux iardins d'Aretuse hesperide.
 Y meslant les parfums d'ambre, de musq. & ceux
 Qui nous sont cher vendus des Arabes heureux.
 Oins-en des pieds la sole, & du dos les espines,
 Le membre geniteur & ses billes voisines,
 La puberte, les reins, le Perinee encor,
 Mais iamais n'y oubly' la rançon du castor.
 L'huyle de la muscade, & des noix indiennes,
 L'huyle pressé du fruit des palmes Chrestiennes,
 Et qu'on tire des plans odorans & gommez:
 Ely, pour ioindre avec, des simple ia nommez,
 La poudre plus requise à l'amoureux usage,
 De celui qui guerist le cerueau qui n'est sage.
 Du suc euphorbion, qui se tire de loing,
 A la gresse meslee de la caille, & à l'oing
 Du Roy des animaux: la racine y meslange
 De qui, pour trop s'aymer en vne fleur s'eschange.
 Et les grains gnydiens de Thymele le fruit.
 Et la bruslante ortie, & le pyretre enduit,
 Enduy moy des mortelz le membre petit pere,
 Prenant du fier sanglier l'escumante colere,
 La cendre y demeslant de l'asnis genital,
 Y refondant le suif de ce lourd animal.

Et la gresse du iars: duquel la teste on plume
 Afin que plus paillard son desir se r'allume,
 Si du nerf du iars mesme en huyle ardant plongé
 Le nerf humain on frotte, il se dresse alongé,
 Trois grains de poyure adiouste à vn caillé de lieure,
 Et au suc de l'espine au mary de la cheure:
 Et du souffre viuant, d'un, de deux, ou de trois,
 Ou plus, engresses-en les vergongneux endroits.
 Du stellion la cendre (ô estrange nouvelle)
 Au iars Paladien on destrempe & demeste.
 Qui le gros ortueil droit de ce meslange a oinct,
 Il sent, comme enchanté, son petit membre en point:
 Et s'il porte gaucher, en main la mesme cendre,
 Il sent pour décocher son arbaleste tendre.
 Qui tient du crocodile au bras l'os machelier,
 Ou bien enuelopé dans la peau d'un belier.
 Les rongnons d'un poulet, ou d'une grenouillette
 Entre les rouseaux nee, ou de l'onde celeste
 Le gesier enchanteur, & le cheual dispos
 Qui viste gallopat de l'Ocean les flots, (mides,
 Court plus soudain qu'un dard, ces carrieres hu-
 Portant dessus son dos les vertes Nereides:
 Qui de la Titimale herbe preigne le laiët,
 Sur soy tient la mouelle, il sent ce mesme effect.
 Et qui du cerf vené la croix du cœur arrache,
 Et sur soy la portant au bras gauche l'attache,
 Ou d'un taureau tout roux le nerf genital sec
 En poudre redigé, dissoult, & beu avec
 Le Nectar des humains, iuste au poix d'une dragme,
 L'homme regaillardist & relasche la femme.

DE LA CONCEPTION

Or voy là l'homme en point à faire le deuoir,
 Il reste maintenant de femme le prouoir
 Qui soit de son qualibre egale en toute sorte,
 Affin que beaux enfans feconde luy rapporte.
 Si l'œil malicieux de quelque astre mechant
 De leur iuste vouloir l'effect est empeschant.
 Ou si la mine infuse en la creuse coupelle,
 Irreparable faute, en la iettant se gesele,
 Et à tous coups les trompe: il faut tout esprouuer,
 Tant que quelque remede on y puisse trouuer.
 S'enquerre curieux si c'est point la froidure,
 Qui cause le defaut que la pauurette endure.
 Que si c'est cela mesme, opposer il s'y faut,
 Ceste glace casser par le remede chaut,
 Ce feu morne attiser, luy conseillant de suiure
 (Tirant plus au midy) le droit moyen de viure.
 L'air qui au tour de nous se glisse humidement,
 Amande la froideur de son temperament:
 Et faire menagere ordinaire exercice,
 Combien que quelques vns peignent Venus assise.
 De son corps qu'elle frotte & refrotte le tour
 L'enclume mesmement où ses traits forge amour,
 Les cuisses & le poil qui tesmoigne de l'aage
 Que la fille est ia bonne à mener en mesnage.
 Le sommeil le sang glace & morfond les esprits,
 Chose du tout contraire aux ouuriers de Cypris.
 Que la femme ait le soing que son corps s'euacüe
 Par nature ou par art de l'humeur superfluë.
 Les auares soucis, le courroux eschauffé,
 Resuscitent l'amour sous la cendre estouffé.

Toute autre passion qui chaude trouble l'ame,
 En euentant son feu demy-esteint r'enflamme.
 L'humeur autheur du mal le premier banny soit,
 Et qu'elle vse des mets dont son mary vsoit:
 Et d'autres pour remettre en son train ordinaire
 Le cours trop retardé de sa purge lunaire.
 Leur goust aromatic & leur piquante odeur
 Subtilise le foye, euantille le cœur.
 Le fenoiil en est vn, & l'herbe qu'on reuere,
 Pour tant que le nom porte à la ville d'Homere,
 Et qu'elle sent la myrrhe, on mesle aussi parmy
 La graine bien sentant du memphitic amy,
 Qui faict par son seul flair, tant ceste herbe est puissante,
 La femme conceuoir, pour ven qu'elle la sente.
 L'orualle, le persil & cest herbage saint
 Dont du grand Iupiter le grand prestre se ceinct:
 Quand aux malins Demons il veut donner la chasse,
 Ou bien quand de son Dieu il implore la grace,
 De la graine duquel est saintement nourri
 Le simple & bel oyseau de Venus fauori.
 Ou deuant ou apres ses repas qu'elle tasche
 Vomir le phlegme gros, l'humeur qui plus la fasche
 Cause de son mal-heur, apres auoir humé
 Du thim tard fleurissant des abeilles aymé.
 Le bouillon, & celuy de l'origan onite
 Par la porte d'en haut chasse la pituite.
 Pour doncq's s'accommoder à la conception,
 Apres le vomitoire & la purgation
 A iun elle boira la pressure du lieure,
 Et la bourse pendante aux deux aines du Bieure.

DE LA CONCEPTION

Du Bieure Amasien, my-beste, my-poisson,
 Au Nectar angeuin, ou parmy la boisson
 De l'onde emmiellee & la mercuriale,
 Soit qu'elle soit femelle ou soit qu'elle soit masle.
 Le poyure Perusin, (le plant qui le produit
 A nostre vigne semble, à nos raisins le fruit)
 Ne s'eslongne iamais, qu'elle adiouste à ce nombre
 De l'arbre haut & droit dont le serpent craint l'ombre.
 Le fruit langue d'oysseau, & du cerf montaignard,
 Qui met la biche en rut de son mary paillard,
 De la mauue visqueuse, & les herbes en somme
 Qui eschauffent au liect amoureux l'homme.
 Le genitoire droit, face bruler du rat,
 Cestuy-là mesme encor de l'escumeux verrat,
 Ceux du regnard finet, & ceux du Capitaine
 Du camus regiment des bestes porte-laine:
 La feconde matrice au lieure pied-leger
 Ou leur char tendre y est aussi bonne à manger:
 De la corne de cerf, l'elephantine inoïre,
 La corne d'amalthee, & du vin fay luy boire.
 Ou luy donne à manger les humides cerueaux
 Du veau, du cerf, du porc, de pigeons, de moyneaux.
 Donne luy à manger du laict qui se fromage,
 Au ventre remaschant du dain s'affre & volage
 En la gresse & au sang d'un folatre aignelet,
 Donne luy à manger ou à boire le laict
 Qui chaudement se caille au ventre deshonneste
 D'un bouc, d'un chameau masle, & qui pend à la reste.
 Le meurte n'en soit loing, qui maugré les yuers
 Pour Venus couronner maintient ses rameaux verds.

L'honneur des beaux iardins les perles fay luy prendre
 Du plus doux grenadier, de son bouton plus tendre
 De l'escorce reduite en poudre bien menu,
 Et du coudrier basset premier de Pont venu
 Les caquerottes brusle, & la flairant racine
 Du fouchet rinager, & la frelleuse aluyné,
 Et les grains emperlez du genieure epineux
 De nul autres encor, boy les eaux, boy les ius
 Ou les prens verts, ou secs, meslez, seuls, à sa mode:
 A sa propre nature vn chacun s'accomode.
 L'heure plus opportune est celle du matin
 Dedans vn ius de chair, dans vne foye de vin
 Auecqu'vn œuf mollet en eau de fleurs d'orange,
 Ou du plant que l'abeille en ses ruches arrange
 Et qui retient le nom du Citron odoreux.
 Mais fay que ce pendant ce breuage amoureux
 Resente du cheureul des Indes l'apostume,
 Ou le flair plus exquis qui de l'ambre gris fume:
 Ou que de la ciuette il sente la sueur
 Et les plus chers parfuns à la teste & au cœur.
 Qui pour leur donner corps mollement les melange,
 L'autre en les recuisant les retaille en losange
 A angles inegaux l'vn large & l'autre estroict,
 En les iettant tous chauds sur le porphire froid
 N'y espargne le sucre & les especes rares,
 Le butin precieux des terres plus barbares.
 L'autre pour les garder de la corruption
 En fait en temps & lieu bonne prouision,
 Le confit és douceurs des rouseaux de madere
 Ou en l'œuure que faiët la mouche miellere,

DE LA CONCEPTION

Pour garder l'acorum tel fut tousiours le soing,
 Et les mentionnez seruant à ce besoing.
 Celle doncq' qui s'ennuyè estre tousiours brehaigne,
 De ceste mixtion gros comme vne auelaine
 Sur le temps que sa fleur commence à defaillir,
 Prenne par quelques iours, puis se laisse assaillir
 Du mary seiourné, impatient d'attendre
 L'heure que de son faict vn heritier s'engendre.
 De l'inceste Myrrha prens de l'arbre blessé
 L'humeur qu'amerement pleurant ell a versé,
 Et l'encens que larmoye vne autre arbre sacree,
 Et dont l'encensement les celestes recree:
 Du lentisque gommeux la perle distillant,
 Et le boys d'orient qui faict qu'en le brulant
 On sentent l'orient, & que le fleuve gange
 Nous amene flotté dessus sa vague estrange:
 Et du fruiet de l'enfant qu'Apollon larmoyant
 En Cypre transmua eternal verdoyant.
 Du Su l'epicerie & ses senteurs exquises
 Auecque l'eau de Nasse & de rose y soient mises.
 De ce petit Caos en quatre separé
 Un quard pende à son col, l'esprit euaporé
 Luy frappe la narine, & l'autre part seconde
 Seruira pour roller mainte pilule ronde,
 Dont matineusement deux ou trois mangera:
 Du tiers à son usage vn pessaire fera,
 Et le reste dissolt d'eau bouillante qui fume
 Par sous le cotillon son petit cas parfume:
 Qui n'a que commencé assez faict il n'a pas.
 Le haut ce porte bien, secourre aussi le bas.

Femme venez icy, choisissez la matiere
 Pour à vostre besoin composer le Pessaire.
 Des simples qu'amassez i ay pour vous tant de fois
 En mille lieux cherchez, ie vous donne le chois.
 Ausquels vous adioindrez la sarazine chere
 A la femme accouchee, & ceste autre herbe amere
 De Chyron, & l'hissope aux purpurines fleurs,
 La racine d'iris enuiant les couleurs.
 Iris nostre asseurance & de l'inique Althee
 Qui fit ardre son fils par son fils outragee.
 Et le ius verdoyant du pressuré nombril
 De la femme du ciel, & l'autre plus subtil
 Du sauuage cocombre errabond sur la terre,
 Sur l'heure se vangeant de celuy qui le serre
 Et qui l'ose toucher, frappant iniurieux
 De son ius reially en la bouche & aux yeux.
 De ce bel arbrisseau en qui le Priamide
 Fut mué, massacré du Roy tuteur perfide,
 On y mesle le ius du cornu fenugrec:
 Et des plants amoureux mets les graines avec,
 Et leur larmes encor, le suc qui semble au foye
 Que l'espicier marchant des Indes nous enuoye,
 Puissant, pour des viuants contregarder les corps
 Et de corruption contregarder les morts.
 Du ledum Cypriot, la resine gommée,
 Le ius de Pauacé d'Hercule sur nommée,
 Celuy du Therebinte rauallant la couleur
 Du plus luisant cristal, & des fleuves l'azur.
 Il s'en trouue qui font seruir à cest usage
 La tres-amere grene à la courge sauuage,

DE LA CONCEPTION

Et du Sumach Pontic le raisin rougissant,
 Qui seruoit és vieux temps de sel appetissant.
 Et de l'epy du nard la rousse cheueleure,
 Et de l'ongle odorant qui prent sa nourriture
 Et sa musquine odeur dans le mesme marest
 Où le Nard cheuelu & l'ongle odorant croist.
 Toute l'espicerie & parfuns de l'aurore,
 Auecque le saffran dont son giste elle dore
 Il y faut employer, & des aluns la fleur,
 Qui freslement ce rompt, de negeuse couleur,
 Et dont le lin se faict que le feu ne consume,
 De l'argent affiné la calabroise escume,
 Le Nytre clytien, sur se glaçant en sel,
 Et le sel dont l'on sert l'autel de l'eternel.
 N'y oubly-pas les fiels des bestes plus sauuaiges
 En qui l'ire des dieux transforma les visages
 Du cruel Licaon, le blaphemeur des Dieux
 Et Caliste sa fille, ou vn Astre des cieux
 D'Hippomene eshonté de sa femme courriere,
 De l'admirable hiene, vne beste sorciere
 De celuy qui rauit la fille d'Agenor.
 Des satires bouquins, des compagnons encor
 D'Ulisse que Circé par ses murmures change
 En bestes que la race infidelle ne mange.
 Et du viste pelaud accouples-y le fiel
 Et sa siente encor, & les faueurs du ciel,
 Le miel avec la cire vne double merueille,
 Tous deux l'ouurage blond de l'hiblenne abeille.
 Le pressurage amer du maritime ongnon
 Qui ores violent prent la force & le nom

De celle, qui du pere est à mort pour suiue,
 Pour luy auoir osté le cheueu de sa vie.
 De peur que ce secours ne nuise trop poingnant
 Tu le modereras doucement, y ioingnant
 De ces fiers animaux la venaison fondue,
 Et la moille de cil qui à son dan vit nuë
 Des Nymphes la princesse, ou la creme du laiët,
 Ou le laiët baratté qui de creme se fait.

En ceste grand forest pleine d'arbre & d'herbes,
 De semences, de fruiëts, & d'animaux superbes,
 Et des appriuoysez, va toy-mesme choisir
 Ce qui t'est plus commode, & te vient à plaisir.
 Pour fleurir on y treuue, & pour charger remede:
 (Car il faut que la fleur tousiours le fruit precede)
 Prends y ce qui te duit, ce qui dur & entier,
 Ne te pourra seruir, broy le dans vn mortier.
 Mynce moy l'herbe verte en poudre bien menuë,
 Reduy-moy l'Aromate, à la figue grenuë:
 Raliele & le remesle avecq le grain bouilly
 Du lin remolissant: soit le tout recueilly,
 Pour plus commodement l'adresser en la voye
 Des trauerses d'amour, couuert d'un drap de soye.
 Ou dans vne toyson conuient l'enuelopper
 Puis en huile nardin mollement le tremper:
 Ou en huile de rose au sang d'Adonis teinte,
 Ou de la fleur qu'au cœur le François porte empreinte.
 Sur la fin de son terme elle mesme ait le soing
 A sa mesure egal de se forger vn coi ng,
 S'arrondir vn bouton, qu'elle mesme se bousche
 Cependant que l'amour reciproque les touche,

DE LA CONCEPTION

Droit de ses traits dorez iusqu'au cœur les tirant,
Et les laissons tous seuls faire le demeurant.

En la mesme forest les matieres on treuve
Dequoy faire les bains desquels elle s'estuue,
Cuite ou dedans l'eau douce ou és flots de la mer,
Pour veu que ioinct y soit le sauinier amer,
Qui pres-terre se rame, & mille autres encore
Qu'il n'est besoing fascheux qu'encor' ie rememore.
Des vns elle prendra l'exalante vapeur
Au trauers d'un tuyau, & des autres l'odeur:
Et des autres encor soit la grise fumee
Par la bouche d'embas secrettement humee.
Du bitume du lac, où Dieu fist abismer
La vie sodomite, & en fist vne mer.
Et de l'Iuray, n'aguere entre les blez l'elite,
Et du gagate noir l'encensement proffite.
Or dans l'estuue seche, or dans l'humide bain
Suer & s'essuyer est & plaisant & sain:
S'oindre de mesme unguent, se froter de mesme huyle
Dont son homme se frotte & s'oint, est chose utile.
Mets-y de Daphne encor la perle teinte en noir,
Et l'anet couronné d'une fleur belle à voir:
La maryolaine gente, & qui ne porte enuie,
Se contantant des siens, aux honneurs d'Arabie.
Sans la senteur omettre, (ort qu'elle sente mal)
Du Bioure, or' aquatic, or' terrestre animal.
N'y oubly la racine à l'herbe decoupee,
Sa fleur à l'arc des cieux, sa fueille à vne espee
Semble naïfument, ny du ben blanchissant:
Le baume precieux iamais ne vieillissant,

L'huyle du triple poyure & des grains de ceste herbe
 Qui reuange la mort d'un Roy Iuif trop superbe,
 De celle, qui s'auouë au messager des Dieux,
 D'esquels s'oindre & frotter il affier le bas lieux
 Que la nature cele, & que l'honneur ne nomme,
 Ny plus ny moins qu'on fait quand la faute est en l'homme.

Celle doncq' qui desire un iour mere se voir,
 Face ce qui s'ensuit pour son desir auoir.
 Qu'elle tire du laict de la beste timide
 Dont la peau de Palas couure la fiere Egyde:
 Aussi tost qu'elle aura son petit Cheurotté
 Ains que debout il soit, & sa mere ait teté,
 Qu'elle face soudain de ce nouveau laitage
 Pour le porter au bras, gauche & un mol fromage,
 Couuert d'un linge blanc, n'ait horreur d'aualler
 L'ement de un faucon le grand brigand de l'air,
 Pour l'honneur d'estre mere, & n'ait horreur de boire
 Du foy' rosty la poudre, ou du sec genitoire
 D'un petit porcelet n'a guiere cochonné,
 Qu'i seul d'une portee est de sa mere né.
 Pour bien tost engroisser mange de la racine
 De l'artichaut armé de mainte & mainte espine,
 Et le ius de la sauge aux lionnes cognu
 Soit premier qu'embrasser trois iours par elle beu.
 On en dit presqu' autant de l'herbe imperatoire,
 Qui veut de sa racine en vin angeuin boire,
 Et le royal Cumin senty tant seulement
 A lors que l'androgine ils font ensemblement.
 Et si en son secret elle estuyë sa grene,
 En bref elle sera de fils ou fille plene.

DE LA CONCEPTION

Il en prendra de mesme à celle qui mangeant
 Est des hieres l'œil mille fois se changeant,
 Porter au col penduë vne pierre de l'aire
 De l'aigle au ciel volant pour seruir d'escuyere
 Au Roy des eternels, ou bien pour le plus seur
 Sur l'artere du bras qu'on dit respondre au cœur,
 Fait receuoir la femme, & retenir plus ferme
 Ce qu'elle aura receu, & le porter à terme.
 Parmy ses mets vser moderement de sel,
 Vn maritime humeur deseché, sans lequel
 On ne vit, on ne dit rien de plaisant au monde,
 De sterile peut rendre vne femme feconde.
 Boire quarante iours l'herbe pied-de lion
 Habilité la femme à la conception.
 Boire du lait d'Ic que Iuno la despite
 Jalouzement moucher fist par toute l'Egypte.
 Qu'elle ait sept iours durant par sus son nombril ceint
 Vn bandage pourprin au siel d'un bouc reteinct,
 Quand le croissant vousté recommance à renaistre
 Le face à son mary charnelle recognoistre.
 Mais cependant se garde aux simples s'acointer,
 Qui peuuent enuieux leur affaire gaster
 La mente cependant qu'elle est verte n'empesche
 La generation, mais si on la prend seche
 Elle debande l'arc, la ruë est dissipant.
 Les diuers aguillons d'amour & du serpent.
 Les prestres anciens pour auoir plus propices
 Les celestes vsoient de ruëés sacrifices
 Femme du chast'ozier: gardé vous d'aprocher

Au feste de Ceres qui seruoit pour coucher
 La pudique prestresse, & du faux le fueillage
 Rebelle se declare aux droits de mariage:
 Et toute sa semence au ius refrigeran:
 Des pauots incisez amour vaincu se rend,
 Et le campre Indien presque du tout le tue,
 Acheué de tuer il est par la laittuë.
 On dit que le persil aux trepassez voué,
 A souuent, estant pris, l'esguillette noué.
 Les nymphes, le pourpie, & les froids iusquiames,
 Sont ennemis iurez du passe-temps des dames.
 Le vin beu par excez le sang fait refroidir,
 Et l'estude obstiné engarde de roidir
 L'arc des loyaux amans, & desbander l'empesche,
 Estaint son feu natal & son huyle dessèche.

Si quelqu'une se trouue en despit de nature,
 Qui soit à l'esperon inhumainement dure,
 Plus que le diamant, plus froide qu'un glaçon,
 Qu'on voit aux esgoux pendre en la froide saison:
 Plus forte à esbranler que le pied d'une roche,
 Qui sans force forcee au montoüier n'approche:
 Appren doncq' comme il faut l'apprendre à sy ranger.
 Qui d'un pigeon le cœur luy donne pour manger,
 Où en quelque breuage amoureux luy fait prendre,
 La contraiçt volontiers entre ses bras se rendre.
 Comme celle qui porte un floc teint au sang noir
 Des sœurs volant sans plume & qu'on nomme du soir.
 Si de la titimale elle tient la mouëlle,
 La belle à son mary ne fera la rebelle.
 Ou si sous son cheué cependant qu'elle dort,

DE LA CONCEPTION

Il recele le traict extraict d'un homme mort.
 Ains que le fer meurtrier tombant la terre touche,
 Elle oublie aussi tost sa nature farrouche.
 Mais sur tout la hiene eschangeant tour à tour.
 Et d'an en an son sexe a grand force en amour.
 Car la femme qui a sa vergongne mangée,
 A l'appetit de l'homme est aussi tost rangée.
 Qui la moustache encor' de ce fier animant
 De l'une ou l'autre leure a baisé seulement,
 Elle suiura soudain de son mary la voye:
 Ou qui luy fait manger de la langue d'une oye,
 A son plaisir la tourne, ou portant le poulmon
 De l'oyseau en qui fut mué Dedalion
 Pere de Chioné, en la peau de Pigmee,
 Qui fut femme, or' oyseau, contre les siens armée,
 Humble elle se rendra: Que si de galantis,
 Qui pour punition enfante ses petits,
 D'où la parole naist, l'os de l'aureille mange,
 Sa rigueur en pitié amoureuse elle change.
 Je ne voudrois pour rien qu'aux femmes fust donné
 Ce qu'on arrache au front d'un poulain nouueau né:
 Seroit pour enrager, plus chaut que le feu mesme
 Ard celle qui le prent, & par ce moyen ayme.
 Mais tresbien ie voudrois qu'elle eust le cœur couuert
 De l'amiable aimant, le sein de iaspe vert:
 Qui porte en œuvre d'or la hieracite enclose,
 Au mary refuser ce qu'il demande n'ose:
 Auoir dedans le ^{doigt} ou à son col pendu
 Le ioyau recouuré dans le gesier fendu
 Ducoq, ou le beril a la couleur plus pale,

Eternelle maintien l'amitié coniugale.

Si cause est de ce mal, un humeur abondant,
 Surgeonnant, bouillonnant, croupissant, inondant,
 Et l'entement glayreux, qui destrempe & qui noye
 Ce peu que le pauvre homme en cest abisme enuoye:
 Abisme à qui sans cesse est force de baailer,
 Pour laisser cest egout regorgeant escouler.
 Qui en sortant la pique & ne cesse la mordre,
 Faisant en la nature un horrible desordre,
 Laisant relentissant les parois du canal
 Que nature deuoit faire rude inegal,
 Affin de mieux serrer & retenir plus ferme
 De l'arbre renuersé le chaut-humide germe.
 Que peut-on faire là? ainsi voit-on souuent
 La fleur de l'arbre choir secoué par le vent.
 Le marescage ainsi qui en ce fond regorge
 Le germe humain enfondre & luy coupe la gorge.
 Ainsi aduient au grain en la terre recen,
 Qu'une grand pluye estouffe auant qu'il soit conceu.
 Et tout ainsi la terre or ores emblauee,
 Est d'un lagage d'eau aual courant lauee.
 Si tu as descouuert par ce signe euident
 Que s'en soit là la cause, il luy faut estre aydant.
 Il luy faut mettre en teste vne forte partie,
 Sa qualité contraire ou son antipatie.
 Recourir au secours & du tout ruiner
 L'humeur qui veut, tyran, seule icy dominer:
 Mise a sec & à sac qu'on la destruisé toute,
 Que d'elle il n'en demeure vne petite goutte.
 Que l'air, que le travail, le Laconique bain

DE LA CONCEPTION

Le coucher sur la dure, & le soing, & la faim
 Et tout ce que l'on dit chose non naturelle.
 Qu'on bande, qu'on esleue & coniuere contre elle,
 La voy-là ie la voy qui sort secrettement,
 Et par derriere fuit vaincuë honteusement.
 Qu'on la laisse courir, remparans ceste bresche
 Exterieurement par moyen qui la seche,
 Et la reserre estroicte: & que desormais soit
 Plus fidelle à garder ce qu'en elle conçoit.
 Sur ayons l'acerum racine n'ouïailleuse,
 Et celle du souchet ionc à la verge angloise:
 De la dure bistorte enterrant son pied tort,
 Qui tortillé ressemble à vn serpent qui dort.
 Ayons la tormentille, & sa seur quinte feuille,
 De forme & de vertu l'une à l'autre pareille.
 Le meurte tapissant les riues de la mer,
 Pour l'amour de la mere au Dieu qui fait aymer.
 De Cyparis la noix, & ceste aigrette galle
 De la feuille du chesne, & de son fruit l'escaille,
 Et du sumach le tan, la fleur & le bouton
 De la pomme punique, & le mol reiectom
 De la ronce espineuse, & la perle sacree
 De l'arbre qui aux dieux & aux hommes agree.
 La rose vermeillette és espines croissant,
 Et le rouge arbrisseau soubz les vagues naissant,
 Et du liege eternal l'escorce reuenüe,
 Le lierre serpentant, & l'herbe cheual-queuë.
 L'encens atramitain & son escorce aussi,
 Et le ius du Ledun grassement espessi.
 Et l'un & l'autre Cyste avecque l'Hypociste

Qui ne croist iamais loing de l'un & l'autre Cyste.
 Et du timide cerf le branchage bruslé,
 La motte armenienne, & le limon sellé
 De l'isle de Lemnos iadis portant la marque
 De Diane la chaste, ore d'un grand monarque.
 L'egyptienne Acacie, & l'automnal raisin
 Par le soleil recuit sans oster le pepin.
 Et le plus franc alun & de roche & de plume,
 Du fer chalibeen l'estincelante escume,
 Et tant d'autres encor' que i ay dit cy deuant,
 Dispercez par l'aduis d'un medecin scauant.
 Des vns cuits en vin brusque on se sert pour estuue,
 Ou bien pour si bagner on verse en vne cuue.
 Les autres on siringue, ou tiede humidement,
 On reçoit les vapeurs de leur bouillon fumant.
 Ou sur la braise ardente elle en reçoit encore
 L'odorante vertu qui fumant s'euapore,
 Où maint petit verroil ell en pourra former,
 Pour de son cabinet l'antichambre fermer. " (oindre
 Pour les reins maint emplastre & maint unguët pour
 Les lieux circonuoisins deuant que de se ioindre,
 Ains qu'aux prises venir & que deux corps aymez
 Hermaphroditement soient en un transformez.

L'autre sur qui l'excez de la chaleur domine.
 Seche, eueillee, hagarde & que Venus encline,
 Fretillarde, lassive, à qui souuent le bas
 Blesse, demange & ard moins assouuy que las.
 Ne charge volontiers: car tout ce que peut l'homme
 Ietter dans ce fourneau ambrasé se consume.
 S'esteinct, dissippe & perd si tost qu'il est receu,

DE LA CONCEPTION

Comme vne goutte d'huyle au milieu d'un grand feu:
 Comme qui semeroit vne fertile graine,
 Au cœur d'un chaut esté sur la bruslante arene.
 Ou comme qui voudroit avecqu' un peu d'humeur
 De quelque ardente fieure estancher la chaleur.
 Hé que luy ferons nous si rien ce mal n'appaise,
 Si esteindre ne peut de ce chaut mal la braise.
 Et quoy la lairrons-nous cruellement brusler:
 Non non, crions au feu, qu'on rafraichisse l'air,
 Qu'on la iette dans l'eau d'un bain faiçt pour esteindre
 Ceste flamme, & son corps faut tout mouiller & oindr
 Du ius qui du nombril de Venus est espreinçt:
 Ou bien de la morelle, ou du branchage sainçt
 De l'osier amerin, & que sur sa ionchee
 Sur un lodier fueilli elle dorme couchee.
 Comme sacre à Ceres, & là profondement
 Sans ennuis iour & nuict son temps passe en dormant.
 Que le soleil leuant ne la trouue leuee,
 Que le couchant la laisse où il l'auoit trouuee.
 Le long dormir engraisse: & qu'on frotte l'endroit
 Qui demange le plus, de quelque oignement froid.
 Le ius & la racine à la nymphe pudique,
 Y seruent, qu'on les mange, ou qu'on les y applique.
 Mais on y doit mesler de l'escume d'argent,
 Et du plomb resolu en vinaigre rougeant,
 L'eau de la belle fleur en riche pourpre teinte,
 Et du camphre indien la gomme pure & sainte.
 Du plomb vif argenté vne lame luy ceins,
 Comme d'un ceinturon tout le contour des reins.
 Le songe elle perdra brouillant sa fantasie,

Et l'amour qui de iour tient sa raison saisie.
 Prenne de la toyson du passager d'Helé,
 Et la mouëlle du chef du cerfeceruelé,
 Des compagnons d'Ulis, d'une cheure peureuse,
 Et en face vne tante à sa playe amoureuse,
 Qu'en huyle du beau lis elle tiendra premier,
 Ou au plus doux extraict des cœurs de l'amandier.
 Pour saulse en tous ses mets à la table se serue
 Du vinaigre froid-chaut, sec-humide il preserue
 Du bouccon apposté, l'estomac soit repeu
 D'herbage cru & verd, & qui nourrisse peu.
 De cent sortes de fruiçts de garde ou prime-rouges,
 Prune, pesche, abricot, fraise, cerises rouges.
 Le cocombre, & sa suite & salade d'esté,
 Le laiçt ou doux ou aigre, & ce qui a esté
 Aux froides deffendu d'une loy rigoureuse,
 A celle il est permis qui est trop amoureuse.
 Et la pomme suiçcte à mile-fois changer
 Son nom, son goust, sa forme elle peut bien manger.
 Et la poire qui est mile-fois plus diuerse,
 Et la molle chasteigne à l'escorce qui perce,
 La semence de saule auortant de son fruiçt,
 Le fruiçt que l'ozier chaste a chastement produiçt.
 Du cheneué la grene, & la dure qu'engendre
 Le cheure-fueil qui ose à un plus fort se prendre.
 Et tant d'autres encor' lesquels par elle pris
 Refroidissent pudics les ardeurs de Cypris.
 Si elle ioinçt du fiel de cil qui sur sa crouppe
 En Crete traieçta la mareine d'Europe,
 A la gresse meslé du traistre, qui mussé.

DE LA CONCEPTION

Piqua mortellement le pied d'Euridicé,

Où au sain d'Elpenor elle pourra encore,

Ce fier vaultour donter qui son foye deuore.

Si sont uens entonnéz prisonniers detenus

Comme ceux qu'enferma és peaux de boucs cornuz

Des tempestes le Roy, de peur que par leur rage,

Ulis ne perillast par un autre naufrage.

Ou tels que ceux qu'on oit és abismes hurler,

Et qui les fondemens du monde font crouller:

Ainsi des uens enclos au ventre la secousse

Resouffle la sarence & dehors la repoussé.

Et comblant tout ce lieu de son estre leger,

Ne laisse espace aucun pour un homme y ranger.

Que s'il y est receu ell l'agite & bouillonne,

Tout ainsi que le flot que le nort tourbillonne.

Vers ces quartiers y a un champ plein & vny

D'herbage bien menu & de fleurs bien garny,

En forme de triangle ainsi que l'on desseigne,

La riche region que le Nil sept fois baigne.

Si elle ne conçoit, mercy ce mauuais vent,

Elle touche, elle voit, rondement s'esleuant.

Un petit moncelet se hausser su la pleine,

Auecque vne douleur qui luy saccade l'aine,

Auecque un petit bruit remurmurant un son

Tournoyant à l'entour de ceste liaison.

Dont la mere à l'enfant & l'enfant à la mere

Se sappe pour succer sa viande premiere.

Quel remede a cela? grand les portes ouurir,

D'emplastres, de sachets le ventre luy couurir:

L'estouffer, l'accabler, par parfums, par pessaires

Le frotter, le chasser par les armes contraires,
 Que l'ingenieux maistrè a prestes dans la main
 Des simples chauts & secz, qu'il y employ' le grain
 De l'anis, de l'anet, du cumin, de la rue,
 La mente & le mentastre à la fueille bourruë,
 La drogue du leuant, dont i'ay par sa vertu
 Le froid son allié n'aguere combattu.

Et quoy de ce d'estroit, si l'entree est estroite
 Si de ce gil-batard la goulette n'est droite:
 Mais tourne de biais, ou bien de la façon
 D'une trompe guerriere, ou du lent limaçon,
 Si que le laboureur qui n'est ny froid ny lasche,
 Et qui à pris ce champ de la nature à tasche,
 Tout droit entrer n'y puisse, il a beau s'efforcer
 Pour de ses reins feconds soy-mesme ensemencer.
 N'est-ce pour enrager, qui n'a loysir d'attendre.
 Un peu de patience, entens, ce qu'il faut prendre:
 Les semences du lin, le fenegré cornu,
 La mauue & laguy-mauue, & du cassier cognu
 Au seul Egyptien, la liqueur noire douce
 Que nature enchassa en l'estuy d'une gouffe,
 Et tout ce qui est né expres pour remollir,
 Fay-les en moytié huile en moytié eau bouillir
 Longuement, & souuent mouille ceste ouuerture,
 Mouille-la tant que molle ell' deuienne de dure,
 Se laue de ce bain, & du marc epeffy
 Un pessaire se fourre au trou trop restrecy,
 Qu'elle y laisse long temps, puis son qualibre augmente,
 Y ioingnant du Souchet la racine odorante,
 Et des Indes l'espy: pour plus mollifier

DE LA CONCEPTION

Entasses-y le fruiçt du porte-laiçt figuier.
 Remets-le violent & par force le pousse
 Et plus ferme & plus gros dedans la mesme fousse.
 Qu'il croisse encore vn coup, la fueille d'Arthemis,
 Et des puces avecq' les deux plants ennemis,
 Et les pleurs que myrrha arabesque larmoyë:
 Mais fais le tout couvrir d'un drap en fine soye.
 Adoints y les senteurs des penchereus parmi,
 Iamais n'en soit absent de smylace l'amy,
 Que ce coing engressé pousse fort roidde & ferme,
 Si souuent que ce tronc s'ouure fende & deferme,
 Et s'il va biaisant dy moy que feras-tu.
 J'auray pour redresser ce passage tortu
 Une tante de plomb, ie mettray ceste soude
 Pour long temps l'y tenir, en la fosse profonde.

Et si quelque meschant au demeurant fasché
 De te voir des enfans ta le ventre bousché,
 Et si par un boucon, par charme ou autre chose
 Ta matrice retient infecundement close:
 Si l'autheur du meschefme peut estre euident,
 J'yray tost au secours à son contraire aydant.
 Combattant per à per i'auray le choix des armes,
 Aux charmes opposant de plus forts contrecharmes.

C'est assez pour ce coup ce n'est ores le temps,
 Icy n'est pas le lieu de rendre tous contants:
 Au docte manouurier la cure soit remise
 Quand la cause requiert qu'on use de main mise.

Mais d'autant que chacun desire volontiers
 Plus-tost qu'une heritiere auoir un heritier,
 Mesmement les plus grands, les nobles & les princes.

Pour leur laisser leurs noms, leurs armes, leurs provinces.
 Le magistrat aussi en voudroit bien auoir
 Pour auant que mourir à ses estats pouruoir:
 Et aussi que nature au plus parfaict s'adonne,
 En ces vers la façon d'un masle ie leur donne.

Lors que l'aage de l'homme est preste à faire fleur
 Que l'humeur amoureux bouillonne dans le cœur,
 S'il trouue vne moytié à sa moytié egale,
 Tout du beau premier coup ils produiront un masle.
 Il ne s'y faut laisser y allant trop souuent:
 Qu'il obserue songneux la part d'où vient le vent.
 S'il tire du costé des aquilons qui tremblent,
 Ils feront un beau fils si leur pieces asssemblent.
 De toutes les saisons plus commode est l'Esté
 A faire des garçons, sur le dextre costé,
 Où le sang demicrud au sang vermeil se forme.
 Que maistresse du lict la femme tousiours dorme:
 Et si lors que parfaict de son fleuve est le cours,
 (Ce qui faire ce doit en cinq ou en sept iours)
 Si des le premier iour que la vague est passée
 Elle est iusques au quint tous les iours embrassée:
 Elle engroisse d'un fils, iusqu'au huit depuis cinq
 Son flanc, tu faux nature, est d'une fille enceinct.
 Si de huit iusqu' à douze elle se fait cognoistre,
 D'un masle elle verra son ventre enfler & croistre.
 Passé douze, l'on dict, que ce qu'elle fera
 De Mercure l'enfant & de Venus sera.
 Et si la femme grosse a iuste terme enfante
 Quand en sa plenitude au ciel Phebe est luisante,
 A la premiere foys qu'ils se ressembleront,

DE LA CONCEPTION

*S'ils ne battent à froid vn male ils forgeront.
 Mais si la femme accouche en la lune nouvelle,
 Et qu'elle engroisse apres, sera d'une femelle.
 Qui veut vn fils planter, qu'il ne face l'amour
 Que depuis la minuiet iusques au point du iour.
 Car celuy qui tout soul apres souper besongne
 Ne fera qu'une fille, ouurage d'un iurongne.
 Qui la ré du chardon horriblement pointu
 Mange, & qui mange encor' de l'artichaut testu
 La delicate chair sucçant l'escaille tendre,
 En sa moytié fendue vn enfant maslé engendre.
 Qui veut faire vn beau fils mange le gros ongnon
 De ceste herbe portant des Satyres le nom.
 Qui de Cynosorchis mange aussi le plus ferme,
 Sa femme luy rendra vn fils au bout du terme:
 Si ell' a pour sa part le flestry ramoly,
 A pestrir vne fille elle n'a point falli.
 Autant dire en peut-on de la plante greuee
 Du Dieu au chefelé, a la plante empennee:
 Et tient on si la femme estant son moys escheu,
 Bien tost apres le ius de ce plant maslé a beu,
 Et la fueille mangé trois iours durant l'espace,
 Pour veu que son mari au quatriesme l'embrasse,
 Qu'elle patronne vn fils, mais du fueillage vert
 Son parnasse fendu cependant soit couuert.
 Mais si de la femelle elle mince, elle pile
 Et en hume le ius, ne fera qu'une fille.
 Si enuiusement vne enceinte a mangé
 La Sarrazine maslé au fueillage alongé
 Auecque le rosty du rauisseur de celle*

Qui des trois parts du monde a nommé la plus belle.
 Ou en la chair d' Apis, qui le premier trouua
 Le contre qui premier l'Égypte cultiua.
 Ceste plante enueloppe, & de sa main secrette
 Pour vn masle y mouller dans sa fente la mette.
 Si le mari encor' durant le doux sejour
 Qu'il faict en Salmacis, la fontaine d'amour:
 Si baignant Androgine avec vn blanc bandage
 Le pied dextre se lie, vn masle est son ouurage.
 C'est vn peu plus que rien, si l'autre pied est ceinct,
 Lors que deux ne font qu'vn d'vn lien qui soit teint:
 Que si l'vn des bessons pris du costé du foyé
 D'vn rat & d'vn verrat menument on poudroye,
 Et qu'il soit par la femme enuieusement beu,
 Si retenu ell' a, vn masle ell' a conçu:
 Si au contraire arriue, vne fille elle engendre.
 Si du gauche on luy fait le tesmoignage prendre:
 Si le caillé d'vn lieure est pris par le mari,
 Si d'vn lieure femelle, on donne l'amarri
 Ou le rond tourbillon du masle pour le boire:
 Si souuent elle mange, ou boit le genitoire
 Des piolants poussins, iuste au terme prefix
 Lucine appellera accouchant d'vn deau fils.
 Que pour rendre plus beau & de meilleure grace
 Tandis quell' en sera grosse & nourrice, brasse
 Et mesle ensemblement de la pomme de pin
 Le fruiet né sous l'escaille, & du laiict, & du vin,
 Et l'amoureuse Palme, & la Myrrhe eploree,
 Et de crocus de blond la perruque doree.
 Qu'ell' prenne du matin de ceste mixtion

DE LA CONCEPTION

Qui sert tout d'un beau train à la conception,
 On dit, chose admirable, une chose diuine
 Qu'elle, mangeant souuent, quand son terme auoyssinc
 Le fruiçt du flanc coingner de poils d'or cotoné,
 Vn fils enfantera à la bonne heure né,
 Ayant l'ame gentile, industrieuse, accorte,
 Et fera que legere à son terme le porte.

Mais ce n'est pas le tout qu'enceinte deuenir,
 Il faut ce cher depost fidelle retenir
 Et l'empescher de fondre, & par la mesme porte
 Qu'il y estoit entré qu'auorton ne ressorte.
 Par le persil bastard il est fixe arresté
 Si la bouche le prent, le panais moucheté
 Trop glissant le retient, & la mauue qu'on pile
 Auecque gresse d'oyë, enduite y est utile.
 Au secret des secrets qu'on ne touche ny voit
 Applique l'oingnement qui de l'huyle reçoit
 Que de la noix royale à fine force on presse.
 Et l'encens myneen, & du porceau la gresse.
 De la sauge la fleur & son fueillage blanc
 Viuifient le fruiçt demi mort dans le flanc,
 Si par la mere ell'est durant sa grosse prise
 Comme la tormentille ou prise ou dessus misse,
 Aussi bien que sa seur au fleurissant espy.
 Ardre l'on faict le corps de l'archer porc-epy,
 Qui contre son chasseur herisse mille pointes:
 Ses cendres elle boit, ses aines en soient oinctes.
 Fays en autant encor brulant les herissons
 Par la nature armez d'autres mile poinçons:
 Et sur ceste partie à nommer des-honneste

On plaque l'animant qui tire de sa teste
 Corne, pour se guyder, qui sans pieds & sans os
 Niomide, sa maison charge dessus son dos.
 Or à fin que ce fruiet en sa coque demeure,
 Son temps déterminé, que la datte n'en meure,
 Face au soleil secher, & le grain duquel Tyr
 Teint les draps precieux, pour les princes vestir,
 Du lentisque perlé, & ceste gomme encore
 Dont le pauvre pecheur l'ayde du ciel implore:
 Conioinctement ensemble en un œuff frais meslez,
 Soient par la femme grosse en humant auallez.
 En l'herbe du gramen à la blanche racine
 Qui cherche curieux y trouue vne vermine:
 Ains, que ce vermisseau à la terre ait touché.
 Que l'enceinte le porte à son col attaché,
 Ou que cinq ou que sept de ces vers ell' deuore:
 Ou si le poissonneau qu'on appelle remore,
 Qui sur la rade peut aux Nort d'est resister.
 Et deux grands gallions eschouez arrester,
 De deux grands empereurs, ou bien ceste coquille
 Ou premier s'engendra du ciel chastré la fille.
 Qui n'eut moindre pouuoir les desseings ruinant
 De ce cruel qui guide alloit effeminant
 En chastrant sa ieunesse, au bras tien attachee,
 Ell' portera son fruiet au neusiesme accouchee.
 Si encor ell' tient vne branche de guy
 Religieusement sur le chefne cuilly:
 Religieusement si ceste branche porte
 Ne craigne le danger que iamais ell' auorte.
 Celle qui de l'oysseau qui plane au ciel volant

DE LA CONCEPTION

Qui ministre au grand Dieu le tonnerre brulant,
 Qui se baignant dans l'eau sa ieunesse retrouve,
 La pierre peut auoir sans laquelle il ne couue
 A son col appenduë, attacher à son bras
 Fera que l'embrion ne s'ecoulera, pas.
 Et le iaspe madré de cent couleurs diuerses
 De verte se changeant en rouges, iaunes, perses:
 Et celle là qu'on trouue es ventrailles du Dieu
 De Memphis, ressemblant à celle qui du feu
 Du tombeau de Typhæ, est recuite & brulee.
 Ou celle là encor' de la beste immolee
 Pour la greque Yphigene, ou celle de saint Pol:
 Si l'une de ces trois, ou qu'on la pende au col
 Ou qu'on l'attache au bras de quelque femme enceinte,
 Qu'à bon port ell n'arive il ne faut auoir crainte.
 Qu'elle recoiue en bas la puante vapeur
 Des charbons arrosez de l'infame liqueur
 Que rend l'animal fier que des ondes le maistre
 Pour seruir aux humains de la terre fist naistre.
 Ou esgorge la beste en qui le cuysse-né
 S'estoit, tremblant de peur, en Egypté tourné.
 Comme les autres Dieux celez sous autres bestes
 Chassez par les geans de leurs maisons celestes.
 Fais en brusler le cuir rebours se herissant
 De ce poussier cendreux, si son corps est gressant,
 Iusqu'au neufiesme ira: & ainsi chasque annee
 Renaitre se verra d'une belle lignee.



LE TEMPLE DE L'AME, EXTRAICT
DE L'ÆSCVLAPE DE R. B. A. M.

A

TRESHAUT ET TRES-IL-
lustre Prince, Monseigneur le Duc,
fils de France, & frere vnique
du Roy.



*Sfiste à mes desseins, ô diuine puissance,
Et me fais acheuer l'œuure que ie commence:
Oeuure laborieux, sur nul autre imité,
Temple, que le premier à la diuinité
De l'ame ie basty, le premier ie dedie*

*A l'ame, qui de l'homme est l'immortelle vie.
Fay, qu'immortel comme elle il puisse triompher
De l'eau, du feu, du temps, de l'orage & du fer.*

*Ie ne quiers que me soit ceste grace donnee
Par ton moyen, Pallas, deesse vierge-nee
D'un dieu éceruelé, & de toy ne depend,
Apollon, mon secours, ny de ton fils-serpent.
De vous ie n'ay que faire: Aussi ie ne m'adresse
A si fantasques dieux, ny à telle deesse.*

*Ains, Seigneur eternal! qui n'es pas vn dieu feint,
C'est toy, qui m'octoyras vn entendement saint:*

O iij

LE TEMPLE

Et qui m'enseigneras la science parfaite,
 De Bezelel l'eleu excellent architecte
 Du sacré paviillon, que tu vins habiter,
 Dieu entre nous mortels, que ie puisse inuenter
 Aussi nouveaux desseins, pour ouurer & par-
 Le tabernacle humain, de l'ame le sacraire. (re
 Reforme moy le cœur, & me conduy la main:
 Car sans ceste faueur mon labeur seroit vain.
 Vous qui n'auetz de l'ame opinion estrange,
 Et n' imaginez pas que ce soit la meslange
 De la terre & de l'eau iointe temperement,
 Que de l'air & du feu prenne son mouuement.
 Que soit vne armonie accordante en discorde
 Des freres ennemis que la discorde accorde.
 Que ce soit vn esprit chaudement allumé,
 Un sang arterieux dans le cœur enfermé,
 Vne glissante humeur dont nostre corps sabreue.
 Vne moitte vapeur qui de l'humeur esleue.
 Vn feu tout espessy d'athomes rondelets,
 Vn esclair agissant dedans noz intellets,
 Vne essence vniment aux animaux commune,
 Qui d'une esparse en tous se refait de tous vne.
 Entrez-y librement: car il vous est permis
 Par moy qui suis son prestre en ce temple cõmis.
 C'est à vous seulement que i'en ouure la porte:
 Doncq' approchez-vous en, mais que l'on y apporte
 Un cœur non curieux, n'en voulant plus sçauoir,
 Que l'esprit en comprend & la veuë en peut voir.
 Venez & regardez la merueille de l'œuure.

Ou l'aduis merueilleux de l'ouurier se descouure.
 Et d'elle quant & moy, que le sor inconstant
 Et l'ordre sans raison n'en sçauroit faire autant.
 Que ses compartimens sont pris sur le modelle,
 Tiré dans la pensée infinie,eternelle,
 Representation de la diuinité,
 Ainsi que le rayon est fils de la clarté.

Mais arriere bien loin, ô vous trouppé infidelle,
 Qui vous figurez l'ame vne chose mortelle.
 Escartez vous d'icy, retirez-en voz pas:
 Car dy mettre le pied vous ne meritez pas.
 Retournez vous veautrer, pourceaux, dedans l'ordure
 D'un Protagore Athee, & d'un sale Epicure,
 Où de sa propre main Dieu soy-mesme s'est peint.
 Et vous gardez d'entrer dedans ce temple saint:
 Affin que ne souillez par vostre dire infame
 Le saint des saints où est le logis de nostre ame:
 Si ne voulez sentir la vengeresse main
 Du tout puissant qui peut foudroier tout humain.

O grand Duc c'est à toy (encore que suiuié
 Ton illustre vertu soit de la faulse enuie)
 Que desormais i'adresse & mes vers & mes vœux.
 Soit doncq' leur cours de grace & facile & heureux:
 Haut en est le subiect, & l'entreprise grande,
 Aysee ell' me sera, si mon Duc le commande:
 Si de son œil benin il me fait le signal
 Au Cigne Vendomois* il me peut faire egal.
 Et plein de la fureur qu'aux siens Phæbus inspire,
 De mortel desormais on ne m'orra rien dire.

* Pierre de Ronsard

DE L'AME.

Tant aura eu de force en mon entendement
 De mon Prince & Seigneur un clin d'œil seulement.
 Car, ou soit que tu guides vne nombreuse armee
 Par ta vertu presente à bien faire animee,
 Rendant les plus couars magnanimes & forts:
 Ou soit que tu preside entre mille Nestors,
 (N'ayant pas accompli de ceste vie humaine,
 Qui sans retour s'en va la troisieme semaine)
 De ton sang trop prodigue, à fin de soulager
 Tes François, non plus francs du ioug de l'estranger:
 Et pour mettre vne fin par vne paix durable
 A la guerre, au vainqueur, & vaincu dommageable,
 En destournant le fer rouge de nostre sang,
 Pour des tyrans ouvrir l'estomac, & le flanc,
 Et reioindre en un rond du Croissant les deux cornes,
 Du paternel Royaume outre-plantant les bornes.
 Que de nom, & de fait fatalement tu sois
 A tes aimez François, vray Hercule François,
 Et des Muses l'amy tu puisse estre en la sorte
 Que François ton ayeul, dont tiers le nom tu porte.

Après que du Chaos l'univers fut éclos:
 Que sur les elemens, sous ta rondeur enclos
 La grand' tente des Cieux fut autour estendue,
 Et la terre habitable aux animaux rendue:
 Ayant fait resserrer l'onde en son propre lieu,
 Il ne manquoit plus rien à l'ouvrage de Dieu.

„ (Dont la ferme parole est desia l'œuvre faite,
 „ Qui aussi tost est dite, aussi tost est parfaite)

Que l'animal diuin, lequel il composa
 De son souffle, & d'Argile, & puis se reposa.

Car c'est aussi pour luy que Dieu feist toutes choses:
Et en luy seul il a toutes choses encloses.

Quel autre eust peu du ciel admirer l'ornement,
Adoré son ouurier religieusement?

Quel autre eust habité ceste grand' maison ronde,
Pour l'homme seul bastir au beau milieu du monde?

Pour ce il fut reserué à creer le dernier
Pour estre uniuersel de la terre heritier.

Doncq' du grand Tout apres (dõt toutes les parties
Furent diuinement par bel ordre assorties).

Fut comme en un recueil en l'homme ramassé,
Et fut son petit corps sur le grand compassé.

Soit qu'en bas tu regarde, ou le haut tu contemple,
Et le moyen auccq, tousiours tu vois l'exemple

Du tresgrand uniuers, ce n'est doncq' sans raison
Que du petit au grand ie fais comparaison.

Chere Muse dy moy comme a esté bastie
De l'humain Microcosme à part chasque partie:

Et commençons au chef, qui tient un pareil lieu:
A l'ame, que le ciel tient au regard de Dieu.

Sur un mesme patron, d'une mesme matiere

Que les cieux furēt faits de la main toute ouuriere
Il fut créé aussi, & compassé en rond,

Sinon deuers l'Ouest, & de la part du front,
Qu'auancer on le voit: car alors qu'on le presse

Pour l'assoir sur son tronc, entre les mains s'affaisse:
Ceste matiere tendre, & non trop ferme encor

Et de la part du Sud, & du costé du Nor.

Ainsi que l'artisan orne & pare son œuure

D'une tresfine soye ell le suruest & couure,

LE TEMPLE

(Soyè que les humains appellerent cheueux)
 Fors la bouche & la iouè & le front & les yeux.
 Car nature, qui fait tout à nostre aduantage,
 La face n'ombragea de poil comme au sauuage,
 Qui ne porte respect, qui n'a le point d'honneur
 Dont l'appetit folatre est guyde & gouuerneur.
 Qu'elle peine eust c'esté: car tant plus on moissonne
 Ceste espesse toyson, plus druë elle foisonne.
 Comme vn nuage gros de bruit, de vents, d'humeur
 Nous desrobe à noz yeux la celeste lueur.
 Si aussi Dieu eu faict cheuelu le visage,
 Comment y eust-on veu reluire son image?

D'un suc lent & fumeux fust faict le cheueu froid,
 Poussé par la chaleur hors du pignon estroict,
 Par le cuir aussi froid, pour reparer la teste,
 Et pour la r'emparer inutile quant au reste.
 Femmes, penseriez-vous que d'un vil excrement
 Fust faict de vostre chef le superbe ornement?
 Qui est-ce d'entre vous, qui n'estale vne tresse?
 De qui, suiuant de choist: l'infallible promesse,
 Perdre vous ne deuez seulement vn cheueu.
 De Dieu les fauoris on recognoist au veu
 Du Nazarien pur qui par son efficace,
 Leurs ennemis vainquoient, & leur donnoient la chasse.
 Que si cest ornement est du chef abbatu,
 De soy on sent partir l'inuincible vertu.
 Entre les francs iadis ce poil faisoit cognoistre
 Cil qui leur Roy estoit, ou qui meritoit l'estre:
 Anelé, frizotté & comme flots flottant,
 Alloit au gré du vent les espaulles battant.

Vn signal qu'à sa gent il auoit la franchise
 Recoux, à l'estranger villainement soumise:
 Et mouroit volontiers plustost que de rechef
 Ce royal parement luy fust rauy du chef.
 Qui des estoilles sçait combien le nombre monte,
 Il sçait certainement de noz cheueux le conte.

Du masle le menton de moustaches orné,
 Et du poil fust encor, qui toutesfois n'est né.
 Si tost que cil du chef, mais à poindre commence,
 Quand l'homme entre en la fleur de son adolescence.
 Prest à prendre le ply, & qu'amour le vainqueur
 Allume son brandon au fusil de son cœur.
 Iustement sur le point qu'Hercule estoit en peine,
 A choisir le sentier qui droitement nous meine.
 Sur la penible roche où se tient la Vertu,
 Laisant de volupté le grand chemin battu.
 Lors qu'inegalement l'homme enfle sa parolle,
 C'est ce qui met la barre entre la femme molle
 Et l'homme courageux, le menton estant nu,
 A quoy eust sa moytié l'autre moytié cognu?
 Ceste barbe honorable est vn assureé signe
 De la masle vertu eschauffant la poitrine.
 Que nul ne doit porter d'homme de bien le nom,
 S'il ne porte premier ceste merque au menton.
 Par ce merc l'on cognoist à qui l'aage & l'usage
 Les tiltres ont aquis d'homme sçauant & sage.
 Ce fut pourquoy iadis au grand Dieu d'Epidaur,
 L'antiquité donnoit vne grand barbe d'or:
 Par elle on discernoit le philosophe graue
 Du populaire ras, le patron de l'esclau.

LE TEMPLE

C'est ce qui l'homme auance, & le pousse en credit:
 Or qu'un Mysopogon le contraire en ait dit,
 De ce poil venerable accomparant la grace.
 A d'un bouc enfumé la tres-sale barbasse:
 Ell' monstre aussi que l'homme est le chef & seigneur
 De la femme, qui doit à l'homme son honneur.
 Qu'un homme soit sans barbe, est-ce pas pareil blasme
 Que voir à descouvert sans cheueux vne femme?
 Chose autant triste à voir est un menton razé,
 Qu'un pré par où la faux a n'aguere passé:
 Que le cheual sans crins, & que l'arbre sans fueille,
 Plus difforme que n'est d'Horace la corneille.

Je n'ose leuer l'œil, pou voir si grand beauté,
 Qui superbe se monstre en cest autre costé:
 Tout esblouy ie suis quand ces yeux ie contemple,
 Ce front large & poly, & l'un & l'autre temple,
 Confus quand i'oy ou voy le nectar distiller
 De ce double corail, qui s'ouure pour parler:
 Je me pafme & me perds, voyant qu'un doux sourire
 La bouche à l'environ mignardement retire.
 Quand d'un nez alligné ie voy le gentil traict,
 Et des sourcils voustrez l'un & l'autre arcelet,
 Et la double paupiere habilement frangee
 De petits brins de soye vniment arrangee:
 La crespine de l'œil, qui le couure & deffent,
 Comme ell' se haulse ou baisse, & se plie ou s'estend.
 Mais rauy ie me sens d'une vermeille iouë,
 Où la grace vermeille auécq' le ris se iouë.
 Sa fossette m'affolle, où Venus ses attraicts
 Recele, & d'où son fils armé de mille traicts

Traitement embusché, & sans qu'on s'en auise
 A quiconque y regarde au cœur droitement vise.
 Qu'elle presumption seroit-ce? me vanter
 Les singularitez pouuoir toutes chanter
 Que nature a vni en vn si peu d'espace?
 Dire comme ell' a peu en si petite place
 Sur vn cuir simple & prim en cent mille façons
 Representer aux yeux du cœur les passions?
 Comme frappé il est par la puissance emeuë
 Du sens premier emeu, par la chose aperceuë.
 Les esprits & le sang consecutiuellement
 Courent incontinent apres son mouuement,
 Que si l'obiet luy plaist, le cœur soudair. enuoyë
 Son sang, pour annoncer au visage sa ioyë.
 S'il est triste ou pensif, s'il est saisi de peur
 Aussi tost fuit le sang se renfermer au cœur.
 Mais s'il se sent coupable & de sa faute ait honte,
 Viste ce vermillon en la face remonte:
 Enuie, & son contraire, amour, desdain, espoir,
 Se font par leurs couleurs en ce miroër voir.
 La fureur fait palir, & la trahison blesme
 Tant plus veut s'excuser plus s'acuse soy-mesme.
 Prothee oncq' ne changea de forme si souuent,
 Ny le chameleon, qui ne vit que du vent,
 Que l'homme fait la sienne, où souuent se reuele
 Ce qu'és cachots du cœur traistrement il recele.
 Si qu'à tort contre Dieu tu murmures moqueur,
 Luy reprochant qu'il n'a, pour voir au fond du cœur,
 Au fenestre costé ouuert quelque fenestre:
 Ton visage changeant te fait assez cognoistre.

LE TEMPLE

C'est de là, c'est de là que cognoist un chacun
 S'il est ami ou non, ou s'il est importun:
 S'il est des fauoris, ou s'il est hors de grace,
 Si qu'au ciel estoilé i'accompare la face.
 De là chacun attend de son espoir la fin,
 Comme sera l'aspect, favorable ou malin.
 De là le courtizan sa fortune presage,
 Comme il verra muer du prince le visage:
 Ainsi chacun d'en haut l'influence est suiuant
 Comme en mer le nauire est poussé par le vent.

Le chef doncq' couronné d'une espesse perruque
 Ceindant le front, la tempe, & l'oreille, & la nuque,
 Imitant l'hemisphère, où la nuit fait son tour,
 Quand le char delien nous rapporte le iour.
 De deux toiles se vest: tresfine est la premiere,
 Unie également, blanche, mince & legere,
 Faicte pour regarder, & le pourfil parfaict
 Qui l'œil de son Ouurier & l'esprit satisfait.

L'autre, qui est dessous epesse & pertuisee.
 D'inuisibles poinçons de la veine est tramee,
 De l'artere & du nerf, & est celle qui sent
 Ce qui plait au toucher, ou luy est déplaisant.
 Ces cuirs font un tissu dont la teste est munie
 Pour estre moins subiecte à l'iniure ennemie:
 Par là transpire & sort le hasle, & la sueur,
 Par là s'halene l'air euantant la chaleur.
 En nostre petit ciel semble ce double voile
 Au cours saturnien de la septiesme estoile.

Sous la double cuirasse une autre rondement
 Vient à l'entour circuir ce globe entiere ment,

Estoffee de mesme, & de couleur pareille,
 De chair contrepointee, & de gresse vermeille.
 On l'appelle charnuë: elle estend son pouuoir
 Sur le front plus qu'ailleurs en le faisant mouuoir,
 Lors que reuesche il monstre vne chere felonnie,
 Et de plis reschinez de trauers le sillonne.
 Ou quand on voit ioyeux s'esuanouïr soudain
 Cest ourage froncé avecque le desdain:
 Mille filons sanglans ceste tunique percent
 Qui sur les premiers cuirs l'humeur nouricier versent:
 Pourtant à Iupiter, qui tient le second lieu
 Entre les feuz errants, ce petit ciel est deu.

L'os du Crane est dessous ceint d'une autre mëbrane
 Que les grecs pour cela nommerent Pericrane:
 Coeffe si admirable, & telle que Pallas
 Et sa docte ennemie ourdir ne pourroient pas.
 Tant l'ouurage est subtil, qui en blancheur surpasse
 L'iuoyre polissè qu'elle enuoloppe & laisse.
 Cest os ne peut sentir que par son seul moyen,
 Luy faisant esprouuer & le mal & le bien:
 Si, qu'aussi tot quell' sent qu'on la blesse & la pique,
 Son mal au mesme instant à l'os se communique.
 Sans elle l'os n'auroit le plaisir du toucher,
 Ne different en rien à l'os d'un dur rocher
 Pour les plaisirs quell' faict à l'os qu'elle recouure,
 Du long & du trauers & oblique il s'entrouue,
 A fin que de sa mere, or que dure ell' soit,
 Naïsse au giron de l'os qui plus dur la reçoit.
 Ceste blanche Tunique, à un semblable usage
 Au chef, que Mars au ciel tournant le tiers estage.

LE TEMPLE

Ces guimples estenduz sur l'humain firmament
 Seruent de couuerture, & d'enrichissement.
 Si ne remparent-ils d'une roche assez dure
 La diuine raison qui dans la tour demeure:
 Pource tout ce pourpris d'un mur double fut ceint.
 Pour pouuoir faire teste à son ennemy craint.
 Doncq' bastis sont les flancs d'une escaille percee
 Pour donner seure entree à la voix prononcee.
 Vne en chascque costé, vne autre vers le front
 Où l'œil veillant se tient à découurir tresfront.
 Si le haineux le braue, à l'endroit que la veuë
 Deffendre ne pouuoit ny la main estenduë,
 D'un os Diamentin nature fist un fort.
 Qui fortement epais dépite tout effort.
 Plus haut vers la fontaine, où la ceruelle molle
 On sent battre & pousser, (auant que la parolle
 L'enfant puisse former, que ces quartiers ossuz
 Fussent du fil des ans ferme ensemble confus)
 De rocher entaillez presque en forme esquarree
 De chascque costé un fut la place asseuree.
 Et vers le chemin creux par où monte l'odeur,
 Et le cerueau s'ecure, un os, qui n'est si dur,
 Un Aqueduc y faict de semblable matiere
 Qu'est la pierre de Ponce, & l'esponge legere,
 Garni de souspiraux, biaisants, de trauers,
 S'entrentortillonnans, longs, estroits, & ouuerts.
 Et croy qu'il fut basti expres de telle estoffe
 A fin que l'air trop frais en y entrant s'eschauffe
 Dans ces longs laberints, & n'y allast tout droict
 Ceste Roine euanter laquelle craint le froict.

Ou de quelque importun surprise ne peust estre,
 Trouuant par ces contours qui l'arreste & empestre.

Ce petit bastiment rondement compassé
 D'un iuste contrepoix hardiment balencé
 Fut sur un petit roc, qui tout ce temple porte.
 Le Sphinx Ægyptien de si bizzerre sorte
 Oncq' machiné ne fut, qui autour sa maison
 Voit bien tard voleter sur l'arriere saison
 Un petit animal, qui n'est oyseau ny beste
 Voit c'est os bigarré, plant de l'humene teste.

Le maistre tout faisant, qui le Crane bastit
 En huit os, comble & fond, sagement compartit
 Pour la commodité: car si un os se casse,
 N'y a qu'un os cassé, la playe n'outrepasse
 Ses orlets dentelez, & l'autre plus prochain
 Ne se sentant du coup demeure entier & sain:
 Et s'il falloit encor' laisser quelque ouverture
 Par où deuoit saillir la toile Meredure,
 Pour au dedans s'estendre, & se tendre dehors
 Sur ces os rapportés, iamais le pauvre corps
 N'eust esté sans douleur, iamais n'eust eu liesse
 Si le caluaire rond estoit tout d'une piece.
 Comme exalé s'en fust la fumeuse vapeur
 Du sang bouillant en nous à sa propre chaleur
 Pour le clarifier? ainsi sort la fumee
 De toute la maison par une cheminee.
 C'est pourquoy fut le chef dressé deuers les cieux,
 Quoy qu'on ait assureé que pour l'amour des yeux
 Il est si haut monté, raison, il faut qu'on mette
 Sur la plus haute tour, celuy qui fait la guette.

LE TEMPLE

Et le fanal qui monstre au nocher estrange
Vne routte asseuree à l'escart du danger.

C'est os, le Tout-ouurier, d'artifice admirable
Recama par dessous d'une seconde table
Mince, mais pourtant forte, entre ces doubles os.
Ce que le Dyploé on appelle, est enclos
Tout plein d'humeur moüelleux, mais pourquoy: d'une
Si le Crane estoit fait solidement epeffe, (piece
Ou bien tout au rebours, flacque, epez, & leger,
D'estre souuent brisé l'un seroit en danger:
Et l'autre par trop lourd, & la teste pesante
Iroit encontre bas brutalement pendante.
Que si tenure & leger, bien que dur eust esté,
Il s'en fust ensuiui cest incommodité:
Car à tous coups subiect seroit l'os mince & tendre
A se rompre, ou mascher, à s'enfoncer & fendre.
Il ne deuoit doncq' estre ny mince ny epais:
Cestuy foible eust esté, l'autre un trop pesant faix.
Tel de l'ame est le fort renforcé de deux tables
Creuses par le dedans, rarement transpirables:
Tables où l'Eternel a de son propre doy
Tracé les premiers traits de sa diuine loy.
L'une la pieté vers l'Eternel concerne,
L'autre vers le prochain la charité gouuerne.
Le premier os sera par moy accomparé
Du Dieu aux cheueux blonds au chariot doré,
Et le lambris luy sant de la vouste Iuoirine
Represente le ciel de la belle Cyprine.

Or d'autant que Phæbus par ses contournements,
Dispense les saisons, mois, iours, heures, moments,

Donnant clairté aux cieux, à la terre, & à l'onde,
 Prince des feus errans, la grand ame du monde:
 Du monde le grand œil, & le mari fecond
 De la nature enclosé en son enclaué rond.
 Roy de tout l'univers, sous qui bransle & s'agitte
 Sans cesser, sans errer, le celeste exercite
 De tout le pere grand tousiours ieune & naissant,
 Duquel le ray doré est l'esprit tout perçant
 Et penetrant par tout, vraye image visible:
 Et le fils premier né du soleil inuisible
 L'instrument souuerain de l'eternel ouurier,
 Des Dieux l'infatigable & des hommes courrier,
 Qui tous les autres feus au ciel brillans esclere:
 D'un seul plus grād que luy empruntant sa lumiere,
 Qui voit tout, qui oit tout, & qui tout animal
 Remplit de feu, de germe & de soufffle vital.
 Des tours imaginez au ciel l'unique cause
 Des petits & des grands, aussi maintenir i ose
 Qu' autant de tours on trouue au petit ciel humain
 Qu'il en compasse au grand, imaginez en vain:
 Et que doref-nauant on n'aura plus que faire
 De signalez cerceaux s'arrondir vne Sphere,
 Ny contraindre les cieux à deualler ça bas
 Pour estre mesurez à un petit compas,
 Sans tant fantastiquer & faux cercles te feindre
 Vien les voir retracez tous dix ta teste enceindre.
 Auise seulement de la face le tour:
 N'est-ce cest orizon qui nous borne le iour?
 Et la ligne egallant en deux moytiez le Crane
 N'est-ce pas celle là qu'on dict Meridiane?

LE TEMPLE

Entre la Coronale, & le Lampda pointu
 N'est-ce des animaux le grand cercle tortu?
 Les deux extremittez de sa rondeur oblique
 Expriment naïfvement l'un & l'autre tropique.
 Ceux qui pres des Effieux sans sejour vont tournans,
 Sont les bords escaillez l'oreille enuironnans.
 Cherche toy-mesme & voy sur cest humain couuercle
 Les colures iumeaux, de l'Equateur le cercle:
 Car de ma tasche emprise il me faut depescher.
 Passons outre, & voyons sous ce double rocher
 La tante du cerueau largement estenduë
 Et à lassez de soye au lambris suspenduë:
 Si l'asche toutes fois quell permet librement
 Au cerueau qu'elle embrasse aller son mouuement.
 Du Cerebel encor' ell' depart la ceruelle
 Qu'elle enueloppe en elle, & les nerfs naissants d'elle
 Ce voyle redoublé s'enfonçant bien auant,
 Droict, sous la ligne droicte, une fosse est cauant,
 Courbe en façon de faux, où le sang se presseure
 D'ou le cerueau attire, & prend sa nourriture
 Par cent tuyaux veneus, c'est estame glissant
 Par le dessus obscur & par dessous luisant,
 Entre le crane est mis & la ceruelle tendre,
 A fin que le plus dur le mol ne peut offendre,
 Comme mediateur, l'Astre Cillenien
 De Diane & Venus tient ainsi le moyen.

Des tantes du cerueau nous en reste encor' une
 De toutes la plus basse, ainsi qu'aux Cieux la lune,
 De plus prés nous gouuerne, & de son large sein
 Repend l'humeur fecond dont tout le monde est plein.

La Royne des Errants, de tous la plus errante,
 Et de son frere absent nuittiere lieutenante,
 A toute heure changeant l'estat de l'uniuers,
 Comme ell' va changeant ses visages diuers:
 Et qui de sa clairté ou plus ou moins nous darde
 Selon que le soleil loin ou pres la regarde,
 Pour temperer l'ardeur qu'il elance d'en haut,
 Tout le monde autrement periroit par le chaut:
 Comme lors que Pheton l'enfant trop temeraire,
 Feist verser de Titan le char porte-lumiere.
 Il faut que d'un accord les deux astres germains
 Gouvernent tour à tour les cieux, & les humains.
 Tant plus pres de la terre on la voit approchee,
 De sa vertu la terre est puissamment touchee:
 Vertu qui par amour eut pouuoir deschauffer
 Le cœur froid & selon du noir prince d'enfer,
 Où l'on l'appelle Hecate, au ciel Lune se nomme,
 En la terre Diane est dicté de par l'homme,
 Qu'ell' fait bondir gaillard, mouscher & voltiger,
 Espanchant son humeur variable & leger
 Dedans son cerueau creux, qui croist ou diminué
 Comme ell' se monstre à luy mousser, onde, ou cornué.
 La tayé de laquelle est le cerueau vestu,
 A cest astre ressemble, & a mesme vertu.
 D'elle ell' emprunte doncq' l'argentine lumiere,
 Egale, & roussoyante, humide, blanche, & claire:
 Ouurage si subtil, que l'œil y est decen,
 Lequel en le voyant ne croit pas l'auoir veu.
 Comme fait sa compagne elle se continue,
 Suruestant chasque nerf, & la ceruelle nuë.

LE TEMPLE

*Au trauers d'elle encor' surgeonne maint ruisseau
 De sang, où ell' se baigne abreuant le cerueau:
 Se rendant inuisible entre iusques au centre,
 Si qu'on ne peut sçauoir comme o'est qu'elle y entre.
 Ny plus ny moins qu'on voit sur leur propres effieux
 Se mouuoir, se rouller les etheriens cieux,
 Continuans sans fin leur eternelle course,
 Sans que l'austral crucier se bouge & se contro'urse
 De mesme au ciel humain le sommet, & le col
 Sont les poinçts proprement de l'un & l'autre pol.
 Feins l'essieu au trauers, autour du quel tournoye,
 Or' droit, & puis en rond, ore d'oblique voye,
 Le ciel de nostre chef, lequel est agitté
 De sept esprits seruans à nostre volonté
 Es sept muscles espars, que la nature mere
 Feist de chair, nerfs, liens, taye, vene, & artere.*

*Tels sont du petit ciel avecque le tresgrand
 Les accords, cestuy Dieu, l'autre l'ame comprend:
 Voyons aussi qu'elle est la diuine harmonie
 De l'ame avecque Dieu humainement vnie.*

*Dans le conclaue rond sous ces huit cieux compris
 Fut à l'ame emperiere vn superbe pourpris
 Ciselé dans vn roc, qu'on voit en deux se fendre,
 Entre ses deux coupeaux vne fontaine esandre
 Ses eaux de toutes parts: ce Terte est consacré
 Aux Pegasides seurs, comme est le mont sacré
 De Parnas Aonide, & l'eau qui y abonde
 Leur est sacré aussi bien que la Pegasid' onde.*

*Nature sagement sceut ce dongeon munir:
 Combien de corps-de-garde auant qu'y paruenir*

Et de forts passe t'on? cheueux, cuirs, pericrane,
 Et l'une & l'autre taye, & l'os double du crane.
 Qui t'a meu, ie te pry, faire un tel appareil?
 Est-ce que le cerueau n'a au corps son pareil?
 Qu'il est siege de l'ame, & les cieux auoysine,
 Imitant le parfait de la forme diuine?
 Qu'il preside & commande au gesier & au cœur?
 Ou que ne l'as peu mettre en lieu qui fust plus seur?
 Adoncq' sa figure est rondement inegale
 De blaffarde couleur & tirant sur le pale,
 Brusque, aspre, r'abboteuse: ainsi voit-on les vens
 Ammonceler les flots l'un l'autre se suyuans,
 Et de sous les sospirs d'un zephire qui souffle,
 Ondoyer la moysson, & bransler l'espy souple.
 Onde à onde est ainsi le nuage frizé,
 Quand le temps est serain & l'orage appaisé.
 Tel est le double mont de l'humaine ceruelle:
 Mais pourquoy tant de tours & de retours fait-elle?
 Est-ce affin que son sang soit mieux assaisonné,
 Pour auoir en ses plis & replis seiourné?
 Comme de l'Ocean de la vague espanchee
 Tournoyant & comblant mainte & mainte tranchee.
 Sur l'arene arrestee est l'humide salé,
 Par le soleil de Mars peu à peu congelé.
 Ce que sel on appelle, en noz corps s'eslaboure,
 De mesme l'humain germe és tours où il demoure:
 Lequel tant plus s'arreste en chasque impression
 Par la chaleur aquiet plus de perfection.
 Seroit-ce que l'esprit, de l'ame coche & guyde,
 Par ces canaux glissant enfle ce qui est vuide?

Ou pour nous figurer par ces contournemens
 Combien sont differens les humains iugemens.
 Ou bien que le cerueau de l'esprit qui le meine
 Puisse suiure, leger, la cadance certaine?

Coupez-la iusqu'au vif, ce qui sera couppé
 Resemble à vn porphire obscurément iaspé.

Si plus profondément tu fossoyè & retranche,
 D'un albastre plus fin verras la mine blanche
 Gentiment marqueté à petits point de sang,
 Qui sont par cy par là sur-semez sur le blanc.

Si tu creuses plus bas, & iusqu'au front penetre,
 Droitement sur le front à dextre & à senestre,
 Tu verras sous tes pieds la roche s'entr'ouuir,
 Et ia deux autres creux commence à descouuir:
 Cambres longs & estroits & de figure telle,
 Qu'en son premier quartier est la lune nouvelle.
 Qui sont doz contre doz, oppossez vis à vis
 Le signe effigiant du nombre qui fait dix:
 Non par cas d'auanture, ains par vn sainct mystere,
 La nature a chiffré au chef ce caractere.
 La deuise luy plaist, ell' nous donne dix doigts,
 Tant aux pieds comme aux mains, dix naturelles loix.
 L'Eternel nous commande, & preschent les prophetes,
 Et en nombre de dix sont les globes celestes:
 Apollon, & ses seurs font ce nombre parfaict,
 Les Graces, & les arts font aussi trois & sept.
 Dix sibiles y eut, Atride ne desire
 Que dix Nectors pour Troyë enflammesches reduire..
 C'est le souuerain nombre à toutes gens commun,
 Où estant parueniu on recommance à vn.

Les cornes se limant de ces deux demi-cernes,
 Regardent du dedans aux regions externes
 De leur paroy le tour d'un clair lustre bruny,
 Est fait de marbre blanc egallement vny:
 Et si ny a cristal qui mieux flambe & reluisse
 Que le mur mytoien qui ces antres diuise.
 Par où de l'un à l'autre, aussi tost que l'esclair
 Passe par la verrine, entre l'esprit leger.

Le couuert en est faict d'estoffe plus solide:
 Ceste double crottesque en tout temps est humide,
 Par la concretion de la moitte vapeur
 Dont l'esprit se descharge, estant encor' impur.
 Icy est le surgeon dont le dueil ou la ioyë,
 Exprime tant de pleurs, dont le double œil ondoye.

Ces antres souuerains descendans au milieu
 De ce roc, se vôt ioindre & tous rendre en un lieu,
 N'y faisant qu'un conduit, par lequel se desgorge
 L'esprit, comme le vent des soufflez d'une forge.

Tayray-ie en cest endroict l'ouurage elabouré,
 Les admirables plis de l'un & l'autre ré?
 Ce que dedans son corps l'homme le plus admire,
 Dont la langue se taist, que plume n'ose escrire,
 Du quel l'œil egaré en l'entrelasement,
 La grand perfection ne voit parfaitement.
 Tels n'estoient les erreurs de la geole secrette,
 Prison du monstre-fils d'une Roynie de Crete.
 Ce resul mille-fois & mile retracé
 Est plus emerueillable, & plus ambarassé,
 Et beaucoup plus subtil que d'aracné la soye,
 Qu'elle tist pour y prendre au despourueu sa proye.

LE TEMPLE

Pour l'esprit recevoir des hauts cieux descendu,
 Nature en chascun antre a ce beau ré tendu,
 Tissu de mille-brins d'arteres & de venes,
 Qui d'esprits tournoyans sont vermeillement pleines.
 Lesquels parfaictement ne seront accomplis
 Qu'ils n'ayent mille-fois voulté par ces replis.

C'est icy que s'affine une cinquiesme essence
 Des esprits animaux la legere substance,
 Faicte du plus subtil qui soit en l'element,
 Pour à l'ame & au corps servir de ligament.
 Penetrante par tout, viuisfante & pure,
 Transparente & illustre, une chaleur qui dure,
 Qui respire & transpire, & qui a son vouloir
 En toutes les façons fait sentir & mouuoir.
 Ainsi que le patron, qui tient de la nauire
 Le thymon, la gouuerne, à son plaisir la vire:
 Ou comme vn Magistrat peut à sa volonté
 Ranger les habitans de toute vne cité.
 Ell' tient confusément és membres espanduë
 Leur lourde masse en l'air droitement suspenduë,
 Et faict en corrompant le naturel puissant,
 Que le leger descende & monte le pesant.
 Ceste influance encor en diuers lieux disperse
 Diuerses actions diuersement exerce:
 Tout le temps qu'elle y est, tout est ouuert & plain,
 Et quand ell' n'y est plus, il n'y a que du vain.
 C'est l'ame, c'est l'esprit, c'est la diuine flamme
 Qui anime & euante, & salutaire enflamme
 Cerueau, polmons, & cœur, qui fait ouir & voir,
 Le corps sourd & muet, sans elle n'a pouuoir.
 Qui pcnses-tu qui soit authheur d'un tel ouurage?

Qui ait tiré les traits d'une si belle image?
 Qui en ait peint les yeux, clairs comme deux soleils?
 Et par dessus courbé deux petits arcs pareils?
 Qui ait pelé le front, qui ait fait les merueilles,
 Du nez, & de la bouche, & percé les aureilles?
 Qui ait du chef filé les nerfs rondement longs?
 Les muscles attachez à de puissans tendons?
 Tiré, comme ruisseaux d'une viue fontaine,
 Et du cœur & du foye & l'artere & la veine?
 Qui ait foré les os, & arrondis autour,
 Et de chair recouverts & de cuir à l'entour?
 Qui ait fendu les mains, & couplé les iointures,
 Qui ait planté le corps dessus deux plantes dures?
 Qui sur ses pieds le fait & aller & venir,
 Et qui enseigne aux mains à prendre & à tenir?
 Qui ait ouuert l'ouye & aguisé la veüe,
 Et qui de gousts diuers ait la langue pourueüe?
 Et qui euenta l'air de senteurs parfumé,
 Qui ait dans l'estomac tant de feu allumé.
 Pour auoir la viande & dans le cœur inspire,
 Le poulx nourry du vent, que le poulmon attire?
 Qui maintienne du corps la naïfue chaleur,
 Et qui ait teint le sang de vermeille couleur?
 Qui penetre le corps en mille endroits & mille
 Pour en faire exhaler ce qui est inutile.
 Qui penses-tu qui soit qui ces miracles faict,
 Si ce n'est cest esprit de son corps l'architect?
 Ceste substance adonc de matiere etheree,
 Dans ces tortis vermeils est d'ailleurs inspiree,
 Moins pure que le ciel, engendree du vent,
 Que le cœur tire à soy par le poulmon mouuant.

LE TEMPLE

Et du fumet du sang, qui és veines bouillonne,
 Transmis au ventre droict du cœur qui le façonne.
 Du droict au gauche il passe, où il se rend si fin,
 Se coulant au trauers d'une cloison, affin
 Qu'estant clarifié plein d'une chaleur viue,
 Le cœur mouue tousiours, & l'artere le suiue.
 Dont une portion s'euapourant à mont,
 Montant par les canaux qui sommeiller nous font
 Finement deliée en ces filets penetre,
 Ces autres tient ouuerts, le fenestre & le dextre.
 Elle emplit le cerueau, & l'agite & le meut,
 A l'ame sert d'outil, sans lequel rien ne peut.
 C'est ce feu, c'est ce Ray, comme Heraclite pense,
 Qui des corps animez les actions dispense,
 Et qui selon l'organe apte ou mal composé,
 Fait l'homme sage ou fol, volage ou bien posé.

Pendant qu'és laberints de ces deux retz seiourne,
 Qu'elle y fait mille tours, & mille-fois retourne,
 En s'epurant tousiours s'y parfaict tellement
 Par la propre vertu de l'entre-lassement,
 Que de l'ame immortelle ell' usurpe le tiltre,
 Neutre entre l'homme & Dieu, s'ose dire l'arbitre:
 Qui les appointe ensemble, & qui faict les accords
 Entre l'ame celeste & le terrestre corps,
 Ensemble mariant & l'une & l'autre extrême
 Si bien que l'un & l'autre est une chose mesme:
 N'estant n'y l'un ny l'autre, il n'y auoit lien
 Meilleur, pour les vnir que ce corps aérien.
 Quel autre eust allié une matiere enorme,
 Rude fragilement, corruptible, & difforme,

Une loge de terre, un tas emmoncelé,
 Que Promethé auoit d'argile boufillé:
 Vne bouë, vne fange, vne pesante masse,
 Vne paste de chair, obscure, froide & casse,
 Materielle, abrutie, ignoble, sans arrest,
 Qui commence à mourir au moment qu'elle naist.
 A chose tant diuine, avec vne nature
 Inuisible, sans corps, sans couleur, sans mesure,
 Simple, pure, immortelle, ouurage non de main
 Faicte sur le patron de l'ouurier souuerain,
 De science & d'honneur seule au monde capable,
 Iuste, religieuse, accorte veritable,
 Un eternel souspir' de la diuinité,
 Vn rayon procedent d'eternelle clairté,
 Roine de l'uniuers, & la plus belle chose
 Qui soit entre les cieux & nostre terre enclose,
 Des creatures fin, & le commencement,
 De Dieu temple & image, & l'homme entieremēt.

Que si loysir ell' a en son essence sainte
 Se separer du corps, & n'estre plus contrainte
 A fournir les esprits, au sentiment brutal:
 Car vueille ou non il faut, c'est vn arrest fatal
 Qu'elle soit quelque fois serue au corps qui l'empestre
 (Car ensemble autrement ne pourroient long temps estre)
 Son fait ell' faict sans luy, en Ecstase, apart soy,
 Comme sont voirement les œuures de la foy,
 Et tous ces petits feus intelligences nues
 Qu'oreille n'a ouy, & que l'œil n'a point veuës.
 Au contraire le corps paresseux & pesant,
 Sans elle ne fait rien, ne se meut, ny ne sent.

LE TEMPLE

D'autant qu'elle estoit nuë, incorporelle, & simple,
 Il la fallut couvrir & reuestir d'un guimple
 Delié, pur & net, d'un lustre plus luisant
 Que la plus clere estoile au ciel resplendissant,
 D'un habit tout diuin, qui ne craint que la parque
 Le face traicter dans la mortelle barque,
 Pour le perdre à iamais dans le gouffre oublieux:
 Ains apres le trepas il s'en reuole aux cieux
 Quand le temps est venu, que par la loy fatale
 Faut qu'une ame à son tour en la terre deuale,
 Pour venir habiter un corps obscur & noir
 Deuant que de partir du celeste m'anoir.
 Ia informee elle est pleine d'intelligences,
 (De science & vertu les diuines semences)
 Ainsi que de tout temps la Marcasitea eu
 Sans qu'aparance y ait, les semences du feu,
 Et ainsi qu'en yuer vne plante ne porte
 Fruit, ny fueilles, ny fleurs, si n'est elle pas morte.

Des Dieux doncq à l'enuy & des astres luisans,
 En prenant d'eux. congé, accepte les presents,
 Qui veut que de son vueil elle soit l'interprete:
 L'autre la predestine estre quelque iour poëte,
 Mars l'inspire à la guerre, & Cypris à l'amour,
 Neptune au pilotage, & Ceres au labour.
 Les plus contentieux la façonnent habile,
 A suiure du palais la prudence ciuile.
 Le Dieu de Maie né, son ayeul porte-faux
 Luy montrent les metiers, les sueurs, les trauaux,
 Par qui elle pourra, durement asseruie,
 A la necessité du corps gagner la vie.

Inpiter luy enseigne à establir les lois.
 A gouverner Cites, les peuples, & les Rois
 De nous chetifs mortels, qui a pitié l'encline
 A suiure heureusement la docte medecine:
 L'autre de Sphere en Sphere és cieux la pourmena,
 Leurs nōbre, aspects, & bransle & nōs luy enseigna
 Et sons harmonieux, qu'elle a mis en pratique
 A noz voix accordant la celeste musique.
 Non pour estre adorée ains pour cōplaire aux yeux
 La plaisante peinture elle apporta des cieux.
 Somme, au ciel n'y eut Dieu, qui prodigue n'honore
 De quelque saint ioyau la celeste pandore.

Equippee en ce point l'ame s'en vole au chef
 Son logis preparé, où elle est de rechef
 Aussi soudainement qu'elle y fut escoulée
 Humainement receue, aussi tost habillée
 D'un autre accoustrement, non toutesfois si fin
 Que le premier sandal Eternel & diuin:
 Mais fait du plus subtil de la confuse masse
 De l'air large espandu, & du feu qui l'embrasse.

Mais de peur que le corps de leur ardeur épris
 (Car c'est au feu vrayment que semblent les esprits)
 Ne vint à s'embraser, & ieune se resoudre
 L'ayant remis à sec en sa premiere poudre.
 Sans cesse vne eau y sourd, qui moite l'entretient
 (Car autant qu'il s'en va, autant il en reuiet
 Par le double aliment où elle a sa ressource)
 Plus pure toutesfois fut sa premiere source
 Qu'epuise peu à peu nostre flambeau fatal,
 Qui s'esteint au deffaut de c'est humeur natal.

LE TEMPLE

*Ainsi pompeusement l'ame estant accoustree
 Fait en son propre corps sa miserable entree.
 O pauvre ame ou vas-tu! à peine à peine y est
 Qu'à tous cognoistre fait comme ell' s'y deplaiçt
 Par ses gemissements, c'est folie quell' pleure,
 Il faut puisqu'elle y est que son terme y demeure,
 Car de partir de là ne luy sera permis
 Sans le vouloir de Dieu, comme vn soldat commis
 A la garde d'un fort, que congé ne luy donne
 Son capitaine en chef, la place n'abandonne.
 Par la contagion du corps impur quell' sert
 Sa naifue beauté incontinent se perd.
 De rien il ne luy chaut, & semble estre saisie
 De l'oublieux sommeil de quelque letargie.
 En ces antres profonds languissent ses desseings,
 Et tous ces petits feuz y font presques esteincts,
 Pour d'un gros torrent d'eaux se voir enuironnee
 Se trouue des l'entree en son corps estonnée.
 Pour se voir estrangere en vne region
 Pleine de fauceté, d'abus, d'opinion:
 Il ne luy reste plus que ce desir honneste
 Qui la fait differer à l'ame de la beste.
 Vn desir reste encor' d'entendre & de sçauoir,
 Et en sa liberté premiere se reuoir.
 Plus desseche son corps moins ell' s'accoustume
 A ses complexions, peu à peu se r'allume
 Sa diuine clerté, par assidu labour
 Recouure avecq le temps son antique vigueur:
 Reprent cœur reueillee en ceste masse sourde,
 Et auençle & muette, outrageusement lourde*

Et commence à se foudre, & tante les moyens
 S'abstraire & depestrer des corporels liens.
 L'œil luy fait souuenir d'une chose ia veüe,
 Les oreilles ouir vne voix entenduë.
 Par le moyen des sens, & du sensible obiect
 R'aquiert les notions du celeste intellect.
 Contre le corps s'eleue, & rebelle sans cesse,
 Apres l'auoir dompté elle en deuiet maistresse:
 Se deseschaut de luy, se depestre des sens,
 Commence à desdaigner leur sensibles presens,
 Et par son intellect, qui est son œil, elle ose
 D'une chacune chose epelucher la cause.
 Iane s'amuse plus à ce qui meurt & naist,
 Ce qui est simple & pur est tout ce qui luy plaist:
 Et si auant s'auance és secrets de nature
 Qu'a remonter au cieux à la fin s'auanture.
 Par contemplation qui l'enleue si haut
 Qu'elle trouue le lieu où est ce qui luy faut.
 Hanter ne daigne plus les choses de la terre,
 Recule loing de soy l'opinion qui erre,
 Se contantant d'auoir trouué la verité
 Des traux endurez le loyer meritè:
 Mesprisant quāt au reste hōneurs, biens, voire mesme
 Ce que l'esprit cherist, & ce que la chair ayme.
 Or du corps & de l'ame oyez la liaison,
 L'intellect à son siege au dessus de raison:
 La raison, qui en est, ou doit estre la dame,
 Obscurement logée est au profond de l'ame,
 Et les eles de l'ame est l'esprit cler & pur
 Pour voler en son corps froid, terrestre, & obscur:

LE TEMPLE

Où estant arriuee on luy presente & donne
 L'habit d'un gros esprit qui toute l'environne.
 En ce bel equipage elle entre dans le creux
 De ce temple mortel, epés & tenebreux,
 Où pour un temps banie, en son corps confinee
 Attent l'heure à venir à tous predestinee
 Qu'on la r'appellera en son pais des cieus,
 Pour eternellement viure avecque les Dieux.

Es cornes de deuant de chacun demicerne
 Les sens cōmun habile, & grād maistre y gouuerne:
 Les sens exterieurs, qu'il tient aupres de soy
 Ainsi qu'ambassadeurs sont autour du grand Roy,
 Seant sur un haut tronc, il entend leur messages:
 Il reçoit leurs presents, remerque leur visages,
 Representations de tout ce qui est hors,
 Couleurs, saueurs, odeurs, magnitudes des corps,
 Leurs qualibres, leurs sons, leur nombre, leur figure,
 Leurs lieux, leurs mouuemēts de leur tēps la mesure.

Pour auoir accez libre, & s'approcher plus pres
 De ce prince, on y va par cinq sentiers expres:
 Comme vne font qui verse en cinq canaux l'eau viue
 Par cinq conduictz l'obiect au maistre sens arriue,
 Dont l'image il remire en son siege Royal.
 Comme on voit reiallir un corps d'un pur cristal
 Ou l'image d'un seau s'epreindre en cire molle,
 Ou sur le papier blanc s'imprimer la parolle:
 Ainsi le Roy des sens retient le vray pourtraict
 Qu'il a par un d'iceux hors du sensible extraict.
 Mais le sens messenger depeesché se repose
 Tant qu'un nouueau patron deuant luy se propose:

Luy cependant ne chomme, ains s'employ à ranger
 Les ombres des obiects, que le sens estrange
 Confusement luy offre, ensemble les compare,
 Le blanc d'avecq' le noir és couleurs il separe:
 Le doux d'avecq' l'amer, le chaut de la froideur,
 Le pesant de l'aigu & l'odeur de l'odeur,
 Leur causes epeluche, à leurs moyens prent garde,
 Et qu'els sont leurs effects contemplatif regarde,
 Reconnoist leurs rapports & leur varieté.
 En fin trouuant son conte & l'ayant arresté,
 Et qu'il a chasque espece en son ordre estrangee,
 Les liure à la fantaisie avecque luy logee.
 Cestuy-ci s'en descharge & l'autre en prent le soing
 Qui les reçoit soigneuse & reserre en un coing
 De l'Antre encervellé tout en bloc pelse mesle,
 Qu'après à son loysir elle arrange & demesle.

Tout ainsi que la nuë on apperçoit souvent
 En cent mille façons varier par le vent,
 Ores semble un rocher, qui tout soudain se change
 En serpent tortillé, ou en la forme estrange
 D'un lion rougissant, a peine est-il formé
 Qu'on le voit, cas estrange, en un ours transformé.
 Ores c'est un oyseau, ore un poisson, & ore
 C'est un dragon volant, qui un egle deuore,
 Il en creue en cent parts, qui toutes se refont:
 Puis tout en un instant cest un gouffre profond
 Qui se va boletant, la voy-là, qui s'allonge,
 Regarde ce Triton, qui nouë & qui se plonge,
 Qui se tourne en galere, elle est prest d'abismer:

LE TEMPLE

Non est, sauue la voy, car bonasse est la mer.
 Le voy apres un cerf de chiens une grand mutte
 Qui grand rendon courant dans les vals se culbute.
 Voy ce heurt, voy ce choc, voy c'en dessus-dessous
 Ces cheualiers Errants atterassez d'un coup.
 Elle est là toute blanche, icy est bleuë & verte,
 Subit d'un cresse noir voyla-là recouuerte.
 Là vermeille se monstre, elle est là toute en sang
 Pres de ces grands Geants marchants sans tenir rang:
 Montagnes entassants, & qui font contenance
 Vouloir audacieux combatre la puissance
 De tous les Dieux ensemble, ô ils sont renuersez,
 Accablez sous le faix des monts qu'ils ont dressez.
 La fantasie ainsi par les formes emeuë
 En autant de façons se transfigure & muë,
 Soit que veillant tu soys ayant les yeux ouuerts
 Ou du bandeau songeard des paupieres couuerts:
 Oysifue n'est iamais, sans repos est agente,
 Resuant sur les patrons que de iour luy presente
 Le commun sentiment, sur ce qui estre peut,
 Ce qui est, a esté, ce qui iamais ne fut.
 Controuue estrangement, ell' a aux cœurs empreinte
 Des Demons quell' fait voir une terrible crainte.
 Quand de nuit vagabonds esgarez par les bois
 Elle nous fait ouir leurs esclattantes voix,
 Depeur nous transissons, c'est elle qui nous monstre
 Le satyre, le pan, qu'és forests on rencontre,
 Sur les monts l'Oreade & les Nymphes és eaux
 Noz parents trespasés qui hantent leurs tõeaux.
 L'incube dans noz lits la fantasie est mere

Des centaures, d'un sphinx, de la tripe Chymere,
 D'un Pegasus élé, d'un hypogriffe encor,
 Du monstre Gnosien le felon minotaur
 D'un cruel Gerion, de Scilla la meurtriere
 De la fille portant serpentine crimiere:
 Et de ses seurs encor, de la fiere Alecton,
 D'un Radament seuer, & d'un cruel Pluton.
 Des Hesperides seurs, de la triple harpie,
 Et de la triple fee ourdissant nostre vie,
 Pour tost nous la raur, & des enfers trouua
 La barque, & le chemin par lequel on y va.
 Et qu'en lieux incognuz l'inextinguible flame,
 Flambe, sorette & cuist, affine & purge l'ame
 De sa contagion, car apres le trespas
 Absoulte est de sa coulpe, & de peine non pas.
 La cruche ell' inuenta & la soif de Tentale,
 Le chien à triple forme, & le roc qui deuale,
 Le champ Elysien, d'elle sont enfantez
 Tous ces monstres de dieux par Homere chantez,
 Et du Beotien: bref de la fantasia
 La peinture est la fille & sa seur la poësie.

Quand le commun repose, & l'obiet empesché
 N'entre plus par le sens de la vapeur bousché,
 Il ressemble un enfant, elle à une nourrice,
 Qui chantant son do-do l'endor, affin qu'ell' puisse
 S'aller esbatre seule, ainsi ceste-cy sort
 Du corps emmailloté du frere de la mort.
 Doncq' s'escartant de luy solitaire repense
 En ce qui s'est passé depuis sa cognoissance,
 En ce qu'ell' a ouy, de ce qui luy souuient,

LE TEMPLE

Et dans le miroïer que deuant elle tient
 Où du iour & de nuit son image remire,
 Des ombres qu'elle y voit les fentaumes retire,
 Qui si confusement s'offrent tous à la fois
 Que ranger ne les peut, ny en faire le chois.
 Et comme elle en commance, quelque autre vient se mettre
 Au deuant, l'autre apres sur le champ demande estre
 Premier expedié, le voulant depescher,
 Vne foule en voy-cy, qui la vient empescher.
 Pour ce imparfaits sont tous, l'un n'aura que la teste,
 Et c'est autre les pieds luy manquant tout le reste:
 L'un du corps la moytié aura tant seulement,
 Qui point n'aura de bout, ny de commencement.
 Tant d'esprits on ne voit en la campagne blonde,
 Tant de sablons aux bords de la mariniere onde,
 Tant de feuilles és bois que de fantaumes vains
 Se forgent en dormant és cerueaux des humains.
 Qui espere & qui songe est presque en mesme peine:
 L'un & l'autre ne voit, sinon vne ombre vaine.
 D'une nuë qui passe, à la fin se trouuant,
 Loing de son conte auoir le cerueau plein de vent.
 Irus songe trouuer de Cresus la richesse,
 Que la faim miserable à son reueil oppresse.
 Vn pescheur songera qu'il prend vn poison d'or,
 Qui en ce monde n'a qu'un ré pour tout thresor.
 Et l'amoureux fera de sa dame vn beau songe,
 Qui se trouue escorné au matin d'un mensonge.
 Qui desire, ou a peur, qui se contante, ou plaint,
 Selon sa passion des visions ce feint.

En fer, & en furie est tousiours le colere,
 Qui craint, pense en dormant que tout luy soit contraire.
 Le sanguin, qu'il se noyë en vn fleuve de sang:
 Et le pytuiteux qu'il est de nege blanc,
 Qu'il boit de l'eau, qu'il pleut, qu'il se lave, & qu'il nage,
 L'un croit estre de plomb, l'autre a estre volage
 Bauole haut en l'air, le plus gaillard se plaist,
 Dans vn plaisant verger ou il songe qu'il est.
 Qui se couche affamé songe goulu qu'il mange,
 Toute nuict a le cœur l'irongne à la vandange.
 Le laboureur reuasse à gueretter ses champs,
 Et par terre & par mer tracassent les marchants.
 Le chasseur en dormant retourne à sa brisee:
 Et moy i ay toute nuit la muse en la pensee,
 Qui pense aussi en moy, car la nuit quand ie dors,
 Que l'ame ne s'employe au seruire du corps,
 Maint' belle inuention elle me vient apprendre,
 Qu'en veillant ie ne puis ny penser ny comprendre.
 Et quoy, le grand Morphee a qui de nous il chaut
 A chascun sa fortune entendre fait d'en haut,
 En nous admonestant de la mort d'un grand Prince,
 Ou que tost doit changer d'estat quelque Prouince.
 Hecube ainsi songea d'une torche accoucher,
 Qui en fin la brusla & son Ilion cher.
 Par un songe preneut l'incredule Alexandre
 Qu'il prendroit le bouccon de la main d'un Cassandre.
 Simonide aduertty la nuit par l'estranger
 Qu'il auoit inhumé, escheuë en grand danger,
 En songe vit aussi le tyran de Cartage
 Que d'Itale il seroit & la ruine & l'orage.

LE TEMPLE

Une nuit en Megare vn arcade endormy
 Songea qu'on massacroit traistrement son amy.
 De Cire le bon heur songe le Roy de Mede,
 Mais contre son malheur ne songea le remede,
 Qui est diuinement par songes aduertiy,
 Qu'on complotte sa mort, de prendre autre party.
 L'autre sept ans deuant la famine reuele,
 L'autre voit en dormant que les cieux on eschele:
 Et l'autre nuit songea vn tyran inhumain
 Que son sceptre bien tost deuoit changer de main.

En la faueur des Roys Iupiter nous enuoye
 Songes qui sont certains & veut que l'on y croye.
 Ainsi que fut celuy, plein d'augure & bon heur,
 De la mere des Roys, & du Duc monseigneur.
 C'estoit deuant le iour, l'amie de Cephale
 N'auoit peint l'Orient de couleur iaune & pale,
 Quand des pauures mortels las des trauaux passez
 D'un somme plus estroit sont les membres lacez:
 Ains que l'oyseau creste le coy silence rompe,
 Ce Dieu luy apparut qui iamis ne la trompe,
 Grosse de monseigneur ia. sentoit approcher
 Le terme des neuf moys, qu'elle doit accoucher:
 On n'attend plus que l'heure, ell' sent sa fantasie
 De ce diuin morphee estre en dormant saisie.
 Son songe est qu'elle accouche, & que le fruit naissant
 Est vn petit laurier qui au iour se poussant
 Au large sa ramee, & haut sa cime estalle,
 De souëfue odeur remplit chambre & couche royale:
 Son fueillage allongeant par vn des bouts pointu,
 Faisoit predire à tous sa future vertu.

La mere ceste plante en son iardin enclose
 Nourrit royalement, & de sa main l'arrose.
 Elle y profite & croist, & si belle y deuiet,
 Que chacun à l'enuy voir ce miracle y vient.
 La terre à l'enuiron legere se soustleue,
 Et d'un suc Nectarin ses racines abreue:
 Et espere qu'un iour un fruit apportera,
 Ce fruit tant désiré, que paix on nommera.
 Le ciel de ses grans yeux. se courbant la regarde,
 La manne & la rosee & ses faueurs luy darde:
 Vn Zephir gracieux autour ses esles tend,
 Et du hasle bruslant & du froid la deffend.
 Mais Apollon l'embrasse & s'attend que couuerte.
 Sa teste un iour sera de ceste branche verte.
 Il proteste & promet qu'il l'aymera tousiours
 Tant qu'il se souuiendra de Daphné ses amours.
 Mais Mars malicieux ne fait qu'espier l'heure
 Commode à se vanger de l'ancienne iniure,
 Quand aux dieux le soleil feist voir ses membres nuz
 Pris au ré de Vulcan, dans les bras de Venus.
 Or' le temps est venu, dist le fier dieu de Trace,
 Qu'une belle vengeance il conuiet que ie face
 Sur la plante prophete & le pris ordonné
 Au poëte, & dont le chef tu portes couronné.
 Que i endure qu'on poi te en pompe triomphante,
 Triomphante de moy ceste mignonne plante,
 Pour un ioyeux signal de me voir enchesné,
 Esclaue d'une paix honteusement mené.
 Il y va de l'honneur: & en ceste colere,
 S'encourt vers l'antré creux de vents & de tonnerre.

LE TEMPLE

*Aolides de bout, sus qu'on aille mesler
 Le feu avecque l'eau, la terre avecque l'air.
 Mettez pieds contre mont, d'une braue rencontre,
 Ce beau plant que voyla: Et ce disant leur monstre
 Ce laurier nouuellet par tourbillons sortant,
 Aux quatre coings s'en vont de la terre escartant:
 Leurs iouës gros enflans, bouffant tournans visage,
 Siffiant contre ce plant descochent leur orage.
 L'air se trouble soudain, le soleil plus ne luit,
 Et d'un beau iour se fait vne profonde nuit.
 Le Nort bat furieux, le garbin bruit, Et ruë,
 Et le sud s'enveloppe au ventre d'une nuë,
 Qu'il fait vireuolter, tourner, pyrouetter:
 Puis s'en vient tout à coup en feu precipiter
 Sur l'arbrisseau tremblant, à voir cela l'on pense,
 Helas, que c'en soit fait: non non, on ne l'offence,
 Au trauers des esclairs on le voit vert encor,
 Sa cime à terre donne, or' se releue, Et or'
 Il se reconche encor' obeissant Et souple,
 Branlant va çà Et là, il se dresse il se double:
 Il gauchist quand il voit la bourasse venir,
 Et foiblet n'ose pas encontre elle tenir.
 La fueille en tremble Et bruit: pourtant elle ne tombe,
 Mars a beau tempester: le laurier ne succombe.
 Deux iours autant de nuits (quand un songe est fascheux,
 Vne heure dure un an ce tumulte orageux
 Croist Et gronde tousiours, le carreau ia s'appreste,
 Ia la main est leuee, Et l'œil guigne sa teste:
 Il esclatte, Et le traict estoit pres à lancer,
 Quand Apollon qui voit en la nuit mesme cler*

S'apperçoit que c'est Mars qui en vent à sa plante,
 Qui fait tel tintamarre, emeut telle tourmante.
 Il se monstre, & subit commence à descocher
 Tant de traits sur les vens qu'au creux de leur rocher
 C'est à qui mieux mieux escampe, à sa voix courroucée
 Le temps retourne beau, la tempeste est cessée:
 Mars demeure confus & l'arbre triomphal,
 Des tonnerres exempt ne receut aucun mal.

Icy ne s'esueilla de Monseigneur la mere,
 Le monde recourant sa beauté iournaliere,
 Va son arbre reuoir: qui si large s'estend.
 Que le peuple François à grand trouppes si rend,
 Pour y estre à couuert, s'asseurant sous son ombre
 Encor tout estonné de l'orageux encombre.
 Florissant ell' le voit, & de ses rameaux vers,
 Luy semble qu'il ombrage elle & tout l'uniuers.
 Qu'il donne aux bons François ombre seure & plaisante,
 Au pillard estrangere dangereuse & nuisante.
 Que nul malheur ne peut à celuy aduenir,
 Qui en peut en sa main vne branche tenir.
 Et quiconques encor en couronne sa teste,
 Du Dieu tonnant ne craint l'estonnante tempeste.
 L'animal mal-faisant, le cauteleux serpent,
 N'osent s'en approcher ny verminier rempant.
 Luy semble qu'elle voit de l'arbre belle & franche,
 Transplanter en tous lieux la triomphale branche.
 Sans qu'on l'offence en rien, le Flamand mal-mené,
 En espere secours: l'Espagnol bazoné.
 Desire d'en auoir, l'Escosse & l'Angleterre,
 Et le Reistre Allemand en engencent leur terre.

LE TEMPLE

Le Suisse en demande, Itale en veut auoir,
 Le Grec & l'Abissin, & tout le peuple noir
 Les images des dieux de sa ramee on orne:
 De ses festons sacrez leurs autels on entourne,
 Et compagne en tous lieux les superbes arros
 Des Pontifes sacrez, des Empereurs, des Roys.
 De son beny branchage on enionche les temples,
 Les arcs victorieux les grans palais & amples.
 Mistique, ferial, vierge, chaste, feé,
 Aymé de tous les dieux, & des cieux enuoyé,
 Pierien, Enthée, & des muses la gloire,
 Le messager de paix, de liesse & victoire.
 Diuin, Parnassien, Prophete d'Elie,
 Veritable, puissant, delfique, Aonien.

Vostre mere s'esueille & ia l'heure la haste
 D'inoquer le secours de Lucine la chaste:
 La deesse l'exauce & le poupon naissant
 D'allegresse & de ieux la France est remplissant.

O que le ciel mes ans iusqu'à ce iour prolonge,
 Que la France verra la verité du songe:
 Et qu'à autant de faneur me voulust faire encor
 Qu'il en faut pour chanter luy & son siecle d'or!
 J'entonnerois ses faiçts d'une si grande audace
 Qu'egal on me diroit au saint chancre de Trace.

Tu te pourras adoncq' assurement fier
 Aux songes par lesquels le ciel signifier
 Nous veut, quel est le cours de nostre destinee,
 En les faisant passer par la porte cornee.
 Mais il se faut garder que le faux ne soit pris
 Pour le vray, suborné par les trompeurs esprits.

Et que l'euenement ne t'apporte dommage
Pour t'estre trop fié au nocturne mesnage.

Tels discours la fantasque apart elle se feint
Quand le sommeil glissant ses ministres estreint:
Mais hors de ses liens elle est si roidde & forte
Quell' souleue les corps de terre & les transporte,
Qu'en elle mesme peut l'heur d'autruy transferer
En estrange animal l'homme transfigurer.
C'est elle qui changea de l'Ita quois la bande,
Et en feist de pourceaux vne trouppes gourmande:
Qui le docte Apulée, & Lucian charma,
Et en asnes dossus leurs membres difforma.
Qui feist ce, dont à tort on accuse Medée,
Que tour à tour quelqu'un de la race d'Anthee
Muë en vn loup-garou, qui doit courir neuf ans,
Et celuy qui mangea du ventre des enfans
L'hostie abominable, & qui la vieille guide,
Cheuauchant le balay la nuit parmi le vuide:
Malencontreux oyseau, pour se trouuer au lieu
Où l'infame assemblee adore vn bouc pour Dieu.
Qui feist iadis parler humainement l'anesse
Que le faux Balaan en vain talonne & presse.
Qui les corps transforma par son enchantement,
Par Ouide chantez ingenieusement.
C'est elle maintenant & vn peu de richesse,
Non l'ancestre vertu qui barre la noblesse
Et le bas populaire: & si c'est elle encor
Qui fait les cheualiers de l'ordre au collier d'or.
Vn petit compagnon vn Roy elle fait estre,
Et le petit valet deuenir vn grand maistre.

LE TEMPLE

C'est elle qui est cause en ce grand uniuers
 Qu'on voit tous les humains estrangement diuers
 De la bouche, & des yeux, du poil, & de l'oreille,
 Qu'on ne trouue vne face à vne autre pareille.
 Entre tant de mortels? n'est ce vn merueilleux cas
 Que mesme les bessons ne se ressemblent pas?
 Qu'un seul homme il n'y a qui n'ait sa propre tare,
 A tous, sinon à luy, nouvelle estrange & rare.
 Que celuy ait le corps de seins tout marqueté,
 Et qu'une femme blanche vn Negre ait enfanté:
 Ou bien tout au rebours que d'une bazanee
 Aussi blanche que lis, vne fille soit née.
 Qu'un autre en son enfant ait au vif exprimé,
 Sans en auoir iouy, vn qu'elle auoit aymé.
 Qu'une fille on ait veu de face & de corsage
 Herisee de poil, comme vn' ourse sauuaige:
 Qu'une qui engroissoit ait bien ozé manger,
 Appetit enragé, de son mary la chair.
 Que celle qui engroisse & ne mange d'un lieure
 Accouche d'un enfant fendu par la baulieure.
 Et qui desire encor d'un fruit, & ne l'a pas,
 Le petit poupelin fustré de ce repas
 Tousiours s'en doit s'entir: ce n'est point vne feinte
 Car la tasche en demeure en son corps bien empreinte.
 Qui a les yeux du pere, & qui la bouche aura
 De la mere, & cest autre à l'ayeul semblera.
 L'autre à l'un ny à l'autre, ains à quelque homme estrange:
 Si que par fois l'on prend l'un pour l'autre en eschange.
 Vn autre en sa maison d'un voyage venu
 Trouue qu'un qui luy semble a sa place tenu.

Ceste-cy d'un beau fils sera grosse & enceinte
 Resemblant vne image en quelque tableau peinte.
 Cela n'aduiet-il pas par l'aprehension?
 Quand entre les baisers de la conionction
 Auecq' la volupté de toutes la plus grande
 Des fantomes conçoit, imagine apprehende,
 Quell' voit deuant ses yeux sans iamais s'arrester,
 Vaguer aussi menu, que l'on voit bluer
 Les flammesches du feu au trauers de la flamme:
 Car autant remuant est l'esprit de la femme.
 Si que, ce que la mere en cest instant a veu
 L'imprime viuement dans le germe conceu.
 Mesme si en sa grosse elle s'affectionne
 A chose qu'elle appetite & qu'on ne la luy donne,
 Au petit enfançon elle engraué deslors
 Un signal, qu'à iamais portera sur son corps.
 Voire peut conceuoir un fantastique germe
 Qu'elle forme & anime & porte iusqu'à terme,
 Tel qu'a esté Merlin en Angleterre né
 Fils d'un ambrassement en l'ame Imaginé.
 Si horreur seulement a de voir vne ordure
 Ceste aprehension marque sa creature.
 C'est cela, c'est cela, c'est di-ie, ce qui rend
 L'homme diuersement à l'homme different:
 Tesmoignage certain de l'inconstance humaine.
 Mais qu'en peut mais l'enfant qui en porte la peine?
 Dames qui desirez de beaux enfans auoir,
 N'aprehendez doncq' rien qui beau ne soit à voir.
 C'est elle qui du cœur piqué par la colere
 Le poux haste, & doubler faict le pas à l'artere,

LE TEMPLE

Qui eschauffe le foyë, & chatouille la chair
 Quand de l' amoureux trait ils se sentent toucher.
 Par elle l'œil malin enforcé d'enuie
 Fait tristement languir de son haineux la vie:
 Et contrainct le muet à franchement parler,
 Et le vieillard gouteux elle auance d'aller.
 O aprehension, que grande est ta puissance!
 Tu fay qu'un corps meurtry crie & prend la vëgeance
 Du coup mortel receu, d'où le sang ialissant
 Remerque l'Assasin s'il se trouue present:
 Encor, ô cas estrange! ell' donne à la viande
 Tel goust que le friant le souhaicte & demande.
 Et groumelant tout bas un murmure incertain
 Acroire elle nous fait que le pain n'est pas pain.
 Ell' fait rire & pleurer, tout en un instant mesme:
 Par la ioye vermeille, & par la crainte blesme:
 Et par elle de ioye est le cœur si ouuert
 Que l'esprit eschappé s'eparpillant se perd.
 Pareils miracles fait nostre Imaginatiue
 Que des regenez la foy constante & viue.
 Le medecin heureux souuent est guerissant.
 Par vne opinion le malade gissant:
 L'autre la medecine, ou qui la mixstionne,
 Voyant tant seulement tout le corps luy frizonne,
 Par en haut par en bas, comme s'il auoit beu.
 Le salutare Ius, il a le ventre emeu:
 Et tandis qu'un quidan de deux taureaux contemple
 Le duel furieux de l'un & l'autre temple,
 Du front trop attentif sent deux cornes sortants.
 Qui sembloient celle-là de ces deux combattants.

De passe passe iouë & subtil à merueilles
 Là Midas attachâ d'une asne les oreilles
 L'homme fait se resoudre & sur la corde en l'air
 Les pieds dans un bassin le voltigeur baller:
 Et l'autre d'une planche, or' quell' soit asseuree,
 Tombe au danger qu'il craint dedans l'onde azurée.
 Tant de force a encor' que sans en rien sentir
 Fera l'ame peureuse hors de son corps sortir,
 Sans plus y retourner: & tel pense par feinte
 Donner en se iouant de la mort une crainte
 (Ieu du prince vrayment) qui fait passer le pas
 De la mort la presente, & qui ne se iou' pas:
 Et qui d'homme viuant n'endure estre trompee,
 Faisant faire à la peur l'office de l'espee.

Mille autres gentils tours fait l'apprehension,
 Qui a dedans le front son habitation.

Reprenons noz outils, & par mesme artifice
 De la sainte raison depeschons l'Edifice.

Sous ces deux arcs croisez, en chasque costé un,
 Où la fantasque loge avecque le commun:
 Là, où du Cerebel le cerueau se partage
 On s'en va droictement rendre au second estage
 Du bastiment de l'ame, où le grand architect
 A luy mesme basti son temple à son pourtrait,
 D'une celeste estoffe, en ce diuin chef d'œuvre
 Tout ce que peut nature & sçait l'art se decouure.

Le plant est en ouale, & le comble vosté
 Sur trois piliers de marbre est seurement porté.
 Il falloit bien aussi que l'arcade en fust forte
 Pour soustenir le faix du cerueau qu'ell' supporte

LE TEMPLE

Et ce grand miroïer des deux costez luisant
 Qui est ce haut estage en deux corps diuisant.
 En sortant du Paruis, tirant droict vers l'entrée
 De la maison, qui est à memoire sacrée,
 Vne colonne on trouue encroustee d'or fin,
 Faiçte en flamme de feu, ou en pomme de pin:
 Passant outre tu vois derriere ce pilastre
 Quatre tertres iumeaux, plus blācs que fin albastre,
 Deux à deux accostez, deux sont Didimion
 Des gregeois appelez, les autres gloution.
 Et plus bas on rencontre vne plene egallee
 A trois angles, dont l'un desaigne vne valee.
 Qui ces corps composa il vouloit exprimer
 Les membres qu'on ne peut honestement nommer
 De quelque Hermaphrodite: aquoy faire, ô nature
 As-tu effigié de nostre geniture
 Les engins dans le chef? est-ce à fin que tousiour
 L'esprit eguilloné pense à faire l'amour?
 Car sans l'amoureux soing d'accoupler les deux
 En bref des animaux periroient les especes: (sexes
 Fut ce pas pour cela? sous ce pilier doré
 Entre ces coustaux blancs disposez en carré,
 Dedans la pierre viue est taillé à l'antique.
 Un conduict long & droict de l'ame le portique.
 Où ell se pourmene & s'en va visitant
 Dans le coche soudain de l'esprit la portant
 La mere des neuf sœurs: En ceste mesme place
 Un petit Timbre y a, qui tendant vers la face
 A l'emboucheure large, & le bordage rond,
 Et qui se restrecist peu à peu par le fond.

Ainsi que le vaisseau, par lequel en Automne
 Le mont qui boust encor dedans le muy s'entonne.
 Son autre extremité trouue son siege prest
 Sur le basilere os, le fondement du test:
 D'où l'abondant humeur par la glande percee
 A iour de part en part, dans la bouche est versee.
 Comme en vn bon menage, où tout est ordonné
 Par sage aduis, y a vn lieu determiné,
 Où, par conduits expres, les ordures on iette
 Loing, hors de la maison, pour l'entretenir nette.
 Ainsi l'humain Cerueau par des certains canaux
 Iette ses excrements, cause de tous ses maux.
 Le fleume mesmement, or' epés, or' liquide
 Par c'est entonnoier commodement se vuide.
 Car deçà & delà pais Circonuoysin
 Les superfluitez coulent dans ce bassin,
 Par plusieurs canelez qui s'y viennent tous rendre,
 Pour, quand il en est plein, & temps, hors les epandre.
 Tout au plus pres du ciel, en ce dome vousté,
 Du diuin intellect est la principauté,
 Où souuerainement haut assis sur vn throne.
 Tient de l'empire humain le Sceptre & la couronne,
 Loing des sens separé, ne meritans l'honneur
 D'acoster de si pres vn si noble seigneur:
 Fors que quand il luy plaist, par la loy naturelle
 Tant que le corps & luy, sous la forme mortelle
 Qu'un homme ne feront si d'eux se veut ayder:
 C'est à eux d'obeir, à luy de commander.
 Il faut bon gré malgré aussi tost qu'il le mande
 Que le corps sensuel humble homage luy rende.

LE TEMPLE

Qu'amour armé de feux flechisse sous les loix,
 Ou ses flambeaux esteints, & luy rompt son carquois.
 Si l'ire se reuolte & faict de la mauuaise,
 Seuere il la chastie & son orgueil rabaisse:
 Des appetits charnels il est maistre & vainqueur,
 Bien qu'ils soient fauoriz & du foye & du cœur.
 Quant aux sens il s'en sert, seulement pour extraire
 Les formes vne à vne hors de chasque matiere,
 Que premier le commun en ses ventres reçoit:
 L'imagination de leurs ombres conçoit
 D'autres formes encor, la forme imaginee
 Est du cler intellect soudain illuminee,
 Comme le raix brillant du soleil prent clarté.
 Il aduise premier que l'obiet présenté
 Ne soit falsifié, que de l'œil la uisée
 Du sensible commun ne puisse estre abusee:
 A peine, quant à luy peut il estre deceu.

Des fantaumes presents apres qu'il s'est emeu
 Et les a recognuz, aux sens congé il donne
 Commandant qu'un chascun derechef se cantonne
 D'eux il n'a plus que faire il peut sans leur secours
 Desus l'image extraicte ourdir mille discours.
 Et de chacune forme en soy-mesme gardee
 Sans plus la rechanger, en retient vne Idee,
 Sans faillir, sans matiere, & sans estre subiect
 Au corps, ce qui luy plaist, ose, entreprend, & faict.
 Ainsi qu'un petit Dieu tres-puissant il transforme
 En tout ce qui luy plaist, de ses formes la forme:
 Et du Chaos confus des fantaumes diuers
 En soy mesme bastit un petit uniuers,

Qui ne prendra point fin: car science asseuree
 Pourroit-on bien auoir de ce qui n'a duree?
 Mille conceptions peut à part soy former,
 Sans art, & sans outil, si tost qu'à s'allumer
 Vient le feu naturel, la semence celeste
 Qu'aux astres desroba la race de Iapete:
 Et martelant le cœur durement enroché,
 En fait saillir le feu oyseusement caché,
 Qui errer ne peut plus suiuant de sa nature
 Les mouuemens secrets & l'adresse plus seure.
 Ainsi deuant le iour vne clarté voit-on,
 Et deuant le fruiçt meur, la fleur & le bouton:
 L'Herbe deuant l'espy, l'espy deuant la grene,
 Et le drap est ja teint ains que son lustre il prenne.
 Brusque est encor l'acier ains que par l'emeril
 L'ouurier l'ait polissé en vn miroiër gentil,
 Qu'une chose si dure, aspre, rude & obscure,
 Sous sa solidité celast telle nature,
 L'eusses-tu iamais creu? si encor ne le croy,
 Tourne-toy deuers luy, & toy-mesme t'y voy.
 Qui a-il plus naif? n'est-ce pas là ta face,
 Qui vit, & qui se meut, qui rit en ceste glace,
 Cil qui de sa nature est tout resplendissant,
 Sera-il moins habile, & beaucoup moins puissant?
 Ia la semence y est, reste à la faire naistre,
 A force de sueurs l'arrosant faire croistre.
 Ce sont les fondemens que le Ciel a plantez
 En l'intelleçt humain, où les arts sont antez,
 Table raze il n'est donq, puisque les apparences
 De tout temps y estoient des arts & des sciences.

LE TEMPLE

Qu'il inuente, & compose, & diuise & entend,
 Par elles tout il ose, assure & entreprend.
 Sans accident aucun, sans lieu, temps, ny mesure,
 Leur essence il comprend, leurs causes, leur nature.
 La matiere & la forme il separe il reioinct.
 (Oeuure vrayment diuin, que le sens ne fait point)
 Sans s'arrester cy bas à ce qui naist & passe,
 Il se guinde si haut que nature outrepasse.
 (Sans toutesfois bouger de sa diuine tour,)
 De la seule pensee il espie à l'entour
 De la boule du monde, & si profond se iette
 Qu'il d'escouure de Dieu la demeure secrette.
 Pesle-mesle il se fourre au ventre du grand corps,
 Et voit ce qui se fait & dedans & dehors.
 Il discours curieux, & sçauant extrauague
 La terre, & l'Ocean & des airs tout le vague,
 Et tous leurs changemens il contemple diuers:
 Comme par la froideur des rigoureux yuers.
 La glace est en Ianuier de brouillards composee,
 Et comme au mois d'April se forme la rosee.
 La glace estre vn humeur par le grand froid caillé,
 Ce mesme estre l'egail sur l'herbette emailé
 Que les bruines sont des gouttes distillees,
 De l'air, en l'air, par l'air refroidy, congelees.
 Passant plus outre il voit ces grans monts balancez
 De vapeurs, par les uens deçà delà pouffez;
 Que le chaut tire à mont, voguant tant que la nuë
 Se fonde à la chaleur de Phœbus suruenüe.
 Adoncq' ce fond la nuë, & fait que maint torrent;
 Rauine la campagne à val tousiours courant.

S'il aduient que la pluye en tombant soit surprise
 Des soufflets baloyants de la frilleuse bize,
 Ou du froid commandant sur le mitan de l'air,
 Sur la terre on la voit menu s'esparpiller
 Comme l'aine charpie: & si blanche s'esclatte,
 Que les yeux esbloüist, tant leur veü ell' dilatte:
 Si l'yuer est plus grand là haut qu'il n'est çà bas,
 Et de l'air mitoyen le nuageux amas
 Soit assiegé de pres de la froidure extreme,
 Enbuolets se changer il verra l'humeur mesme.
 Une scopeterie orageuse il entend,
 Des nuaux s'esclattant, qui au large s'estend:
 L'air en bruit refrappé, & la terre battuë
 Tremble, que ses enfans & nourrissons ne tuë.
 Le vigneron blemist, le laboureur a peur
 Du vignoble & des champs que l'espoir soit trompeur.
 Il sçait l'occasion, pour laquelle animee
 Est l'esmute des vens nez de seche fumee:
 Et la cause il cognoist de leurs venteux combats.
 Le chaut les pousse amont, le froid les tire en bas:
 Si que grondans ils sont contrainct faire la ronde,
 Or plus haut, or plus bas, rodants l'entour du monde.
 Mille troubles il voit sans bouger de ce lieu,
 Qu'endure à tous momens l'estage du milieu.
 Il y oit despiter la flamme detenuë,
 Froidement, maugré ell' és prisons d'une nuë.
 Ce souffle ardent & prompt, qui se roule bruyant,
 Courant, hurlant, muglant, son contraire fuyant:
 Le voicy, le voylà, casse, fracasse, & perce,
 Les costes de la nuë obscure, noire & perse.

LE TEMPLE

L'esclair sort quant & quant, cest esprit enflammé
 Est le traict dont le bras de Iupin est armé.
 De là plus haut il monte en l'ardente contree
 Où d'abord mainte chose estrange a rencontree,
 Un dragon, vne cheure, vn long feu serpentant,
 Une poutre, vn cheuron, vn Typhon s'esclatant,
 Vn flambeau, vn tonneau plein d'ardante fumeé,
 Une lampe brillante, vne espee allumée,
 L'estoille traiectante, & le feu mal-heureux
 Dont les Rois craignent tant les menaçans cheueux.
 Des tourbillons bruslants, des ianelots, des lances,
 Et de mille autres feux les vaines apparences,
 Creez diuersement comme l'exalaison
 Gluante, qui les fait imprime leur façon:
 Ou selon que la méche où la flamme s'allume
 Par la flamme plus tard ou plustost se consume:
 Des Elements s'ennuye élancé d'un plein saut,
 Tous les cieux penetrant il gaigne le plus haut.
 Où il gouste, où il flaire, & diuinement touche
 Ce que dire ne doit, vne mortelle bouche,
 Ny d'ancre estre souillé, où il a ouy & veu
 Ce qui doit, sans le voir, par la foy estre creu:
 D'ou contant il retourne, & plein d'intelligence
 Sur vn bien assureé fonde son esperance.
 Tel estoit l'intellect du porte-estaille Atlas,
 Sous le celeste faix qui tout suant & las
 Pour aleine reprendre, a deschargé sa somme
 Sur le grand dos d'Hercule: a l'intellect de l'homme
 Rien impossible il n'est, la contemplation
 Diane en amoura du bel Endimion.

L'intellect proprement est ce diuin Mercure,
 Qui cloüa Promethé nud sur la cime dure
 Des rochers Caspiens, c'est le mesme intellect
 Qui dans le mont ardent precipiter a faict
 L'Empedocle diuin, qui le grand Pitagore
 Iadis authorisa, qui fut d'Anaxogore
 Le parcin $\text{\textcircled{D}}$ qui l'a (NOY S) de son nom nommé,
 Par qui Thales en Grece est sage renommé:
 Et six autres avecq', l'intellect faict encore,
 Que maints mortels pour dieux en la terre on adore.
 Qui nous a reuelé que les cieux font neuf tours?
 Et le temps que chacun met à faire son cours?
 Qui nous a inuenté l'admirable Buffole,
 Par qui voit le pilote $\text{\textcircled{D}}$ l'un $\text{\textcircled{E}}$ l'autre Pole?
 Et l'aiguille ayme-nort approcher à l'aymant,
 Qui par toutes les mers le guyde seurement?
 Que les vieux n'ont osé entreprendre ny croire,
 Terminant en un coing de la terre leur gloire?
 Qui nous a dict qu'aux bons sont reseruez les cieux?
 Et les lieux soub-terrains pour l'homme vicieux?
 N'est-ce de l'intellect la diuine pensee,
 Fille unique de Dieu, de Dieu grosse $\text{\textcircled{E}}$ forcee?

Mais la raison, dy moy, pourquoy tous n'ont cest heur?
 L'un estant retardé par la grand pesanteur
 De sa retifue chair ne peut si haut atteindre:
 L'autre a le cœur trop bas, qui, lasche, le fait craindre.
 Ny pouuoir arriuer: qui mal-conditionné,
 N'aura le vouloir bon, qui en est destourné
 Par l'auare richesse, où tout son espoir fonde.
 L'autre icy bas s'amuse aux blandices du monde,

LE TEMPLE

L'autre est en beau chemin, mais la mort le suiuant
L'attrappe, & ne veut pas qu'il aille plus auant:
Qui en lieu d'aller droict, tourne au sentier du vice,
Se laissant egarér. à sa propre malice.

Cestuy, qui est mal né, sera plus mal nourry,
Qui bien nourry sera des cieux n'est fauory.
Comme Phæbus se voit par sa propre lumiere
Nul ce but ne peut voir, si Dieu ne luy esclaire:
Et venir n'y peut pas, s'il ne luy tant la main,
Sans le secours du ciel l'homme traueille en vain.
Il faut pour paruenir à ce degré supreme,
Qu'il ayme la vertu, & que Iupiter l'ayme.

Ce Prince pres de soy tient sa seur voloncé,
Qu'à aller il laisse & viure en pleine liberté:
Par vne opinion de quelque bien conduite,
De ce que mieux ell' ayme, ell' fait, la poursuite.
A sa dextre se sied la prudente raison,
Des appetits regente & qui comparaison
Fait des ombres sans corps, selon qu'elle les trouue
Estre de mise ou non, les condamne ou approuue.
Icy marche en son rang le graue iugement,
Qui assiste à sa seur en son gouuernement.
La contemplant haut y leue la teste,
Qui n'apprehende rien qui ne soit tout celeste:
En m'esprisant la terre & sa corruption,
Cerche par ce moyen vne perfection,
De se reioindre encor à ceste ame supreme,
Qui n'a commencement ny milieu ny extreme.
L'experience y est, auecq' le sage aduis,
Qui de prompte action sont pas à pas suiuis.

La foy tout ce sainct lieu remplit de sa lumiere,
 Dissipant les brouillards de l'erreur temeraire.
 Voylà quel est le train & superbe appareil,
 De ce Prince, qui n'a au monde son pareil.
 Eminent par sus tous, fait assez à cognoistre,
 Le lieu dont est issu, qu'il ne deuoit point naistre
 D'un element impur, ny de ce germe blanc,
 Escumeux & humide & la creme du sang:
 Qu'il est extraict du ciel, vne viue estincelle
 De la diuinité, vne idee eternelle
 Du premier intellect: sur lequel a esté
 De toute eternité le monde proietté.
 Des dieux le grand mignon, à qui la mort, ny l'aage,
 N'ont pouuoir, n'y n'auront faire ou porter dommage.
 Qui de tout ce qui est dessous le soleil né,
 A la vie eternelle est seul predestiné.
 Qui autre obiect n'a point que l'essence des choses,
 Uniuersellement, & qui ne sont encloses
 Sous l'accident muable, & ses esprits moteurs,
 Qui du bal eternel des cieux sont les auteurs.
 Et la premiere cause infiniment parfaite,
 Tressimple, ingenerable, & qui n'est point subiecte
 A la corruption, en tout lieu, & sans lieu,
 Qui n'a commencement, ny terme, ny milieu.
 Qui par tout a son sentre au milieu de son cerne,
 Qui tout orne, & dispose, entretient, & gouuerne,
 Par son esprit diffus, dont tout est comble & plein,
 Ne laissant rien dehors, ny dedans qui soit vain.
 Son essence ne peut en parts estre partie,
 Car toute en tout ell' est, toute en chasque partie.

LE TEMPLE

*A tous est son pouuoir euident & caché,
 Et n'est de passions son vouloir empesché:
 Regardant en soy-mesme elle est son exemplaire,
 Sur qui ce qui luy plaist & veut elle peut faire.
 Elle est tout ce qui est, & tout ce qui n'est point,
 Commencement de tout, de tout le dernier poinct.
 Laquelle en soy n'ayant ny figure ny forme,
 En tout ce qu'elle veut quand ell' veut se transforme.
 Ce n'est qu'air, terre, & feu: que mer & ciel profond,
 Vn abisme beant qui n'a riue, ny fond,
 Que langue ne peut dire, & que l'ceil n'a point veüe,
 A nul que par la foy de l'aureille cognüe.
 Celle qui du grand tout fist les compartimens
 Et au dedans renga l'ordre des Elemens,
 Et peupla d'animaux l'air & la terre & l'onde,
 Pour le plaisir de l'homme, où tout le monde abonde.
 Qui l'homme expressément a faict pour l'intellect,
 Et l'intellect pour elle expressément a faict.
 Qui se replie agile, & sa belle lumiere
 Retournant en soy-mesme, en soy se reuerbere:
 Si qu'à luy mesme il est comme vn miroir poly,
 Où bel il se remire, & voit l'homme annobly
 Sur tous les animaux, prendre son origine
 De l'estoc des hauts dieux, de la race diuine.
 De ce qui fut créé, voire y fussent les cieux,
 Le plus beau, le meilleur, & le plus precieux.
 En nature vn miracle, vn petit Dieu terrestre,
 Vn animal diuin des terrestres le maistre,
 Craint, honoré, serui des celestes esprits,*

En qui tous du grand tout les thresors sont compris.
 Aussi fait comme luy il fut de forme ronde
 De l'infini capable, & de l'ame du monde.
 Dieu doncq' pour le petit le grand monde bastit,
 Pour l'amour de soy-mesme il bastit le petit.
 Dieu à l'homme par l'homme au vif se represente,
 Ainsi que le tableau la personne viuante:
 Mais qui doit quelque iour son terme estant fini,
 Estre la chose mesme, à sa cause r'un.
 Il n'est rien maintenant, que le Creon la monstre
 Qui de son Archetyp' l'excellence demonstre.
 C'est c'est ce grand prophete, à qui seul est donné
 Pouuoir disertement par vn langage orné
 De son docte intellect, qui iamais ne repose,
 Exprimer les desseings qu'il inuente & compose,
 Tât grâds & hauts soiët ils, & qui maugré les ans
 Faiët ses faiëts & son nom les siecles suruiuants.
 En ce monde il est seul, qui raison puisse rendre
 De ce qu'il diët & faiët, qui puisse seul apprendre
 La vertu genereuse, & seul tient le milieu,
 Des deux participant, d'entre le monde & Dieu.
 Ams que le ciel fust rond, & la terre abaissée
 Pensé desia l'auoit l'eternelle pensée:
 Tout le premier conceu, créé le dernier fut
 Des œuures du grand Dieu & le comble & le but.
 Deslogeons de ce lieu pour aller voir la gloire
 Du riche cabinet que garde la memoire,
 Hors de bruit, solitaire, & bien loing à l'escart
 Derriere retirée, a son logis apart.

LE TEMPLE

A l'entour entaillé par les tayas iumelles
 Rentrant se redoublant entre les deux ceruelles,
 Qu'un Aqueduc conioinct seruant comme de prout
 Par lequel les esprits des vns aux autres vont.
 Ceste basse crottesque en vne roche dure
 A la docte memoire elu pour sa demeure,
 On trouue vn Obelisque y'entrant, s'eleuant
 Sur le derriere, vn autre on voit seur le deuant:
 L'un & l'autre est semblable aux aiguilles d'Ægypte
 Ouurage tres-hardy, de marbre sienite.
 C'estuy-cy feist nature à cestuy-là pareil,
 Que les siecles passez consacroient au soleil.
 Qui d'un Cyprez a veu la cime faite en pointe
 Entrelassée autour de l'arbre à Bacchus sainte
 Où la coque tournée au cornard limaçon
 De ces pointes a veu la gentile façon.

De ces piliers frisez, sur chascque pointe aiguë
 Ceste maison sacree est ferme soubstenuë
 Dans le brun Cerebel, ce dome est mesuré
 Iustement myparty, du rond & du quarré.
 Dictes doncques Io, qui en la quadrature
 Cherchez, trop curieux, du cercle la figure,
 Ce que trouuer à nul possible n'a esté.
 Or icy lauez-vous, dessus la fermeté
 De la forme esquarree est assise l'histoire,
 Sous la protection de l'heureuse memoire:
 Dans la rotondité les arts s'entretenans
 Main à main, vont sans cesse en soy se retournants.
 Comme en vn bransle gay vont tous sous la cadence
 Du labeur qui les mene au but de la science.

Et comme en une rouë ils tournent nuict & iour.
Tant qu'ils ayent trouuë de leur parfaict le tour.

Diuine prouidence! admirable sagesse
Tu imprime en chacun le signe, où tu l'adresse!
Ce cabinet est fait & taillé proprement
Comme la plume, outil de nostre entendement:
Plume dans le cerueau diuinement antee,
Parqui est la memoire au vif representee
A la posterité, des vertueux effects,
Et le braue renom, de ceux qui les ont faicts.
Qui tes traits considere il est contraint de dire
Que naturellement l'homme est né pour escrire:
Et que t'ayant en main ne doit douter l'effort
Des rauissantes faux du temps, & de la mort.
C'est de là que tout homme à ne scay qu'elle enuie
Faire heritier son nom d'une eternelle vie.
Qu'epoinçonné de gloire il n'a peur du danger,
Seur que la plume apres sa mort, le doit vanger
Sus doncq' esprits eluz, d'escrire vous inuite
Nature, qui vous a au chef la plume escrite.
Et vous, ô prince illustre, établissez leur pris,
A fin que voz beaux faits à l'enuy soient escrits.
Taillez de la besongne à qui nature taille
La plume pour l'escrire, à celle fin quell' n'aille
Dans la grand mer d'oubly s'engouffrer, & l'ouurier
Qui travaille pour vous viue de son metier.

On dit qu'en ces quartiers est la grotte sacrée
Où les Muses trouua le laboureur d'Ascrée
Où poëte il fut créé & aprint à chanter,
Du labeur & des Dieux enfants de Iupiter.

LE TEMPLE

*Là des preux renommez Clyon la gloire y vante,
 Et là tragiquement Melpomene lamante,
 En ses fleutes entonne Euterpe ses chansons:
 Et là Terpsicoré de la citre les sons
 Accorde avecq' ses pas, Calliope s'applique
 A chanter grauelement maint exploit heroïque.
 Uranie au compas y mesure les cieux,
 Et Eraton la terre, & Polymnie aux yeux
 Deuotieusement les louanges y chante:
 La comedie encor Thalie y représente,
 Memoire qui preside en cest antre profond
 Songneuse obserue & voit ce que ses filles font.
 Chacune retiree, apres sa tasche faicte,
 Sur ce qu'a entendu la memoire secrette
 Repense & le repete, & le met sous la clef
 Du riche cabinet du monarque du chef.
 Là sont tous ses thresors, cent mille belle tables
 Peintes au naturel des choses memorables:
 En autant de façons, sont di-ie, les presents
 Qu'offre la fantasie & le prince des sens,
 A tout' heure à leur Roy, que Mnemosine propte
 Reçoit, & qui s'en charge, à fin d'en rendre compte
 Quand requise en sera, cachetez de son seau
 Fidellement les doit rapporter au bureau.*

*Mais depeur que le temps, qui sans retourner passe,
 Les vrays originaux n'abolisse & n'efface,
 De chacun exemplaire elle tire & extrait
 Sur ces impressions autre pareil pourtraict.
 Ce qui n'est de grand pris, ce que moins elle estime
 En cire seulement negligemment imprime.*

Ce qu'elle veut garder plus curieusement
 En marbre ou en metal burnie viuement:
 Qu'apres dedans son Louure ell' s'enferme & dispose,
 Souuent deuant ses yeux le remet & propose:
 A fin que du passé se puisse souuenir.
 Car du present n'a cure, & moins de l'aduenir:
 Le present seulement est pour la fantasie.
 Le diuin intellect du futur se soucie:
 Vray est quand mesme obiect deuant elle reuient,
 Comme encore present du passé se souuient.

La meditation ceste dame accompagne;
 Depeur que rien se perde en ceste riche espargne.
 Que si rien s'y egare, ell' ne fait que resuer
 Au temps, au lieu, & comme on la pourra trouuer.
 La recherche ell' en fait errant de place en place,
 Et ne reposera que n'ait trouué la trace.
 De l'image oubliée, adoncq' de son pinceau:
 La refraichist, trouuée, en l'antique tableau,
 Quell' rend, renouuellé, à l'ame thresoriere,
 Qui le repend, fidelle, en sa place premiere.

De cest Antre sacré sort vn roide torrent
 D'esprit impetueux, à grand rendon courant:
 Qui du moitte cerueau s'elançants, par la bonde,
 Entrent au grand canal où tout le corps se fonde:
 Contre leur naturel, encontre bas soufflez
 Trente couplez de nerfs en sont meuz & enfilez.
 Ainsi que l'organiste entonne & souffle l'ame:
 Qui en tous se depart, par cent tuyaux se rame:
 Ou comme vn long estang, lequel s'épanche, pour
 Prez & champs arroser, qui languissent autour.

LE TEMPLE

Tel est l'esprit couliꝝ qui tout le corps transperce,
 Par ces nerfs mariés, deçà delà se verse:
 Par ce long eschenal, du long & de trauers
 Fait sentir, fait mouuoir le petit vniuers.
 Tout le corps fait mouuoir presque en la mesme forme
 Que vogue la galere, à lors que la chiorme
 De forçats enchesnez tirants à l'auiron
 Font de la Nereide escumer le gyron.

Mais mon ame dy moy (pourueu que ta penssee
 De ses diuins discours ne soit trop abaissée
 Pour m'ouir importun) mon ame, quand tu sors,
 Pour aux necessitez pourueoir de nostre corps,
 Par la voïe des sens: ou quand tu te recrée
 Admirant les beautez de la chose créée,
 Dy moy, ma chere vie, ame par où vay-tu,
 Ou comme à toy paruient leur extreme vertu.

Des diuerses odeurs, ie sens la difference
 Par un double canal qui vers le front s'auance,
 Et va costoyant l'œil, & lequel mol & rond
 Du teint de la ceruelle est perçant l'os du front
 Caerneux vient au nez où l'odeur vaporeuse
 S'entonne obliquement par la narine creuse:
 Euentant le cerueau, bonne ou mauuaise soit,
 L'impression demeure au sens qui la reçoit.
 Quatorze nerfs apres deux à deux on attelle,
 Qui naissent tous du fond de la grande ceruelle:
 De deux toiles tissuz l'os du crane perçants
 Pour faire leur passage aboutissent au sens.
 Chacun organe propre à son action trouue
 Qui par l'obiect externe & le moyen se mouue:

Desquels le premier pair toutes choses fait voir:
 L'autre par son esprit les deux yeux fait mouvoir.
 Celuy qui vient apres par la face se rame,
 Porte au nez, & au front les puissances de l'ame:
 Aux maschelieres dents tant d'enhaut que d'embas
 Par compas ouure & clost de la bouche le pas.
 Vn reste se reprend sur la langue friande:
 Le quart le palais couure & gouste la viande.
 Le quint se laisse au fond du tortu limaçon
 De l'aureille, & de l'air fait entendre le son.
 Le sixiesme fecond par dedans la gorge entre,
 Et se va partageant à l'un & l'autre ventre:
 Dont un lot en amont en rebroussant tout court
 Dont il estoit party, se retroussé & recourt,
 Pour ouurir & fermer la gargamelle blanche,
 Et y articuler une parolle franche.
 De l'ame le dernier est le seur messager,
 La langue remuant d'un mouuement leger:
 Qui est cause que l'homme hors des rangs s'ose mettre:
 Des autres animaux, & s'en dire le maistre.

Deuot ie te salue, eternal Architect,
 Qui ce temple as basty, œuure le plus parfaict:
 Qu'onques crea ta voix. O Dieu maintiës-le encore
 Que l'ouurier par son œuure on cognoisse & honore!
 Que seruiroit-il d'estre accöply de tout point,
 Et puis le quitter là, & ne s'en seruir point?
 Comme vn qui de plaisance vne maison eleue
 Pour viure heureusement, lors qu'on la paracheue,
 Elle est abandonnee aux nocturnes esprits
 Pleine de bruit, d'effroy & lamentable cris.

LE TEMPLE DE L'AME.

Ou comme le marchand, pour aller à l'emplette
 Au Peru, sur la rade vne nauire appreste,
 Chargee on l'auanture aux ondes & au vents:
 Vn corsere voy-ci lequel se met dedans,
 Emmene le vaisseau, la marchandise vole,
 Le marchand voit du port son espoir qui s'enuolle.
 Ainsi est-il de nous: tu n'en es si tost hors,
 Ton ennemy voyci qui se fourre en noz corps.
 Ton temple & ta maison adoncq', Seigneur, conserue,
 Que ton hostesse l'Ame autre que toy n'y serue.
 Ne permés que l'athée & moqueurs impudens
 Qui la veulent honnir, n'entrent iamais dedans.
 Et que le feu diuin ell garde pure & vierge,
 De la prison mortelle immortelle concierge:
 Renonçant à iamais, pour digne te loger,
 Son espoux, son espoir, à l'esprit estrange.
 Et quand il te plaira qu'aduienne la iournée
 Que du corporel temple ell soit exterminée.
 Diuine entre tes bras vueille-la recevoir,
 Et la fay meriter face à face te voir:
 Et quand le cor orra de ton autre venuë,
 Restaure sa maison, & elle toute nuë
 Reuez-la d'un corps pur immortel & luisant,
 Desponillant cestuy-ci mortel, sombre & pesant:
 Et que le Prince à qui mon œuure & moy ie vouë,
 Mon œuure & moy pour siens doux & benin adouë.

FIN DV TEMPLE DE L'AME.



LA FABRIQUE, OV LE TRESPETIT
MONDE.

A MONSEIGNEUR LE DUC
de Joyeuse.

AU monde il n'y a rien qui le soleil egale,
 En beauté, en bonté, en splendeur, en grandeur:
 Aussi c'en est l'œil dextre, & le gauche est sa sœur,
 Qui de son frere emprunte un teint iaunissant-pale.
 La porte de nostre ame est l'œil, par où deuale,
 Plustost que le penser, l'amour au fond du cœur:
 Et du cœur l'œil encor' est le miroir tresseur,
 Qui l'ame toute nuë aux yeux de tous estale.
 A vous doncq', Duc heureux admirablement beau,
 Qui egale des cieux l'un & l'aut re flambeau,
 Et qui heureusement sur la France rayonne:
 C'est à vous, Monseigneur, des François le soleil,
 A vous Madame aussi, qui en estes l'autre œil,
 Que l'œil que i ay tiré sur voz beaux yeux ie donne.

LA FABRIQUE



*Plus meschant ie serois que ne fut Epicure,
 Et ferois traistrement irreparable iniure
 Au diuin architect: qui a fabriqué l'œil,
 D'artifice, qui n'a au monde son pareil:
 Si, ayant le saint temple, auquel l'ame on adore,
 Superbement basty, ie ne chantois encore
 L'œil, de ce bastiment le membre plus parfait,
 Où l'ouurier s'est luy mesme au naturel pourtraict.
 De la diuinité l'œil est le caractere,
 Vn esclat procedant du pere de lumiere,
 Vn rayon apparent de cest esprit espars,
 Qui vigore & nourrist du tout toutes les parts,
 Et qui en toutes parts diuinement se darde,
 Par qui diuinement la iustice regarde:
 Et au trauers du monde infiniment s'espend,
 Et selon le merite à vn chascun se rend:
 Par qui la prouidence eternelle, diuine
 Conduit de l'uniuers la tresgrande machine.
 Qui se reuerberant dedans les cercles pers,
 Verts, ou noirs, bleuz ou roux du petit uniuers,
 Par le petit pertuys de ces cercles le centre,
 Iusques au fond de l'ame inuisiblement entre:
 Et entré il esbranle, & meut premierement
 L'imagination, & puis l'entendement,
 D'où il voit par les yeux, en l'aureille il escoute,
 Par le nez il odore, & par la bouche il gouste.
 Il parle par la langue, il allume le feu,
 Pour cuire en l'estomac ce dont il s'est repen.
 Il eschauffe le cœur, ce rayon est en somme,
 La seule occasion des puissances de l'homme.*

Au chef il imagine, il discours & cognoist,
 Et retient ce qu'il oit, ce qu'il sent, gouste, & voit.
 Il est l'ame de l'ame, & du bel œil la sphere
 Est le diuin outil de ceste flamme ouuriere.
 Lequel par tout diffus & dedans & dehors,
 Nourrist, auie, anime & l'esprit & le corps.
 Puis en l'œil retournant, la lampe de ce temple,
 Il se recule en blot, toutes choses contemple,
 Qu'il imprime en son rond, dont fidelle tesmoing,
 Les formes il retient, tant de pres que de loing.
 L'ame des passions variable Prothee,
 Et dans le clair miroir de l'œil representee:
 Et qui d'une belle. ame est diuin amoureux,
 Qu'il la voyè & la baise au bel email des yeux.
 S'elle est douce ou farrouche, ou fascheuse ou contante,
 Difforme ou belle encor', nuë en l'œil se presente
 En son vray naturel, en l'œil est le signal
 Pour descouvrir de l'ame & le bien & le mal.
 Le front n'est si fidelle, aussi nul ne s'y fie:
 Mais l'œil n'abuse aucun & ne se falsifie.
 L'œil est le vif tableau où la diuinité,
 A tiré le plus beau de la mesme beauté.
 Ce qui entre par l'œil, qui de l'ame est la porte
 Est bien plus assure que cela qu'on rapporte
 A l'aureille, & souuent se perd avecq' le son,
 La parole empennee au fond du limaçon.
 L'intellect, œil de l'ame, est du grand Dieu l'image,
 Et l'œil de l'intellect exprime le visage.
 L'œil est le seul quadran, qui seur merque du corps,
 Les diuers mouuemens, les contraires accords.

LA FACRIQUE

De l'homme interieur, en saglance egallee,
 La pure verité se voit nuë estallee.
 L'œil est le truchement, qui parle pour le cœur,
 Que nature estuya au fond d'un coffre obscur.
 L'œil est le different de la mort & la vie,
 D'orgueil le braue siege, & de hayne & d'enuie,
 Du desdain, du chagrin: l'œil manifeste à tous,
 Comme l'ame le meut, qui est cruel ou doux,
 Et comme l'œil mondain enflamme & illumine,
 Du tresgrand animal la tresgrande machine.
 Le seul œil est du corps, comme un petit soleil,
 La couronne des cieux se courbe peinte en l'œil:
 Dont l'esclat tout perçant toutes choses penetre,
 Plustost que le penser il est où il pense estre.
 Terre & mer il parcourt, sur les lieux voltigeant,
 Voit tout ce qui s'y faict & retient diligent.
 D'un clin d'œil, du soleil il court au double giste,
 Sur la double ourse il est, la grande & la petite.
 Prince des sens assis sur le throne plus haut,
 Contemple s'il y a en eux quelque defect.
 Rien plus cher n'est que l'œil, mais Dieu d'amour extreme,
 Plus chèrement que l'œil nous contregarde & ayme.
 Car du dextre element est oilladant celuy,
 Qui humble le seruant de luy fait son appuy.
 Du gauche & de trauers menaçant il regarde,
 Qui ses saintes mandements rebelle point ne garde.
 Un surion eternal s'espånche dans les yeux,
 Qui par compassion prend sa source des cieux,
 Mainte larme iettant iustement pitoyable,
 Pour voir iniustement le pauvre miserable.

On diroit que des dieux, pour rendre l'œil parfait
 A qui mieux, de son mieux chascun present luy fait.
 De l'œil, le dieu d'amour a emprunté ses armes,
 Ses traicts, & ses brandons, que parles froides larmes
 Fondant par les canaux de l'humide cerueau,
 Trempe, aguise, & embrase, ainsi qu'à gouttes d'eau
 Vulcan sa forge allume, & par les yeux sa gette,
 Ou la mort, ou la vie aux amans qu'il agnette.
 Sans l'œil, pour qui amour a tout basti de rien,
 N'y auroit en ce monde aucun plaisir, ny bien.
 L'œil commande, muet, que seulement il cligne,
 Tost obeir il faut à l'imperieux signe.
 Si l'on faut, d'autre signe obliquement lancé,
 De la punition on se voit menacé.
 Au monde il n'y a rien qui plus au monde semble,
 Que l'œil, ou les beautez du monde sont ensemble.
 Et comme du grād monde, œuvre en six iours parfait,
 L'homme plus admirable est le viuant pourtraict:
 Ainsi est l'œil humain, que tiers monde ie nomme,
 Un raccourcissement de l'uniuers de l'homme
 Oeuure mille-fois plus hardiment entrepris,
 Que du Meonien tous les carmes compris
 Dans le fond d'une noix, ou le char, qui sous l'aile
 D'une petite mouche admirable s'atelle.
 En son vny crystal il enuoyë & reçoit
 Tout ce que l'uniuers en sa rondeur conçoit.
 Dieu a tourné nostre œil de forme toute ronde,
 Au modelle & au tour, où il tourna le monde:
 Et d'accord mist encor' dedans son petit corps,
 Des autres uniuers les accordans discords,

LA FABRIQUE

N'est-ce un songe de voir dans sa petite boule,
 Qui autour de l'essieu en son vuide se roule,
 De tous corps les pourtraicts tour à tour penetrer?
 L'un en est-il dehors, l'autre est prest d'y entrer.
 L'homme s'y recognoist, & la beste s'y mire,
 L'oyseau y pense voir son pennache reluyre.
 D'arbres, fontaines, monts, des pleine, & des prez,
 Verts, coulans, esleuez, unis, & diaprez,
 Les feintes on y voit: dedans l'œil sont gardees,
 Vniuersellement de Platon les idees.
 Sans l'œil tout l'univers ciel & chascue Element,
 Ne seroit qu'un Chaos, comme au commencement.
 D'un, de trois, & de sept, à Dieu nombre agreable,
 Fut composé de l'œil la machine admirable.
 Le nerf, & le crystal, l'eau & le verre pers,
 Sont les quatre Elemens du minime uniuers.
 Les sept Guimples luyfans qui son rondeau contournent,
 Ce sont les sept errans qui au grand monde tournent.
 Car le blanc qui recouure & r'affermit les yeux,
 Nous figure Saturne entre ces petits cieux.
 La tunique d'apres, comme corne luisante,
 Par où l'obiet visible au trauers se presante,
 Comme le songe à l'ame, à l'humeur glacial,
 Conformément ressemble au cercle iouial.
 La tierce est bleuë & forte, issant de dure mere,
 Plus que sa mere dure, ell' appuye en arriere.
 Cest humeur rayonnant plus precieux que l'or,
 Plus clair qu'un diamant, qu'une emeraude encor
 Duret & rondelet, de façon un peu platte
 A la gresle pareil, d'où il brille & s'esclate.
 Un lustre tresillustre humeur oriental,

Humeur qui a le lustre & le nom de crystal
 Instrument principal, & le plus necessaire,
 Duquel l'esprit se sert pour les couleurs extraire
 De tout visible obiect, s'il luy est apparent:
 Car le vitreux humide, espais & transparent
 N'y sert que de chatton, dedans lequel s'enchasse,
 Ce crystal precieux, l'eau que la corne embrasse.
 Est dessus epanchee, affin de rebouscher
 L'esclat, qui trop à coup nud le viendroit toucher.
 Qui a l'œil azuré ou bien de couleur verte,
 A fleur de teste il a ceste perle couuerte
 Cichement de ceste eau, & celuy qui l'a noye,
 Et trop abondamment ceste eau y enuoye
 Profond s'enforce en l'œil, ou bien l'eau y abonde,
 Ainsi que noire est l'onde où elle est plus profonde.
 Ce n'est qu'eau, que de l'œil sans couleur, & sans teint,
 Affin que par l'esprit de feu tout y fust peint.
 Esprit de feu, qui fait la vision diuerse,
 Comme subtil ou gros clair ou nulle il se verse
 Dans le rond crystalin: à l'esprit qui reluit,
 Petitement subtil le iour externe nuit.
 Et en sortant se perd, de sorte que la veüe,
 Or' que bonne elle soit, n'a pas longue estendue.
 Il voit ce qui est pres, mais estant auenglé,
 D'un grand air ne peut voir ce qui est reculé.
 Si la prunelle est large, & l'œil à fleur de teste,
 Le visible rayon eparpillé se iette,
 Sortant du nerf croysé ne se serrant au bout,
 Ou bien il voit bien peu, ou ne voit rien du tout.
 Si eschars & grossier, obscure & rebouschee,

LA FABRIQUE.

De iour ira la veüe à la chose touchée.
 Par l'esprit esclairé, au engle sera l'œil
 De nuit, bien peu-voyant au coucher du soleil.
 Si cest esprit abonde, & de substance grosse,
 Il demande aduantage, affin qu'entre la chose,
 Et l'œil, qui la veut voir, entreuienne du iour
 Beaucoup, illuminé par l'air qui luit autour
 Trouble il verra de nuict à faute de lumiere,
 Ou trop humidement la lune luy esclaire.
 Quant à ceux qui de iour voyent moins que de nuit,
 Leur œil ressemble au ver, qui en ce temps reluit,
 Leur rayon delié, lequel en plein iour erre,
 Se serrant s'espessist par l'ombre de la terre.
 Clair-voyant est l'esprit, qui n'est point empesché
 De passer par son nerf, ny tortu, ny bousché,
 Partant d'un cerueau sain pour és humeurs s'espandre,
 Pour animer son tout, pour ses globes estendre,
 Parfait dans son crystal, & la corne perçant,
 Moderément subtil, espais, obscur, luyfant.
 Qui tel esprit obtient, bonne il aura la veüe,
 Pour tout voir, pres ou loing parfaitement aiguë.
 Ceste subtile peau, qui contient les humeurs,
 Contr' imite de Mars les certaines erreurs.
 La quarte a trois couleurs, noire, perse & obscure,
 Du raisin contrefaiët la petite figure:
 Le dedans en est mol, mais le dessus est dur,
 Pour estre à la veü foible un soulagement seur.
 Un naïf coussinet, qui mollement enserre,
 Et soustient par dessous le crystal & le verre:
 Percé par le deuant compasse un pertuys rond,

Par lequel les obiects à la prunelle vont.
 La corne penetrant mince, subtile & clere
 Par là entre & au s'espand crystal la lumiere
 De dehors enuoyée, ou des visibles corps
 Par cest air moyennneur qui nous cerne dehors
 Du iour illuminé, la sur-face est depeinte.
 Lors qu'à celle de l'œil la lumiere est coniointe
 Infuse du commun par le nerf, qui fait voir.
 Si le miroir auoit que l'œil mesme pouuoir,
 Comme l'œil il verroit de tous corps la sur-face,
 Dont les pourtraicts l'on voit paroître dās sa glace:
 Mais ce sens luy deffaut, & l'esprit rependu,
 Qui le globe luyfant enfle & tient estendu,
 Brillant comme l'esclair, pour colorer la chose,
 Par le moyen de l'air, que le iour luy propose.
 Ainsi par le moyen du voile estincelant
 Par le pertuys qu'on va la prunelle appellant,
 (Car plus en cest endroict ne cherche de tunique)
 A l'obiet coloré l'esprit se communique.
 Comme vn ray de soleil en s'allignant tout droit,
 Passe resplendissant par vn pertuys estroit:
 Ainsi de la visiere vne ligne se darde,
 Qui droite va frapper le point qu'elle regarde.
 Le point di-je qui voit, de tout le cercle veu
 Sans çà ny là gaucher, iustement le milieu.
 De l'œil maint traict encor deça delà s'elance
 Pour voir outre ce point & la circonference.
 Ce beau voile luyfant icy fait pareil tour,
 Que le flambeau des cieux qui engendre le iour.
 La quinte est vn reseau, qui rondement s'estendre

LA FABRIQUE

Vient sur tous ces humeurs, pour dure les deffendre.
 D'un suc bien epuré le verre nourrissant
 De Ciprine ressemble au planette puissant.
 Sous ceste cy encor' s'estend vn autre voile
 Ny plus ny moins tissu, que l'airegneuse toyle
 Lequel par le deuant de ses filets de lin
 Enlasse, embrasse & tient le miroir trystalin,
 Qu'il separe moyen d'aucc l'humide verre:
 C'est le sixiesme ciel, qui sans foruoyer erre.
 L'autre du voyle blanc la ceruelle embrassant
 Comme vne douce mere, est vermeille naissant,
 Enueloppant le nerf, voyturier de la veuë
 Tant dessus que dessous, sur l'oeil est estenduë
 (Fors qu'alendroit du noir) cest ce voile vermeil
 Tramé de fils sanglans, qui a suffire à l'oeil
 Donne nourrissement, cestuy-ci est semblable
 Au planette plus bas, des sept le plus muable.
 Chacun d'eux tient son cours, son propre mouuement
 Tantost bas, tantost haut, à costé, rondement:
 Et vn autre commun à noz sens manifeste
 Isnellement porté du bransle de la teste.
 Les sept muscles encor' sont les esprits mouuants
 Qui vont diuersément les sept cerceaux rouants.
 Dans leur petite vouste, ainsi que dans le vuide
 Vne ame chasque ciel roule, pourmene & guide
 La Sphere où attachez sont tant de clous de feu.
 C'est le crane diuin qui se courbe dessus,
 D'où, comme d'un haut ciel, les sens & les puissances
 Decoulent sur le corps comme des influences:
 Et le visible esprit qui anime l'oeil prompt

Resemble à la grand' ame infuse en ce grand rond,
 D'où empruntent leur vie & leur mouuement tiennent
 Tous animaux qui l'air & les ondes haleinent.
 L'œil s'ouurant, il est iour: se fermant, il est nuit.
 La nuit la Cynthienne à son tour y reluit.
 Et comme elle en son ciel icy se masque & muë
 Selon que sa clarté accroist ou diminuë.
 Adoncq' par le moyen de ce rayon de feu
 Qui a-t'il en ce tout qui ne soit veu & sceu?
 Et l'esternelle essence infinie, accomplie,
 Se laisse à l'œil comprendre, & en l'œil se replie.
 L'homme beste aueuglé, ignorant, mal-heureux
 N'eust iamais cognu Dieu s'il eust esté sans yeux:
 Mais ainsi qu'une taupe enfoüye, enterree,
 Perpetuellement sa misere eust pleuree.
 L'œil foudroyé irrité, & descoche l'esclair,
 Puis se calmant soudain se fait bonasse & clair:
 Tout ainsi qu'au grand monde en l'œil y a des venes,
 D'orages, de vapeurs, de pluyes, de fonteines.
 Qui ne s'estonneroit qu'un si petit Surgeon
 Peust de larmes fournir une si grand' foison?
 En l'oeil il n'y a rien qui soit vague ny vuide,
 Il est tout plein de feu, de l'air, & de l'humide,
 Et n'apperçoit-on rien en tout son orizon
 Poly, clair, & luyfant, de cent couleurs, sinon
 Ne sçay quoy de tout bon, de tout beau, qui atteste
 Que l'ouurage est diuin, que l'ouurier est celeste:
 Qui n'a rien epargné pour rendre l'oeil parfaict,
 Que mesme, ô grand bonté! deux il nous en a fait,
 De peur que si l'un d'eux (car y a il partie

LA FABRIQUE

Plus que l'œil précieux au mal assuiettie)
 S'eteignoit, se bleffoit, s'eclipsoit, tenebreux
 Que le sien pour le moins fist le deuoir pour deux:
 Pource il les enclaua dans la face de l'homme
 En deux chatons percez, pour y estre, ainsi comme
 Est Phæbé pour la nuit, & Phæbus pour le iour,
 Deux astres vagabonds qui eclerent toutiour,
 A celle fin que l'homme aille droit, & ne choppe
 Contre vn monde de maux, qui fascheux, l'enueloppe,
 Et que l'œil eust du corps & la garde & le soing,
 Le sauuant du danger qu'il voit venir de loing.
 Comme le bon cocher, qui destourne & reuire
 Son coche de deuant tout ce qui luy peut nuire.
 Tout ainsi en faict l'œil, de l'homme le cocher,
 Le destournant de mal s'il le voit approcher.
 Pource rond il fut faict pour estre plus mobile:
 Petit il fut moulé, pour estre plus agile:
 Et fut dans vn rocher seurement emmuré
 Pour contre tous hazards se tenir asséuré.
 D'un dur sourcil tendu sur la molle paupiere
 Nature rempara la plus haute frontiere,
 Et vers le grand canton d'un nez long & vuidé,
 Comme d'un ravelin, iour & nuict est gardé,
 S'il se veut reposer pour recreer la veüe:
 Il fut encourtiné d'une cresppe menuë
 Sous les rideaux charnels obscurement enclos,
 Ou s'estant retiré il prent vn doux repos.
 Ceste crespine fut artistement frangée
 D'une subtile soye vniment arrangee
 Qui couronne les bords, des cartilages ronds

Longs & tenures de l'œil, comme les auirons
 Egallement distans aux flancs d'une galere.
 Comme la penne entée est en l'ele legere
 Des passagers de l'air, ainsi est poil à poil
 Le tarse disposé, le pennache de l'œil.
 Souple il fut composé pour se pouuoir estendre,
 Et pour se replier, & dur, pour l'œil deffendre:
 Et pour seruir encor' d'un ornement gentil,
 Et à fin qu'en s'ouurant ce double ré subtil
 Adressast du regard & l'une & l'autre ligne,
 Pour au droit point se rendre où son angle termine.
 Le comble de tout bien, & le plus grād qu'aux dieux
 Demander l'homme puisse, est des cler-uoyans yeux,
 Qui sont au chef posez comme en vne tournelle
 Pour y faire veillants de iour la sentinelle:
 Pour aduertir la main de se mettre entre deux
 (Se voyant en danger) entre le coup & eux:
 Que la teste soudain s'en d'estourne & l'enite,
 Et les pieds que le corps ils sauuent à la fuite.
 Nature a bien preueu que le traistre meschef
 Tousiours de quelque mal aguigneroit le chef.
 Pource ell' fortifia la part la plus sugette
 Aux traiçts, que l'ennemy sans relasche luy iette.
 Doncq' comme un double mur, sur chasqu'œil elle estend
 Un sourcil herissé, qui targe & le deffend:
 Et les poils clinetants engardent que la veuë
 Ne soit de l'ennemy surprise à l'impourueë.
 Pourtant bon guet ils font, ouurant, fermant par tour
 De l'ame les guichets, dame de ceste tour.
 S'il auient toutesfois que par quelque surprise

LA FABRIQUE

Sans l'auoir meritè, ta veuë soit eprise
 D'une douleur amere (vn triste sentiment
 Qu'apprehende le sens qui iuge sainement.
 Or rens luy gracieux les biens qu'as receu d'elle,
 Appaise la douleur, qui la presse, & t'apelle
 A l'aide gemissant, tu l'ostes, si tu mets,
 A gençant proprement sur les deux yeux fermez
 Des rideaux sommeillants, la toison enyurée
 De l'oliue tranquile à Minerue sacrée:
 Si tu portes sur toy du Scorpenot de mer
 Les deux yeux emperlés, tu la pourras charmer.
 Si pour cela ne cesse, à mon aduis faut prendre
 Du chou la fueille sobre, & la reduire en cendre:
 (Icy avecque le vin faut que le chou soit mis,
 Quoy qu'autremēt ils soient, cōme on dict, ennemis)
 Et la poudre d'encens, dont les dieux on honore.
 Du salubre beton de cheure pren encore.
 Mais essuyè bien premier l'humeur lent & cireux,
 Puis couche ceste vnguent mollement sur les yeux:
 Tu en verras la preuue en moins d'une nuictée,
 L'angoisse guerissant de l'œil soudain ostée.

Qui a les yeux chargez de brouillas tenebreux
 Seduits par faux obiects voletans deuant eux,
 Desquels rebouchee est leur pointe accoustumée,
 Qu'ils voyent bluetter par l'espeffe fume
 Cents mille points errants, droicts, traouerfants, & torts,
 Qui de l'ame & de l'œil vont troublants les accords.
 De ces fautaumes vains tu dissipe la nuë,
 Si tu es distillant dans la prunelle nuë
 L'erienne douceur, que l'auette d'hibla

Des plus exquis fleurons de Sicile assembla.
 Du paillard bouc encor' mets y de la colere:
 La bethoine qu'on dict si beaux miracles faire,
 Pour en tirer le ius, il te faudra mascher.
 La chasse elle chasse, & faict les pleurs secher:
 Si l'aage plus pesant mais aussi la plus sage,
 Te tend dessus les yeux vn encombreux nuage,
 Tu chasse ceste nuict, espanchant dedans l'oeil
 Le ius purifié de l'herbe du fenoil:
 Du fenoil qu'enseigna aux humains la couleuvre
 Quand sa maille effaçant son beau printàs recouure
 (Que l'hõme n'ait point hõte, or' qu'il soit de haut pris
 De confesser auoir du serpent mesme apris)
 De l'hibeen miel ioins y l'onde epurée.
 Pour de ta veuë obscure escarter la brouee.
 L'amer d'un vautour noir avecq' le ius brouillé
 De l'herbe qu'aux humains l'hironde a reuelé.
 Or' qu'il y ait long temps que supporte ta peine.
 Pour la veuë esclarcir l'esclaire est souueraine.
 L'amer roux d'un vieil coq surueillant de la nuit
 Aiguise le taillant de l'oeil, dessus enduit.
 Maille, tayë il en racle, & toute tasche noire,
 Mais qu'il soit detrempé d'eau claire & bonne à boire:
 La siente dissoute à l'oysseau de Cypris,
 Et le iaunissant fiel des lasciues perdris,
 Et le sucre coulant de la diuine abeille
 Prends, & les mesle ensemble en mesure pareille:
 Prends moy pareillement de l'hironde le plant,
 Et du vin autre tant: & les deux accouplant
 N'en fay qu'un, que dessus il te conuendra mettre
 Pour esclarcir puissant de l'esprit la fenestre.

LA FABRIQUE DE L'OEIL.

Il applanit aussi ce qui egal n'est point:
 Ce qui est separé il recolle & reioint.
 Si quelque estrange feu, ô pauvre homme! s'allume
 Dans les venes de l'œil, qui les arde & consume:
 Ce charbon rougissant est tout à coup esteint
 Si du laict d'une chienne est dessus eux espreint.
 Le verdet ratissé de la bronze qui rouille
 La gresse de serpent brouille ensemble & rebrouille:
 La playe reiunie, quand ils sont appliquez
 Dessus les yeux cassez, creuassez, & piquez:
 Si l'eau du beau crystal, & son esclat illustre
 Est changé en du plomb, & a perdu son lustre,
 Quelqu'un de son desastre horrible estant fasché,
 Du bouffe dedans l'œil, apres auoir maché
 Le pallissant Cumin, dont la tourbe trompee
 Par le faux hippocrite est prise à la pipée.
 Que si l'œil se gonflant se foriette dehors,
 Et de sa couche ronde outre passe les bords,
 Referrer le feras sous la iumelle cille
 Si autour tu l'enduy de la potiere argille.

FIN DE LA FABRIQUE DE L'OEIL



S O N N E T.

A MONSIEVR LE LIEVTENANT
GENERAL DE LOCHES, SIEVR DE
sainct Astaucin, sur l'anagramme de
son nom Gilbert Seguin.

LE cœur que ie vous offre est ce qui nous fait viure,
A mille passions humainement subiect:
Et mesme autant de fois que le sens quelque obiect
Par l'apprehension soit bien ou mal luy liure.
Le cœur l'appetit fol brutalement veut suiure,
Le cerueau s'y oppose & partie se fait
Contre l'affection, iuge en est l'intellect,
Des premiers mouuemens diuinement deliure:
Chasque partie ouyë il deboute le cœur,
Fait le diuin cerueau de la cause vainqueur,
Et tous ces fols desirs il condamne en l'amende.
Iuges qui l'intellect esleu de la cité,
Que Dieu entre voz mains a commis, & commande,
Estre Dieux commeluy, IUGES EN LIBERTE.

LE COEUR OU LE SOLEIL DV
petit monde.

Vel Demon dedans moy bondissant se mutine!
 Qu'est cela qui esbranle & secoust ma poitrine:
 Et semble que tout rōpre il vueille dās mō corps
 Me fendre l'estomach pour en sortir dehors.
 Tant rudement mes flancs hurte, pousse & repousse.
 Ah c'est toy doncq' mon cœur! qui despit te courouce,
 Et te plains que ie t'ay ingratement omis
 En mes vers que ie donne aux intimes amis.
 C'est pourquoy, cœur mutin, contre moy tu te bande,
 Et servir importun un autre corps demande.
 En bon lieu ie te veux adresser & loger,
 Où à un autre cœur meilleur que toy changer.
 Ou du tout te donner à un autre moy-mesme,
 Pour ne viure sans cœur un corps transi & blesme.
 Par quel bout me prendray-ie à subiect si fecond?
 Digne d'autre escriuain mieux disant, plus facond.
 Diray-ie que le cœur est l'ené de nature?
 Qui le premier se meut & le dernier demeure:
 Babatant l'estomach, tremblottant dans le corps,
 Long-temps apres encor que les membres sont morts?
 Qu'il print place au milieu de la chaude poitrine,
 Lieu le plus honorable en l'homme, & le plus digne,
 Où sans se reposer, & sans iamais cesser,
 On le sent se hausser, on le sent s'abbaisser.
 Se haus sant, eslargy de l'air tire le soufffle,
 S'abbais sant, reserré l'air en l'air il resoufffle:
 Par un certain compas, tousiours mesure il tient,
 A mesure qu'il bat l'artere va & vient,
 Se reserrant, le sang dedans l'artere verse.

L'esprit soudain le suit qui chaleureux transperce
 Le corps de toutes parts, courant vif & leger,
 En toutes parts s'espand, soudain au desloger
 Impatient de busque entrant en la grand bouche
 Close d'un ré subtil qui pour luy se debousche.
 Et d'artere en artere errant de part en part,
 Par infinis tuyaux aux membres se depart.
 Si qu'endroit il n'y a si petite partie,
 Ou l'esprit fretillant l'ame n'ait departie.
 L'artere, qui du cœur prent son commencement,
 Du cœur, suit peu à peu le réglé mouvement.
 Et iamais de ses pas ne se detraque ou erre.
 Ore l'arge s'estand, or' estroite se serre:
 Soit qu'elle succottant l'air à tire de l'air,
 Qui la doit raffreschir, ou se laissant aller,
 En se restrecissant, des vapeurs allumees,
 Par le cuir perçotté & criblant les fumees.
 Tousiours va mesme train, pendant que la santé
 Es termes se contient de mediocrité.
 Sans les deux mouuemens des poussantes arteres,
 Quel animal viuroit encor' qu'ils soient contraires?
 Mais quand le cœur se sent conuaincu du danger,
 De son trac tremblottant on la sent estranger.
 Soit que l'occasion au dedans soit la tante,
 Ou bien que par dehors quelque mal la tourmente,
 Le chaut, le sec, le froid, & la soif & la faim,
 Et les mets dissolus, le labeur & le bain,
 Ou de quelque langueur l'aprehension triste,
 Et tout cela qui l'ame esgaye ou bien contriste
 L'aage, le sexe, & l'er, l'exercice & le temps
 En vn mot, chasque excez rend les poux inconstans,

LE COEUR.

Le cœur dedans l'artere, elle par le cuir lasche
 Chasse l'humeur dehors qui contraire la fasche.
 Quand le soufflé vital a fait faillir au cœur,
 Quand elle brusle au feu d'une fieureuse ardeur:
 De respirer souuent adonc se sent contraindre,
 Et souuent transpirer pour ces flammes estaindre
 Et recouurer sa perte: occasions en nous,
 Qui souuent sous les doigts font varier le poux.
 Or viste en peu de temps il fait longue carriere,
 Le tardif est celuy qui fait tout le contraire,
 Le grand est comparty du long, large & profond:
 De l'humble, court, estroit les petits poux se font.
 Le vehement s'oppose à la main qui le touche:
 Sous la pointe des doigts le languissant rebouche.
 Au mou mole est l'artere, & le dur tout ainsi
 Qu'un cuir trop pres du feu se rencontre endurcy.
 L'artere, enfle au plein, pleine d'esprit humide:
 Le vuide au toucher semble vne artere vuide:
 Le chaud, quand chaud l'on sent de l'artere l'endroit,
 Et quand cest endroit mesme est froid, le poux est froid:
 Sans repos le frequent dru & menu replique:
 Le rare à deux repos va battant sa tunique,
 Qui en certain desordre est tousiours ordonné,
 L'autre est changeant par tout l'ordre desordonné:
 Qui un seul coup à droit desordonné ne frappe.
 On le pense tenir, inegal il eschappe:
 Qui de chasque nature est suiuant le compas,
 L'autre à son naturel ne s'accommode pas.
 Les coups du poux egal sentresuiuent semblables:
 Mais du poux inegal les coups sont variables.

Du nombre qu'on attend ore quelqu'un deffaut,
 L'autre fait qu'on n'y pense, entre les deux un saut,
 Ou décroissant se perd, ou bien se diminuë,
 Ou sa taille inegal, ou egal continuë,
 Or fait la cabriole, or s'en recour le pous,
 Ores il s'entretaille & ne suit pas ses coups:
 Or il va floflottant à petites ondettes,
 Ou foiblement rempant comme ver à courbettes
 Il s'en va tout hectique, il est desia retraits,
 Elancé le voy-là & fuit comme le traits
 Qu'une robuste main de l'arc bandé descoche:
 Ore comme une scie on diroit qu'il se coche.
 Le formillant ressemble aux flammèches de feu,
 Qui par faute d'humeur va mourant peu à peu:
 Signe seur qu'à la porte est la mort qui enuie
 A d'entrer pour trancher le filet de la vie.

Le soleil est aux cieux comme leur cœur vital,
 Le cœur est au soleil des cieux en l'homme egal:
 Doncques des cieux le cœur par sa vertu seconde,
 Anime de ses rais le corps de tout le monde.
 Et le cœur, le soleil dedans l'homme mouuant,
 Inspire sa chaleur à tout membre viuant.
 Des celestes flambeaux la contraire influence
 Peut du soleil celeste empescher la puissance:
 Des ventrilles aussi l'indisposition
 De nostre humain soleil faict faillir l'action.
 Le grand faisant son cours par tout sa vertu porte
 Toute chose, s'il tarde un moment deuiet morte.
 Si du petit aussi cessoit le mouuement,
 Chasque membre du corps mourroit en un moment.

LE COEUR.

De peur que l'un ne brusle & que l'autre ne glace
 Des extremes,és cieux de vertu print la place.
 Le quart des sept errans seruiteurs,qui ont l'œil
 Ouuert,pour obeir aux signes du soleil:
 Des pieds & de la teste en la distance egale,
 Pour iuste departir de sa flamme vitale.
 Le cœur dans l'estomach d'archers environné,
 Des Princes de son sang se tient accompagné.
 Le cœur qui dans un iour fait dans les cieux sa course,
 D'esprit & de chaleur est la vitale source:
 Des humains le soleil, qui est aussi leur cœur,
 Fournaise leur fournist d'esprit & de chaleur.
 Où Phæbus est present, toute chose est plaisante,
 Toute chose desplaist, si la clairté s'absente.
 Si ioyeux est le cœur, tout le corps l'est aussi:
 Languissant & failly, tout le corps est transi.
 Six dieux pour le conseil des cieux suivent le Prince,
 Le cœur est gouverné des grans de sa prouince.
 De Phæbus attrempée est par Phæbé l'ardeur,
 Le cerueau temperer doit les ardeurs du cœur.
 Phæbus sans fin poursuit sa carriere diuine,
 Sans relasche le cœur dans l'estomach chemine.
 Qui du diuin soleil peut retenir le cours,
 Qui engarde le cœur qu'il ne mouue tousiours.
 S'il aduient quelquefois que du beau iour le pere
 Retire, tenebreux, des terres sa lumiere,
 Les humains de frayeur le courage ont failly,
 Si par mesauanture ou trouble est assailly
 Le cœur petit soleil de la machine humeine,
 Chasque membre languist, tout le corps est en peins.

Ainsi du cœur humain, & du diuin soleil
 La chaleur est egale, & l'esprit tout pareil:
 L'un de l'homme est la vie, & l'autre l'est du monde,
 L'un haut, & l'autre bas, tous deux de forme ronde:
 Et tous deux ont encor' deux mouuemens diuers.
 Car en un an Phœbus ardent court au trauers
 Du celeste bandrier, du cancre au Capricorne,
 Et de l'Inde au couchant, son cour iournalier borne.
 Le cœur, ainsi que luy, s'estendant, se serrant,
 Fait son cours ordinaire, vne autre fois errant,
 Va poursuyuant l'obiet que l'ame sensitive
 Luy monstre, gracieux, par l'imaginatiue:
 Il s'eslargist & ouure, & enuoye au deuant,
 Pour son hoste accueillir, son esprit receuant.
 Mais s'il est ennemy, autre qu'il ne desire,
 L'esprit fermant la porte en son fort se retire:
 L'obiet premier aborde au sens qui emouuoir
 Par sa presence faiçt du cerueau le pouuoir:
 La raison qui n'est pas foible ny corrompue,
 Par l'image foreine apres le sens emeue,
 Iuge en premiere instance, & de l'obiet present,
 Selon qu'elle cognoist proffitabile ou nuysant,
 Naist l'amour ou la haine, ou bien l'ire enflammee
 Par la vapeur du sang dans le cœur allumee:
 Mais du bien ou du mal qu'elle prenoit futur,
 Presentement s'engendre & l'esperoir & la peur.
 L'enslee ambition, la hardie assurance,
 La honte, & la tristesse, & l'auare esperance:
 L'ame, à qui appartient equitable estimer
 Tout ce qu'il faut hair, ou ce qu'il faut aymer,

LE COEUR.

Tel qu'il s'offre, aussi tost au cœur le represente,
 Qui fascheux, le contriste ou ioyeux le contante.
 Comme le sens commun meut l'apprehension
 Par l'obiet, ceste-cy conçoit l'opinion:
 Ou comme la raison, qui n'est tousiours maistresse,
 A l'appetit conduire & gouverner se laisse.
 Tantost on sent l'esprit tremoussant s'esjouir,
 Tantost hastiuement en son ferrail fuir.
 Quelque fois le vouloir, qui au cerueau preside,
 Libre le lasche aller, on luy serre la bride.
 S'on espere du bien, le cœur verrez ouurir: }
 S'il a crainte du mal, affin de recourir,
 Il se mussé & tapist: mais s'il sent de la ioyë,
 L'orgueil s'espanouist & luy ouure la voyë.
 S'il a honte ou vergongne, ou s'il est triste aussi,
 Il se clost comme on voit, vers le soir le soulcuy
 Regretter sa planette, il se ferme, il se bouche
 Comme la passion diuersement le touche.
 Selon qu'il est touché le sans en cas pareil,
 Au dedans se retire, ou se monstre vermeil,
 Pour le bon heur d'autruy qui se chagrigne, ou ayme,
 On le cognoist au front s'il est vermeil on bleme.
 Le pale desespoir, l'impudence, & rancueur,
 Le froid, estonnement, la pitié, la douceur,
 L'orgueil braue & hautain, la temeraire audace,
 Quoy qu'on les cache au cœur, paroissent sur la face.
 Et comme en vne mostre on voit tous euidens
 De l'orloge secret les discords s'accordans:
 Tel est l'humain visage, où vn chacun peut lire
 Ce que souuent la bouche honteuse n'ose dire.

O admirable ris, vray & souuerain bien,
 Propre & unique à l'homme! ô sans qui ny a rien
 De beau, d'heureux au monde! ô ris dont la puissance
 Au vieillard radottant rend la verte iouuance!
 O ris qui faix egaux les dieux & les humains,
 Et qui cent & cent fois a faict tomber des mains
 De Iupin le tonnerre, & cesser la tourmente
 Si tost qu'il auoit veu Cypride la riante.
 Si tost que tu parois, ô Dieu mignard & doux!
 Toute noise s'acoise & finist tout corroux.
 Si tu te monstre ouuert, tu descouure au visage
 Ce qu'on pensoit tenir secret dans son courage.
 Qui te peut retenir, qui te peut attraper,
 Si rompant bride & morts on te laisse eschapper?
 Des cyzeaux de (loton, sauueur, tu nous deliure
 Tu charmes noz ennuis, contants tu nous fais viure.
 Tu derrides le teint; & tu fais que rians
 De plus de la moytié nous termoyons noz ans.
 Tu chasse les brouillards de la melancholie:
 Sans toy viure est languir, & viure n'est pas vie.
 Ou te pourrois-ie mieux, ô Dieu plaisant rieur!
 Ny plus commodement loger que dans le coeur?
 La rate orde & infame, & qui ne fait que boire
 Du sang la bourbe impure, obscure, trouble & noire,
 Ne merite heberger (or' qu'au prouerbe viens
 T'ait chez elle logé) hoste si gracieux,
 Si gay & si ioyeux: si donques se presente
 Par l'oreille ou par l'oeil quelque gayté plaisante
 Si quelque tour folatre, inepte, sans danger
 Sans pitié, sans la vie & l'honneur outrager

LE COEUR.

Soit qu'on y pense, ou non, ou par quelque rencontre,
 Par faict, ou par parole aux sens trompez se monstre,
 Qui par les sens trompez trompe l'opinion,
 Qui trompe derechef l'imagination.
 Ceste-cy n'a si tost du faict la cognoissance,
 Que pour le rapporter soudain elle s'elance
 Du cerueau dans le cœur: avecq' elle descend.
 Le folatre pourtraict du ridicul plaisant.
 Le cœur tout resiouy de la nouvelle folle
 D'aize sautelle & dance, & d'allegresse vole:
 Et si n'estoit qu'il est quelque peu retenu
 D'un peu d'ennuy meslé au plaisir suruenu,
 Ses espauez esprits se resoudroient en ioyè:
 Mais l'ennuy s'y oppose, & empesche leur voye.
 La ioye les repouffe, & contrainct de courir,
 Le triste le rêtient, la ioye secourir
 Les vient, pour les haster, la ioye & la tristesse
 Debattent à l'enuy à qui sera maistresse,
 Se hurtant l'une l'autre alternatiuement
 Contraires elles font contraire mouuement.
 Par ces deux passions la poytrine frappée,
 La voix tremble au dedans murmure entrecoupée.
 Comme le vent qui entre & ressort tout soudain
 Des soufflets agitez d'une legere main,
 Et bruyant comme l'eau qui se desrobe & glisse
 Par cailloteux destroits se coupe & s'entrebrise.
 Le cœur des passions gay & triste agité,
 Ne peut de la raison faire la volonté.
 Du ris doncq' le cerueau mene le premier branle,
 Le cœur sautant apres le Pericarde ebranle.

Cestuy tenant la main du Diaphragme rond
 Tire & mene apres soy le Diaphragme prompt,
 Qui suspendu aspire vne voix fredonnée,
 Se perdant, inspirant autre fresche aleinee.
 Ce muscle trauersier, qui est comme le mur,
 Separant mitoyen & le foye & le cœur,
 La poytrine rauist, l'elargist & pourmeine,
 Soufflettant les poulmons leur faict reprendre alleine.
 La bouche s'ouure grande & contrainte baailler,
 Ou elle estoufferoit, faut qu'elle prenne l'air.
 La leure s'applanist & retire grossette,
 Et de perles estalle vne double rangette:
 Enfonce le menton, en chasque iouë vn creux,
 Dont la grace peut faire vn Caton amoureux.
 Force le front chagrein, clair & serain s'estendre,
 Et bien heureux celuy lequel se lairra prendre
 Es beaux rets amoureux qui se liment tendus
 Sur les yeux doux rians mignonement fendus.
 Telle mine se faict quand la rieuse face
 Les chatouilleux esprits & sang bouillant ramasse,
 D'ont elle se remplist: si ce trouble au dedans
 Croist, encor' on verra signes plus euidents,
 Quand matiere de rire excessiue est offerte,
 Comme autre Democrite on rit à bouche ouuerte.
 Lors le visage on voit de rides sillonner,
 L'œil comme vne escarbouche ardente estinceler,
 La face enluminer & gros s'enfler les veines
 Du col, des yeux, du front excessiuement pleines
 D'esprits vifs, tous groullants, d'un sang bouillant & chant
 Remontants pour gaigner de la face le haut.

LE COEUR.

On en sue, on en touffe, au nez force est de rendre
 L'humeur qu'on a rians à la gorge fait prendre.
 On sent comme insensez tous ses membres croller,
 Et quelque fois le ventre y lasche tout aller.
 Ce plaisant desplaisir en fin est si estrange
 Que la liesse en dueil, qu'en pleur le ris s'eschange.
 Philemon en moureut, voyant l'asne oreillé
 Qui mangeoit le disné pour luy appareillé:
 Et le peintre Zeuxis contemplant son ouvrage
 D'une vieille en laideur vne parfaicte image,
 Le menton, front & bouche, & le nez & les yeux
 Barbu, ridé, sans dents, roupieux, chassieux.
 Mais laissons-là ce ris d'un cœur humain la marque,
 A cheuons de chanter des membres le monarque.
 Sur la forme parfaicte il fut faicte rondement,
 Plein d'air, & de clarté, d'esprit & mouuement:
 De toutes parts dardant sa salutaire flamme,
 Comme un autre animal, animé d'une autre ame
 Que n'est du corps le reste: il eut pour obeir
 La raison pour regente, oreilles pour ouir.
 Il eut ce qu'on doit mettre entre les grand merucilles
 Aussi bien que le chef, pour ouir deux oreilles:
 Ou si tu aymes mieux, eles les appeller.
 Il eut comme un oyseau, deux eles pour voller,
 Qui fermant & ouurant ses bauolantes penes
 Euante tout le corps par ses freches halenes.
 Rond nature le fist l'eguissant peu à peu,
 La figure imitant qui a son nom du feu.
 Deux antres y caua dont le dextre se cambre
 Comme un nouueau croissant, & en fist vne chambre,

Pour y loger du sang le subtil & leger.
 Et en l'autre costé vne autre pour loger
 L'esprit qui des vapeurs du sang se renouuelle,
 Pour chaut entretenir ce que vie on appelle,
 D'un sang purifié, passé par le tamis,
 Et par l'entremoyen subtilement transmis
 De l'autre droit au gauche, vne partie euante
 Et nourrist les poulmons, l'autre est l'ame viuante.

Or il est si bouillant, les esprits si ardants,
 Que si à tous momens il n'aspire au dedans,
 Un air humide & frais, que chaut luy cōuient redre
 En moins d'un tour de main le corps deuié droit cen-
 Nature l'estuya, ô precieux ioyau! (dre.
 Dans vn luyfant crystal & l'arrosa d'une eau,
 Substance precieuse, essence euaporee.
 A la tiede chaleur d'une flemme etheree,
 De peur qu'il ne se brule à sa propre chaleur,
 Il nage dans ce bain & se plonge au sur cœur.
 Vaisseau plus clair que verre, vne ronde cuvette
 Où sans cesse surgeonne vne viue ondelette:
 Ou librement il nouë, ou il se va baignant . .
 Si n'estoit cest humeur le cœur incontinant
 Arresteroit son cours, son aage seroit breue :
 Comme au poisson sans eau languissant sur la greue,
 Ou comme d'une rouë on voit souuent l'essieu
 Qui roule sans humeur estre amorcé du feu,
 Il fut empaqueté d'une toyle filee
 Des paladiens doigis Mitoyenne appelée,
 Pource que la poytrine elle partit en deux
 Venant de la clauette à l'oblique entredeux.

S'en va droit rendre au cœur où ell' se fend & ouvre,
 Et de tous les costez l'enveloppe & le couure,
 Pour tousiours le tenir suspendu au milieu,
 Pour ne bouger iamais droit & ferme d'un lieu.
 Dessous luy rondement se tend le Diaphragme,
 Le seiour d'Alegresse & pavillon de l'ame:
 Entre les mous poulmons pleins de venteux esprits,
 Comme entre les deux mains, nostre cœur est compris.
 Pour ce Roy refreschir, leur office est de prendre
 L'air froid qu'incontinent fumant leur conuient rendre.
 Mais qu'en diray-ie plus? qu'il est de toutes parts
 Emmuré de cent os, assure de remparts:
 Que toute chose encor, laquelle est contenuë
 Depuis le trauersal insqu'à la leure nuë,
 N'est faicte que pour luy, qu'il se trouue des cœurs
 De qualibre diuers, que les epez & durs
 Font le melancholique, ingenieux, & sage.
 Que les mols sont ioyeux, mais lasches de courage:
 Que iadis on trouua dans l'estomac ouuert
 Du fort Aristomene un cœur de poil couuert.
 Les petits sont hardis & vont bien à la guerre,
 Les gros n'y valent rien que pour fuir grand erre.
 Qui a le cœur bouillant, estale sur le front
 Une grand hardiesse & un courage prompt,
 A faire hazardeux, toute haute entreprise:
 Prisant trop son honneur toute chose meprise.
 Qui l'a sec, par excez à eschauffer est lent
 Son courroux suffoqué: mais beaucoup plus brulant
 Si un coup irrité sa colere s'amorce:
 Ainsi que d'un fer chaut plus ardente est la force

Que d'un boys allumé, son sein foisonne en poil.
 La poytrine d'enuie, & de rage & d'orgueil,
 Cruel, outreuidé, de l'estomac inique
 Souffle meurtrierement un esprit tiranique
 Contempteur d'un chacun, implacable, inhumain,
 Impudent, furieux, & trop haut à la main.
 Qui aura son contraire un cœur froid & humide,
 Un paresseux doit estre, & laschement timide:
 Sans fiel, sans amertume, amateur de la paix,
 Vne belle entreprise il n'acheue iamais.
 Misericordieux, doux, paisible, & affable:
 Vers Dieu deuotieux vers l'homme pitoyable,
 Sans nulle ambition, & viuant sans espoir
 Met toutes les faueurs des grands à nonchaloir:
 Contant de sa fortune à peu d'homme cogneuë,
 Et du genereux poil la poytrine il a nuë.
 L'Égypte curieuse & du Ciel & des temps
 Tient que nostre cœur croist iusques à cinquante ans,
 De deux dragmes chasqu'an, & d'autāt chaqu'année
 En cinquante ans décroist où l'aage est terminée:
 Que le cœur vient à rien: & de viure sans cœur
 Possible seroit-il? s'il est de vie auteur:
 La chandelle s'esteinct quand la cire est faillie,
 La linotte s'enuole hors des prisons fallie
 De sa cage rompue, & le verre cassé.
 Le vin qui est dedans est par terre versé.
 Au cœur tout se rapporte & par luy tout commence
 Mytoyen il enuoye à la circonference
 Sa vitale vertu, luy mourant tout deffaut.
 Et quoy, mon coeur cruel, tu redoubles l'assaut!

LE COEUR.

N'ay fait, i'ay fait, fuy t'en, & cesse de me battre,
 Accorde le discord qu'en moy ie sens debattre.
 Or que Dieu te conduise, & ne retourne plus :
 Et fais dans moy cesser ces grands faux perilleux.
 Tu diras à celuy auquel humble ie t'offre,
 Que de mon estomach i'ay fouillé tout le coffre,
 Que rien plus precieux, plus riche, ny meilleur,
 Pour luy donner, ie n'ay trouué que toy mon cœur.

FIN DV COEUR.

A MONSIEUR BOULAY
 Aduocat à Loches.

IE veux en mille parts mon corps partir & fendre,
 Et me veux membre à membre offrir à mes amis,
 Au premier rang desquels mon Boulay, ie t'ay mis,
 Qui m'as tousiours voulu amour pour amour rendre:
 Je ne puis mon amour leur faire mieux entendre,
 Qu'en leur donnant moy-mesme: il ne m'est pas permis
 Te departir des biens à fortune commis,
 Aussi n'en voudrois-tu de moy ton ami prendre.
 Quand à ceux de l'esprit, qui t'en voudroit donner,
 Seroit verser de l'eau proprement dans la mer:
 Mais à qui plus qu'à toy est la nature amie?
 Or tiens voyla ta part, c'est le membre où l'amour
 Et ses freres elez font l'amoureux sejour,
 De mon ame le tiers, la moytié de ma vie.



LE FOYE.



*N*ature ingenieuse, ô admirable ouuriere
 De tous les animaux ! ô mere nourriciere
 De toute creature, ô le commun suiect,
 Et la matiere encor' d'ôt le mōde fut fait!
 La main de l'Eternel & puissante & be-
 nigne :

*Sans art industrieuse, & docte sans doctrine,
 Pour maintenir ton œuure entier, parfaict & sain,
 Pour le contregarder du peril ia prochain,
 Ou qui est ia present, ta sainte prouidence
 Tousiours en luy demeure, & sage le dispence
 Plus doctement que l'art: tu ne fais rien en vain,
 Sans cause, ou superflu: quel est le sens humain,
 Qui les causes pourroit de tes effects comprendre?
 Faut doncq' que l'artifice aille de toy apprendre:
 Et faut que qui desire estre artisan sçauant,
 Qu'il aille le patron de tes œuures suiuant.
 Bien qu'il te contre-face, & Artiste t'ensuiue,
 Autant qu'à dire y entre la chose viue
 Et la morte, & autant que l'ouurier souverain,
 Nature est par sus toy, de l'Artiste la main:
 Tant bien apprise & seure, & habile soit-elle,
 Inferieure cede à l'œuure naturelle.*

LE FOYE.

Ce qu'engendré tu as d'un soucy maternal,
 Tu tasche, si tu peux, à le rendre eternal.
 S'il n'est tel, tu n'en es, ô nature, coupable:
 Par ordre successif un autre à luy semblable.
 Tu remest en son rang, la generation
 D'un autre recommence en sa corruption:
 De celuy qui prent fin perpetuant la race,
 Un autre ou plusieurs tu recree en sa place.
 Car, ô nature, c'est par ta seule bonté
 Que toute chose au monde engendree a esté:
 Est, & sera encor, & par toy est parfaicte,
 Voire mieux qu'au compas du docte Polyclete.
 En parle qui voudra, le repreneur mordant
 Ne peut sur toy trouuer lieu où mettre sa dent.
 Rien ne se peut penser plus iuste ny plus sage,
 Mieux accomply, plus beau, qu'un naturel ouurage.
 De ce que sans semence, ô nature, tu fais,
 Iouant de passe-passe au monde ie me tais.
 Comme c'est que tu graue es rochers les coquilles,
 Et fais naistre les vers du bois, & les chenilles.
 Des roses de May, du ver le papillon,
 Et du cheual guerrier la guespe & le freslon.
 L'abeille d'un veau mort, & du bois la pierre,
 Et maint poisson encor des boyaux de la terre.
 Et du limon du Nil engendre la sourry,
 Le traistre scorpion du basilic pourry.
 Ie me tayray encor des estranges merueilles.
 De cest arbre Escossois, dont tu changes les feuilles.
 En oyseaux mariniers, & des ais naufragez
 De l'hebridide nef en des oyseaux changez.

Que Plotin contemplant tes beaux tours de souppléssé,
 N'appelle enchantement ta diuine sagesse.
 Vray est que tu n'es pas ny le commencement,
 Ny le premier motif, ains de Dieu l'instrument:
 Qui meut tout & vigore, & la cause seconde
 De tout ce qui se forge en l'arsenac du monde.
 Car d'un feu, qui au ciel son origine a pris,
 D'un humeur premier né, & vegetants esprits
 Ensemble temperez, se fait une substance,
 L'outil & la matiere & la forme & l'essence,
 Par lesquels tu peux faire engendrer, animer
 Tout ce qui est en terre, en l'air & en la mer.
 Et tout pour l'aduantage & l'usage de l'homme,
 Quoy qu'un iniurieux sa maratre te nomme.
 Dame des Elemens, ame de l'uniuers,
 C'est, Deesse, à ce coup que t'appellent mes vers,
 Que ma muse te pry que tu sois sa conduite,
 Pour dignement entrer és lieux où tu habite.

Dans l'estomach humain au creux d'un antre enclos,
 De muscles, de tendons, de membranes & d'os,
 Que l'oblique entre-deux par le dessus embrasse,
 Droitement sous le cœur qui la vie compasse:
 Le foye tout de sang obscurément figé,
 De couleur d'ematiste au ventre fut logé:
 De mains vaisseaux sanguins sa chair est parsemée,
 D'air viuable, & de feu perspirable animée.

En tous il n'est egal, les gloutons & craintifs
 Sont ceux qui l'ont plus grand: sobres sont les petits:
 Mais hardis & prudens, car au sang qui se serre
 Y a plus de chaleur, qu'en cil qui vague & erre.

LE FOYE.

Du chaut sont les conduits larges & plains de sang,
 Les membres eschauffant, & le ventre & le flanc
 Se herissent de poil, & seruiteurs infames,
 Aux brutaux appetits de la gueule & des femmes,
 Tousiours le gosier sec, & tousiours le dedans
 Des mains, & le dessoubs des pieds brulent ardans.
 Contraire à ceste-cy l'autre temperature,
 Du foye engendre aussi toute vne autre nature.

Estre de loing vn mont de iaspe rouge & noir,
 Lisé de tous costez on diroit à le voir,
 Gros, espais & pesant, plus ferme qu'une roche,
 Ioignant de toutes parts au membre le plus proche.
 Vers la droite du corps inegalement rond,
 Il se rehausse en crouppe, & caue parle fond,
 En voulte il se recourbe, où l'ardente cholere,
 Dans vn vaisseau de verre: y pend iaune & amere,
 Pour attirer du foye & escurer l'humeur roux,
 Et pour de l'irassible attiser le courroux.
 En cest endroit du corps est toute la despence,
 Que la nature mere à ses enfans dispence,
 Aux membres iustement tant d'en bas que d'en haut,
 En donnant à chacun autant qu'il luy en faut.
 C'est icy que le sang vermeillement surionne,
 Icy fecondement se cuist, & s'asaisonne.
 Le chyle, qui estoit dedans l'estomach blanc,
 Icy change de teint, & prend le nom de sang.
 Icy estable encor' au plus creux de cest antre,
 L'orde cupidité attachee au bas ventre,
 Qui rend l'homme semblable à tout autre animal,
 Qui n'a discretion ny de bien ny de mal.

Nee ell' est auccq' l'homme, & friande & lasciuë,
 Affin que sans plaisir insensible il ne viue,
 Affin que chatoillé de l'amoureux desir,
 Et du glout appetit, ne vesquist sans plaisir.
 Ceste fiere, sauuage, indocile, reside
 Au foye où ell' se souille au sang chaud & humide.
 Là enfermee elle est, comme en vne prison:
 Car elle contreuient aux edicts de raison.
 S'on la laissè courir, estant farouche & forte,
 Tout le corps en danger à vauderoutte emporte.
 Adonc pour ne troubler du celeste intellect
 Les beaux & hauts discours que iour & nuict il faict,
 Et ne peust debaucher insolente, insensee,
 Diuertir les desseins de la haute pensèe.
 Pour encor allecher la chair de ses apas,
 Loing du cerueau fut mise au ventre le plus bas.
 Qu'eu-ce esté que de nous, si ceste insatiable
 N'eust eu séparément loing du chef son estable?
 Si sur elle n'estoit le courroux qui souuent
 De la raison maistresse est le party suiuant.
 Et qui comme vn chien, bonne & fidelle garde,
 Tousiours veille à la porte & de sortir en garde.
 Ce bouc sale & lascif, qu'il faut bien arrester:
 Autrement la raison feroit precipiter
 De son diuin dongeon en l'humene valee.
 Arrangez sont ainsi les membres de ce corps,
 Affin que la raison peust aux lascifs efforts,
 Aux appetits gourmands de la concupiscence,
 Contester courrageuse, & faire resistance.

LE FOYE.

Commis pour la raison fut le courroux au cœur,
 Pour de l'homme animal estre garde & vainqueur.
 Car à ses volonteꝝ l'ire est tousiours contraire,
 Qui se fascha iamais pour, obeyssant, faire
 Ce que raison commande, & pour n auoir esté
 Laschement consentant à la cupidité?
 Quand la raison complaiſt à la concupiscence
 Soudain le repentir & de pres suit l'offence,
 Iour & nuict becquetant, & cruel tirassant
 Le foye en son tourment iour & nuict renaissant.
 Punissant le forfait en la part criminelle,
 D'un martel qui croissant nuit & iour renouuelle.
 Titie ainsi languist pour auoir attenté
 De la chaste Latone à lapudicité.
 Venus au foye est nee, & de sa blanche escume,
 Au foye elle accoucha de l'enfant qui allume
 Le sang d'un fol amour, lascif, desordonné:
 Car le chaste est au cœur en lieu plus noble né.
 Le foye est la maison que le grand' architecte
 A, de ses propres mains, pour y habiter, faicte.
 Sur un throne Royal y sied sa maieſté,
 Où iuste elle commande à l'uniuersité
 Du petit monde humain, si sage le police,
 Et si bien, que tout membre y faict son droit office.
 Souueraine elle y est, iuge à droit ou à tort,
 On n'en peut appeller à un autre ressort.
 Des flatteurs appetits elle est tousiours suiuié,
 Rebelles de raison, leur antique ennemie,
 Esclaues des plaisirs qui la perdroyent sinon
 Qu'ils fussent retenuz de la mesme raison.

D'un perdurable cours, une rouge fontaine
 En cest endroit ressort entrant dans la grand veine.
 Par cent conduits de bordz en mille autres suiuanz,
 Regorgeant, arrosant tous les membres viuans:
 Comme une viue souche à la terre voisine
 Qui deçà, qui delà iette mainte racine.
 Chasque racine apres de la terre est succant,
 La seue que le tronc succe à soy nourrissant.
 L'arbre, qui en rameaux & en branches se fourche,
 Le foye, tout ainsi, qui est la viue souche
 De l'homme, qu'on appelle vn arbre renuersé,
 Apres auoir le suc des racines succé.
 Ces racines ce sont veines de mesentère,
 Ressucçant l'estomach qui est leur terre mere:
 Labreue & se remplit d'humeur presque vermeil,
 Luy donnant par la force vn second appareil,
 Apres l'auoir doiüé d'une naturelle ame,
 Le versant au gros tronc, qui en branches se rame,
 Grosses de sang, de feu, & des esprits esparts,
 Nourrist, eschauffe, allume vn corps en toutes parts.
 Dame nature adoncq', ame vegetatiue,
 Quinteuse, menagere, ingenieuse, actiue,
 Sans peine, & sans repos, qui au corps fait la loy,
 Tient quatre vertus sœurs seruantes pres de soy.
 Chascune à tour de rolle, & par alternatiue
 Va seruir son quartier à la vegetatiue.
 Electice pouruoit, & fournit au gesier
 L'humeur, qu'elle cognoist luy estre familier.
 Cathectice reçoit & retient ce qu'apporte
 Sa compagne & sa seur, tirant la veine porte:

LE FOYE.

Cuisiniere est Peptice, & le sang commencé
 Assaisonne, & recuit pour estre dispensé:
 Mais c'est confusément, car bien peu se soucie
 De trier le meilleur, le pur d'avecq' la lie.
 C'est à toy Ecritice, avecque iugement,
 Tu frelate le sang, & mets se parément
 L'utile de l'inutil, ce qui est bon tu range,
 Et l'estuyë en son lieu, dehors iette l'estrange.
 Ces vertus n'ont qu'un but, d'entretenir tousiours
 En vne equalité de nature le cours:
 Et de regenerer l'humidité natale,
 Qui par son propre feu se deseché & decale.
 Vn feu, qui de l'humeur qui l'engendre se paist,
 Vn humeur, où ce feu viuifiant renaisst.

Or que leurs actions ne soient pas toutes vne,
 Elles n'ont qu'un outil, leur boutique est commune.
 Le foye est leur boutique, & l'esprit leur outil,
 Un corps chaut, vapoureux, esclairant, & subtil,
 Qui la chaleur ennee, autre instrument de l'ame,
 Diuine portion de l'eternelle flamme,
 Qui fut rauie aux cieux du sage Promethé,
 Mais cherement vendüë à sa posterité.
 Tous les membres d'icy prennent leur suffisance,
 Chacun selon son grade, & pour son indigence.
 Que si ces quatre seurs chascune tour à tour
 S'aquittent de leur deu, le sang sera tousiour
 Ny trop clair, ny trop gros, vermeil & mediocre,
 Doucereux, sain & net, la nourriture propre
 De ce corps animé du petit vniuers,
 De mille pieces fait, de mille accords diuers.

S'elles ne font aussi ce qu'elles doiuent faire,
 En lieu de proffiter elles font le contraire:
 Vn sang rond, morne & froid, baueux & rongelé,
 Ou lentement gluant, trop fade, ou trop salé:
 Ou comme feu flambant de couleur verte & grise,
 Ou de l'eau de la mer quand elle est plus rassise.
 Ou de noir hebenin, ou de charbon estemct,
 Tel qu'est dessous le cuir le sang, tel est le teinct
 Du miserable corps, qui en prend nourriture,
 Diffamant sa beauté d'estrangere teincture.
 Si doncq' ces quatre seurs les ouurieres du sang
 Leur office ne font vn sang loyal & franc.
 Que si de tout le corps la despence n'est saine,
 Le foye est le premier qui en porte la peine.
 Paresseux, nonchallant il deuiendra bouffy,
 Ou froit comme vn glaçon, ou recuit endurcy,
 Ne fera que des eaux, le corps molasse & blesme
 Boursouffle tréluisant patist douleur extreme,
 Encor' que le poulmon trempe en l'humeur salé
 Il estouffe de soif, le gosier est brulé:
 Le flanc qui le contrainct, la coste qui l'embrasse,
 Poussif, gros & enflé, pousse hors de sa place:
 Si d'heure on n'y pournoit finalement esteinct,
 Premier que d'estre vieux vieillesse nous atteint.

Si ton foye est frappé de ceste maladie,
 Pillant l'humeur benin nourricier de la vie,
 L'humeur qui sert de lampe & d'huile à la chaleur:
 Tu trouueras icy pour guerir ta douleur.
 Si le coup est donné, boy l'onde miellee
 Au salutaire ius de la sauge meslee.

LE FOYE.

De fresne les noyaux enclos dans les fucillards,
 Seurement boy encor, & des vautours pillards.
 Auale les gesiers, ou bien le bouillon hume
 Des perdris efforant au clair soleil leur plume.
 Du poiure aigre-mordant, de la plus dure poix
 Broyè & pisle menu, pour en prendre le poix
 Que la dragme trebuche à balance droitiere,
 Ensemble reduy-tes en subtile poussiere:
 Puis un melange en fay pour apres estre beu
 En l'onde demortie à la chaleur du feu.
 A nature agreable est la chaleur modeste:
 Mais le froit importun luy est triste & moleste,
 Et le ius de l'aluyne or qu'en la bouche amer.
 Au foye il ny a rien plus plaisant à humer.

F I N.

A MONSIEUR GANGNOT,

Aduocat en la Cour de Parlement.

GAngnot dont la candeur a sur moy tant gaigné
 Qu'à Princes n'y à Rois mes labeurs ie n'adresse:
 Ils ne font cas de nous, pour un mot ou souplesse,
 Vn bouffon, sera mieux qu'un de nous guerdonné.
 C'est à toy qu'ils sont deux, pourtant ie t'ay donné
 Mon Phrenetic, de qui la fureur l'ame blesse:
 C'est toy qui le premier me remist en l'adresse,
 D'où pour suiure autre train ie m'estois destourné.
 Sans toy ie n'eusse osé si grand'ceuvre entreprendre:
 Ce n'est doncq' te donner, c'est seulement te rendre
 Ce que iauois de toy receu premierement.
 L'espy le premier meur Ceres pour soy demande,
 Et le premier raisin Bacchus veut qu'on luy rende:
 En attendant la fin pren ce commencement.



LE PHRENETIQUE DE R. B. A. M.
EXTRAICT DE SON ÆSCVLAPE.

POur suiurons noz desseins, ma chere Calliope,
Que pour moy i ay eleuë en la sçauante trope
Des neuf pucelles sœurs, que pour guide ie prens,
Pour conduire à sa fin l'œuure que i'entreprens.

Ce n'est assez encor' d'auoir basty vn temple,
Où sa diuinité l'homme mortel contemple:
D'auoir tiré les traits d'un admirable corps,
Où du grād on peut voir l'ordre & tous les accords:
Contregarder le faut de l'excessiue iniure,
De la pale languueur, à fin que deuant l'heure,
Que condamné il est par arrest du destin
A prendre, quoy qu'il tarde, ineuitable fin,
Ruiner ne le puisse, auant le temps dissoudre,
Chose commune à tous, en sa premiere poudre.
Soit que cela se face, ou par froid ou par chant,
A lors que l'un excède, ou bien l'autre deffaut:
Ou bien que quelque effort ait ceste humeur rauie,
D'où n'ait, & se repaist le feu de nostre vie.
Dy moy doncq' les motifs & les occasions
Qui font que sommes tous à mille passions,
A mille maux sujets, tout autant que nous sommes
De viuants sous le ciel, & sur la terre d'hommes:

LE PHRENETIQUE.

Soit que la cause en soit cogneuë à l'un des sens,
 Ou profonde recluse, & loing des yeux absens,
 Que la raison recherche, incertaine & obscure,
 Guidee par le signe ou par la coniecture.
 Retournant sur mes pas par moy sera chanté,
 Ce qui aux corps rauist, la treschere santé:
 Qui rompt leur Symmetrie, & qui corrompt leur forme,
 Qui la proportion de leurs membres d'iforme.
 Soit que le mal soit seul, ou d'autre accompagné,
 Ou premier, ou second, ou le troisieme né.
 Mal, par qui l'action à l'organe cogneuë,
 Se gaste, ou bien se pert, ou bien se diminuë.
 Ie diray tout d'un train les diuers accidents,
 Les signes par lesquels, ce qui se fait dedans
 Les corps troubles, se voit, qui venants à paroistre,
 L'occasion du trouble au sens font reconnoistre.
 Par eux long temps deuant on sçait dire & preuoir
 La fin, à celle fin de bonne heure y pouruoir:
 Qui fera qu'un chacun ainsi qu'un Dieu admire
 (celuy qui sçait pouruoir, & preuoir & predire.
 Ie passeray plus outre, & suiny d'un bon heur,
 Aux remedes i'iray, hardy entrepreneur:
 Et à chasque languueur i'opposeray la cure
 Non temerairement ou par cas d'auanture:
 Pource de l'uniuers ie parferay le tour.
 I'iray où le soleil eclost le point du iour,
 Cercher la perle fine, & la pierre indique,
 Le parfum precieux, & drogue Aromatique:
 Puis à gauche tournant i'iray voir l'Africain,
 Et mon retour hastant, le peuple Americain.

Tout le monde nouveau, de ceste gent Barbare,
 Quoy qu'il couste, i'auray l'espice la plus rare:
 Mille animaux diuers que sa terre produit,
 Et du baume puissant le ius, le boys, le fruit.
 De là ie chargeray au Nord qui tousiours gele,
 Tout cela que nature enuieuse y regle :
 De la mere commune ouurant les flancs encor
 I'en tireray la terre aussi chere que l'or.
 Il n'y aura liqueur, pierre, metal, ou mine,
 Proffitable aux mortels qu'en soufflant ie n'affine,
 Dressant pour c'est effect maint fâtasque fourneau:
 Pour en tirer l'esprit, l'huile, le sel & l'eau.
 Puis dedans l'océan à chef baissé me plonge,
 Pour le Coral pescher, l'Ambre riche & l'esponge:
 Les escailles, les os des humides troupeaux,
 Et les thresors cachez sous le crystal des eaux:
 Mille autres nouueautés dont la nature est grouffe
 Et que de iour en iour ell' enfante en eau douce.
 Au nid de l'herondelle, & de l'aigle leger,
 D'un vol Dedalien sans craindre aucun danger,
 Les pierres i'iray querre au dessus de la nuë:
 L'une fait accoucher, l'autre sert à la veüë.
 Voire au fond des enfers si la necessité
 Me commandoit d'aller sur les bords de Lethé
 Les deux pauots cuillir, pour euoquer le somme,
 Pour celuy endormir que ceste erreur consomme.
 Il n'y aura recoing en tout cest vniuers,
 Où ie n'aille quester les remedes diuers,
 Pour piteux m'opposer d'une cure hardie
 Aux efforts violents de chasque maladie.

LE PHRENETIQUE.

Comme on voit rang à rang vn esquadron marcher,
 Sentant son ennemy, pour combattre, approcher.
 Se ranger, se serrer, & son enseigne suiure,
 Resolu de mourir ou victorieux viure.
 Ainsi que chasque membre en nostre corps humain,
 L'un à l'autre s'allie, & va d'ordre certain,
 Suiuant ce mesme train, & de façon pareille,
 De nostre vie humaine, hardy, ie m'appareille.
 L'ennemy attaquer, & mesprouuer, vaillant,
 Contre le mal qui est nostre vie assaillant.
 Ainsi de main en main feray que le remede,
 Contre chasque langueur s'entresuiue & procede:
 Opposant l'un à l'autre vn chacun à son tour,
 Le commence de l'ame à deffendre la tour.

Mais quoy? l'ame, qui est vne chose impassible,
 Non subiette à mourir, celeste, incorruptible,
 Immuable, & qui n'est serue à la passion,
 Son logis exemptant de la corruption,
 Peut-elle estre aux langueurs d'un corps assubietie?
 Et aussi bien patir que toute autre partie?
 Nenny, non, quant à elle, à nostre aduis, ell' sent
 Les vices des conduits, par où ell' va passant.
 Mais nostre aduis s'abbuse à l'egal ell' ne souffre,
 Que l'eau qui va glissant par des veines de souffre,
 Ou celle qui s'escoule en vn bourbeux canal:
 C'est le sens, qui patist, elle n'endure mal.
 Non plus que fait Phæbus, quand son luisant visage
 Rouge ou blesme nous semble au trauers d'un nuage,
 Von plus que luy encor, quand il se monstre obscur,
 S'estant mise entre nous & luy, sa belle seur.)

Et non plus que sa seur, lors que la terre entiere,
 Vis à vis, opposite empesche que son frere
 Ne voit sa face obscure, & qu'un nuage ombreux
 Luy affeuble le chef d'un voile tenebreux.
 Et non plus que nostre œil qui durant la nuict s'ombre,
 Ne voit autour de luy que de la terre l'ombre.
 Pour celà dirois-tu en ceste obscurité
 Que ton œil cependant fust veuf de sa clarté.
 Non, non, l'ame ne souffre, & moins de mal endure
 Que l'œil enueloppé d'une nuictée obscure.
 Et ne souffre non plus qu'en yuer le soleil,
 Quand un brouillard espais s'entrepose à nostre œil.
 L'ame subiette n'est à nul sentiment triste:
 C'est en ses instrumens que la douleur consiste.
 Ses sentiers, hors desquels il n'y a que fureur,
 Qu'un oublieux sommeil qui suit du sens l'erreur.

Phrenesie est donc vne erreur furieuse
 Espanchant dessus l'ame vne nuict tenebreuse,
 Qui de son droit chemin la detraque, en danger
 Que plus à son bon sens ne se vienne ranger.
 Si grand est son defastre, & fier, que plus tost cede,
 A l'implacable mort, qu'au salubre remede:
 Quel tan, qu'elle folie, ô pauvette! & pourquoy
 Tes-tu tant esgaree & estrangee de toy?
 Quel Demon mal-faisant te pique & te tourmante?
 C'est mon logis qui ard par la fumee ardante,
 D'une fieure insensee, un brasier allumé
 Dans le cœur, qui luy a l'humide consommé.
 Le foye est bruslé, le poulmon s'en altere,
 Et tout le sang en boust dans la veine & l'altere.

LE PHRENETIQUE.

Ainsi qu'ar doit Hercule, quand son mortel par feu
 Repurgea, sur Oeté, & que d'homme il deuint Dieu:
 Semele ainsi ar doit lors que trop curieuse
 Voulut voir le tonnerre en la dextre amoureuse:
 Ainsi bruloit encor' l'enfant (limenien
 Dans le Pau culbuté du char Titanien.
 Ce feu continuant en son ardente rage,
 Le miserable corps forcenement saccage:
 Il s'eleue d'en bas vne chaude vapeur,
 Qui la teste eschauffant souffle ceste fureur,
 Et l'atize sans cesse, en seduisant la veüe
 Par qui la fantasia est faussement deceüe
 (Encor' que la raison iuge bien autrement)
 Quelque fois fol tout seul sera l'entendement
 Sans que le sens se trompe, en ce qu'un tel fol pense,
 Fait, ou dict, il ny a aucune vray' semblance.
 La memoire s'oublie aussi le plus souuent:
 Si qu'on diroit à voir tel corps estre viuant
 Sans ame raisonnable: en la ceruelle molle
 Simprime estrangement mainte vision folle:
 Ainsi qu'on aperçoit tout au plus haut de l'air,
 Or droit, or de biais maintes flammes voller
 En diuerse façons, la vapeur chaude & seche
 Sert au feu, qui l'alume, & d'amorce & de meche.
 Elle monte rauie en estage plus haut
 De l'air, par le soleil ou d'un autre astre chaut:
 La terre, qui en est eprise & enflammee,
 Secreuasse amoureuse, haut, pousse sa fumee
 Prés l'element brulant, lequel quand il s'y prend,
 Voyant briller ces feux tous estonnez nous rend.

Maintes impressions de l'aride fumiere,
 S'engendrent ceste part, selon qu'est la matiere
 Duitte à l'air concevoir, tantost se reserrant,
 S'amoncelle & ramasse, or' esparse & errant,
 Voltige çà & là, ou bien large espanuë,
 Continument se serre ou erre entrerompuë.
 Montant ou descendant fait semblant menacer,
 Les mortels esbahis, on luy verra tracer
 Dedans le clair serain de feux dix mille feintes,
 Que plustost ou plus tard, tantost verrez estinctes.
 Ceste exhalation, or' qu'une chose soit,
 Toutesfois diuers noms en la terre reçoit.
 Qui un traict flamboyant, ou sagette l'appelle,
 Qui un ardant cheuron, brandon, torche, ou chandelle:
 Qui cheure bondissante, & qui belliers cessans,
 Vn dragon effroyable, & cheueux menaçans
 La terre d'un desastre, ou bien le feu d'Heleine,
 Qui tousiours aux nochers quelque malheur ameine,
 Ou les freres bessons, fils d'œuf, venans calmer
 Les courages troublez, & les flots de la mer.
 De ce que plus ell' semble haut allumee en somme,
 Par des noms empruntez entre nous on la nomme.
 Ainsi est des vapeurs, dont le chef est espris,
 Qui de fantaumes vains vont troublans ses esprits:
 Et de brouillars fumans l'ame offusquee & pleine,
 Des choses ne voit plus qu'une apparance vaine.
 Tel que l'humeur sera auquel l'homme est subiect,
 Telle est la vision qui dans l'ame se faict,
 A sa cause semblable: ore c'est la colere,
 La portion du sang escumuse & legere.

LE PHRENETIQUE.

*Mornasse, palissante, à la couleur de l'or,
Soudaine & fretillante, & cest humeur encor
Par la chaleur recuit, qui enfle & qui enflamme,
Les deux tantes du chef, tabernacles de l'ame.*

*Le cerueau ondoyant des toiles ambrassé,
Trop voysin de leur feu soudain est ambrassé.*

1. *C'est quād on perd son sang où gist la vie humide:*

2. *Ou que par trop iusner on a le cerueau vuide:*

3. *Ou bien par quelque coup sur la teste donné:*

4. *Ou des esprits le Prince, est trop passionné:*

5. *Ou quād dessus le liure en veille on se consume,
Se priuant, studieux, de la douceur du somme.*

6. *Ou qu'ō ait des presens de Bacchus par trop pris,*

7. *Ou quand le froid reserue au dedās les esprits.*

*Auecque la chaleur, laquelle ne s'esuante,
Lors là dedans s'allume vne fournaise ardente,*

Le feu prent à l'esprit, & l'esprit tout de rang,

Brusle le sang, le corps est allumé de sang:

Du sang, qui est logé à l'estroit, sans issuë,

Nāist la corruption dont la fieure est conceü.

Desordre si piteux peut-on voir sans fremir?

Dormir tousiours resuant, ou iamais ne dormir.

Cā & là se debattre en suiuant la manie:

De l'humeur furieux qui le pique & manie:

Bien qu'importuns ils soient par liens retenus,

Nē pouuans remuer leurs pauures membres nus:

La bouche ils n'ont iamais ny la paupiere close,

Ny, babillards, iamais leur langue ne repose,

O quelle pitié c'est voir qui au parauant

Doux & paisible estoit, modestement viuant,

Deuenir vn farrouche, & d'une voix hardie,
 Ne respondre à propos à chose qu'on luy die:
 Colere, audacieux, forçant & mutin,
 Hors du liçt s'eslancer, point de son auertin
 Ne se laissant forcer, plus fort que de coustume,
 A cause de l'ardeur qui son courage allume.
 Ils estranglent de soif, & leur tient au palais
 La langue noire & aspre, & toutesfois iamais
 Ils ne parlent de boire, ils ne plaignent la teste,
 Combien que soit l'endroit que le mal plus moleste.
 Ils poussent loing à loing à grans & à longs traicts,
 De souspirs vn orage, hors des poulmons extraits.
 Ainsi que l'amoureux duquel l'ame est viuante,
 Hors de son propre corps pour viure en son amâte:
 Si que l'esprit, qui fait la poytrine mouuoir,
 Est occupé ailleurs, & oubly, son deuoir.
 Des arteres le poux, de la viel' indice,
 Foible & petit aussi ne fait bien, son office.
 Leur veuë ont esgaree, ils flamboyent des yeux,
 Effroyables à voir, explorez, furieux,
 Chassieux, foriettez, & leurs petites veines
 Esparses sur le blanc de feu parroissent pleines.
 Leur nez le sang degoutte, ils ont l'orreur du iour,
 Et les mains demenans furettent à l'entour:
 Et pincetant les draps cherchent sur la couuerte
 Mile festus vollans deuant leur veuë ouuerte.
 L'un ne s'en fait que rire, & on peut seurement
 De plus pres l'accofter: mais l'autre enragement,
 Dangereux, crie, & frappe, hardy, craintif ensemble,
 Mourir veut, mais de peur, il frissonne & en tremble.

LE PHRENETIQUE.

Leur eau tomber ne peut, s'ils en font quelque peu,
 Aussi rouge sera que la flamme de feu:
 Quelque fois blanche aussi, mais c'est lors que plus forte,
 La fièvre au Bac des morts meurtrière les emporte:
 Prisonniers de Pluton, & proche du trespas,
 Quand pres sont de la mort ils murmurent tous bas.

Lairrons-nous doncq' mourir ceste pauvre personne,
 A faute que secours personne ne luy donne?
 Or que de son salut en doute soit l'espoir,
 Je ne lairray pourtant d'y faire mon deuoir:
 Essayer il vaut mieux vne cure incertaine,
 Taschant à soulager d'un malade la peine,
 Que le laisser languir, cruels, l'obandonnant,
 Un iouët miserable à l'herreur forcenant.
 Et vous diray comment qu'en la chambre où il couche,
 L'yuer, l'air temperé, l'Esté le frais le touche:
 L'un luy donne grand iour, l'autre nuble & obscur,
 Le moyen ce me semble on prend pour le meilleur.
 Car la fureur s'aigris en lumière tresgrande,
 Et le sommeil oysieux les tenebres demande.
 En l'obscur, où les sens cessans se tiennent cois,
 L'esprit pensif se feint mille peurs, mille effrois:
 Gisant il ne sera en chambre peinturee,
 Ou inconstante veüe extrauague esgaree.
 Qu'autre, sinon l'amy ne l'aille visiter,
 L'estranger sa fureur ne feroit qu'irriter:
 L'amy s'accommodant à sa passion fole,
 Ne luy contredira de faict ny de parole.
 Corrige doucement le trop audacieux,
 Feins des successions à l'auaricieux.

Ly moy quelque beau liure au sçauant Phrenetique:
 Chante deuant celuy qui ayme la musique:
 S'il est trop remuant, il le faudra tenir
 Gré à gré, si tu peux, sinon, fay le tenir.
 Et les pieds & les mains estroitement luy lie:
 Car plus il se tourmante & plus croist sa folie.
 Et sa force se lasse, & l'inuoqué sommeil
 N'a cependant loysir de luy arrouser l'œil.
 Sougne qu'il ait tousiours mol & lasche le ventre,
 Par ce remede seur, qui parle bas, y entre:
 Et luy fay, sans delay, la veine enslee ouuirir,
 Que verras vers le chef sur la dextre courir:
 Selon l'excez du sang, & du bras la portee,
 Plustost moins qu'autrement, soit l'abondance ostee.
 Mais bousche bien la playe, affin que l'incensé
 La vie aussi le sang, par où il est percé,
 Ne perde, quand le coude il estend ou replie.
 S'il refuse le bras te tendre en sa folie,
 Saysis-le moy au corps, & d'un bandage mol,
 De laine cordonnee ambresse luy le col:
 Pren ta lancette en main, assureé donne contre
 La veine qui au front droite & pleine se monstre.
 L'asperge cuitte & prise en la force du vin:
 De la mauue le ius: & la chair d'un sucrin
 Cuitte en mesme liqueur, du cocombre la grene]
 Beüë en laict de la femme, ou celle dont est pleine
 La courge, & la citrouille espraindre qui voudra,
 Et boire l'eau, serré le chaut mal esteindra.
 Du boulet arraché, du cedre sarmatique
 Est souuerainement salubre au Phrenetique.

LE PHRENETIQUE.

Qu'il retire estant beu hors du mortel danger:
 Mais auisé faut estre en faisant desloger
 L'humeur qui est au corps & à l'ame contraire,
 Gardant de l'irriter, luy estant trop seuer.
 Soys luy doncq' gracieux, du rosoyant miel
 Qu'es champs Appuliens Iupiter faict du ciel
 Toute la nuict pleuuoir, dessuz son arbre chere
 Pour bening subuenir à l'humeine misere,
 Esclattant, grumelant, & tout farcy de grains,
 Deux onces fay luy boire, ou bien la moytié moins
 De la moüelle enchassée en la coque du Cayre:
 Mais pour la prèdre il faut tout frâchemèt l'extraire
 Le Mirabolan iaune, & le datte Indien
 Rangent ceste ennemy, par vn mesme moyen.
 Quoy oublirois-ie bien ceste racine rare,
 Qu'apporte avecque soy de la terre Barbare
 De l'indique Catay vn nom Barbare aussi?
 O ciel, amy tu n'es de la terre d'icy,
 Où croistre ne la fais, mais d'un pais sauuaige,
 Qui sa vertu ignore, & n'en sçait pas l'usage:
 Nous qui l'entendons bien, & en vsons encor,
 A cheter l'a nous fais du volge, au pois de l'or.
 Mal partis sont tes dons, cétuy-cy m'en refuse
 Qui bien me seruiroit, l'autre l'a qui n'en vse.
 Grosse & ferme doit estre, orengée au dedans,
 Rayée, de filons semblants au rais ardents
 De l'estoile de Mars: grisastre en est l'escorce,
 Des quatre premiers corps imittante la force:
 L'air rare, & le feu chaut, espars sont par dessus,
 Au fond avecque l'eau le terrestre est confus.

Ceste estrange racine, en son corps, qui enserre
 Les puissances du ciel les vertus de la terre,
 Porte un suc precieux (si le More trompeur
 N'en tiroit le premier la vitale liqueur,
 Qui nous en vent le corps exprimant pour soy l'ame)
 Duquel, qui boit, esteinct la phrenetique flamme,
 De l'onde, où par trois fois on fait tremper la fleur.
 A qui Mars faict porter son nom & sa couleur,
 La puissance est egale, & sa graine menuë
 En peut bien faire autant, l'une & l'autre estât beuë.
 Autant tu en peux faire, ô rosier damasquin,
 Si pressurant ta fleur on voit son ius pourprin
 Et de ton incarnat, qui vingt fueillages mange,
 Fais que ceste fureur de son cerueau vuidange.
 C'est ainsi que tu dois chasser cest humeur roux,
 Ne luy donnant loysir de s'emparer de nous:
 Et que dans nostre fort le plus fort ne puisse estre.
 Ce pendant pense aussi à t'en rendre le maistre,
 L'assiegeant par dehors: au commencement donc
 Tons le chef frenetique, puis la temple & le front:
 Et tout l'os couronné d'aigre rosat arrose,
 De l'eau sainte à Venus, du meurte & de la rose,
 De la chaste laittuë, & du nerueux plantain,
 De celle qui d'amour l'arc debande, & rend vain,
 Vierge nourrie en l'eau, de la froide morelle,
 Et de la mandragore, or' masle & or' femelle:
 Longuement composé du plus tendre bouton
 Du peuple Ambre pleurant la mort de Phaëton
 Employer y pourras, vertueuse y est l'huile
 Où tu suffoqueras vne viue torpille.

LE PHRENETIQUE.

Poisson qui prent celuy par son propre poison,
 Qui l'a pris, l'apatant d'un trompeur hameçon.
 D'huile, où le tors lierre, arbre gaye & la sciue,
 Qui tuë en embrassant celle qui la tient viue,
 Et succant faict secher celle qui l'entretient,
 A trempé, luy frotter front & temple il conuient.
 Pren la semence noire à l'herbe boutonnee
 Qui des puces a nom, l'huile mixtionnee
 Aux graines des pauots, & leur ius espessy
 En la necessité seruir on faict icy.
 Qu'on s'en garde autrement, comme de tout extreme,
 Il esteindroit le feu de la nature mesme
 D'un eternel sommeil: à sentir le poil blond
 De crocus on sommeille, ou s'en frottant le front.
 La rubarbe & nombril herbe aux parois aymee,
 Ont maintesfois aussi la paupiere fermee.
 L'huile espreint, & tiré de la mouëlle des os
 De persique, & phillis prouoque le repos.
 Enduite sur le front, la hanne-banne plonge,
 Tous ceux qu'elle assommeille en quelque fascheux songe.
 Des arbres boy la mousse à l'aggreable odeur,
 En du vin Angeuin, des lambrunches la fleur
 Sur la teste esparpille, vne nourrice espanche
 Le laiçt reiallissant de sa mammelle blanche,
 Et du vin-aigre encor dont la chaude froideur
 Penetre l'espaisseur de l'os mascif & dur.
 L'herbe verte on applique, ou de son pressurage,
 Entre les doigts serree, arrouse le visage:
 Ou y mouille vn bandeau dont ceins le front resuant,
 L'esté froid, l'hyer tiede, & le change souuent.

Pour cuire, prens les vns de cest ordre & meslange,
 Humes en leurs bouillons, ou bien leur fueilles mange,
 De nourrir le malade, & guerir sa langueur,
 Point n'est-ce à vostre aduis un moyen doux & seur?
 Lorge frais metiué de son escorce esmonde,
 Mets la semence auccq' close en la teste ronde
 Du pauot grillotant, du doux sommeil amy,
 Du cocombre tortu mesle les grains parmy :
 Et dans l'onde bouillie auccq' l'herbe laittiere,
 Pile, presse, & le suc dont se braue Madere.
 Remele & le recuy, blanc, tresluyfant & fin,
 Et lequel ne doit rien au breuage diuin.
 Fay luy, quand le sommeil sous sa grand aile noire
 Couure tous animaux, ce doux breuage boire.

La laittuë en secret mise sous l'aureiller,
 Fait l'œil trop eueillé malgré luy sommeiller.
 Mais tourne vers le chef la cime verdoyante,
 Et la racine en bas vers l'une & l'autre plante:
 Du iusquame noir le fueillage bourru,
 En a meint en la sorte au besoin secouru.
 Et du pauot bruyant la racine, & la pomme
 De l'herbe circeenne euoquent le doux somme.
 Et de l'aluyne amere vne branche, pour veu
 Que, qui sous le couffin la cache, ne soit veu.
 Du lieure hermaphrodite à fuir du pied viste,
 Qui des chasseurs pressé va mourir dans son giste,
 Qui dessous le chesné le fiel roux cachera,
 Autant qu'Endimion, voire plus, dormira.
 Mais garde que trop long ce sommeil ne luy dure,
 Et qu'il n'aille dourmant payer de la nature

LE PHRÉNÉTIQUE.

Le tribut à Charon: ostant doncq' cest amer,
 Fay luy, pour l'euiller, du vinaigre humer.
 Le Camphre que l'Indois pur & blanc nous enuoye,
 Dormir faiçt, appliqué sur le cœur & le foye:
 Oins luy les pieds encor de gresse de glyron:
 Ou du vin fay luy boire, où le bec d'un heron
 Tout un iour a trempé, ou bien près de sa couche
 Feins un ruisseau couler, qui murmurant luy touche
 L'oreille d'un son doux, de haut dans un bassin,
 Bruyant goutte apres goutte d'un endormeux tintin:
 D'une main chatouilleuse hanche & cuisse luy flatte,
 D'une ongle fretillard sous la plante le gratte,
 Ou le creux de la main, ce chatouilleux plaisir
 Fera qu'un d'oux repos luy viendra l'œil saisir.
 De tout ce grand herbier tu dois encor elire
 Quelques uns des plus froids que tu feras recuire
 Dans des celestes flots avec fueilles de saux,
 Et leur vapeur odore haletant des naseaux.
 Qu'il s'en laue les mains, & les pieds & la teste,
 Les aisselles & l'aine, & la part deshoneste.
 Ses membres demi ards soient nuz enuelopez:
 De linges, qui seront dans ces ondes trempez,
 En la mesme eau eneor il conuiendra qu'il plonge,
 Pour luy faire odorer l'achilienne esponge:
 Le froment qui naguere a desponillé l'espy
 D'un sommeil vapoureux a la fieure assopy:
 Si la farine au front il endure qu'on mette
 Pestrie au ius de l'herbe à la fleur violette.

Iusqu'icy auons nous l'ennemy combattu,
 Qui de l'ame occuppoit la tour, par la vertu

De cent simples diuers, ia il branle & encline
 A se rendre, & la place, à la main medecine.
 Pour suiurons la victoire, & que loysir n'ait pas
 De faire de rechef de ses forces l'amas.
 Moderons la froideur du desusdict remede,
 Auecque la chaleur mediocrement tiede
 Du ius, de l'eau, de l'huile, où le gay pouliot
 Trempe, boust & s'infuse, & le blond melilot,
 Le serpolet rempant, le thim, la mariolaine,
 L'ache, le Calament, l'origan, la betoine,
 Et de l'herbe qui porte & le nom & l'odeur
 Du fruiçt du franc pommier, la blanchissante fleur,
 Et l'amante changee en l'herbe de la mente:
 La fleur du rosmarin l'an deux fois florissante,
 Ensemble la guy-mauue, & la mauue y conioincts.
 Si remoittir le chef ia caterreux tu crains,
 A l'herbe capitale ally l'a coriandre:
 Mais gare ceste cy, on en pourroit trop prendre,
 Ell' vire le cerueau: des sandaux le bois sec,
 Du rouge vermillon mets la semence auec:
 Et le tout fay secher pour le reduire en poudre,
 Laquelle sursemant le chef razé saupoudre.
 La sansue peschee aux riuës d'un estang,
 Se s'appant sous l'oreille, hume ce mauuais sang.
 Ou luy verse de l'eau tiedement sur la teste,
 Ou l'arrose de lait saillant chant de la tette,
 Ventouse de feu pleine en peu de lieu contrainct
 Qui, ayant deuoré l'air prisonnier, s'esteinct,
 Sur le col decouppé, sur l'espaule hachee
 D'un rasoir bien trenchant ferme soit attachee.

LE PHRENETIQUE.

D'un coq vif fens le dos sans aucune pitié,
 L'oiseau Venerien coupe par la moitié:
 Ou le chien compagnon, recompense cruelle,
 Pour à son maistre auoir fait seruice fidelle.
 Escartelez soient mis dessus le chef fendu,
 Tant qu'ils ayent la vie & leur chaleur perdu,
 De l'estomach ouuert de l'oïaille bellante,
 Prends les poulmons fumans, ou my-morte haletante,
 La vie bouge encor: & en ceindre sois pront
 De ce pauure resueur les temples & le front.
 La laine atout son suin y sert, si allumee
 On luy en fait sentir la puante fumee.
 Souuent a-on guarry par puantes odeurs,
 Ceux que Ceres piquoit de ses chaudes fureurs:
 N'atten iamais le coup, cestuy-là n'est pas sage
 Qui à son ennemy a quitté l'aduantage.

A MES.

FIN.



A MESSIRE ANTHOINE FVMEE,
CHEVALIER ET CONSEILLER DV CON-
seil priué du Roy, seigneur des Roches
sainct Quentin.

Vous qui estes poussé de la sainte fureur
 Qui les hommes mortels aux immortels allie,
 Vous qui ne tenez rien de l'humaine folie,
 Et qui vous tenez loing de la commune erreur:
 D'un visage bening, ie vous pry, Monseigneur,
 Receuez le present de ma melancholie:
 Mal chascun'un affligeant, mais que chascun palie,
 Vn mal sans aucun mal, sans fièvre, & sans douleur.
 Quand deux contraires sont opposez & mis contre,
 Le grand pres du petit, & le blanc pres du noir,
 Beaucoup plus apparens l'un & l'autre se monstre.
 En ces vers vous verrez, s'il vous plaist de les voir,
 Vostre sagesse luyre entre l'infiny nombre
 De fols, comme Phœbé reluit en la nuit sombre.



LE MELANCHOLIQUE.

EN fut-il oncq' vn seul, en est-il, qui serace:
Voire fust-il issu de la celeste race,
Sur terre cheminant, portant visage humain,
Qui n'ait le cerueau creux, & trop leger d'un
grain,

Ou de deux, ou de trois? ie ne veux pour balance,
Pour le verifier, sinon ta conscience.
Confesse franchement la pure verité.
N'as-tu iamais senty ton cerueau agité, (tre,
D'un humeur brusque, & gay, bizerremēt fola-
Verneux, resueur, fantasque, inconstant, opiniastre,
Gaillard, gentil, & prompt, plaisant, recreatif,
Sec, noyraud, & leger, taciturne, inuentif,
Ingenieux, sublime, bien contant de soy-mesme,
Tout autre desdaignant, des bons esprits la crespme,
Le subtil du subtil des plus diuins esprits,
Qui sous le bon Saturne ont leur essence pris.
Et qui faict les mortels aux immortels cōformes,
Abstraiçt, & tire en bas les eternelles formes,
Par dessus la nature haussant leur intellect,
Espionnent le ciel, pour voir ce qui s'y faict.
Humcur, où la clairté diuine reuerbere,

Comme le clair soleil se voit en l'onde claire:
 Rauissant tellement les esprits iusqu'aux cieux,
 Les separant des corps d'un decez precieux,
 Qui l'homme curieux par sus la nuë emporte,
 Pour y voir mille cas, faits de diuerse sorte.
 Des feux volans par l'air, qui nuict & iour font peur,
 Gresles, pluyès & vens, engendrez de vapeur,
 Et les brillants esclairs de l'esclattant tonnerre:
 Qu'imiter il oza de retour sur la terre,
 Si effroyablement, & si grand coup tonna,
 Qu'il esbranla la terre & les cieux estonna.
 Craignant encore un coup que les fils de la terre
 N'eschalassent le ciel pour leur faire la guerre.
 Ils sont tous en ceruelle, & pour fuir ces maux,
 Ils se cachent couarts sous diuers animaux.

De l'humeur, qui de vie heureuse & loque est cause,
 De l'humeur par lequel, pour peu d'honneurs, on ose
 Vne moytié du monde encontre l'autre armer:
 Et pour un petit gain toutes les mers ramer,
 A trois doigts de la mort, ayant pour toute guyde,
 Vne esguille de fer: par la grand Beauce humide.
 Pour moins que ce qu'auons auarement cerchant.
 Les Indes, le Peru, le midy, le couchant.
 De l'humeur, qui tirer fait des creuses entrailles;
 De la grand mere, l'or, pour forger les tenailles,
 Qui plus cruellement que les damnez Pluton,
 Serrent le cœur humain auarement glouton.

De l'humeur qui soufflant par mainte & mainte annee:
 Noir, poudreux, enfumé, comme vne ame damnee.
 Noir comme un charbonnier sauuage hoste des bois,

LE MELANCHOLIQUE.

Noir comme un ramonneur, dont la hurlante voix
 Fait les enfans trembler: peut par le feu extraire,
 Tirer, & separer du corps elementaire,
 De la terre, & du feu, de la terre & de l'air,
 Autant d'astres qu'on voit de nuit estinceler
 En la vouste du monde: humeur qui manifeste
 Fait és corps composez tout l'univers celeste,
 La lune & le soleil, & contraint sous sa loy
 Mercure faire ioug, & s'arrester tout coy. (croire)
 Humeur, qui tous les cieux (ce que pour vray faut
 En or peut trāsformer, que pour viure il faut boire.
 Tous les cieux trouue en l'homme & ses mutations,
 De ses mouuemens cause, & de ses actions.
 Et dans le rond astré, qui iamais ne se change,
 Autant, & mesmes corps eternellement range:
 D'arbres, d'herbes, de plants, de mines, de metaux,
 De pierres, & encore de mesmes animaux
 Qu'icy il y en a, pour les semences estre
 Icy bas à iamais de tout ce qui doit naistre.
 L'univers refondant, & ses fondemens seurs,
 En sel, souphre & liqueur change ses quatre humeurs.
 Mais en fin, ô malheur! sa quinte sublimee,
 Et toute son attente s'euapore en fumee,
 Laisant pauuret & vieil au credule heritier,
 Vn four, un Pelican, outils de son mestier.
 De l'humeur, qui le peintre, & le Poète faict naistre,
 Et qui rend l'artisan grand & souverain maistre,
 Des arts unique autheur, qui a seul recerché
 Ce qui est dans le puy de verité caché.

Et qui de toute chose acquis nous a l'usage:
 Qui fait que l'homme est seul entre les bestes sages,
 Et qu'entre tous les Grecs on n'en conte que sept,
 Ce saint nombre honorant diuin, sacre & parfait.
 Humeur, qui n'a repos que premier il ne sonde
 La loqueur, la largeur, la profondeur du monde.
 Sans ce gentil humeur, pere d'inuention,
 Ce monde ne seroit qu'une confusion.
 Pour abreger, chacun tient de la quinte essence
 De cest humeur, par qui tout s'acheue & comance:
 Et oncq homme ne fut si sage reputé,
 Qui n'ait fait en sa vie un tour de gayeté.
 Et si folie estoit un mal qu'on ne peut feindre,
 Par tout on n'ëtendrait que se douloir & plaindre:
 Ains c'est un mal si doux, si plaisant, que marry
 Vn chascun se plaindroit, s'il en estoit guery.
 Tout homme donc s'en sent, & n'y a difference
 Entre le fol marqué & cil que sage on pense:
 Sinon que cestuy-là tient sa marotte en main,
 Cestuy-cy finement la fourre dans son sein:
 Mais non si sagement qu'on ne voye en sa vie
 Luy eschapper souuent quelque traict de folie.
 Fust-ce toy, ô Socrate, & toy sage Zenon,
 Qu'un chacun iuge à part si ie dy vray ou nom,
 Le masque seulement paroïr fait l'homme sage.
 Voy-là comme le monde est de fols une cage,
 Ou bien un eschaufaut, où un monde de fols
 S'entrecioüent l'un l'autre & se moquent de tous:
 Ou bien une grand' nef de fols passagers pleine,
 Voguant sur la grand mer de ceste vie humaine,

LE MELANCHOLIQUE.

Pouffee par les vens de diuerses humeurs,
 De langage diuers, d'habits, d'aages, de mœurs:
 Et presque autant y a en ce monde où nous sommes
 De manieres de fous, que de visages d'hommes.
 Et si n'y a estat, nulle vacation,
 Qui se puisse exempter de telle passion:
 Passion, sans laquelle au monde il n'y a ioyè,
 Que pour souuerain bien le ciel à l'homme octroyè.
 Necessaire à la vie autant qu'autre Element,
 Si que qui plus est fol, vit plus heureusement.
 Qui en trouppes effronté se garde bien de rire,
 Et pour fol n'estre pris: muet n'ose rien dire,
 Qui tout seul est tout fol, magnifique au marcher,
 Le sage contrefaiçt se gardant d'approcher
 Beaucoup moins fous que luy: l'autre tout au contraire,
 Sage au parler, mais fol quand faut venir au faire.
 Les plus fins ce sont ceux, qui plus doubles qu'ongnons,
 Font des fols sagement, trompant leurs compagnons.
 Qui se plaint, qui se deult, & qui veut que l'on rie,
 Ne se chaut ny du temps, ny de la seigneurie.
 La plus part presumant de folie estre absous,
 Grans fols se vont riant des tours des petits fols,
 Qui les veut reformer, mais quelqu'on par derriere,
 Des fols, moins fol que luy, luy pend la grand baniere.
 Mais celuy qui son mal libre confessera,
 C'est cil, à mon aduis, qui le moins fol sera.
 Quel plaisir auroit-on au monde, quelle ioyè,
 Si l'homme quelque-fois folement ne foloyè?
 Mais entrepris ie n'ay de vous conter icy
 Tous les fols folatrans, ny leur folie aussi,

Car plus fol ie serois, que cil qui la mer toute
 Entreprit d'espuyser, & boire goutte à goutte.
 Autre plus fol que moy, s'il s'en trouue, & hardy,
 L'entreprenne, s'il veut: quant à moy ie ne dy
 Ny ne chante, sinon que de ceste folie,
 Dont la cause & le nom est la melencholie:
 Vn suc gros, limoneux, espais, pale, & obscur,
 Parmy le sang brouillé, dont la seche vapeur
 A la vouste du chef obscurément comblee:
 Dont l'ame est apres estrangement troublee
 A cil, qui vagabond tout seul erre de nuict, -
 Ayant pour compagnie vne peur, qui le suit:
 Il tremble s'il entend vne fueille qui tremble,
 Son sang fige de peur: l'ame peureuse semble
 De tenebres couuerte, & ne peut conceuoir,
 Que ce qui est horrible à penser & à voir.
 Ell' ressemble encor', à cil dont la berluë,
 Mainte Chymere oppose à l'ame & à la veuë.
 Maint fantausme ennuyeux, maint simulacre feint,
 Iour & nuict se presente à l'ame qui le craint.
 Ce qui est hors le corps, la peur luy faiët accroire,
 Estre tel que dedans, ell' est obscure & noire,
 Et tel se represente aux tremblottans esprits,
 Que le sens fantastique l'a faussement compris.
 L'humeur, qui telles peurs sans occasion cause,
 Et qui le chef remplist d'apprehension fausse.
 Vaguant de place en place occupe lieux diuers:
 Ore du corps humain il tient tout l'uniuers:
 Ou l'un & l'autre flanc, mesme le gauche assiege,
 Et la raison souuent il met hors de son siege.

LE MELANCHOLIQUE.

Pose le cas qu'il soit par le cerueaudiffus,
 Ou bien parmi le sang de tout le corps confus,
 Ceux qui en sont atteints on remarque au courage
 Que lasche ils ont perdu, & à leur noir pelage,
 Duquel se herissant les membres ont couuerts:
 Nuiët & iour vont errants seules par les deserts,
 Courants apres leur verue, & leur est ennemie.
 O Timons inhumains, l'humaine compagnie
 Qui les deust consoler, tous leurs conduits veneux.
 Se goufflent sur le cuir d'un gros sang limoneux.
 Bas ils portent la teste à la terre panchee,
 Sans varier leur veuë en terre ils ont fichee,
 Et où leur œil se iette ils tiennent, obstinez,
 Ferme là leur regard, esperduz, estonnez.
 Gros ont le ventre & dur, de la gorge les venes
 D'un sang noir & meurtry s'enslent grosses & plenes,
 Maigres, secs, elancez & violet leur teinct.
 Semblable au cramoyssi duquel la pourpre on peint,
 Où maint flambant bouton. on y voit souuent croistre:
 Pendant que l'un s'en va, un autre est prest à naistre.
 De la mort, tous ont peur, & toutes fois beaucoup
 D'une meurtriere main s'en sont donné le coup.
 De tristesse & de peur leur diuine pensëe
 Sans nulle occasion perseuere offensee.
 Ce mal vient peu à peu, & si caut nous surprend
 Sans fieure & sans douleur, qu'il est ia fort & grand
 Deuant qu'il soit cognu, plus difficile à mettre
 Dehors, si vne fois de l'ame il s'est faict maistre,
 De l'apprehension, si l'erreur deceuant
 A gaigné du cerueau les deux forts de deuant.

Ceste folie en tous n'est semblable ou égale:
 Car l'un tousiours est fol, l'autre par interuale.
 Comme le vin qui est pris sans discretion,
 A l'iuongne fait voir mainte apparition:
 A l'un d'une façon, à l'autre d'autre sorte
 Selon que l'auertin de chacun se comporte.
 Ainsi diuersement maniez & poussez
 Sont selon leurs humeurs ces pauures incensez:
 L'un n'en fera que rire, & nouveau Democrite,
 Imagine ce qui à rire plus l'incite.
 A cestui-cy pleureur la larme pend à l'œil,
 Et n'apprehende rien que la crainte & le dueil:
 Cest autre estre un coq pèse, & du chant & de l'ele
 A toute heure de nuit le point du iour r'appelle:
 Vn autre estre vne cruche, à tous dist gare heur,
 De peur d'estre cassé: l'autre tremble, de peur
 Qu'Atlas portant sur soy la grand charge du mode:
 Ne se lasse, & le ciel brisé sur soy ne fonde.
 Comme cil qui croyoit que du doigt du milieu
 Il soustenoit le ciel, le saint siege de Dieu.
 L'autre fait du corbeau, & sans cesse crouasse:
 L'autre le rosignol, dont le chant ne se lasse.
 De repleurer Itis, & qui mué se croit
 En quelque autre animal ainsi qu'il le conçoit,
 En ours, en loup, en cerf, ou en quel qu'autre besté,
 Dont la voix contrefaict, & l'aller & le geste:
 Ou en un dur rocher, en poisson, en oyseau,
 Ou au ciel attaché en un astre nouveau.
 En fleur portant son nom, & la fille d'Inache
 L'Egyptienne Isis pensoit estre vne vache.

LE MELANCHOLIQUE.

Qui se cuide estre Pape, ou Empereur, ou Roy,
 A tout le monde veut faire & donner la loy.
 Gestuy fait du prescheur, & ravi en Ecchase,
 Ne parle que de Dieu, de iustice, & de grace:
 La penitence annonce au peuple desfoyé,
 Qui a le saint esprit des hauts cieux enuoyé.
 Il predict l'aduenir, l'autre dict qu'il s'enuole.
 Au ciel, il fait le mort, feint perdre la parole
 L'un croit estre sans teste, & l'autre auoir les flâcs
 Farcis, pleins de souris, de rats, & de serpens,
 Ou de demons parlants, au riuage du nile
 Certain Artemidor voyant un Crocodile,
 Tout cela qu'il sçauoit oublia tout soudain,
 Pensant auoir perdu les cuisses & la main.
 Icy tayrai-ie ceux dont les amours despites
 Cherissent seulement les vieilles decrepites?
 Et cil qui de son nom vne fleur fist nommer,
 Pour en l'eau se mirer, s'admirer & s'aymer:
 L'autre hanter ne veut ny approcher personne,
 Pour un fantasque estat, craignât qu'ô l'époisonne.
 Il court, & puis s'arreste, il conte par ses doigts:
 Mais tout court il demeure & ne peut dire trois.
 Quelqu'autre au meurtre cry' qu'ô luy coupe la gor
 Selon sa fantasie ainsi chacun se forge. (ge,
 Des Chymeres en l'air, leurs metiers anciens
 Tous exercent & font, le riche, de ses biens
 Parle, l'aduocat tient au poing quelque requeste,
 Le chasseur iour & nuict va pour suiuant sa queste.
 Et le Poete inspiré, indiscret, importun
 A reciter ses vers est ennuyant chacun.

Le prestre entre ses dents marmote vne priere:
 Et l'amoureux se plaint de sa maistresse fiere.
 Bref où chacun iadis sage s'est adonné,
 C'est où fol maintenant il est passionné.

Quelle plus grand fureur, quelle erreur, quelle rage,
 Que l'amour, qui contraint folatrer le plus sage?

Las qu'ay-ie dict amour: t'ay-ie point offencé.

T'appellent furieux, fol, resueur, insensé?

Folie n'est-ce pas, telle sollicitude,

Mettre en vn faux plaisir vne beatitude?

Suiure vn fol appetit, estrange & desreglé:

Courir apres l'erreur, d'un enfant auenglé,

Quitter sa liberte pour esclau se rendre,

A vn qui ne se peut d'une femme deffendre?

Vn bien par apparence, vne corruption

De l'œil, peruertissant l'imagination:

De l'œil, qui en lieu d'estre à l'ame seure voye,

Met en combustion & le cœur & le foye.

Ce fut pourquoy Nature auoit de là raison,

Loing du foye & du cœur, separé la maison.

Amour est le vautour, & l'aigle qui deschire:

Et le foye & le cœur de cil qui le retire:

Et plus ce rauisseur de son tourment se paist,

Tant plus grand son tourment sans fin prendre renaißt.

Cest vne passion qui prent sa nourriture

D'un incertain espoir, d'une certaine cure.

Mais à quoy cognoist-on ce faux bien, ce vray mal?

N'a-t'il pour s'en garder sur soy quelque signal?

De ce feu forcenant l'insatiable rage,

Des membres perissants l'humidité saccage,

LE MELANCHOLIQUE.

Sans sang, & sans couleur sont ces fols amoureux,
 Affreux ont le visage. & les yeux ont affreux:
 Le sourcil abbaisé, des poulmons ils halettent,
 Et mille ardents sanglots de la poytrine iettent.
 Leur ame variant fait leur langue fallir,
 Le cœur papillotant on leur sent tressaillir
 Leur voix & leur pouls tremble aussi tost que nommée
 Par quelqu'un qui ny pense est la personne aymée.
 Au docte Erasistrat par le poux fut connu
 Sa belle mere ayant d'Antioque le feu.
 Ce grand Galen encor' descourrit ceste flamme
 Dont tristement ardoit de Boëte la femme,
 Quell' nourrissoit honteuse & couuoit dans son sein,
 Eprise folement d'un beau danseur Romain.
 Tu cognoistras encor' ce doux-cruel martire
 Aux grands & longs souspirs, que loing à loing il tire
 Du cœur tout embrasé, par la bouche fumant
 Pour ce brasier nourrir, qui le va consumant.
 Ce tam l'amant reueille, & d'une leure blesme
 Va, resueur, songe-creux, seul parlant à soy mesme:
 L'une & l'autre paupiere il clignette tousiours,
 Tout autre desdaignant n'ayme que ces amours:
 Ayant le cerueau sec ne pleure ne lamente,
 Et seul de sa fortune heureux il se contante.
 Tousiours veille pensif, taciturne, transi,
 Il brusle & si n'a soif, n'a de manger soucy.
 Mais laissons là l'amour avecque sa folie,
 Et retournons chanter de la melancholie
 Les genres vn à vn. Si cet humeur follet,
 Occupe seulement le soubtendron mollet,

Tu l'y orras gronder, ainsi qu'un vent qui erre,
 Engagé dans la nuë, ou és flancs de la terre,
 Il cherche s'il pourra quelque breche trouuer,
 Sinon il faict la nuë ou la terre creuer:
 Le nuage fendu vn trait ardent descoche,
 Et le vent tremoussant toute la terre hoche.
 Ainsi bruire on entend l'un & l'autre costé,
 Le gauche mesmement de ces vens agité,
 L'estomach s'en sousleue, & à chasque secouffe
 Maints routs aigres-amers l'un apres l'autre pouf
 Et de si grand' douleur il se sent oppresseé, (se:
 Qu'on le sent c'en dessus, c'en dessous renuersé.
 La dent blanche s'agasse, & le cœur petillant,
 Se serrant, se tapist, & le poux tressaillant
 En fretille & fremist, l'oreille luy en corne,
 A l'estonné cerueau il semble que tout torne.
 Il ard, & si n'a soif, mais apres le manger
 D'estre vif suffoqué il doute le danger.

Que si ceste humeur froid des autres la fondree
 Duquel l'erreur de l'ame est premier engendree,
 Outre le temps prefix és veines retenu,
 Sec se vient ambraser, comme par le menu
 S'allume le bois verd, quand le feu s'y vient prendre,
 Rien plus aspre chaleur qu'au sec on luy voit rendre:
 Ainsi ce suc vaincu par le flambeau ardent,
 Brusle plus viuement aspre, cruel, mordant,
 Et plus noir que le gest, tout ce qu'il touche il gaste,
 Et sousleuer le faict, comme vn leuain la paste.
 Cruels sont ses effects, i'aymerois beaucoup mieux,
 Rencontrer en ma voye vn sanglier escumeux,

LE MELANCHOLIQUE.

Un lion harcelé, vne tigresse vifte,
 A qui on a vollaé ses fans dedans le giste.
 Que de tels fous trouuer. de l'humour noir touchez,
 Fuy, sur toy se rurent hydeux, effarouchez,
 Horriblement hurlants: durant l'ardente rage,
 La force leur augmente avecque le courage.
 Plus que charbons ardens rouge ils ont le regard,
 D'alliance il n'ont point, ny d'amitié esgard.
 Querelleux, riotteux, à leur veuë allumee,
 Tousiours il semble voir vne epeffe fumee.
 Et dedans bluetter mille rayons bruslans,
 Leurs yeux tousiours ouuerts sont cler estincellans:
 Et vont crollans la teste ainsi que la prestresse
 Qui deuine le sort quand son Demon la presse.
 Ils ont vn appetit desreglement vilain,
 De toute vilenie ils appaisent leur fain:
 Et sont tellement points de la mouche enragee;
 Que se mordans, cruels, de leur chair ont mangee.
 Et plus que bouc puans, plus que Faunes cornus,
 Courent les champs, piquez des fureurs de Venus.
 Deschirez, haillonnez, nuds-pieds, car de leur robe
 Chasque espineux buisson quelque lopin desrobe.
 Sans espargner leur chair, d'ulceres tous sanglans,
 Les pieds gastez ils ont les cuysse, & les flancs.
 Mais le plus dangereux, & qu'un chascun euite,
 Est le fol qui les loups & les chiens imite:
 En leur façon de faire il hurle, il iappe, il mord,
 Le iour mussé se tient, la nuit horrible il sort.
 Aux cimitieres court & les monumens ouure,
 Il senterre dedans, de leurs lames se couure:

Puis en ressort soudain, d'un regard plein d'horreur,
 Les passans il espie & faict mourir de peur.
 Il hait & fuit chascun, de la bouche tiree
 Un pan de langue il montre, aspre, noire, alteree.
 L'œil creux, & la veüe courte, aux iambes mille loups,
 Des chiens harasé hurte & tumbe à tous coups.

Des fous qui sont sans nombre, adiousteray-ie au roole
 Ceux que des eaux la crainte enragement affole:
 Qui durant les ardeurs d'un chaut-bouillant esté,
 Ou d'un frileux yuer, poincts ou mords ont esté
 De quelque chien fol, dont l'escume ou dentee
 Ont avecque le sang leur raison infectee.
 Presque pareils à ceux que l'ardente fureur,
 Melancholiquement esgare en son erreur.
 Ces malheureux on voit sans raison & sans ordre,
 Cõtre eux-mesme acharnez se deschirer & mordre.
 Leur visage ambrasé, leurs membres tressaillir,
 Et les premiers venuz de la dent assaillir.
 Aboyer, & hurler sans personne cognoistre,
 Ne recognoistre plus pere, frere, ny maistre.
 Celuy doncq qui craint l'eau d'une hideuse voix,
 Du chien qui l'a mordu imite les abois.
 Tout ce qu'il oit & voit c'est un chien qui iappe,
 Qui gronde, & le poursuit, qui le mord, qui le happe.
 L'eau de sa guarison, qui est l'unique bien,
 Luy presente l'horreur d'un furieux chien.
 Le cœur luy papillotte, il en tressuë & tremble,
 Au chien qui l'a mordu voyant ce qui ressemble.
 Les mirouers il abhorre, & tout corps transparent,
 Où du chien qui l'a mord l'idole est apparent.

LE MELANCHOLIQUE.

*Mesme en l'eau de son corps sans vergongne versée,
 De ce chien enragé est la forme tracee:
 Contre terre il se veautre & la pry' de s'ouuir,
 Pour son corps miserable & sa honte couuir.
 Du ciel il a horreur, honte de la lumiere,
 Et hait plus que la mort à voir l'eau salulaire.
 Tout son corps est en feu, il n' imagine rien,
 Son ame ne conçoit que l'horreur d'un chien.
 Des fous ayons pitié & recerchons la mode,
 Comme on les peut guerir par remede commode.
 Auecque leur folie appointe sagement,
 Comme à un qui croira estre entré en dormant
 Un serpent dans son corps qui le cœur luy deuore;
 Accorde luy cela, & luy promets encore
 Que dehors le mettras, repurge luy le corps,
 Et fine le trompant tu supposeras lors
 Soubz luy vn serpent mort: le voyant saisi d'aise,
 Son opinion perd, sa fantasie appaise.
 Appelle le barbier, mais faut premierement
 Tenir net l'intestin du plus sale excrement:
 Lequel le pignera d'une dextre hardie,
 Si au chef-seulement luy tient la maladie,
 En la veine du chef: car en deux autres cas
 La moyenne vaut mieux, dans le reply du bras.
 Commune à tout le corps: que si l' Hemorroïde
 Et le sang fleurissant tous les moys ne se vuide:
 Descend du pied au bras, le col du pied serrant,
 La veine qu'on uerra sur la cheuille errant,
 Et plus grosse apparoiſt, qu'on appelle sapheme,
 Hardy donne dedans, ou bien perce la veine*

Qui s'enfle entre les doigts, entre le medecin,
 Entre le port'aneau & son petit voisin:
 Ou bien celle du front, s'elle n'est manifeste,
 Sur le pied, sur la main, au bras, ou en la teste.
 Ouure moy celle-là qui se monstre le plus:
 Car le sang & l'esprit ont un flux & reflux;
 Tout le corps est percé, & l'esprit par tout passe.
 Vuide de sang n'y a au corps aucune espace,
 Les membres differens tous d'un accord y sont:
 Artere, veine & nerf, l'un à l'autre y respond.
 Fay l'ouuerture large au sang, qui gros s'épanche:
 Mais s'il coule vermeil, que soudain tu l'estanche,
 Permits luy, tost apres mollement sommeiller:
 Car nuisible luy est le trop long temps veiller.
 Qu'on ne le laisse seul, donne luy compagnie
 D'une gaye ieunesse, agreable & amie:
 Reueillé, qu'on le meine à pied, ou à cheual
 Voir des bois la verdure, ou le fond d'un beau val,
 Ou le Cristal des eaux, ou l'email d'une pree,
 De fleurs de cent couleurs, & d'herbes diapree,
 Dans les vergers fruitiers, dans les iardins plaisans,
 Pour les oiseaux ouyr leurs motets degoisans.
 Aux sons de cent chansons fouler l'herbeuse riue
 D'un ruisseau surgeonnant de quelque source viue.
 Là le Cystre y resonance, & le Luth à son tour,
 Qu'on n'y parle de rien que de rire & d'amour:
 L'amour, pourueu qu'il soit moderé, luy profite.
 Qu'alternatiuement maint conte on luy recite:
 Qu'il soit entretenu de maints propos ioyeux,
 Son espoir retenant, & ses esprits peureux,

LE MELANCHOLIQUE.

Qu'il use de viande assaisonnée & tendre,
 Et boive du meilleur qui le gay sang engendre.
 Du capprier genevois qu'il mange les boutons,
 En vinaigre susat, & les mollets iëttons
 Du oublon que la terre ore tendrelets pousse,
 Au retour du prin-temps, en l'humeur aigredouce.
 Le citron medien les perdus appetits,
 Estant mangé, recouvre, on dict que les petits
 De l'oysseau nysean qui fut pere de Scile,
 Aux cerueaux euantez estre viande utile.
 Et ceux de Nyctimene oysseau vollant de nuict,
 Par la seule faueur de Mimerue conduit.
 Fay luy manger encor le merle au noir pennache:
 Le ioyeux nepenté que l'on nomme bourrache,
 Le soucy qui de ioye enfle & comble les cœurs,
 La racine de l'eaure engendree des pleurs.
 De la belle gregeoise, en vin d'Anjou humee,
 Dissippe les brouillards de leur ame enfumee.
 S'il est fort à tenir & que par doux moyens,
 On n'en puisse cheuir, à force de liens
 Tien-le au liët attaché qui portatif se roule,
 Berse-le, tant qu'és yeux le doux sommeil se coule.
 Que si son mal ne vient de tristesse ou de peur,
 Ie luy defens du vin la funeste vapeur.
 Assseure toy de luy, oste luy la puissance,
 Qu'à toyny à autruy il ne face nuisance.
 Affin de le remettre au train de la raison,
 Pour le rendre dispos recevoir guerison.
 Quelques iours se suiuan. lors que l'aube vermeille
 Les mortels au labour matineuse reueille,

Fay luy boire le ius, le bouillon, la liqueur,
 Ou la racine, ou l'herbe, ou le fruit ou la fleur
 Aura cuit ou trempé, quatre huict douze ensemble:
 Plus ou moins en prendras selon que bon te semble
 A ta discretion, & comme expedient
 Au mal tu verras estre, & à ton patient:
 En compassant le froid, le sec, le chaut, l'humide,
 Prends le poix pour ta regle, & la raison pour guide.
 Doncq' la racine arrache au verdoyant fenoil,
 Que trouua le serpent collyre pour son œil.
 Du brusque enraciné à la piquante verge,
 Du persil sauoureux de la tendrette asperge.
 Du cabaret croissant par vallons ombrageux
 Du fouchet qui s'agree aux bords marescageux:
 De l'herbe qui a nom de la plus belle Argiue,
 Du signet noüailleux, & de l'herbe lasciuë,
 Qui bessonne se faict des satyres nommer.
 » La petite häire la grande fait aymer.
 Et de la tormentille, & de la quinte fueille,
 De forme & de vertu l'une à l'autre pareille.
 L'escorce du capris espineux & rampant,
 Et celle-là du fresne ennemy du serpent:
 Du souple tamarix est egale la force,
 De l'odorant citron n'y oubly pas l'escorce.
 L'herbe apres la racine est mise au second ranc:
 Prends donc les Politriques & le noir & le blanc,
 La buglossë, & sa seur, le cetrac plein de poudre,
 Qui en quarante iours la ratte peut dissoudre,
 L'herbe à langue de cerf sans tige, graine & fleur,
 La fueille dont l'abeille ayme & cherche l'odeur.

LE MELANECHOLIQUE.

L'Hissope, l'aigremoine & l'amere maronne,
 Et celle à qui le nom de petit chesne on donne:
 L'origan d'Heraclee, & le Vinceuenin,
 Et celle qui la fueille & l'odeur a du pin.
 La Scabieuse, l'aluine, ou oubelon, qui lie
 Les arbres ses voisins, le serpolet allie,
 La marjolaine encor' qui emporte le pris
 Sur les douces odeurs, avec elle soit pris
 Le plant de la betoine, herbe tant renommee,
 Et celuy que de terre on appelle fumee,
 Apres l'herbe le fruit: Il te faut mettre avec
 Du raisin candiot sans pepins le grain sec,
 De la roquette encor' la lasciue semence,
 Celle de l'osier chaste, & de l'aspre garance.
 Les grains de la Cubebe apportez du Leuant
 De l'Anis qui dechasse hors du ventre le vent.
 Les Cicès de Venus, du basilic qu'on seme,
 Pour plus beau deuenir, avecque le blaspheme:
 La graine du Citron, qui a l'escorce d'or,
 A tout venin contraire: Il y faut mettre encor
 La fleur, qui du Printemps anonce la venuë,
 Et le Passeuelours qui son beau teint ne muë
 Pour quelque hyuer qu'il face, & celle que Chiron
 Plus amer que fiel baptisa de son nom.
 Celle du vert susseau, ronde, grappuë & blanche,
 Et celle qui du Thim estreint la dure branche,
 Herbe d'herbe naissante, & qui meurt sans appuy,
 La Cuscule viuante en la vie d'autruy.
 Celle qui prent son nom des stochades Fraçoises,
 Du rosmarin qui croist és pleines Narbonnoises.

Et celle dont le miel Eri cien se faict
 Du bourru Tamaris, des Nymphes, du genct.
 Plustost, que le subiect, manqueroit la parolle,
 Si chanter ie voulois, qui reduit l'humeur folle.
 De ce peu, soys content, qu'il conuient frais cuillir:
 Puis lentement le faire à petits flots bouillir,
 Tant que le tiers de l'eau s'euapore en fumee,
 Le reste fay passer par la chausse estamee,
 Pour le rendre agreable au nez & au palais:
 Qu'aromatizé soit de la poudre du bois
 Du gangotique Aloé, du ionc de Nabathee,
 De la canelle encor d'Arabie apportee,
 Et du Nard qui produit aux racines l'epy,
 Ou au Nard defaillât supose nostre aspy.
 Recuy-le & le repasse, & en l'onde epurée
 Le suc caillé dissous de la canne sucree:
 Recuy-le encore vn coup bouillant à peti t feu,
 Tant qu'il puisse liquide & vermeil estre beu.
 Si l'herbe tu ne puis recouurer vert & fresche,
 Quel remede y a-til? ayde toy de la seche,
 Dont le poussier menu en vinaigre meslé
 Soit avecque vn bouillon chaudement auallé.
 Boire en de l'eau le ius de la mauue molasse,
 Hors de l'entendement les tenebres dechasse.
 Humer soir & matin de l'eau en du miel,
 Du Centaure le sang, de la terre, le fiel
 Qui du plus grand fenoil à la racine prise,
 Et la graine en de l'eau ceste fureur maistrise.
 Tels aprests tu feras deuant qu'aux mains venir,
 Si tu voy qu'il ne puisse encontre toy tenir,

LE MELANCHOLIQUE.

Qu'il commence à caller & marchande à se rendre:
 Pitoyable à mercy garde toy de le prendre,
 Deffay-le entierement, honteusement chassé,
 Ayant de toutes parts tes forces ramassé,
 Pour combattre à outrance: en premier fay luy boire
 De la sueur du ciel, & de la casse noire.
 L'indois Myrabolan en laiçt de cheure infus,
 Ou en huile d'amande, ou bien pris dans le ius
 D'un des simples nommez, la fueille orientale,
 De qui la gouffe imite au ciel le croissant pale.
 Gouffe grosse de grains, de l'herbe du sené,
 Qui le veut prendre entier, de son corps soit donné
 A boire en mesme laiçt le pezant d'une dragme:
 Trois fois plus il en faut quād on n'ē prêt que l'ame
 Avec le feu abstraicte, ou par l'infusion,
 Ou bien avecq le ius de la decoction
 Du pruneau damasquin, d'une poulaille vieille,
 De la fleur d'epithim croissant d'une autre fueille,
 Dedans du petit laiçt: brouille le en le cuisant
 D'un baston de figuier, boys-en trois gros pesant.
 Prendre le megne à part ou de cheure ou de vache,
 La porte de derriere à l'humeur noir relasche.
 Que si plus volontiers tu prens solidement
 En masse composé quelque medicament,
 Puissant pour chasser hors ceste fiere manie,
 En poussiere reduy la pierre d'Armenie:
 Adioustes-y encor' celle qui peint l'azur,
 Laue les tant de fois que leur poussier soit pur,
 Et qu'ils ait deposé sa force corrosiue,
 Fais-en d'un iaune d'œuf une paste massiue,

En petits pains partie il n'en faut que le poix
 D'un obole adiousté ou à deux, ou à trois,
 De l'une & l'autre encor & la verte & la perse,
 De l'eau par douze fois sur la poussiere verse.
 Demie on ce ioins - y du senné d'orient,
 Deux fois plus, & le quart, du Potyron qui vient
 Au tronc de la Meleze: ensemble y accommode
 Autant de poudre encor mets y du polypode.
 Du plant scammonien mets y le sang figé
 Des pommes de cydon, mais premier corrigé,
 La pesanteur d'un gros, & la fleur dessechee
 Du suzeau bonne y est, la semence hachée
 De la mauue, melon, de l'anis doux piquant:
 Le doux sel indien meslez y quant & quant
 Le tarte de vin blanc reduict en poudre fine,
 Et du cartham le grain armé de mainte espine:
 Vn agreable odeur tu leur feras auoir,
 Si du gyroffle indois tu y ioins le clou noir.
 Et l'escorce du bois qui rend la plus heureuse
 De toutes nations l'Arabie odoreuse.
 De l'indien rouseau le crystal reluisant,
 Cest amas adoucisse à la bouche plaisant.
 Qui prent de ceste poudre autant que deux fois monte
 La dragme, la fureur melancholique donte.
 Melampus le berger des proëtides seurs
 Repurgea les cerueaux transportez de fureurs,
 Leur faisant prendre à iun la puissante racine,
 Du plus noir Helebore à fleur blanche & pourprine:
 Herbe chasse-demons semblable au chef vaillant,
 Qui marche le premier le premier assaillant,

LE MELANCHOLIQUE.

Qui premier se retire hardy se faisant suivre
 Aux esclaves humeurs dont le corps il deliure,
 Qu'on en prenne le corps, ie ne conseille & veux:
 Mais bien l'infusion de ses petits cheueux.

Propre y est le Turbit, ceste blanche racine
 Qui croist en la Lybie à l'océan voisine.

Que si le desuoyé de lentendement sain
 Prendre ta droguerie auoit trop à desdain,
 Il te le faut tromper de quelque douce amorce,
 Cachant la medecine au dessous d'une escorce
 D'une figüë, ou raisin, ainsi que le poisson
 Est amorcé, pipé & pris à l'ameçon,
 Cachant dans son bec croche un'apas qui l'aleche.

C'est assez combatu par enbas ceste breche,
 Changeons la batterie & redoublons l'assaut,
 Et le faisons vuidier par la porte d'enhaut:
 Allons quester secours, en l'isle d'Anticire
 De l'Helebore blanc, dont la fueille retire
 Au plantain, à cinq fils: prens doncq' le taillerin
 Du reffort ennemy de la vigne & du vin,
 Et qui d'or fut sacré à Phæbus par la Grece.
 Piquerer le conuient de mainte & mainte piece
 Du plant chasse folie: & faut que tous les deux
 Au breuage aigredoux soient toute nuit infus.
 Laquelle estant passée, ostes son helle bore,
 Boy à iun ce breuage & le reffort deuore.
 Si tost que pris l'auras, aussi tost reuomy
 Verras deuant tes pieds s'enfuir l'ennemy,
 Si du reffort la grenne ou son escorce tendre
 En eau tiede tu bois, luy feras gorge rendre:

Comme fait du laurier la feuille, & les fleurs d'or
 De la lente geneste, & la semence encor,
 Racine, feuille & herbe à l'Arroche grassete.
 Le Nassitord lascif, l'impudique roquette,
 Et l'aigu seneué qui point la langue & mord,
 De l'onignon la semence au goust cuisant & fort:
 Le cabaret, qui ayme à croistre dessous l'ombre,
 Le melon doucereux, le sauuage cocombre.
 Du plant que l'on dict estre issu du genre humain;
 Vne dragme pesant, de l'espurge le grain,
 Cinq fois double auallé, mundes de leur escorce.
 Trente grains de la main de christ ont mesme force,
 Comme le ius du lin rence, lent & relent.
 De ces simples cuillis prens le moins violent,
 Qu'aualler il conuient en mielleux vinaigre,
 Ou bien prens quinze grains d'amere staphisaigre.
 Charge ton estomach de mille mets gourmand,
 De beurre tout rancy, d'huile pourri relent.
 Tost apres tel repas d'une plume te touche,
 Tant que bailler pourras, le goulet de ta bouche.
 La figue qui cuillie a esté fraischement,
 Mangée par excez cause vomissement.
 Si trop forte est la drogue apres la prise, engorge
 Le coulis blanchissant de sucre, & de ius d'orge:
 Puis t'endors là dessus, des pommes la douceur
 Est au melancholic secours plaisant & seur,
 Si cuittes on les sert des l'entrée à la table,
 Ce sera un melange & doux & profitable,
 De cent simples diuers agreables au cœur.
 D'une & d'autre buglose adoncq' cuille la fleur,

LE MELANCHOLIQUE

Et du satyrion la racine impudique,
 Du panicaut testu qui de cent pointes pique,
 Et du fruit persien l'escorce & le pepin,
 Vie de nostre vie & la mort du venin:
 Les racines encor' de l'herbe tintaride,
 Les grains rouges & noirs de l'herbe glyriside.
 Adioustes y aussi du precieux parfum
 D'ambre, duquel cognu le pere n'est d'aucun,
 L'apostume du musq y soit aussi meslee,
 Et les filles encor' de la Nacre perlee,
 Des barbares sandaux l'aromatique bois,
 Le gyroffle & canelle, & l'uantine noix,
 Le puissant theriaque & la plus chere gomme
 Du Camphre oriental, le doux suc de la pomme,
 Qui de plaisant odeur d'autour parfume l'air.
 Le suc Madericy il y conuient mesler
 A iun des le matin: si de ceste melange
 Aussi gros qu'une noix le fol patient mange,
 Tost il verra ranger son ennemy puissant,
 Que s'il est à se rendre obstiné refusant,
 Obstiné comme luy d'autre cargue nouvelle,
 Opiniatre toy à battre ce rebelle
 Arme le cœur tremblant de la vie le fort,
 Pour plus fort resister au violent effort
 De ce diable d'humeur, prenant de ceste liste,
 Des simples recerchez de toutes parts l'elite.
 Des vns par le feu, tire une souefue liqueur;
 Comme de la bourrache & de l'herbe sa seur.
 Les seches conuiendra subtilement dissoudre,
 Et les brisant menu en faire de la poudre.

Du coral verd & mol sous les vagues caché,
 Qui s'endurcist vermeil aux vagues arraché,
 Pierreux arbrisseau allie ensemble, & broye
 Deuant que teinte soit la precieuse soye,
 De ce vers qui l'engendre, & la deuide apres,
 L'honneur oriental des peinturés Ceres,
 De crocus les cheueux, desquels la belle Aurore
 Pour nous reuenir voir se parfume & redore.
 L'eau de la fleur du fruiçt que le Troyen berger
 A Venus ayma mieux qu'à nulle autre adiuger.
 La pomme du citron parqui fut arrestee
 Atalante trois fois, deuant elle ietee:
 La fueille perle & fleur du meurte palissant,
 Pour trop craindre l'yuer qui le vient menaçant.
 Les secz reduis en poudre, à laquelle meslee,
 L'onde qui plus resiste à la melancholie.
 Une piece de drap teinte en escarlatin
 Mouilles y, puis l'estens sur le gauche tetin,
 En l'endroit où bouger de taille entresuinie
 On sent sans nul repos l'authheur de nostre vie.
 Fay que souuent il'entre en la trempe d'un bain:
 Fay luy lauer la teste & les pieds & la main,
 En vne eau temperee, ou bien dedans laquelle
 La mauue aura bouilly & sa seur auecq elle,
 Les fleurs du rosmarin, chamomille, & anet,
 Et l'herbe à qui son nom donna le Dieu finet.
 Fils du grand Iupiter & d'une des Pleiades.
 Et celle en qui reuit le renom des estoechades.
 Garde d'y oublier les semences du lin,

LE MELANCHOLIQUE.

D'un belier esgorgé la teste & l'intestin.
 Mais qu'est il de besoing que mal plaisant ie chante
 Tant de fois vne note: au reste l'on fomente
 L'estomac d'une esponge & tous ses enuiron,
 La douleur affligeant les mollets soubtendrons,
 Où l'on oit grumeler vn vent qui se remuë,
 Comme vn tonnerre gronde au ventre d'une nuë.
 En tel cas bouillir fay en la vertu du vin,
 L'accresté pouliot, les graines du cumin,
 Et du persil funebre & l'autre, contenue
 Du seneué mordant en la gouffe cornuë,
 Du rosmarin la fueille, & l'herbe dont ses fleurs
 De l'arche pluuiense emprunte les couleurs.
 Les racines ioins y de l'eauue helenienne,
 Et celle en qui reuit la Roine Corienne:
 De la verte Daphné la perle & le tendron,
 L'anis, l'anet, la rose & l'escorce au citron,
 Le serpolet trainant, & le plant de la ruë,
 Qui vert faict l'amour viure & sec l'esteint & tue.
 La mente en faict autant, mais sur toutes y duit,
 Qui de l'Aloë le noms & les vertus ensuit:
 Et mile & mile encor' qui secs & mis en poudre
 Entre deux taffetas ensemble il conuient coudre,
 Taillez en escussions, faisant dessus pluuoir
 Du vainqueur Indien l'indomptable pouuoir,
 Que sur les flancs douillets, sur le dos on applique:
 Ou bien les fais tremper dans le suc pacifique
 Du fruit sacre à Pallas, ioins y, pour faire mieux
 L'escorce du caprier se trainant espineux,
 Et du genet les fleurs, la graine bazanee

De la nielle portant la teste couronnee,
 Et le ioyeux saffran, dont les fueillages verds
 Vont braues despitans la rigueur des yuers.
 Maint unguent embaumé de mainte odorâte her-
 Rabat l'orgueil venteux de la ratte superbe. (be,
 Comme l'ammoniac coulant sur le sablon,
 Des deserts libiens du dieu-belier Ammon.
 Dissout en du vinaigre, & la poix Idienne,
 Distillant des hauts pins de l'escorce ancienne.
 D'huile laurin dissout, les mariant avec
 Des simples tant de fois chantez, le poussier sec.
 Que si au mesme endroict une ventouse on ante,
 Aussi soudainement ceste douleur enchante
 Qu'un tour de main est fait: mais si le mal est haut,
 D'huile d'amande douce, ou de viole, il faut
 Oindre le chef razé: l'huile où la renouee
 Et le meurte ont trempé, est icy haut louee.
 La courge, la laittuë & les fueilles de saulx,
 Quand les elancemens de la fureur sont chaux.
 Si laiët de femme blanche, & la glaire, qui tremble
 D'un œuf n'a guere pond, sont tous battus ensemble,
 En la vineuse aigreur, si vertueux sera,
 (e remede appliqué, que le mal cessera.
 Ou le fay mordre autour de la teste tonduë,
 Au friant mussequin de la gloutte sang-suë.
 D'un aigneau my-party soit le cerueau troublé,
 Ou bien d'un coq fendu chaudement affublé.
 Qu'il haleine souuent quelqu'eau d'odeur plaisante,
 Quelque boucquet tissü de diuerses fleurs sente,
 Qu'il tire la vapeur exhalant du bouillon,

LE MELANCHOLIQUE.

De quelque herbe choisie, ou prene de Philon
 La drogue sommeillarde autāt qu'une lētille, (pille:
 Ambre, camphre & blācs d'œufs, y mesle & puis le
 Repestris & rebrouille, & depars en tourteaux,
 Qu'alternatiuement fourre au creux des nazeaux.
 A quoy tient-il encor' qu'on ne puisse defaire,
 A la sagesse humaine vn humeur si contraire?
 Iouē à quitte ou au double & employe inhumain,
 Et le fer & le feu plus forts que n'est la main.
 Or' la necessitē estre cruels nous force,
 Quand le medicament bening n'a plus de force.
 Employ' le vray cautere ou le potentiel,
 De scauon & de chaux-vine, & de caustique sel:
 Fay-le sommet brusler & la peau profonde ouure,
 Tant que le test à nud à tes yeux se descouure.
 Fais en tomber l'escarre, y laissant vn ruisseau
 Couler tout lentement vne roussoyante eau.
 Ou coupe iusqu'au vif les doubles os du crane,
 La scie contournant de la ronde trepane:
 Et par la playe ouuerte, ainsi que d'un surgeon,
 L'humeur s'escoulera qui troubloit la raison.
 D'un si noble secret l'homme est le redeuable,
 Or' qu'auēgle elle soit, à fortune muiable:
 Qui maints en-a sauué, les faisant trebucher
 Du plus haut de sa rouë, ores sur vn rocher,
 Ou sur vn fer aigu, par la playe fenduë,
 Ont tous avec' le sang leur folie espanduë.
 Et quoy sera-il vray, comme chante Nazon,
 Que d'amour le chaut-mal ne reçoit guerison?
 Que ceste passion est si folle & superbe

Qu'elle ne veut ceder à ius, racine, ou herbe?
 Tu as beau le prescher & dire que ce feu
 Est cause de tout mal, que ruiner à peu
 Mille & mille citez, que sa fatale flamme
 Mene à perdition le corps avecque l'ame.
 C'est perdre temps & peine, & parler à des sourds:
 En amour n'y a-il doncques aucun secours?
 Remede y-a par tout: remonstre luy sa honte,
 Si vn sale plaisir laschement le surmonte.
 Qu'amour est vn serpent qui ne va que de nuict,
 Qui par vn faux plaisir l'opinion seduit.
 Que ce meschant garçon, le bastard de Cyprine,
 A faict que Paris fut d'Ilion la ruine.
 Qu'à son pere Raza Scilevn cheueu fatal,
 Que la cruelle Astride a tant commis de mal.
 Mit Hercul au rouët, que par l'amour periure
 Mille morts, mille torts, le pauure monde endure.
 Ire, noise, desdain, fraude & beaucoup de fiel,
 Caché deffous l'apas d'un bien peu de miel.
 Qu'amour est vn sorcier qui lentement consomme,
 L'homme, quand par les yeux son sang luy tire & hume.
 Tasche par la vertu remettre ses esprits,
 Fais-le loing eslongner les beaux yeux qui l'ont pris.
 Fay luy hanter, songeard, ioyeuse compagnie:
 Conseille luy d'aller au change à autre amie.
 Detestant ceste-cy tu luy conseilleras,
 Une autre caresser que tu luy nommeras.
 Belle, gentille, & sage, & fille à luy esgalle,
 Digne qu'on doiuue aymer de l'amour coningalle.
 Le chaste Nenuphar pris par quarante iours,

LE MELANCHOLIQUE.

Ammortist les ardeurs de ces foles amours.
La graine de pavot: de la froide laitüë,
Celle-là du pourpié enduite, prise & beuë.
L'osier chaste, le saux, le seneuë mangé,
Auecque le cocombre ont ce mignon rongé.
Aussi bien que le germe, à l'anc, à la riüë:
Frotte luy ses tesmoings du ius de la cigüë.
Du ius du chast' ozier, oins luy les reins, le flanc:
Vne lame de plomb plaques-y, & le sang
Du tignet arraché d'une genisse noire,
Des satyres manger fay luy le genitoire
Le moindre & le plus flac, sur luy fay le porter
Ce poissonneau qui peut vne nef arrester,
Malgré les Aquilons, que d'un hippopotame,
Qui se sentant chargé de trop de sang, s'entame,
Du front du costé gauche il ait sur soy la peau:
Et du vin dans lequel le marinier barbeau
Long temps aura trempé, les ondes soient humees:
Fais luy le honteux membre enduire des fumees
Des souris, & du ius de creçon fomentees:
Fay luy dedans du cuir un crappaudeau porter.
Si tu luy oins les reins du fiel d'une torpille,
Au mestier de Venus le rendras inutile.
Si tout cela n'y sert, reste à mettre hors,
Par ieusne & oraison ce diable du corps.
Ou laisse faire au temps qui d'une course lente,
Fera que ce desir loing de son cœur s'absente.
Car ie ne suis d'aduis qu'avecques sang humain
Sacrifier il faille à un Dieu si vilain.
Assiégré de la faim s'il refuse se rendre,

Qu'il aille au bois choisir un arbre pour se pendre.
 Mais laissons ces fols-là qui ne veulent guerir,
 Et allons diligens les autres secourir,
 Mordus d'un chië fol, ains que des eaux la crainte
 Soit en leur fantasie enragement empreinte:
 Car danger il y a qu'en perdant un seul poinct
 De l'opportunité qui ne rebrousse point,
 Le malade on ne perde: or toutesfois esperé
 Qu'on le pourra sauuer tant qu'en la glace claire
 D'un poly miroüer cognoistre il se pourra.

Si tost donc que le chien malignement aura
 Dans la chair de quelqu'un sa dët noire imprimée,
 Laisse long temps segner l'ulcere enuenimee
 La sang-süë ou ventouse, ou les cornets mordans
 Sur la playe attachez au dehors du dedans,
 Attire l'achöison: toute la chair touchée,
 D'un bië trëchät rasöuer soit tout soudain trëchëe:
 De l'ulcere segneux les enuirs machez,
 De cent incisions soient menument hachez,
 D'un fer estincellant ouure large la playe.
 Que si le feu cruel craintiuement l'effraye,
 Le sel appliques y du sublimé brulant,
 Qui brule sans douleur d'un feu secret & lent:
 Fay la crouste tomber de la playe mordüe,
 En la remolissant par la gresse fondüe
 De beurre frais brassé par l'humide vernis,
 Et le moyen d'un œuf, au beurre frais unis.
 Fay-di-ie choir l'escarre & la playe beante,
 D'argent vif calciné de poudre rougissante,
 Soit souuent saupoudree, entretenant le cours

LE MELANCHOLIQUE.

De l'ulcere fluant plus de quarante iours.
 Mordu auoir esté de la beste enragee,
 Rudement, & souuent la part endommagée
 Frotte & laue du flot de son corps espanché:
 Ou d'onde dedans qui le poisson dessésché
 Incorruptible on garde, ou bien de celle où trempe,
 Ou bout le marrabin, le Panax, & la lampe.
 Bassine cest endroit: la ruë avecq' longnon,
 Le potamogeton des nymphes compagnon:
 Pas ny faut oublier la mordante moustarde,
 La roquette, aiguillon de Venus qui trop tarde.
 Les fumees de cheure en vinaigre puissant,
 Ioms y le sel marin, & le miel iaunissant.
 Brouille du souffre avec la saliuë de l'homme,
 Adiouste, si tu veux la vehemente gomme,
 Qui fait reuiure encor par son nom ancien
 Euphorbe medecin d'un grand Roy Lybien.
 La poix qui des vieux pins quand on les brusle coulle,
 Avecque ce secours, faut encor que tu bruoille
 La febue gouesche aussi qui porte dans ses fleurs
 Du dueil des trespassez tristement les couleurs:
 En deux bien iustement par la moytié fenduë,
 Applique chaudement sur la place morduë.
 Et le froment l'honneur des moissons de l'Esté,
 Cuit entier ou maché souuent cause a esté
 Que maints sont eschappez, mis dessus la morsure.
 On dict cas merueilleux, & l'espreuue l'asseure,
 Que le poil du chien qui fol mordu t'aura,
 Le mal qu'il aura fait luy-mesme guerira,
 Sil y est appliqué: qui a mal à la teste

Pour auoir faict carroux, dit, qu'il faut de la beste
 Qui la mord le poil prendre, & le scorpion mis
 Sur la playe, guerist le mal qu'il a commis.
 Par l'Heomonien fer la santé recouree:
 A Telephe ainsi fut par lequel fut nauree
 D'une grand playe sa chair, le mal, le rebleffant,
 Qu'ennemy fit Achile, fut amy gucrissant.
 Ceux desquels ie m'appreste ore dire la force,
 Pris, ou mägez, ou beuz, ou mis sur la chair morse,
 Sont remedes certains: Adonc pren l'ail testu,
 Et que la nature a de cent robes vestu,
 Dans les iardins planté, ou cil qu'elle faict naistre,
 Serpentin, sur les monts, ou en plaine champestre:
 Le chamaras avecq' qui leur odeur retient
 Incorruptiblement, qui les monts entretient.
 La racine de l'herbe appelée de l'ange,
 Et l'herbe que l'auette ingenieuse mange.
 Pour apres le tourner en la douceur du miel,
 De la femme du ciel mets y encor' le fiel.
 La betoine, l'armoise & plus amere aluine,
 Et l'herbe la tresbonne aux femmes en gesine.
 La germandree encor' des durs rochers naissant,
 Et l'oseille vineuse au ius appetissant.
 On dict tressouueraine y estre l'aigu-lampe,
 En vinaigre & miel, on y joint l'yocambe,
 Et le gay pouliot eternellement verd,
 Prise, comme l'on veut, la theriaque y sert.
 Les remedes suiüäs par la bouche on doit prendre,
 Au feu de serment blanc brusle & reduy en cendre,
 Les chancrez reculans nourris de la douceur

LE MELANCHOLIQUE.

Des nymphes, & qui font leur seicur sous l'azur
 Des fleuves tournoyans: fay boire à iun la poudre,
 Mais avecque vin blanc la faut premier dissoudre,
 Et de la gencianne, & de l'encens mesler
 Deux fois vingt iours durant, autant qu'une cuiller
 Trois fois en peut tenir, ou à iun fay luy boire
 L'herbe sur les venins qui gangne la victoire,
 Dont superbe elle porte & la gloire & le nom:
 Accompagner la dois du benedict chardon,
 Et de la lamp'aigue & leurs ondes pressure:
 Que quatre fois dix iours contre ceste morsure
 A iun le patient boira: l'herbe alisson
 Monstre que de la rage elle est la guerison.
 Du sodomite lac boy aussi le bitume,
 Du sauuage figuier pour ce l'escorce on hume.
 Deux fois vingt iours durant, on dist que qui boiroit
 L'urine & sang d'un chien, de ce mal gueriroit.
 Et qui boiroit encor l'ouurage de l'abeille,
 Avec l'oliue grasse, ou la rose vermeille
 A quitté ses vertus: qu'encor luy soit baillé
 A boire d'un regnard, ou d'un bouc le caillé:
 D'un lieure, ou bien d'un chien: de cestuy-cy poudroye,
 Pour le prendre vne fois, le salutaire foye,
 Mais faut estre rusé, que par un long tuyau,
 A longs traicts & souuent fay luy boire de l'eau
 Que le nourrissant cice a de sa couleur teinte,
 L'eau perdant sa clarté il perd aussi la crainte.
 Que l'on le baigne encor auant que le poisson
 Ait plus auant gangné le fort de la raison.
 Ains que dedans le bain l'aprehension folle

Luy face faucement voir d'un chien l'idole:
 L'œillere d'un mastin qui enragément fol,
 Aura qu'elcun mordu si on la pend au col,
 Contre ce mal de dent, d'un plus fort contre-charme
 Qui la porte sur soy, ayde preserue & arme.
 Du cormier ferme & droit se garde d'aprocher,
 Ny la verge sanguine aucunement toucher.
 Enduy luy tout le corps d'un puissant Dropacisme,
 Couure l'entierement du plus fort sinapisme,
 L'humeur desia infect, mais non du tout gasté,
 Du noircissant venin de vuidier soit hasté,
 Hors du ressort du corps par la purge qui chasse
 L'humeur qui triste & noir parmi le sain se brasse.
 Du cocombre estrangier prens le ius du fruit meur,
 Et le plant de Tapsus portant orine fleur,
 Eprains-le, hume son ius, ou implore à ton ayde,
 L'antimoine iacint pour l'extreme remede.

SONNET.

DE nostre corps humain la ratelle est la reine,
 Qui noble cependant qu'à ces plaisirs s'adonne,
 Vers les membres subiects son deuoir abandonne,
 Les oppresse, & leur sang succe de vene en vene,
 Grosse, superbe, enflée, & de son humeur plene:
 Comme vne sponge boit, & dur, exactionne
 Des membres la substance à ses mignons la donne,
 Elle est seule à gogo, tout le reste est en pene:
 Mais tandis qu'elle engresse & qu'elle epuise, gloute,
 De ces subiects l'humeur à la derniere goutte,

Qu'hydropique se faiçt, le corps deuiet heçtique.
Que fera elle plus, n'y trouuant plus que prendre?
Force auſſi luy ſera les derniers abois rendre:
Voila quel eſt l'eſtat de mainte republique.



SONNET.

A MADAME LA MARQUISE
de Thury.



V'en ſon premier Caos l'uniuers ſe confonde,
Premier que d'oublier la liberalité,
Dont voſtre deſſunct pere enuers moy a eſté
Tref-liberal, pèdant qu'il-viuoit en ce monde.
Encor que là puiſſance à mon vueil ne reſponde,
Non ingrat, vne pierre vn iour luy preſenté:
Ce ne fut l'union tant richement vanté,
Ny celles là encor dont le leuant abonde:
Mais telle qu'en noz corps il s'en trouue ſouuent,
Qui iadis affligeoit voſtre pere viuant,
Et dont l'ombre en ces vers humble ie vous deſdie.
Comme à ſon heritiere, à quiconque vous ait
I'en ſouhaiçte le corps, & en ſenté l'effect:
Le bien vous appartient, à luy la maladie.



LA PIERRE EXTRAICTE DE L'ES-
CVLAPE DE R. B. ANG. M. A MONSIEVR
de la Tour d'Argy, Cheualier de l'ordre du Roy.

V Ne coustume antique est ferme demeuree,
Que les siecles ingrats par leur longue duree
N'ont peu faire oublier, depuis la saison d'or
Toutes les nations l'entretiennent encor.

Ore que l'enragee & sanglante querelle
Des freres coniurez, renuerse pesle mesle
Les droicts des vieux François: Si est-ce qu'à tousiours
Ceste façon humaine en France aura le cours,
Qui eternellement & iustement commande
Qu'à son seigneur l'homage vn chacun face & rende.
Tesmoing perpetuel à la posterité
D'une humble obeissance & bonne volonté:
Protestant qu'à iamais il veut tenir sa vie
Au plaisir d'un seigneur gracieux asservie.
Ie ne veux donq' faillir à faire mon deuoir,
Puisque d'œil si bening il vous a pleu me voir:
Mais, pauvre que ie suis, ie ne sçay comment faire,
Tant mon foible pouuoir est au vouloir contraire:
Car encor que de peu les petits soient conzants,
Les grandeurs toutesfois appartient aux grands.

Mais vous n'estes celuy qui les sourcils renfrongne,
 Seuere en desdaignant des neufseurs la besongne:
 Filles de Iupiter & germanes des Roys,
 Quoy qu'elles loing des courts errent parmi les bois,
 Elles vous ont nourri & appris tant de grace
 Que pour leur propre frere on vous prend à la face.
 Vous en auez le teint, le parler, les façons,
 Et scauez accorder leurs plus doctes chansons:
 Vous ne portez respect qu'à qui bien le merite,
 Et n'auetz en desdain l'apparance petite. (mains,
 Ains conforme au grand Dieu, sans regarder aux
 Tant seulement les cœurs vous sondez des humains:
 Ce m'est assez pourueu que ie vous puisse plaire,
 Vous offrant le present d'une estrange pierre.
 (Estrange, ah! qu'ay-ie dict, à qui l'engendre, hélas!
 Elle est par trop cognue, estrange n'est d'onc pas)
 Ny telle que l'Indois auarement apporte
 A nostre nort tremblant, des la premiere porte
 De l'aube matiniere, & telle encor n'est
 Que le riche Vnion qui de la Nacre nait,
 Conceu de la rosée & l'honneur de l'oreille
 De la Royne d'Egypte: ell' encor n'est pareille
 Aux flamboyants rubis; à ces gros diamants,
 Qu'esclatter auez veu autour des deux amants,
 Qui n'ont faict qu'une gent d'Alemagne & de France,
 Et engendré la paix par leur saincte alliance.
 Mais de l'estoffe elle est qu'aux torrents sablonneux
 Sur la greue on rencontre, ou aux fonds limoneux
 Des canaux par où l'eau secretement se glice,
 Pour garder que Paris alteré ne languisse.

L'onde en roullant amasse un grauiet delié,
 Qui d'un gros phlegme & lent l'un à l'autre est lié,
 Dont Phebus par ses rais humant la part subtile,
 En pierre & endurest la matiere plus vile.
 Ainsi, esträge cas! noz chetifs corps humains
 De tels amas pierreux farciZ sont & tous pleins,
 Et n'y a cavité, espace, vuide ou ventre,
 Où telle pierrerie inuisiblement n'entre:
 Dans celles du cerueau, où la raison se tient,
 Dans celles qui du fiel la colere contient,
 Dans le large intestin, dans cil qui droict s'apelle,
 En toussant quelquefois on pousse de la gresle
 Hors des poulmons pantois, & les abres ouuerts,
 D'osselets pierreux sont quelquefois couuerts.
 Au foye, en la ratelle, & au champs où nature
 Sème diuinement l'humaine geniture,
 Se creent des cailloux dementants les tourments
 Que l'accouchee endure és vrays enfantements:
 Mais plus qu'ë autre endroict dedäs le large espace
 Du rein, & dans le vase où l'urine s'amasse.
 Dieu a deux coulouers posé en chasque flanc;
 Deux rongnons sinueux pour epurer le sang:
 Comme par la ficelle escoule la bergere
 La tresse du trouppéau pour faire menagere,
 Des fromages pour vendre, ainsi l'humeur coulant:
 Par long tortiz percez va lentement roullant,
 Des venes & du foye, une matiere grosse,
 Qui bauense s'amasse en la petite fosse
 Du rongnon eschauffé, & se cuit là dedans,
 Comme un potier la terre en ses fourneaux ardents.

LA PIERRE.

Du subiect qui l'engendre elle tient la teincture,
 Du moule qui la forme elle ayme la figure:
 Tout ainsi que la terre en ses ventres feconds
 Engendre des metaux de diuerses façons .

Aux vns ce mal se laisse ainsi qu'un heritage,
 Qui entre les enfans iustement se partage:
 Ou en passant les nuiets enfonçant trop auant
 Les passages obscurs de quelque autheur sçauant:
 Vn autre l'a gagné, quand la chienne etheree
 Seche l'humidite de la terre alteree.

Qui couché sur le ventre ardent sur un ruisseau
 Boit trop gloutonnement la bourbe avecque l'eau,
 Les gros vins, les gros mets, la gueulle insatiable
 Font naistre obscurément ceste mine de sable.
 Il aduient quelquefois que ce rocher du rein
 Descend dans la gargouille au grand & large sein,
 Ou dans ceste vessie estant froide & nerueuse,
 Se fait d'une matiere & glayreuse & baveuse,
 Peu à peu amassée, & qu'un estrange feu
 Eschauffe & endurecist & reuist peu à peu:
 Es enfans mesmement qu'on voit sans garder ordre
 Et sans regle tenir, tousiours macher & mordre,
 Courir, iouer, sauter, & se creuer de laiçt,
 Matiere proprement dont le calcul se fait.
 Qui petit du premier se veautrant dans l'ordure,
 Se recouure croissant d'une autre couuerture:
 Comme crouste sur crouste on voit s'entr-acoller
 La pelotte qu'on fait sur la nege voller.
 Puis le froid suruenant, en pierre ceste masse
 Ainsi que le crystal dans ses venes se glase.

Mais à fin que chacun cognoisse sa douleur,
 Que pour la Nephritide on ne prenne sa seur,
 En mesme endroict des flancs, qui a senty sa peine,
 Qui deçà qui delà ferme ne se pourmene.
 Plus pesant qu'un quintal quand du rein veut partir,
 En l'uretere entrant fiere se faict sentir,
 Et de mille aiguillons doloireusement tranche.
 La cuisse s'engourdist, le tesmoing, & la hanche,
 Et du costé qu'elle est, la carene du dos.
 Refuse d'obeir au gouvernail des os:
 Tantost claire est l'urine ainsi qu'eau de fontene,
 Tantost traîne apres soy une sanglante arene,
 Goutte à goutte distile, & souuent le rocher
 Iustement, tout à coup vient le destroict boucher:
 Si que l'eau arrestee grondant dedans les venes,
 Faict vomir, faict suer faict mille & mille penes:
 Si deuallee ell'est par le conduit glissant,
 En l'euier de noz corps cruel son mal on sent,
 Quand son eau il veut faire, hélas! qu'il ne peut faire,
 Et s'il en fait, elle est plus claire que l'eau claire,
 Ou au megue semblable, & tousiours l'enfançon
 Sent à son petit bout vne demangeçon,
 Qui le tient droit & roidde, & sans cesse a enuie
 D'aller, là où le ventre importun le conuie.
 Mais quoy qu'y feriez vous, si le mal est caché:
 Si par aucun outil ne peut estre arraché,
 Sans destruire du corps le fragile edifice,
 Et rompre les accords de l'humaine police?
 Je diray les moyens que l'ancienneté

LA PIERRE.

*A laissé par escript à sa posterité
 Qu'ell a tiré du sein de la riche nature,
 Pour deliurer noz corps de l'inique torture.*

*Or deuant que venir à miner ce rocher,
 Où en vain tu traueille, il te faut depescher
 Le grand chemin public, & du corps la sentine
 Escurer doucement d'une façon benine.
 Si le sanglot redouble, & le sang est au plein,
 Qu'on en tire lexcez d'une fidelle main:
 Ainsi qu'on oinct vn tour à fin que mieux il vire,
 D'un doux medicament faut le passage enduire,
 A quoy propre sera de l'air le doux miel,
 Qu'aux champs calabriens est enuoyé du ciel.
 De l'Egypte fertile il faut la gouffe noire,
 Ou de l'huile commun, ou des amandes boire:
 Par ainsi la pierre allant en biaisant,
 Bellement coulera par le sentier glissant.
 Tost apres, seurement auoir fait ces approches,
 Faut venir à la sappe & abatre ces roches:
 Ou employer te faut l'hibleenne douceur,
 Cuite en vin qui perdu a lantique chaleur,
 Cuit avec la betoine, & la douce racine,
 Le caprier, le laurier, l'eaune, la sarazine,
 Le nombril & cheueux de la belle Venus,
 Larreste beuf, la scile, & saligots cornuz,
 Lanet & le genet, l'herbe sentant la pomme
 Du fecond cerisier, & du prunier la gomme,
 Et la mile pertuys, l'aluine benüe en vin,
 Le noyau du nefflier, celuy de l'Aubepin,
 Le reffort, le fouchet, la liusche & garance,
 L'odorant bassilic, & la froide semence*

Du cocombre & citrouille, & coucourde & melon,
 La baguenaude rouge, & le gay oubelon:
 L'ache, & le gloutteron, & l'esponge esglantine,
 La berle, & le cresson herbe des eaux voisine,
 Adioustes y encor' les fleurs du rosmarin,
 Et la cristemarine, & le fenail marin.
 Le noyau de cerise, & de l'amande amere,
 Le chiendent, le cumin, & la persépierre.
 L'oseille, & le pourpié, le brusque, & le gremil,
 Le persil & l'asperge, & le pouliot gentil,
 La feuille cheuillee alliee au poix ciche,
 Le chardon l'erneen de teste le plus riche:
 La figue, le pinon, le doux fruit du fraisiier,
 La graine de plantain, celle du geneurier.
 Mesle-y de l'orge encor' & de la pinpenelle,
 La cretique carotte, & l'ortie avecq' elle:
 Et celle que la cheure errante par les bois,
 Broutte plus volontiers, & l'herbe de paroyz.
 En vin blanc cuits encor', ou bien à boire donne
 Du tamarix la poudre, & de l'herbe marronne:
 De la chaste arthemise au fueillage chenu,
 Des racines de ronce, & du pauot cornu.
 D'iris la bigarree & des grames de fresne,
 Du cottonneux dictan, eau de feuilles de chesne:
 De royale confoude ayant pourprine fleur,
 Et de la veronique à semblable couleur,
 Et de la filipendre & de mouffe qui erre,
 Fueilluë & verdoyant, sur les flancs de la terre,
 Du plant qui feuille à feuille est lié à cent nœuz,
 De cil dont les effects ont surnommé hargneux.

LA PIERRE.

Des mauues le bouillon la grauelle faiet rendre,
 Et l'ongnon pris & cuit deffoubs la viue cendre,
 D'hissoppe boy le ius, du blanchissant boulean,
 Quand on le coupe ou perse, il conuient boire l'eau,
 De la lampe la ré, de la mente la graine,
 Et la bruiere encor' cuite y est souueraine,
 Et la gomme qui croist au plant trois fois diuin,
 Qui pour de ioye emplir noz cœurs verse le vin:
 Et mille & mille encor' desquels l'experience

A donné aux humains la parfaicte science.
 Que selon l'occurrence & les occasions
 Le ministre accommode en cent & cent façons.
 Ore par doux moyens le fier tyran il flatte,
 Or' cruel' à oultrance il faut qu'il le combatte:
 Tantost par le dedans, tantost par le dehors
 Tasche son ennemy de desloger du corps.

Si comme l'assiegé qui ne se veut point rendre,
 Obstiné se resoult la batterie attendre.
 Use moy de rigueur, & le rompt si menu
 Que le plus petit grain n'en puisse estre cognu.
 Comme si sur un roc estoit tombé la foudre,
 Brusle-moy par sept fois un verre, & mets l'en poudre
 La pierre qu'à haut cris, & grands gemissemens
 Le graueleux aura rendu premierement:
 Celle qu'en l'escrenice on trouue blanche & ronde:
 Celle qu'en siefs de bœuf on rencontre aussi blonde.
 La poudre du corailt sous l'onde un arbrisseau,
 Hors l'onde une pierre hume auecque de l'eau.
 Des cheuaux les suroz & l'Arabique gomme,
 Le luyfant bdellium: de la teste de l'homme

Les osselets broyez: fumees de soury,
 Mains hommes graueleux, pris en vin, ont guery.
 Brusle d'un rat la teste & d'un cheual les ongles,
 D'une anesse le foye, & les blanches pettoncles,
 Les tournoyans palais des cornuz escargots,
 Les boyaux de la terre, & vilains escarbots:
 Le traistre scorpion piquant par le derriere,
 Et les cailloux qu'on trouue en l'esponge legere.
 Brusle d'un lieure encor' les reins & les talons,
 Et les pennages peincts des bizets & coulons.
 La resine oricie, & pierre d'Idumee,
 La chair de roitelets en fendre consumee,
 Et les coques d'un œuf esclos de peu de temps,
 L'oyseau qui n'est amy que durant le prin-temps.
 Mets en cendres encor la sauterelle nee.
 Auecque le prin-temps de la fresche rosee,
 Amille piedz marchant le petit porcelet,
 D'une cheure sans corne & noire boy le laict:
 Et ce que le vieillard, qui la verité trouue,
 Sans en rendre raison nous monstre par l'espreue.

Si doncq' auecq' le ius d'un limon pressuré,
 Ou parmy du vinaigre, ou en miel epuré,
 Ou au ius d'un vieil coq, ou en celuy d'une herbe,
 De ces poudres tu boy, ton ennemy superbe
 Te quittera la place, ou d'un coup violent,
 En pieces le mettras comme un foudre bruslant.

C'est aussi chose seure, & en dois grace rendre
 A qui si beau secret a voulu nous apprendre.
 Que si d'un ieune bouc le sang chaut & fumant,
 Qui seul peut trespouissant briser le diamant,
 Tu repans sur les reins, & tout d'un long oblique

LA PIERRE.

Tu le laisse couler iusqu'au membre impudique:
 Oû sec, & mis en poudre & pris en du vin blanc,
 Le brise en la vessie & le ront dans le flanc.
 Autant en fait la cendre, & l'huile qui est teinte
 Au meurtre du scorpion, si la part en est oincte.
 Qui d'auantage en veut cerche aux chās des Romains,
 De l'Arabe & du Grec, qui fertils en sont pleins:
 Que si à pas vn d'eux le rebelle ne cede,
 Vulcain Dieu sans pitié soit le dernier remede.
 Cest la pierre enchassée en extreme douleur,
 Soudee dans noz corps par leur propre chaleur:
 Que ie vous donne, hélas! que Dieu me fait la grace,
 Qu'oster ie la vous peusse à iamais de sa place:
 Son nom seroit infame, & de la terre osté,
 Comme du criminel de leze-majesté.
 Ainsi i'ay, Monseigneur, du creon de nature
 Grossierement tiré sa triste pourtraicture,
 Pour faire entendre à tous qu'en mon entendement,
 Comme vous dans le corps, ie sens vostre tourment.

Mais si quelque humeur gros, & gluant elle enferme,
 Pour apres le tourner en pierre dure & ferme:
 Qui bouchant les canaux par où l'urine court,
 Ne la laisse passer, ains l'arreste tout court:
 Si que mille souspirs doublant le mal extreme,
 Sur le visage peint l'Idée à la mort mesme.
 On y remedira broyant l'herbe qui fend
 Des rochers la durté dont son nom elle prend:
 Et la pierre legere en l'esponge trouuee
 En contre ceste-cy s'est souuent esproouee
 Du petit brusq' touffu qui dans la fueille enelos

Porte son fruiet vermeil garny d'un petit os
 Que vertueusement à Bacchus on allie,
 Et à l'huile & au suc, dont les monts d'Italie,
 Le Libien sappa, on faict prendre en du vin
 Les grains noirs fricassez du sauuage cumin:
 Et dedans l'aigrè-miel la siente poudrense,
 Du sauuage ramier pareillement confuse.
 Encor on y faict boire, & faict-on boire encor
 Le datte d'une cheure abominable & ord:
 Mais toutesfois si fort que ce grand mal accable,
 Menuisant le rocher en un deslié sable.

SONNET.

A MONSIEVR D'ALLONNEAV
 LIEVTENANT PARTICVLIER
 à Loches.

Comme qui seur & loing regarde vne tourmante
 Balançant vne nef sur les flots orageux,
 Comme qui des plus grands voit les tragiques ieux,
 Que le docte Garnier aux François représente:
 Encor que l'un ny l'autre il n'esprouue & ne sente,
 S'il ne les doit il voir que les larmes aux yeux,
 Et les sousspirs au cœur: que vous faciez, ô Dieux,
 Que tel orage ou rage au loing de moy s'absente.
 Et si les doit encor de loing encourager,
 Et seur par cris & vœux les tirer du danger,
 En leur monstrant le port, des mains & de la teste.
 Ainsi moy qui contemple & qui plains vostre mal,
 Du port ie vous fay signe allumant le phanal,
 Pour vous faire escarter la Colique tempeste.



LA COLIQUE EXTRAICTE DE
L'ESCVAPE DE R. B. A. M.

N E sortiray-ie point de ces tours & retours?
Ie m'auance le moins qu'ad plus roidde ie cours:
Ne sortiray-ie doncq des rencontres du vètre?
De l'une depeché dans vne autre ie r'entre.
Où suy-ie? en quelle part? où aller me faut-il?
Que n'ay-ie pris d'entree, Ariadné, ton fil?
Qui seur me peust guyder & ramener encore,
Après auoir defaict un autre Minotaure.
Ie me voy renfondré dans un gouffre profond,
Me voicy retombé dans un ventre second:
Qui, naissant du flanc droict à s'eslargir commence,
Tirant vers l'estomach se destourne, & s'auance
D'atteindre l'autre flanc: il ioinct en cest endroit,
De tous les intestins le dernier, & le droict.
Il est large & profond, faict, à croussilles rondes,
Et à replis suiuanans, comme petites ondes,
C'est où se tient le plus excrement endurcy,
Reste du chyle blanc: il en patist aussi:
D'autant qu'il est tresample & tresgrand, on l'appelle
Colon, & sa douleur, la Colique cruelle.

Cruelle voyrement, & telle que ie croy,
 Que plus cruelle n'est l'irreuoicable loy
 Du tyran des damnez, telles ne sont les peines,
 Que Promethee endure, en son foye, en ses veines:
 Ny des bourreaux d'enfer l'implacable tourment,
 Executant l'arrest du preuost Rhadament.
 Si qu'on diroit, oyant, qui la Colique endure,
 Que c'est vn criminel qu'on tire en la torture:
 Que c'est vne furie aux viperins cheueux,
 Qui luy farcit les flancs de serpens veneneux.
 Qui s'entortillonnans s'accrochent l'un à l'autre,
 Et qui se rebroullans l'un sur l'autre se veautre:
 L'un va glissant à gauche, & les aynes mordant,
 Les ronge, les tirasse & perce de sa dent:
 L'autre grimpe en amont, où estroicte est la voye,
 Et du rongnon y faict sa curee & sa proye.
 Icy mordre on se sent de ce serpent coquin,
 Comme qui les costez fore d'un vibrequin.
 L'autre la rate attaque, où il se gorge & saoule
 De la lie du sang, l'autre se roule & coule
 Par dessous l'estomach, où plus au large il est,
 Sifflant le faict enfler & l'enfant s'en repaist.
 Un autre court au foye, & fascheux l'escarmouche,
 Et plus fascheuement en passant muinte touche
 Donne au fiel qu'il repend, & si serré l'estreinct,
 Que de son suc doré le sang en iaune est teinct.
 Tout le sang iaunnissant de sa couleur encore,
 Porté par tout le corps, tout le corps teint & dore:
 Où las & non pas saoul d'vser de cruauté,
 Bruyant, tourne-visage au fenestre costé.

LA COLIQUE.

Ou tou court s'y arreste, y trouuant le passage
 Estroict, qu'il ne passe outre horriblement enrage.
 Qu'entrer n'y puisses-tu, plustost plustost mourir,
 Qu'une telle vermine entre mes flancs nourrir:
 Le cœur se souleuant bondist & se renuerse,
 S'efforçant de vomir l'ennemy qui le perce,
 Apres mille sanglots pres apres se suiuan,
 Apres auoir poussé vn orage de vents:
 Apres auoir mis hors de routs vne tempeste,
 Et s'estre escartelé la poitrine & la teste.
 Par mille forts efforts, roidde comme vn torrent,
 Qu'une rauine amasse à grand brandon courant,
 Vomit les morceaux cruds, dont la gorge estoit pleine:
 Puis les humeurs desgorge avecque plus grand peine,
 Que par la bouche il file en cent couleurs diuers:
 Les vns sont blancs ou noirs, les autres roux ou verts.
 Tel bruit on oit hurler & gronder dans le ventre
 Des tourbillons rouants, ainsi qu'au fond d'un ancre
 Un orage s'enfourne, où ne pouuant trouuer
 Le vent vn soupirail, faict la terre creuer,
 Largement seuentrer: elle tremble agit tee,
 De peur qu'elle ne soit hors de ses gonds iettee.
 Celuy qui dans son corps tel orage oit tonner,
 Se tordre çà & là, haut & bas se tourner,
 Ensemble sue & tremble, & a grand peur qu'il faille
 Que son corps parte, affin que ce grand vent s'en aille.
 Qui furetant les flancs & n'y trouuant conduict,
 Murmure, enfle, & brouille, a l'excrement recuit:
 Et rasant rondement le soubtendron qu'il pique
 Espargne le lien de l'androgine antique.

Mais on se sent cerner de cent razoirs trenchants,
 Les boyaux goldronez hors du ventre arrachants.
 Sans faim la soif l'estouffe, ainsi la canicule,
 Quand sans halene est l'air, nous altere & nous brule:
 Ny par bas, ny par haut, ny l'excrement, ny l'eau,
 Ne peuuent s'esuenter, tout reste en ce boyau.
 Apres vn long traual ce qui sort d'auanture
 Semble à vne pelotte aussi legere & dure
 Que d'un beuf laboureur l'excrement dur leger,
 Qu'on voit venteusement sur les ondes nager:
 Et l'eau, qu'à la vecie en ceste peine epreinte,
 Vermeillement paroist de couleur du feu teincte.
 Quand l'intestin s'eschauffe & vient à s'enflammer,
 On se sent peu à peu au dedans consumer
 D'un ardeur sans repos, sa fieure sans relasche,
 Le brule interieur, sans que iamais le lasche.
 Tousiours en mesme endroit le mal fiché se tient,
 (Pour autre occasion il tourne va & vient.)

Si ceste Passion contumace a enuie
 Raur impatientte au patient la vie,
 Sans poulx, & sans halene, & sans couleur roidir
 Sent son corps, & son sang en ses venes froidir.

O pere dont la force est en delphe adoree!
 O son fils medecin à la barbe dorée!
 Dictes nous-en la cause, ô Dieux! qui la sçauetz,
 Et le plus prompt secours qu'inuentez vous auez:
 Que de vous inspiré aux mortels ie redie
 Ce que vous m'aurez dict de ceste maladie.

Est-ce vn excrement dur, où l'humeur froid & lent,
 Qui enflent, prisonniers, des boyaux le plus grand?

LA COLIQUE.

Est-ce le phlegme gros semblant ceste matiere,
 Que le Noble transforme en soufflant en verriere?
 Amassé peu à peu, pour auoir trop souuent
 Mangé fruiçts, beu de l'eau, oyseusement viuant..
 Ou vne legion de vents dedans conceüe?
 Qui les gonfle & les trenche, à fin d'auoir issue..
 Ou des vers fretillants, dont le boyau est plein,
 Le rongens harcelez d'une trop longue faim.
 Ou qu'un sang bouillonnant, qui brule sa tunique?
 Ou l'humeur roux amer qui cholere le pique?
 He! que seroit -ce doncq', quelle autre occasion
 Pourroit l'homme asseruir à ceste passion?
 Cruelle Passion, si elle continue,
 En autre mile-fois plus cruelle se mue.
 Trop inegal eschange, ô trop cruel tourment!
 Qui ne peut qu'en la mort trouuer allegement..
 Alegement cruel: hé qu'est il plus estrange,
 Abominable & ord, que de faire un eschange
 De la bouche à celuy qui sert vilainement,
 Et changer la parole à l'infame excrement?
 O bourrelle iliaque, execrable, inhumaine,
 De tes mains entre mile un seul eschappe à peine..
 Mal qui sentir se faict au deffous des tetins,
 Tressant un ceinturon des gresles intestins,
 Pour nous lier si fort, d'une corde si forte,
 Qu'il faut que par le haut ce qu'on mange ressorte..
 La cause de cela seroit-ce les grands froids,
 Ou l'inflammation qui ferment les destroicts
 Des moindres intestins? quelque humeur amassée
 Lentement ceste part, qui serre & tient pressée

Leur taye, outre laquelle il ne peut rien passer,
 Auroit-on bien ozé par force repousser
 Le boyau qui en l'aine honteusement deuale?
 Seroit-ce point aussi que l'excrement tressale
 Est icy engagé, arresté, endurcy,
 Et n'en peut plus bouger? seroit-ce point aussi,
 Que quelqu'un ton estat ou benefice aboye,
 Et en poste aux enfers en quatre iours t'enuoye,
 Aussi roidde qu'un pau, aussi froid qu'un glaçon,
 Pour sa depesche auoir au moyen d'un bouccon?

Voy-la d'estranges maux, mais y a -il remede?
 Il n'y a mal si grand, ny si fort, qui ne cede
 A la cure fidelle, & heureuse, pourueu
 Qu'il y soit de bonne heure & sagement prouueu.
 Il se faut bien garder du danger qui menace:
 Que s'il t'a preuenu, fay luy quitter la place.
 Mange l'oyseau Tymbré (alouette est son nom,
 Dont dicte fut iadis toute vne legion)
 Ou du lieure peureux la pressure arrosée,
 Ou la melange encor du persil composée.
 Et d'un des Calaments, & du mastiq' perlé,
 Des odorants anets au fueillage entaillé,
 Donne à ton patient, quand la colique rage
 Luy tenaille les flancs, leur bouillon en breuage.

Ou prens-moy les saueurs des abeilles, le thym,
 Le glissant serpolet, & le blanc marrubin,
 Et l'aurogne & l'alvine & l'armoïse & la rue,
 L'eaulne, le pouliot, & l'hissope ramuë,
 L'asperge & chamaras, le Marsilien ser,
 La perle & reiection du prophete laurier.

LA COLIQUE.

L'amere sarasine, & franche mariolene,
 De la pivoine encor la racine & la grene:
 Du cumin la semence, & celle du fenueil,
 Des marais le plantain, l'embouqueté cerfueil,
 Les graines des panés, & tous les deux centaures!
 La Conize ta puce, & l'angelique encores:
 Racine, feuille & fleur du plaisant romarin,
 Les semences d'anis, & celles là du lin,
 Le bouquet champenois, la belle camomille,
 La mauue & la guymaulue à mile maux utile,
 Le saffran sarasin couronné de fleurs d'or,
 La rymbre sauoureuse, & mile & mile encor,
 Dont le ius tu prendras, ou bien le pressurage,
 Ou bien leur huilé epreins seruant à cest vsage.
 De la Royale noix prens donc l'huile rancy,
 De la flambe & du Nard, & de l'aspic aussi.
 Et celuy qu'en pressant de la perle on distile:
 Que porte sur son chef de Peneus la fille,
 Ou du poiure poignant, ceux qui sont exprimez
 Du scorpion meurtrier, des carreaux enfumez:
 L'huile qu'on tire encor de la forte semence
 Du refort, du naueau, a la mesme puissance.
 Mais n'oubly pas celuy que l'on tire des grains,
 De l'herbe dont la feuille est semblable à noz mains,
 Ny celuy-la de l'herbe ou des graines pressées
 D'hiebles, ny l'huyle amer des amandes cassées,
 Du genitoire mol du Pontique Castor,
 Ny celuy que des os de pesche on tire encor,
 L'huile du blond Cartham, l'huyle de colocynthe
 N'y oubly, ny les pleurs du gommeux Therebinte.

Mais quand seroit ce faict si ie voulois conter
 Tous ceux la dont l'on peut ce grand mal surmonter?
 Choisis-m'en vn, ou deux, ou plus, qui puissent faire
 Teste, & la reste encor' à la douleur contraire.
 L'archer qui n'a qu'un traict est bien tost abatu:
 Sans armes nul ne peut esproouuer sa vertu.
 Tu en as à suffire icy, soit que tu iette
 Leurs ius, en les poussant par la bonde secrette:
 Ou que tu les applique entiers, ou bien pilez,
 Cuicts, ou cruds, tousiours chauts, separez ou meslez,
 Ou soit que tu en laues estuue, & forzente
 L'endroit, que la tranchee extremement tourmante.
 Que par unguents il faille amollir sa rigueur,
 Par scachets maintenir sa nature chaleur:
 User de tous moyens, qu'un docte ouurier raconte,
 Quand l'occasion chauue, en passant, les luy monstre:
 Mais fais l'un apres l'autre, & sans confusion,
 Laisant faire à chacun sa natale action,
 Pour les vns sringuer dans le corps par derriere,
 Faire cuire il les faut en vin ou en eau claire.
 Doncq' des simples nommez, qui te sont plus à main,
 Pren la decoction, pousse ton canon plein,
 Dans le ressort d'embas, adioustes-y la branche:
 De la melisse gaye, & de la putefranche,
 La figue douce molle & le pale cumin,
 La semence ramee & languette du lin.
 Si le riche est frappé de ceste maladie,
 Qu'il tire pour garend le Nectar de Candie.
 Aussi tost qu'assailly, qui veut secours auoir,
 De Bacchus & Minerue implore le pouuoir.

LA COLIQUE.

Faute d'huile (tousiours toute chose n'abonde)
 Pren du beurre, & de l'œuf la molette plus ronde:
 Brouille les, dissou-les: si le rebelle mal
 De gré ne veut saillir par la breche d'auul,
 Tasche de l'estonner par la froide morelle,
 Ou par l'herbe insensee appareillee à elle:
 Par le chef du pauot ou par son suc dormant,
 Ou prenant de Philon le froid medicament,
 Tandis qu'en toutes parts la matiere on ramasse,
 Pour les trippes lauer, qu'en la maison on brasse,
 Au sang Centaurien l'Hibleerne douceur,
 Et le ius du ciclame à la verte couleur,
 Et la courge sauuage, & le sel que reluyre
 Plus clair que glace on voit, que l'on fera tant cuire
 Que la douceur s'en perde & se tourne en amer:
 Et qu'un glan rond & long on en puisse former,
 Pour s'en accomoder: que si le mal ne cede,
 La letheenne drogue accouple à ce remede.
 Aux fomentations, qui vent, adioustera,
 Ce qui mollifiant le ventre eschauffera:
 La figue, & le foin grec, de l'ortie la grene,
 Le poiure noirissant, la nielle romaine:
 Ce que cuire en de l'eau ou en de l'huile il faut,
 Pour t'en seruir encor au bain tiedement haut,
 Où chaut tu entreras: si la douleur ne fine,
 Se lauer, s'estuuer d'eau souffreuse ou marine,
 Est un tresprompt secours: & au sortir du bain,
 D'aluyne, ou de cumin le vin boire est bien sein.
 D'un huile ou bien de deux, de trois, de quatre gresse,
 Les enuirons mollets que la colique angouisse:

Mais tousiours du milieu va le sentier suiuant,
 Les deux extremittez au besoing reseruant.
 Achuee par vn bout, par le plus doux commence,
 Celuy qui court & tombe ou peu ou point s'auance.
 Essaye de gagner l'ennemy par douceur,
 Sinon d'un suc trenchant retranche son humeur.
 A quoy faire il te fait dans ces huiles dissoudre
 Le poiure, & le gyroffle, & la canelle en poudre:
 Le pyretré & le gingembre & de badan les nois,
 Et toute la denree à l'espicier Indois.
 Le ius de sagapen, ferule de Medie,
 Et le brulant euphorbe apporté de Libie:
 Le Galban Syrien, & les parfums d'Ammon,
 Qui ont pour leur parrein l'Arrabesque sablon,
 Dissouts en eau vitale, esteignent la colique,
 Soit que l'on les syringue, où bien qu'on les applique.
 Si riche & delicat ne peut souffrir ton cœur
 De ces sucz estrangers la penetrable odeur,
 Mest y l'ambre nageant dessus la vague esmeüe:
 Le musq, & la liqueur que la ciuette sue,
 Y mouillant chaudement la layneuse toyson
 Du vieil Hermaphrodite oms- en la liaison:
 Par la chaude moiteur si l'humour lent, qui peche,
 Ne se veut chastier, voyons si par la seche
 Corriger se pourra: le mil au chefpenchant
 Te fournira de grain, qu'en la toyle ensachant
 Tout chaut appliqueras, & la vague salee,
 Que le brouage ardent a durement gelee,
 Pour redoubler leur force on les allie avec
 Le souffre, le cumin, le lin & le foin grec,

LA COLIQUE

Et le son fritturé, joins y la camamine,
 Le melilot flairant, & des ers la farine,
 Qui secs ensachetez seront dessus posez,
 Ou des carreaux fumants de vin blanc arrosez,
 Lenoyau persien & sa coquille dure
 Rostis sur les charbons sur le nombril endure:
 Qu'on plaque chaudement, qu'on y soit appliquant
 Des poiures indiens le long au goust piquant,
 Et le iaune d'un œuf: & l'escorce menuë
 De froment en vinaigre, ou cuit avecq' la ruë.
 Qui la mie d'un pain tout chaut du four venant,
 Y couche, son angoisse accoïse incontinant:
 Et qui la mange encor' trempee en eau bouillante,
 Du colon la tranchee en moins d'un rien s'absente:
 En huyle camamine on mince, on cuit encor'
 L'esclaire, don du ciel, portant suc & fleurs d'or.
 Quoy douleur, des douleurs la plus que trescruelle,
 Quitter ne veux-tu pas ceste place? ô rebelle,
 Sors, ô traitresse, sors! quoy ne veux-tu doncq' pas
 Abandonner ce fort par la breche d'embas:
 Tu sortiras adoncq' par la porte d'iuoire.
 Changeons la batterie, or sus faisons luy boire
 Du mizilleur vin Gascon ou d'autre aussi puissant,
 Ou du maluoy sien, ou l'arromatizant
 Hippocratiquement par l'espice plus rare
 De l'Isle de Zeilan, que le marchand auare
 Precieuse nous vend, laquelle tient le lieu
 Du cinamome saint, consumé par le feu,
 De l'enuieux sauuage, ou de l'ardent orage
 Du celeste chien, qui les forests sacage.

Ce vin soit adoucy par le sucre affiné:
 Son bouillon soit tousiours de vin assaisonné.
 En vin blanc qui a pris trois grains de poiure en poudre:
 Ou les a faict pour boire en vn chaudreau dissoudre,
 Ou la poudre du duc: qui prend vingt gousses d'ail
 Quand vesper brunissant donne treue au travail:
 Et qui d'aulx a farcy l'alouette ou mesange,
 S'exempte de ce mal, s'il les boit ou les mange.
 Qui en vin candiot mariolaine est trempant,
 Ou l'autre calamente qui combat le serpent:
 Qui en ce mesme vin ou neuf ou onze encore,
 Perles du Laurier sacre, ou les fueilles deuore
 Du reffort adoré en Delphes massif d'or,
 Sans iamais oublier les tesmoins du Castor:
 Ny du poiure Indien la perle ronde & noire,
 L'acable, si manger il les fait, ou bien boire.
 Du scauant Andromache, & du Pontique Roy,
 L'un & l'autre Antidote aplique, mange & boy.
 Va ten aux chäps cueillir és prez en la montagne,
 Aux vallons & aux bois, les herbes que i enseigne
 En mon auant-fueille, qui manifestement,
 Fortes, donnent la chasse aux coliqueux tourment.
 Ioints à leur esquadron la puissante racine,
 Qui aux riués de Rhasonde à Ponte voisine,
 Noire & lisse s'arrache, & les cheueux du Thim:
 Et l'ue herbe musquee la fueille & flair de pin:
 La rouge Veronique ayment frisches desertes,
 La melisse, & la mente aux fueilles blanches-vertes
 Espaintes, font vn ius, que quiconque en boira
 Par trois iours, en trois iours il se garantira.

LA COLIQUE.

Et le bouillon & l'eau que des eaux on distile,
 Et l'eau & le bouillon que rend la camomille.
 Des bruyeres la fleur deux fois l'an fleurissant,
 Estreincte, à qui les boit est vn secours present.
 Des fleurs du bouillon blanc la poudre en bouillon beüe,
 Et les grains du chou sobre ont la force rompuë
 De ceste affliction, la poudre & ius diuers,
 En vin blanc on doit prendre, & les simples tous verts
 Cuire avecque viëil coq, qu'on doit tant faire cuire,
 Que pour vn seul breuage il en reste à suffire.

De tout le bloc confus de ces auant-coueurs,
 Des rez, fueilles & fruiçts, des semences, des fleurs,
 Pren le choix, pour bouillir, boys-en l'eau miellee,
 Ou en de l'hippocras l'expression meslee,
 Et la racine dure au glayeul esclauon:
 Et celle-là encor' du colchique Acoron,
 Qui du tout est semblable à la cane odorante,
 La nouëuse galange à la langue mordante,
 De l'onite origon, d'amatantique meu,
 Du centaure l'esné, du rosmarin fueillu:
 Et du vinceuenin despitant la dent noire,
 De la beste enragee, & de l'imperatoire,
 Du mentastre velu, de la mente sa seur,
 Et du chardon testu à l'espineuse fleur:
 De l'herbe que Peon diuinement employe,
 En pensant du dieu Mars & de Venus la playe,
 Du gramen qui la terre acolle à mille nœuz,
 Des dictans aux cheureux de la Crete cognus.

Iusqu' icy nous auons en cent & cent manieres
 Attaqué l'ennemy d'escarmouches legeres.

C'est maintenant qu'il faut combattre ouuertement.
 Descharge l'estomac par le vomissement:
 Du meilleur arme-toy euitant le breuage
 Du bon Achelous, que si la force ou l'aage
 L'indiquent, & le mal soit violent & chaud,
 Du bras interieur piquer la vene il faut,
 Et d'une main legere, pour ne forcer nature,
 Auare tu feras estroite l'ouuerture.
 L'humeur cause du trouble, & lequel offensé
 A le corps, hors du corps bany soit & chassé
 Par le medicament qui luy est plus contraire:
 Mais d'entre tous choisis la drogue sacr' amere.
 Si tu veux tout d'un coup & chasser & flatter
 L'intestin ennemy, il t'y faut adiouster
 Des pauots letheens les larmes espanduës,
 Quand de glaiues trenchans sont leurs testes fenduës,
 Deux grains tant seulement on y doit meslanger:
 Qui en prend d'auantage il se met en danger.
 Du poil blanc de crocus, de la rançon du bieuere,
 D'un d'eux un gros, pourueu qu'il n'y ait point de fie-
 Remede souuerain soit dedans ou dehors. (ure,
 Le bieuere ayde les froids & les humides corps:
 Et la melange encor' qu'a iadis inuentee
 Le medecin tarsois, icy soit adiouste.
 Mais si tu t'aperçois que l'ennemy vainqueur,
 De ta peine se iouë, & te braue moqueur:
 Monstre-toy comme luy n'auoir l'ame peureuse,
 Cours-t'en viste au secours de la ventouse creuse.
 (La ventouse tu dois reseruer pour la fin)
 Son ventre remplis doncq' des puissances du vin,

LA COLIQUE.

Dans lequel tu feras un des ennemis cuire
 De ceste passion: ou bien le fonds enduire
 De son ventre profond, & ses cernes voustez
 D'une herbe au goust aiguë, ou d'aulx autour frottez,
 Soudain de flambe grosse, & de feu, qu'on l'applique
 Droit sur le nœud du vend à l'entour duquel pique
 Le foret coliqueux: le feu leans enfermè,
 Apres auoir tout l'air du dedans consumé,
 Par faute d'aliment s'estouffe dans le ventre:
 Elle s'attache & sappe, & succe autre air qui r'entre,
 Au lieu du feu esteint, & s'en remplit soudain.
 (Nature creueroit s'il y auoit du vain)

La douleur tout à coup s'euanoïst perdue:
 Merueille que ne croit celuy qui ne la veü.
 Elle s'euanoïst, & perd aussi soudain
 Que peut maïstre Gonin faire un tour de sa main.
 C'est un songe, un fantosme, un charme, un sorcelage,
 Tant vistement se voir quitté de ceste rage.

Quant à la passion, qui cordonne & retort
 Les menus intestins, quand par bas rien ne sort,
 Ains il faut que le haut qui a pris la viande,
 Puante, corrompüè honteusement la rende:
 Ne veut estre traitee autrement que sa seur:
 Des plus gros intestins la moleste douleur:
 L'autre est en ce seul poinct à ceste-cy diuerse.
 En ce cruel martire il faut que chant on verse
 D'une chauuesouris desmembree le sang,
 Sur ce qui est compris de l'un à l'autre flanc:
 Ou sur ce mesme lieu qu'en frottant soit conduite
 Des serpents la vicilleffe, en huile rosat cuitte,

Dans un pot estamé: l'homme trois fois heureux,
 S'il posoit, raiuny, sa vieillesse comme eux:
 S'il se renouuelloit comme fuit cest engeance
 De serpens, recourant deux fois l'an sa iouuance.
 En ce mal miserable il faut mollifier,
 Par plans appropriez, le ventre dur & fier:
 Soit que sus on les mette, ou la bouche les prenne.
 Tel est le ius d' Janet, tel le suc de la greine
 De la mauue molasse: il n'est secours pareil
 Au sien, ô camomille herbe sacre au soleil!
 O sainte camomille! humanant de ton herbage,
 Onde à onde bouilly, le salubre breuage,
 Ou le ius de tes graines, ô Paladien lin!
 On peut vaincre ce mal extremement malin.
 Cuisant ces simples vers en l'oliue ou en l'onde,
 De l'humaine sentine estuues-en la bonde:
 Ou dessus leur vapeur fay le malade soir,
 Pour lascher le ressort qui ne fait son deuoir.
 Mais retournons au point des Coliques superbes,
 Si vaincre on ne les peut par ces puissantes herbes,
 Ny rompre leur fierté les armes dans le poing,
 Combattant à outrance, adoncq' il est besoing
 De la peau du lyon adiouster à la force,
 De celle du regnard la piperesse amorce:
 Ruser, flatter, tromper, user de trahison,
 Tous moyens employer pour auoir sa raison.
 Dequoy te soucy-tu pourueu que tu les donte?
 De la siente du loup n'ayes horreur ny honte:
 D'un loup qui rauisseur affamement glouton,

LA COLIQUE.

*A mangé tous brandifs les membres d'un mouton,
 Ou bien vne autre proye: on queste les fumees
 Sur les piquans buyssons par cy par là semees,
 Blanchissantes encor d'ossements deuorez,
 Qui n'ont pu dans son ventre estre à point digerez,
 La Colique on en chasse en du vin blanc humees,
 Ou qui des os broyez trouuez dans ces fumees
 La poudre blanche auale: ou qui faict de la peau
 De ce fier, sa ceincture, & en ceinct le boyau
 Où s'enfle la mauuaise & fascheuse Colique,
 Qui vne caquerotte en cest endroit applique,
 Pleine de fient louuier: mais le cordon qui sert
 Pour l'appendre à son col soit fait de cuir de cerf,
 Propre pour cest affaire, ou de laine tressée
 De brebis, que le loup aux champs morte a laissée,
 Qui de la peau d'un loup comme le iour son dos,
 Couure la nuict son lict en prenant son repos:
 De la Colique est franc, soit qu'il dorme ou qu'il veille.
 De ceste fiere beste on conte encor merucille,
 Que son boyau qui est en poudre redigé,
 Les boyaux peut guerir de ceux qui l'ont mangé,
 Pour vn certain rapport, comme qui a meslée,
 Des poulailles l'ordure en l'onde miclée
 Et maugreant laboit: si subtil ie reduy
 En cendres, par le feu, l'osselet, qui d'appuy
 Sert au talon fourchu du porceau ayme-fange,
 S'assure de guerir, qui ceste poudre mange:
 Comme qui le coral engorge en du vin blanc
 De l'anguille boueuse, autant en faict le sang,*

Et tout autant en faict, qui auale les cendres
 Des cornichons du cerf qui sont calcinez, tendres:
 Mais bien plus puissamment si avec y sont mis,
 Le poiure perusín, la mere d'Adonis.

Es iardins & vergers, & par les lieux humides.
 Mains limats vont errans: leurs cornes sont leurs guides,
 Les plus tendres reiects pillants du renouueau,
 Grisastres sur le dos, qui d'un naïf pinceau
 Bigarement est peinct, nez nuz, & sans coquille,
 Qui leur serue au besoing d'asseuré domicile:
 Qui avecques le pied est leur chef escrasant,
 Leur faict vomir leur pierre au lustre clair-luyfant,
 Qui en vin blanc la boit en poussiere reduitte,
 Pour ne reuenir plus, met la Collique en fuitte.
 Qui le gayet bruslé és ondes qu'il ne craint,
 Et qui estre ne peut que dans l'oline esteinct,
 Pierre chasse-demon, lisse, luyfante & noire,
 A faict huiet iours durans vne dragme en vin boire:
 Poudroyé finement, chassera le plus fort,
 Ce demon, ce felon qui les ventrailles mord:
 Mais que le gobelet auquel la poudre il hume,
 De sa fumee obscure huiet iours durans parfume.
 Qui la roche glacee hume encor du crystail,
 Victorieux pourra triompher de ce mal.
 Et l'ambre que les seurs de Pheton ont ploree,
 Luyfante, tirepaille, à la couleur doree:
 Peut en moins de trois iours broyee & prise à iun,
 Chasser sain & gaillard ce tourment importun.


LA COLIQUE.

Qui d'un brassélet creux & d'or son bras embrasse,
 Où, d'un enfant naissant le nombril on y enchasse:
 Qui porte de la toile où est empaqueté
 Le chef du fruit humain, qui heureusement né,
 Reçoit de Jupiter son heureuse influence,
 Dessus du mal cruel l'orgueilleuse puissance.
 Et qui l'onde boira, où le genital nerf
 Du cornu, du léger, & du timide cerf
 A tout un iour plongé, ou bien qui fend & ouvre
 D'un herisson le corps, la taye en prend; que couure
 Et tendue au dedans que l'estomach comprend,
 Chascun selon son sexe ou l'un ou l'autre en prend.
 Boy durant ton angoisse escargots que l'on pile
 Avecque de la myrrhe, avecque leur coquille,
 Ou leur bouillon baueux: de ces encoquillez
 Soient dans un four ardent logis & corps bruslez.
 Pour en gobber la cendre, on sèche, on ard, on broye,
 Pour l'engloutir apres, d'une cheure le foye:
 Du pontique coudrier, qui porte enclos son fruit,
 Dans un estuy de bois, dont le charbon enduict
 Sur le front des enfans, l'œil vert, bleu, ou roux change
 A la triste couleur, qui souuent ce fruit mange:
 Ou qui sa cendre grise hume en quelque liqueur,
 En la guerre intestine il sera le vainqueur.
 La banira du tout, qui un gros d'ordinaire,
 De l'orange au teinct d'or prendra l'escorce amere.
 Le fruit du citronnier au feuillage espineux,
 Le fruit du grenadier farcy de grains vineux,
 Tout autant en feront, si on boit leur escorce.

Boulet Agarien tairay-ie icy ta force?
 Contre tous maux secrets, & qui blanc & leger,
 Contrains, pris en vin doux, l'ennemy desloger.
 Comme celuy qui boit de la cire fondüe,
 Et qui vne noysette au col porte pendue,
 Comble de vif argent le pere des metaux,
 La memoire abolist du pire de tous maux.



A MONSIEVR LE MARESCHAL
 de Cossé.

 Que peusse-ie voir aussi clair en la goutte
 Que Lyncé qui les dieux & les Manes peut voir:
 Qu'encor eusse-ie autant qu'Apollon de pouuoir,
 Qui voit tous les secrets de la nature toute.
 De son fils barbe d'or qui met la parque en routé,
 Et qui reconst les morts, eusse-ie le sçauoir,
 Je pourrois mon seigneur à voz gouttes pouruoir:
 Mais las! comme l'on dit, en goutte on ne voit goutte.
 Orphee appaizà bien par les saintes douceurs
 Deses vers, les enfers, le Roy & les fureurs:
 Voyez si par les miens qu'humble ie vous desdie,
 Vous pourriez adoucir la fille de Pluton,
 Que Megere alaitta, que conceut Alec-ton,
 Pere, mere & nourrice à vostre maladie.



LES GOVTTES, EXTRAICT DE
L'ESCVLAPE DE R. BRETONNAY AV A. M.



Trois & quatre fois en la malheure né,
Qui eternellement fut des cieux cōdamné
A souffrir en son corps la peine intollerable
De la goute enragee, horrible, abominable
Inuincible, & qui fait trembler mesme les
dieux.

Un nom plus que la mort, aux mortels odieux,
Tiran, inexorable, & qui bourrelle & gesne,
Inhumain, les humains d'une peine inhumene:
Le tirant, l'estorçant & l'estreignant si fort,
Qu'il n'a desespéré plus qu'en la seule mort
Refuge, ny recours, que tant plus il appelle,
Beaucoup moins que le mal se demonstre cruelle:
Sourde le laissant viure, un tourment si tres-grand,
Qu'un plus grand le penser ne conçoit ny comprend.
S'il est vray qu'aux enfers les fautes on punisse
Qu'au monde on a commis, par quelque grand supplice:
Punir il ne falloit d'Ixion le peché,
Le contournant au tour d'une rouë attaché;
Faire perir de soif, mourrir de faim Tantale,
Ny faire que Sysiphe un roc monte & deuale.
De tous les maux que l'homme onques commis auroit,

Pour sa punition, la goutte suffiroit:
 Voire eust-il massacré, comme un Oedippe inceste,
 Celuy qui l'engendra, plus felon qu'un Thieste,
 Celle qui l'enfanta, la goutte seulement
 Suffit pour le punir d'assez cruel tourment.
 Comme l'Athé d'Homere à pas hastez s'auance,
 S'en saysiner des corps, lors que moins on y pense:
 Sur noz testes marchant d'un pied viste & soudain,
 Pour nous surprendre aux pieds, aux coudes, à la
 De là dedās le creux plustost qu'une saiette, (main.
 Des hanches, de l'espaule & des genous se iette,
 De ioincte en ioincte errant, qu'elle brise & deioinct
 Faict les os craqueter, ses griffes les estreinct:
 Tire, rompt & démembre, enflamme, gele & perce,
 Ronge, froisse, déchire & tous ces maux exerce,
 Sans playe & sang respandre, on se pense estre épris
 De quelque sorcelage, ou de quelques esprits:
 Mesme lors que chacun espere plus de ioye,
 Que la terre laissant son dueil, verte s'egaie,
 Que Zephir soupirant gracieux parmi l'air,
 Des arbres mollement fait les fueille trembler,
 Que Progné mariee à Theree en malheure,
 Entre nous cherche encor à faire sa demeure.
 Et que le rossignol, Philomene iadis,
 Rechante les regrets de son nepuen Itis:
 Secrette elle se glisse & traitresse se cache
 Es replis de noz corps, & si ne veu qu'on sçache
 Son nom triste & infamé, & confesser ne veut,
 Pourquoy elle se plaint, se l'amente, & se deut:
 Honteuse en auant-mot, tousiours excuse fance

LES GOVTTES.

De ce qu'elle est boyteuse elle dict estre cause,
 Que son pied s'est entors, qu'un nerf est tressailly;
 Ou cest qu'en demarchant le pied luy a failly.
 Conuaincue à la fin par la douleur moleste,
 Par signes euidents son nom se manifeste:
 Mettant au desespoir ceux qui en ses liens
 Elle esclaué à iamais, & enrollé des siens.
 Qui pis est errhenee, esclopee & tronquee,
 Tant s'en faut qu'on la plegne, elle est de tous moquee.
 C'est un plaisir la voir miner iusques aux os,
 Les plus braues courriers, plus legers, plus dispos:
 Il n'est si haut monté que le boyteux n'atrappe.
 N'espargnant saincteté de prelat ny de Pape,
 Cardinal, ny Euesque, ell'a ses rets dressez,
 Contre la saincteté des Abbez engressez:
 Les laboureurs des chäps, le pauure & simple pre-
 Et le simple artizan peu souuét elle empestre. (sirs.
 Des Roys, des Empereurs le pouuoir est trop bas,
 Quand il luy plaist de prédre en ses pieges leurs pas:
 Au pris d'elle des dieux la puissance est petite.
 Podagre fut Priam, or qu'il fust du pied uiste,
 A chil, le fut aussi, & Clopante atrappa.
 Celuy qui la Chymere à triple corps frappa.
 Oedippe fut podagre: adionstez à ce conte
 Le biberon Silene, & sa trouppes qui pronte
 Mist les Indoïs à sac, Uli's n'en est-il mort?
 Encor que Thelegone on en accuse à tort.
 Philotecte nauré fut de sa fleche amere,
 Et le braue Telephe, or qu'Hercul fust son pere,
 Quoy? les cieux ne sont pas exemps de ce malheur,

N'a elle faict sentir à Vulcain la douleur,
 (Combien qu'il eust succé de Iunon la mammelle)
 Que souffre ceux qui sont sous la griffe cruelle
 De l'oysseau stymphalide, & Plutus qui du bien
 Qui en terre se rouille auueugle est gardien,
 Qu'il descouure, & qu'il offre au premier qu'il rencontre.
 N'a il aussi esté gybier de ce fier monstre?
 C'est elle, & non Titid qui Mars nauurer oza
 En la cargue troyenne, & la dextre blessa
 De sa mere Venus, voyez qu'elle est l'audace,
 Le meschant naturel d'une bastarde race,
 De se prendre à sa mere: & vous autres soudards,
 Qui de Mars & Venus suyuez les estendarts,
 Et des douceurs du vers auez l'ame rauie,
 Pensez-vous que la goutte espargne vostre vie?
 Par diuin priuilege ell' a dessus les corps
 Obtenu plein pouuoir, pour garder les thresors:
 Pour estre vn guet veillant sur la toison doree,
 Qu'a l'auaricieux pour Dieu seule adoree.
 Dieu pour punir ce crime encontre luy commis,
 A l'idolatre auare à se monstre soumis:
 Qui iamais ne deffaut à comparoistre au terme
 Qu'il luy est assigné, depuis l'œil ne luy ferme,
 Tousiours est en alarme, en ceruelle, & de peur
 Luy bat en la poytrine incessamment le cœur.
 Le colchique serpent qui sur la toison veille
 Que l'auare gouteux ne faict veille pareille,
 Au moindre bruit qu'il sent, il pense auoir ouy
 Vn larron deterrant son argent enfouy:
 Tousiours à l'œil dessus, & maugré luy sommeille,

LES GOVTTES.

L'importune Harpie aussi tost le reueille.

On tient qu'elle fut fille à la belle Cypris,
 Et du faict de Bacchus de son amour epris:
 Qu'és cieux elle nasquit, mais soudain que la mere
 La vit tant contrefaicté, infame vitupere,
 Vn monstre si horrible, effroyable & hideux,
 Ayant croche la main, les pieds forts & crochus,
 L'ongle croche & le bec, le corps d'une venue:
 Qui courbé & nouëux sans ioinctes continuë,
 Sans nerfs, sans mouuement, toutefois sans repos,
 Donnant du nez à terre, & qui n'a iamais clos
 La bouche ny les yeux, qui d'une voix felonne
 Cent mille maudiffions execrable se donne:
 Comme qui a marché par megarde un serpent,
 Toute trembla d'horreur, voyant tel son enfant.
 Ains qu'on s'en apperceust elle desrobe & serre,
 Et l'enuoye nourrir secrettement en terre,
 Or pour mieux receler son infame peché,
 Ce part incestueux a dans le corps fiché
 Des auaricieux, auant dans la ioincture,
 Où, oysine, elle prent sa propre nourriture.
 Elle y croist & s'y paist d'humeur visqueux & lêt
 Qui est dedans la boyte, où l'os se va roullant,
 Et n'en partira point que la mort de son hoste,
 L'ayant de comble en fond tout mangé, ne l'en oste:
 La mere qui ne peut, or que l'enfant soit laid,
 Hair son propre sang, puis que falle ell' a faict,
 A nourrice l'enuoye à madame Richesse,
 Pour les ayles auoir & biens à grand largesse,
 Nourrice luy falloit qui eust un tel moyen,

Pour estre bien traitee, & ne manquer de rien.
 Non pas la pauureté, qui se tuë & consomme,
 Pour sa vie gagner, qui iour ny nuict ne chomme:
 Qui au serain se loge à la pluye & au vent,
 Et qui son soul de pain n'a pas le plus souuent.
 Sous le planché des cieux ou bien deffous l'enseigne,
 De la toille poudreuse à la pendante araigne,
 Sur la dure couchee on-repose son corps,
 Rendant par ce moyen sés membres durs & forts,
 Contraincte par la faim estre de peu contante:
 Et contre sa fortune auoir l'ame constante,
 La goutte qui se fourre auant-entre les os,
 Aymant à rien ne faire, vn repos sans repos:
 Et qui cent fois le iour, tendrette & delicate,
 Se faire remuer d'une main, qui la flatte:
 Comme l'enfant du bers, n'auroit aucun plaisir
 Chez le pauure qui n'a vne heure de loysir.
 Il ne merite aussi de loger telle hostesse,
 Fille d'un puissant Dieu, & d'une grand' deesse.
 Venus fist sagement, tel enfant estoit deu
 A qui faict icy bas d'or & d'argent son Dieu:
 Des mortels la ruine & de tous maux le prince.
 Lequel pourtant qu'il craint & la touche & la pince,
 Et qui plus que le vent est muable & leger:
 Toujours prest à fuir, prompt à maistre changer:
 Plus lubrique & glissant qu'une bourbeuse anguille,
 Qu'arrester on ne peut, à tenir difficile,
 A qui on ne se doit aucunement fier,
 A bondroit on enferme entre des murs d'acier.
 Ainsi que Danaë, & pour le garder vierge,

LES GOVTTES.

La goutte il luy falloit pour fidelle concierge,
 Plus qu'Argus cler-uooyante, & que Lyncé encor:
 Pour reuiciller son hoste & pour garder son or.
 Luy de l'autre costé recognoissant la pene
 Que luy donne & luy faict son hostesse inhumene,
 Humainement la traicte, & flatte nuict & iour,
 La careffe & courtise, & dorlote tousiour:
 La pry que contre luy despite ne se fasche,
 La sert, honore, adore, à fin qu'elle relasche,
 Tant soit peu, la rigueur qu'ell' tient à son amant.

O deesse qui a le cœur de diamant,
 Un indonté courage, escoute ma demande.
 O Royne des tourments, dont la puissance grande
 Redoute Iupiter & en tremble de peur:
 O qui craindre te fais iusqu'en en la profondeur
 Du sejour de Neptune & que Pluton son frere,
 Encor qu'il soit superbe, humble & craintif reuere,
 Garde liët, arte-pied des doigts qui fais des nous,
 Deuant qui les plus grands flechissent les genous,
 Les pieds & mains liez, & deuant qui faut tendre
 Tapis pour n'offencer des pieds la sole tendre,
 Tu fais craquer noz os, tu etire noz nerfs,
 De sang la vene epuise: en somme l'uniuers,
 Et tous ses habitans ont ta force cognuë.
 Nul encens ne t'appaiZe, & n'es point retenuë
 Par sacrifice aucun, ny par sang rependu,
 Oblations, ny veu, sur tes autels pendu.
 Machaon, Podalire, Esculape & son pere,
 T'ont faict ce qu'ils ont peu, & si n'ont peu rien faire,
 Herbe aucune il n'y a, racine, sueilie ou fleur:
 Fruict, semence, ny ius, ny larme, ny liqueur,

Ny animal aucun mis en dix mille pieces,
 Lait, date, ny fient, os, moïelles & gressés:
 Ny mine, ny metal sous la terre trouuë,
 Que l'on n'ait dessus toy, ô Deesse, esprouuë.
 On est allé pour toy aux puantes sorcieres,
 Aux charmeurs, en voyage, aux deuotes prieres:
 Qu'en est-il aduenü? quel secours, quel effect?
 Plus ils t'ont irritée & pis tu leur as fait,
 Pour le iuste loyer de leur peine perduë,
 Desesperez ils ont mainte larme espanduë.
 Mais ceux qui contre toy tels cas n'ont attenté,
 Traictable t'ont cognuë, & plus douce as esté.
 Deesse à qui la terre & les cieux font hommage,
 Viens adoucir mes maux & mes tourmens soulage.

Que malheureux tu es, ô qui la fers, combien
 Que mille maux t'ait fait, tu n'en dis que tout bien.
 Bien que cent fois le iour contre elle tu te fasche,
 Et qu'en grinçant des dents tes angoisses remasche:
 Ne te pouuant tenir ny debout, ny couché,
 Ayant tousiours le dos aux linceux attaché,
 Les yeux tousiours ouuerts, qui ne voyent que l'ombre
 Du iour, par le trauers d'une verriere sombre.
 Si ne voudrois-tu estre exempt de ce malheur,
 Et crois que ce malheur porte quelque bon heur,
 Et que sans ce malheur tu ne serois pas riche:
 Car ce malheur iamais chez les pauures ne niche.
 Aymant mieux auoir mal que du tout n'auoir rien,
 Auoir beaucoup de mal auëcque vn peu de bien.

Mais qui est plus fantasque, & plus forte à cognoistre,
 Que son bizerre humeur? ores elle veut estre

LES GOVTTES.

Chaudement, mais bien tost du froid elle voudra.
 Si tu la flatte & oins ingrater ell poindra.
 Si rudaier la veux, tu modere son ire:
 Tant moins on la tourmante & plus aigre elle empire.
 Elle est abandonnee à la lubricité,
 Tenant ce vice-là du maternel costé.
 Car lors qu'elle est en rut, or' qu'il luy soit contraire,
 Paillardes, autre mestier ne voudroit iamais faire.
 Du ciel elle cognoist les reuolutions,
 Et des quatre saisons scait les complexions.
 Iour & heure predict, & d'un seul point n'y erre,
 Qu'il fera pluye ou vent, froid, chaut, nege ou tonnerre.
 Et boit comme un templier, & tousiours du meilleur,
 Que bien tost luy vendra chèrement la douleur.
 Mais son plus grand plaisir est l'entreprise vaine,
 De quiconque la veut vaincre par force humaine:
 Et s'esclatte de rire alors que son venin
 A trompé le sçauoir de quelque medecin.
 Or pensoit bien Venus, qui sa fille deteste,
 Qu'on ne cognoistroit rien, en son faict deshoneste.
 Mais elle sabusoit, tandis que ieune elle est,
 Petite, & en maillot, aucun ne la cognoist.
 D'elle ne faict parler: son nourricier encore
 Ne la craint ny la doute, & ses parens ignore.
 Mais l'enfant genereux, & deuenu plus grand,
 Se faict desia tenir, & veut garder son rang:
 Et si se faict accroire, instruite de nature,
 Qu'ell a tiré d'en haut sa noble geniture.
 Qu'elle est des dieux issuë, & maugré ses parens
 Reconnoistre se faict par signes apparens.

*A doree veut estre & deesse tenuë,
 Fille des immortels & des hauts cieux venuë.
 Veut qu'on luy dresse autels, qu'on luy rende des vœux,
 Non de boucs, ny taureaux, ny centenes de bœufs:
 Larmes, souspirs & cris, pour son seruice ordonne,
 Deux fois l'an pour le moins, au Printemps en Autonne.*

*Le chef de Iupiter de chesne verd est ceinct,
 A Bacchus le lierre, & le laurier est saint
 A Phœbus, & le meurte à Venus cytheree:
 Mais l'hieble est à la fille deuotement sacree.*

*Iupiter foudroyant a le tonnerre ardent,
 Et du grand Dieu marin le sceptre est le trident.
 Le petit fils d'Atlas le caducee porte,
 Dont du ciel & d'enfer ouure & ferme la porte.
 L'Egyde est à Palas, dont le regard affreux,
 Peut empierrier quiconque y adresse les yeux.
 La faux est à Saturne & la hache felonne
 Est à Mars, à l'Amour arc & flefche l'on donne.
 Le beau ceste est l'enseigne à la belle Cypris,
 Mais sa fille vn baston tout noüailleux a pris:
 Baston, qui doit seruir de compagnon & ayde
 Au corps pris par les pieds que la goutte possede.
 Tiers-pied, di-ie, qui doit plus ferme soustenir
 Le corps qui ne peut plus sur les siens se tenir,
 Pour estre appuy fidelle, & de guyde par voye,
 De peur qu'il ne trebuche & le pas ne fouruoie.
 Verifiant le doubte auant que d'estre vieux,
 De sphinx trois fois formé, trois fois malicieux,
 Que l'homme en son enfance à quatre pieds chemine,
 Puis à deux, puis à trois quand sa fin est voisine.*

LES GOVTTES.

Honteux ie te supply' qu'en la mauuaise part
 Mon discours tu ne prenne, yrongne, ny paillard?
 Personne ie n'appelle, à tort mainte ioincture,
 Et du chaste & du sobre endure ceste iniure.
 Ne donne à l'affligé nouvelle affliction:
 Il y peut bien auoir quelqu'autre occasion,
 Que qui mortellement te fist au monde naistre,
 Te fist à luy semblable, & goutteux te fist estre:
 Ou c'est de ce grand Dieu le tresiuste vouloir,
 Duquel tu ne te peux ny plaindre ny douloir.
 Mais ce qui me despite, est que ceste harpie,
 D'œil traistrement malin tousiours les grans espie:
 Leur met les fers aux pieds, les manotes aux mains,
 Et enuieusement gaste les beaux desseins:
 Des hommes genereux, comme à vous, qui la France,
 Monseigneur, auez mis hors de longue souffrance.
 Iadis son Diomedé or' son facond Néctor,
 A la guerre, au conseil: & qui estes encor
 De nostre grand Achil' le Chyron iuste & sage.
 Mais que gangneras-tu, ô des rages la rage,
 Combien que sur le corps tu monstre ton pouuoir,
 Si n'as-tu, enragee, en son ame que voir:
 Dont le prudent aduis fait en France reuiuire,
 La douce paix encor' du faux subçon deliure,
 Chassant la guerre au loing dans les terres de ceux:
 Qui nous l'ont enuoyé, & s'en moquent ioyeux.
 Que laisser puisés-tu, furie intolerable,
 Les membres opprimez de ce chef venerable:
 Pour piedz, bras, anches & mains, saisir, tenir, serrer,
 De ceux qui tant de maux nous ont faict endurer.

Ne permets donc iamais que ceste plante immonde
 Iette dedans ton corps sa racine profonde,
 Et s'epande par tout: si le temps opportun
 T'eschappe paresseux, n'y a remede aucun,
 Aucune herbe il n'y a, fucille, racine aucune,
 Qui t'oste désormais ceste peste importune:
 Comme quand un bon vin est du tout aigre ou bas,
 Sa premiere bonté ne se recouure pas:
 Pendant que tendre elle est, & n'a gasté la masse
 De tout le sang, il faut que prompt secours tu brasses.
 Ains que ceste Harpie és miserables corps
 Ait plus auant fourré ses crochus arigots,
 Coupe luy le chemin, & ne vueille permettre
 Que sa serre tortue ell' ait loysir d'y mettre.
 Comme Zethe & son frere, enfans d'un vent leger,
 Contraignirent ses seurs qui venoient pour manger
 Les repas de l'hyuer, à debuquer grand erre:
 A ce monstre d'enfer ie veux faire la guerre.
 Ie la veux estouffer ains que plus fort ait mis
 Ses crochets plus auant és mal-heureux replis
 Du pauure corps humain, suiuant l'ele haultene
 Du docte Sammonic, du grand Quinte Serene,
 Grand poëte & medecin lignage d'Apollon:
 Comme les fils elez du frilleux Aquillon.

Si la sciatique doncq' des Dieux la main terrible,
 De toutes les fureurs la plus fiere & horrible,
 Des gouttes la princesse, & dont l'extreme mal
 Passe tous ceux qu'on dist estre au gouffre infernal:
 Au despourueu te happe, & que l'ente se glisse
 Dans la concauité de la hanche, où la cuisse
 Se roule & se conioinct avecque sa maistresse:

LES GOVTTES.

Sur lequel vont tournants tous les verteils du dos.
 Lors tu la sentiras forcener enragee,
 Et repoussant la cuisse en sa boette rangee,
 Un mal faict incroyable, adoncq' on ne peut pas
 Esfrené, eshanché auancer vn seul pas.
 Des filles de Clymene és bords du Po plantees,
 Qui pour des cheueux blonds ont fueilles argentees,
 Et qui pleurent encor, l'ambre à la couleur d'or,
 L'escorce donne à boire, epreins le ius encor
 Des fueilles du genet qui souples verges porte:
 Ses verges trempe en vin à l'odeur aigre & forte.
 Mets la garance avecq' dont la viue couleur
 Imite d'Adonis la printaniere fleur.
 Des escargots baueux à la conche tournee,
 La chair dedans du vin à boire soit donnee:
 Si on donne loysir à la triste langueur,
 Es membres assaillis prendre force & vigueur,
 Et la foible iointure assiege opiniatre,
 Mettant le pauvre corps en vne longue chatre.
 Au figaier, qui ne craint les menaces du ciel,
 Allie incontinent la iotte avecq' le miel,
 Brouille-les & remesle: avecq' l'onde marine,
 De Bacchus ioins le don qui le courage anime,
 Qu'à boire tu prendras, cependant garde toy
 De la sobrieté n'outrepasser la loy:
 Que ceste grand' douceur traitresse ne t'aleche,
 Et ne face en ton corps à l'ennemy la breche.
 Qu'il ne t'en prenne autant qu'au bon hõme Ennius,
 Qui iamais ne chantoit des hommes ny des Dieux,
 Ny leur braues exploiëts, ny leur belle victoire,
 Qu'à sec premier n'eust mis mainte couppe à bien boire,

Mais sans s'en auiser ce mal, qui traitre & fin,
 En beuant le surprint, se cachoit dans le vin.
 Qui le va doncq' cherchant n'a que ce qu'il merite,
 Il ne vient que trop tost sans qu'à boire on l'inuite.
 Ne desespere point qu'on ne trouue remede:
 Au mal qui furieux & insensé possede
 Les pieds, le fondement sur qui l'homme est planté,
 Qui son nom odieux a des pieds emprunté,
 De la goutte inhumaine vne des seurs germanes,
 Que le ciel suscita pour les fautes humaines,
 Toute semblable au pere, & fille de Venus,
 Vaine, molle, faict-neant & poltronne comme eux,
 Que le fils d'Apollon dit de trois formes estre,
 Vne qui ne commence en chatouillant qu'à naistre.
 L'autre ardente se gonfle & colere se teint
 Des couleurs dont le nez du bon Denis on peint.
 La tierce durement s'empare de la place,
 Ne craignant medecin qui desloger l'en face.
 De la vaincre & deffaire il n'y a plus moyen,
 Y fusse-tu toy mesme, ô Epidaurien:
 Uray est qu'on la peut bien d'vnemain douce & souefue,
 En la flattant induire à donner quelque trefue:
 Et selon qu'on luy donne ou du froid ou du chaut,
 La douleur s'amodere ou redouble l'assaut.
 Sus doncq' puisque par fois manier ell' se laisse,
 Que les fueilles on cherche & l'escorce qui presse
 Les saules riuageux fecondement branchus,
 Qu'on les broye & marie aux presents de Bacchus:
 Soient frottez d'vne main de leur ius molle & oincte,
 Les nerfs, quitressaillants s'en retirent de craincte.

LES GOVTTES.

Ou si tu t'apperçois qu'elle face semblant
 De se vouloir ruer sur le pied ia tremblant:
 Sçais-tu que tu feras, d'une constance dure,
 Les cauterés ardents sur les plantes endure.
 Ou ouvrant l'estomach d'un bouc demi mourant,
 Où l'ame par la playe est encor' sousspirant:
 Les pieds mets dans son ventre, ainsi à ceste peste,
 On tranche le chemin, que tout homme deteste.
 Mais si l'humeur peruers a desia tant gagné
 Sur toy, qu'il y voulust tenir fort, obstiné,
 Obstiné plus que luy, plustost que de te rendre
 Rempare toy, & pren la mie d'un pain tendre,
 Du fueillage haché du Cypres porte-ducil,
 Du vin couuert & brusque, & fais un appareil,
 Qu'appliquant sur les pieds mettras fin à tes larmes:
 Ou si du suif bouquin & d'hiebles tu les armes.
 Qui en vinaigre aigu a detrempé la fleur
 De l'honneur de Ceres, de ce mal est vaincueur.
 L'huile, dans qui la chair de la grenouille est cuitte,
 Y est pareillement vtilement enduite:
 Le vinaigre piquant anecq' le sel confus
 Y sert, y adioustant de l'esclaire le ius:
 Et la san sue aussi inhumainement gloutte,
 Avec le sang des pieds, hūme & tire la goutte.
 Ce n'est point un rapport de quelque bruit leger,
 Ie l'ay leu dans autheur qui n'est point mensonger:
 Un quidam se trouuant un iour dedans son aire,
 Où le vent costoyant try' la balle legere
 Du grain volant à part, comme il se sent saisi
 Du mal, qui fait le sourd à qui luy cry' mercy,

Et voyant deuant soy de blé une mont-ioye,
 Fust la rage ou le sort qui luy monstra la voye,
 Le pied dedans il plonge, ô sort ingenieux!
 Tu fais, sans y penser plus que l'art curieux,
 Miracle, la douleur fit tost place au remede,
 Comme si Dieu expres fust venu à son ayde.



DES HEMORRHOIDES, EXTRAICT
 DE L'ESCVLAPE DE R.B.A.M.



(meure,
 Comme l'on voit rougir sur son arbre la
 Qui sage à faire fleur la dernière demeure:
 Comme l'on voit les grains sur la grappe
 grossir,
 Ainsi au fondement voit-on souuēt noircir
 De gros boutons de sang, que la nature humaine
 Tasche d'espanouir, deschargeant la grand veine,
 Le foye, & mesentere, & la rate, & les reins,
 Quand le sang est mauuais ou qu'ils en sont trop pleins.
 Par des conduicts expres qui droictement descendent,
 Où les gros excremens d'ordinaire se rendent.
 Garde de retenir ce sang noir & infect,
 Retenu, un degas de tout le corps il fait.

DES HEMORRHIODES.

Il regorge aux poulmons au cerueau & au foye,
 Ou leur chaleur estinct, ou leurs esprits il noye.
 Tous n'y sont obligez, ains tant seulement ceux
 Que le malin Saturne à veu n'aistre des cieux.
 Mal, & non trop grand mal: car Hippocrate afferme
 Qu'il est bon que le corps se purge à certain terme,
 De la goutte potine & rend du lepre franc:
 Il escure les reins, & la mere, & le flanc:
 Que l'ame il assagist de vapeurs obscurcie,
 Iette les songes-creux hors de la fantaisie.
 Car si le sang est pur dont les esprits sont nez,
 De l'ame table rase instrumens destinez.
 Si seche est sa vapeur l'ame sera tressage,
 Auertant d'Heraclit' le tenebreux adage.
 Ce degout limonneux coulant hors des vaisseaux,
 Exempte les humains de mille & mille maux.
 Si ces bourgeons enflez & retenans le sang,
 Durs te font endurer vne passion grand:
 Bonne y est la racine à la vigne porrette,
 Pourueu que d'une noix en la coque on la mette,
 La coque sur le mal: mais bien garder se faut
 Qu'on ne blesse le sain par le secours trop chant.
 Tu prendras du sel blanc de grenadine motte,
 Dont le rouge surgeon de la morene frotte,
 Ou de la suye encor merque de feu esteinct,
 Don son image ombreux le peintre docte peint:
 Auecques du miel en l'appliquant meslee,
 Faiet cesser les douleurs de la moruë enflee.

Si ces cuisans boutons sont plus que feu ardens,
 Fay bouillir en de l'eau pour les bagner dedans,

La guymarue & la mauue, & la fleur odorante
 Du gentil melilot, & l'autre iaunissante
 De la mille-pertuis, de qui les saints parfums
 Font, ce dit-on, fuir les ombres des defuncts:
 En la graine de lin, l'ulcere douloureuse
 Oincte d'huile rosat, de lytarge & ceruse,
 S'appaisera tantost, mais plustost ce sera,
 Si on y mesle avec des larmes de Myrrha,
 Et de l'encens sacré, par la liqueur espreinte
 Du pauot incisé, ceste ardeur est esteinte:
 Si du saffran de Tyr y ioins le cheueu blond,
 D'un œuf au feu durcy on prend le moyen rond,
 De la puciere graine estreins le mucilage,
 Tous ensemble brouillez ont dompté ceste rage.
 L'herbe qui mieux ressemble au serpent terre né,
 Qui naist au temps qu'il sort, quand il est retourné
 Au ventre de sa mere, aussi l'herbe se cache,
 Marquetant sur son dos, comme luy, mainte tache.
 La ré feras rostir sous un brasier ardent,
 Et celles-là d'arum au goust acré & mordant:
 Les fueilles du plantain, & du pourreau les fueilles,
 Les fueilles & les fleurs, des bouillons font merueilles.
 Et le iaune d'un œuf, & le pain bien fresé
 Ont ces grandes chaleurs meslangez appaisé.
 La morene s'accoise alors qu'on la parfume,
 A la vapeur qui sort du bouillon qui s'allume:
 Le suc du pourpié gras ou tout le simple cuit,
 Y sert avecque un œuf entierement enduict.
 Ou avecque l'onguent qu'on fait du bourgeon tendre,
 Qui du peuplier commence ores l'escorce fendre.

[DES HEMORRHOIDES.

L'huile qui des noyaux de pesches est espreinct,
Fort singulier y est, si le mal en est oinct.

Du ius de iusquiam? & celuy que l'on presse
Du senegré cornu, frotté, la douleur cesse.

Que si la vene seigne, & que le sang meilleur
Se gastant, gaste aussi la meilleure couleur:

Du lieure grand aureille il sera bon de prendre
Le poil mollet & doux, de l'endroit le plus tendre,
Et du Dragon le sang vermeillement espez,
De l'elephant blezé, qui creue sous le faix.

Ta composition tu rendras plus puissante,
Y ioingnant le bouton de la fleur rossoyante

Du grenadier piquant, avecque des blancs d'œufs:
Ce flux arresteront appliquez par dessus.

La toile d'Aracné où la fleur est volée
De froment, le reserre, estant dessus collée.

Ards la cime bourruë & en cendres reduy,
De l'herbe pied de lieure, sur la playe l'enduy.

De chouz, de coques d'œufs, les esteintes flammesches,
Cendre de tartre gris, poudre des os de seches:

Poudre de coupperose, un humeur congelé
Es veines de la terre, & de l'alun bruslé,

Il te faut saupoudrer la sale Hemorrhöide.

Iette encor sur-ce mal deshoneste & humide,
De l'aloe poudroyé en vin cuit espeszy,

Du geneure odorant iette-y la gomme aussi:
N'oubly d'y ioindre l'huile où la rose fleurie

A trempé, ou bien l'arbre à Venus fauorie.

Le rosmarin fueillu, le roncier espineux,
Cuits, & dessus enduicts sechent le mal seigneux.

L'herbe

L'herbe que les bergers ont appellé leur bourse,
Cuitee appliquee a mis tout à sec ceste source.

Ars du liege leger la renaissante peau

Brusle le plomb pesant, les plumes d'un corbeau

Les cendres sursemant sur la sanglante meure,

Tout court le sang fuiant dans sa veine demeure:

Il se guerist du tout du mal trop ennuyeux,

Qui des bougranes boit le bouillon ou le ius.

Si la meure est profonde à l'œil non descouverte,

Vne cyboule cuy sous les cendres couuerte:

Mets du vinaigre avec & l'amer verdoyant

D'un bœuf, dans un mortier le remuant, broyant

Souuent, l'appliqueras, si elle est aperçue,

Perce-la moy hardy, attache y la sang-süe.

L'herbe, ou ius formiant de l'ortie qui put,

Autant que la sang-süe ou la lancette peut.

Des fueilles de figuier ou de l'apparitoire,

Aspre froite les bouts de ton ampoule noire.

Qui du ius de cyclame a son mal fomenté,

Ou qui de sa racine a ses tumeurs frotté:

Qui en vinaigre fort un ongnon cuit demesle,

Qui de la colocynthe applique la mouëlle,

Qui les estuue d'eau où le petit centaur

Sera pourry de cuire, où de l'aluyne encor

La racine a bouilly, de la flambe ou aurnone,

De la Brione aussi & amere maronne.

A l'huile de moustarde il faut ioindre le sel,

La siente de pigeon, l'amertume du fiel.

Tous ensemble pillez l'Hemorroide s'ouure,

Si de cest onguement tu la touche & la couure.



A MADAME DE LA VALETTE.

N On, ce n'est pas pour vous que ces fards ie compose,
Vous n'en auez besoin: tout ce qui plaist le mieux,

Vous l'aeuz sur le front, aux sourcils, & aux yeux,
Vostre teinct est d'ivoire & voz leures de roses.
Tout vostre corps est beau, mais c'est bi n peu de chose,
Au regard de l'esprit, le plus beau qui des cieux
Vint onques en la terre, où à l'enuy, les Dieux
Ont chacun leur vertu diuinement enclose.
C'est toutes fois à vous que ie les offre, affin
Que celles qui n'ont eu le ciel autant benin
Que vous, vous leur soyez un exemple, un modellersi
Où chacune pourra tirer le plus parfaict,
De l'esprit la bonté, du visage, le traict,
Pour estre vertueuse & pour estre plus belle.



LA COSMOTIQUE ET ILLVSTRA-
TION DE LA FACE ET DES MAINS,
extraicte de l'Esculape de R. Breton-
nayau. A. M.



E l'Epidaurien aprenez, damoiselles,
Les souuerains secrets pour vous mainte-
nir belles:

Car pas vne n'ya deffous le ciel vousté,
Qui n'enuie le prix de la prime beauté,
Que le berger arbitre entre les trois deesses,

A Venus adingea d'Ide es forests espesses:
Icy souiller ne veux vostre precieux nom,
Que i adore, deuot, & le chaste renom,
Qui, brane, vers le ciel vous faict hausser les testes.
Et vous faict appeller belles, chastes, honnestes.
C'est le grand poinct d'honneur, vostre honneur excepté,
Thresor vous n'auetz point plus grand que la beauté,
Priuilege diuin qu'à peu le ciel octroye:
Puissance, deffous qui toute puissance ploye.
Sans vser de contraincte ains volontairement,
Toute chose obeyt à son commandement.
Elle contrainct les dieux en la terre descendre,
Et le mortel aux cieux monter ose entreprendre.
La lune tous les mois voit son Endimion,

LA COSMOTIQUE.

Pour vne Iunon feinte au ciel monte Ixion.
 Tous ces dieux amoureux (croyez les fables vaines)
 Masquez viennent souuent voir les beautez humaines.
 La voix se tait sans elle, & si peut toutefois
 Commander l'impossible & le faire sans vois.
 Ce n'est que charité, vn bien qui plus apporte,
 De bien, à qui le voit, qu'à celle qui le porte.
 Un bien qui n'est par fois que par la foy aymé,
 Bien, qui ne couste rien, mais le plus estimé.
 Aussi dans le beau corps habite la belle ame:
 Le laid quoy qu'on en die est la prison infame
 De l'ame laidde aussi: car la complexion
 Des parties du corps suit la proportion.
 La beauté est le but, où l'œil de la nature
 Vise ententiuement formant sa creature:
 Autrement elle mesme a de son fait horreur,
 Si son œuure n'est belle, & s'elle y voit erreur.
 Farder est imiter l'Eternel Architecte,
 De la terre habitable, & de l'arche celeste:
 Conseruer ce qui est, supplier au defaut,
 A ce qui n'est parfait adionster ce qu'il faut.
 Ce fut pourquoy Bias, & Socrate le sage,
 Aduisoit vn chascun à reuoir son image.
 En la fidelle glace, afin de reformer,
 Sur le beau corps, l'esprit qu'on doit le plus aymer.
 Ce grand tout ne seroit qu'une confuse masse,
 Sans ordre, sans compas, sans mesure & sans grace,
 Si peint n'auoit esté de mille fards diuers,
 L'air est blanc, le feu rouge, & les hauts cieux sont pers,
 Tous brillants de flambeaux, & la mer azurce,

Et de toutes couleurs la terre bigarree.
 Il n'y a corps compris deffous le caue enccinct
 Des cieux, viuant ou non, que nature n'ait peint.
 Mesme celuy de l'homme à tous moments se muë,
 Comme l'aage & le sang croist ou se diminueë,
 Brune & noire est la nuict, blanc & clair est le iour:
 Phebus a le poil blond, & la lune tousiour,
 Soit quelle soit tardine ou soit qu'elle s'auance,
 Errante dans son ciel y fait mainte muance:
 Or' rouge, or' blaffarde, or' blanche comme laiët.
 Au ciel dedans la nuë on voit vn arc pourtraict,
 Qui de quatre couleurs soir & matin se monstre,
 A lors que le soleil pluuiieux donne contre:
 L'Esté est iaunissant, blancs ou noirs les yuers:
 Mons, plenes & vallons au renouueau sont verds.
 L'automne est piolé, si au ciel tu prens garde,
 Tu vois cent fois le iour qu'il se change & se farde:
 Qu'au iour il n'y a heure, en l'heure vn seul moment,
 Qu'en sa terre il n'y ait quelque deguysement.
 Tant se plaist la nature au change & s'y delecte,
 Que cent fois faict, de faict & refaict chose faicte:
 De mille illusion trompant nostre regard,
 Et pour dire en vn mot, le monde n'est que fard.
 N'en dictes donc point mal vous qui sur le front blesme,
 Hippocrites rusez, portez peint le fard mesme:
 Sans honte confessez que ce n'est point peché,
 Secourir au besoing vn visage entaché:
 Soit que la faute soit du naturel venuë,
 Par vne cicatrice, ou par l'aage chenuë,
 Ou du soleil le hasle ait le teinct obscurcy,

LA COSMOTIQUE.

Ou le froid ternissant son yuoire noircy.
 Ou qu'autre occasion la viue couleur change
 En iaune, ou rouge, ou brune, ou en vne autre estrange.
 Dames, de qui le corps est naifvement beau,
 Entre vous vn noir cigne, vn blanchissant corbeau,
 Qui farder vous vouldroit, seroit, comme qui plastre
 Le marbre, ou qui blanchist d'ancre noire l'albastre.
 Dommage aussi seroit d'un artizan pinceau
 Diffamer ce qui est naturellement beau.
 Pource icy n'y a rien pour vous, mais bien pour celles
 Qui ne sont comme vous si parfaitement belles.

Faire doncq' tout exprés deux vaisseaux tu feras,
 Large, rond & profond sera celuy d'embas,
 Plus que celuy d'enhaut, qui de sa pointe imite
 Des sepulchres l'orgueil des Pharaons d'Egypte.
 D'un de ses flancs fay naistre vn canal long & creux,
 Faict come vn bec de proye, en les coupplâr ton deusx,
 Fay que si iustement l'un dedans l'autre s'ante,
 Que l'enclose vapeur n'euapore & s'euante.

De tes materiaux dont tu veux la liqueur,
 Soient feuilles, ou racine, ou grene, ou fruiet, ou fleur,
 Remply de l'alembic la pansé plus profonde,
 Ioins & plonge son fond en vn cuneau plein d'onde:
 Et de ses trois vaisseaux vn corps soit composé
 Sur vn ardant fourneau soit ferme & droit posé:
 Compassant la chaleur par degres & mesure,
 Selon que cognoistras que la drogue l'endure:
 Dans le recipient bien tost pourras-tu voir
 L'humide euaporé goutte à goutte pleuvoir.

Après auoir appris l'inuention gentile,

Comme un Quint Element des quatre se distile:
 Mets dans ton alembic les fleurs que les François
 Aiment sur toutes fleurs, pour l'amour de leurs Roys:
 Et l'argentine rose, & ceste fleur premiere,
 Qui du printemps, qui tarde à venir, est fourriere.
 De la pudique Nymphe, hostesse des estangs
 La racine distile, ou ses beaux fleurons blancs:
 N'y oubly' celles-là dont les couleurs diuerses
 Imitent l'arc des cieux, blanches, jaunes & perses,
 Et pourprines encor, qui meritent le nom
 De l'aquatique Iris courriere du Tunon:
 Ny les caduques fleurs de la blanche Molene,
 Pour faire le beau teinct voyci la souuerene.
 Dans ta retorte creuse, agence entremeslez
 L'Ambrosienne chair des melons canelez:
 Les racines de lampe à la fueille aiguysée,
 Et du salpêtre en poudre vne once y soit pesée,
 Et deux de tartre blanc, de sept citrons le jus,
 De l'ironde estrangere ecrases-y les eufs.
 Verse sur cest amas d'une cheure laitiere,
 A son retour des champs, la tresse iournaliere,
 Qui a l'eau de plantain, à cinq nerfs remarqué,
 Et l'huile vertueux du Tartre alambiqué,
 Et celuy du Biion, qui a du laiët de vache
 L'esprit euaporé, qui sous le blanc se caché:
 Qui dedans du vinaigre a fait tremper du son,
 Puis la faiët distiller, & le lent limaçon
 Auecque sa coquille, & le peint fasiolle,
 Qui sublime des œufs la coque tendre & molle,
 A force du vinaigre, & qui du plant fertile

LA COSMOTIQUE.

De la ventouse feue a ce diuin outil,
 Des fleurs tire l'humour des fauas de la gouffe,
 Peut l'opprobre effacer de la lantille rousse,
 Et leur farine enduire aux rides de la peau,
 Maint effacé visage a fait raiunir beau.

D'un pain blanc prent la mie, & par dessus epanche
 Blancs d'œuf, ius de limons, & lait de cheure blanche.

De la poudre camphreuse, & le vermeil coral,
 Et l'alun verd glacé, le borax mineral:

Et le blanc Espagnol, mais chacun d'eux dispense,
 Pesant chacun à part, à la iuste balance.

Merueilleuse est ceste eau, l'impetige surbrun
 Par le vinaigre s'oste adioinct au sel commun.

Et l'aloé pour vn tiers: mais de la coluurine
 Cuitte sous cendre chaude applique la racine.

Du Royal Aphrodit d'Hesiodé chanté,
 Qu'Homere aux champs heureux des ames a planté,

La racine accommode en vinaigre bouillie,
 Car par elle est la tache en la face a bollie:

Où le ius y respans de longnon reuestu,
 L'odorant pouliot a pareille vertu.

Du prunier damasquin employez y la gomme,
 Celles du cerisier qu'en cent sortes l'on nomme,

Resoutte en du vinaigre, au nez couperose,
 Le pourreau cheuelu est propice appose.

Plaisante scabieuse, ou soit que tu boutonne,
 Ou que tu passe fleur, mille plaisirs tu donne

Au berger, qui remire en ton chef autant d'yeux
 Qu'en eut l'Alectoride, ou qu'il en flambe aux cieux,

Tu y es secourable, ou qu'on le mange ou boiue:

Ou que dessus la tasche appliquer on te doive,
 Dans le ius de la bette affriandee au vin,
 Contre ce mal on trouue vn remede diuin:
 Celuy, qui du bouleau coule quand on le perce,
 Rendra le teinct plaisant, si dessus on le verse.
 Autant en fait celuy du fresne estant nauré,
 Et l'eau des pieds de veau lequel n'est point seuré:
 Du saule amer la seue en la fleur distillee
 D'un œuf fr ais la sueur en le cuisant coulee,
 Y sont propres aussi, Comble de limaçons
 (I'entens de ceux qui n'ont sur le dos leurs maisons)
 Une cruche à demy, de l'aigreur les arröse
 Du citron Medien qui iamais ne repose,
 Ains en tout tēps se charge ou de fleurs, ou de fruiet
 Puis surseme dessus de ce sel qui reluit
 Plus clair qu'un diamant: au chien celeste expose
 Ce vaisseau qui aura l'emboucheure bien close.
 Vn baume il s'y fera dont qui voudra s'ayder:
 On viendra comme estant refondu regarder.
 D'une legere main qui se contourne & vire,
 De la Ceruse broy' sur l'egal d'un Porphyre:
 De ceste poudre blanche il faut prendre vne part,
 En six fois plus d'eau rose on detrempe ce fard:
 Quand repassé l'aura l'hippocratique manche,
 T'a face il faut mouiller soudain de ceste eau blanche.
 Qui l'humide vertu par ces vaisseaux couuerts
 Abstract des pignolats cependant qu'ils sont verts,
 Biffe les plis du front que l'aage multiplie:
 Et du figuier le lait les egalle & deplie,
 Comme celuy de Truyë estant versé dessus:

LA COSMOTIQUE.

Ou bien en se gressant la face d'huile d'œufs:
 La venaison d'un loup, la tresse d'une anesse,
 Raviennent le teint aussi bien que sa gresse:
 Comme iadis Popee aux dames enseignoit,
 A lors que toute nue en ce l'aict se baignoit.
 Le suif d'un ours libic viement le colore,
 Et le ius de l'oreng, & de la fraize encore:
 Le ius du bon Henry, & de la berle épraint,
 Si faict celuy que rend le genouillet estreinct.
 Qui a sceu par le feu l'humeur celeste extraire
 Du cocombre sauuage, & de la serpentaire,
 Que le prince Glaucus de miel trop gloutton,
 Pour s'en estre engoué faict hoste de Pluton,
 Feist repasser deça l'oublieuse riniere:
 Qui viande aux serpents fut dicté serpentaire,
 Riere faict retourner le temps qui s'auançoit,
 Et rabat les sillons que sa grand' faux traçoit.
 Qui ceste herbe serpente a peu reduire en poudre,
 Ou bien Arum sa seur en cendre a faict resoudre:
 Ou qui cendre & l'exine a fait de gouffes d'aux,
 Et des cancrs nourris à la douceur des eaux.
 Au moulin cliquetant qui sous la mente broye
 Ers, segle, senegré, orge, lupins, yuroye,
 Froment, nielle, auene, & ses farines-cy
 Qui pestrit en vinaigre en du miel adoucy:
 Pour les fortifier encor' y peus-tu mettre
 Du soustre estincelant, du petillant salpêtre:
 Et si tu veux avec allier y pourras
 Les poudres ou les ius, qu'à force exprimeras,
 Du seneué mordant, ou des Lupins superbes,

Qui toute compagnie haissent d'autres herbes.
 Des raisins doux-amers malplaisants au gouster,
 De la sauuauge vigne, on y peut adiouster
 Le labeur de labeille, ou bien les associë
 Aux semences du chou, du lin, & de l'ortie.
 Qui la racine a cuit de l'herbe, dont les fleurs
 Du lent chameleon empruntent les couleurs:
 Qui du Narcis vermeil la racine ongnonniere
 En vinaigre a recuit, qui de l'amende amere
 A l'huile de son corps, & l'esprit retiré,
 Par le feu, par qui est de tout corps séparé
 Chasque element à part, pour veu qu'avecq' on mette
 L'ouurage elabouré de la songneuse auette,
 De la cire qu'encor la mesme mouche a faicte:
 Du lis racine & fleur plus blanches que le laiët,
 Pour faire un oingnement: de l'amendier encore
 Fay bouillir la racine, & l'herbe du centaure,
 Qui du vainqueur lierre & tousiour verdissant,
 Et du lent sauinier le fueillage est cuisant,
 De l'aigras verdelet, qui presse le liquide.
 Des vns la poudre applique, & des autres l'humide:
 Soit qu'il en faille vser prenant chacun à part,
 Ou tous mixtionnez par mesure & par art,
 Il essuye, applanit, efface de la face
 Roussours, rougeurs, saphirs, les rides & la crasse.
 De mes profonds secrets tairay-ie le meilleur?
 Qui teint le teint esteint d'une belle couleur?
 D'un mouton esgorgé les os des pieds faut prendre,
 A force de bouillir separer la chair tendre,
 Concasser bienmenu l'ossement denué,

LA COSMOTIQUE.

Tant qu'en cent mille parts il soit diminué,
 Fay chascque portion en mille autres reduire:
 Fais encore vne fois ces os froissez recuire,
 Tant qu'apres que le froid sera maistre du chant,
 Les os fondent en bas la mouelle nage en haut:
 Ce qui nage, ramasse, ou qu'on se leue ou couche,
 C'est ongnement enduit, blanchit tout ce qu'il touche.
 Qui fait de la litarge en vinaigre bouillir,
 S'en lauuant, a dequoy son visage embellir.
 Vn fart exquis & rare or' veux-ie apprendre à faire:
 Du Mercure argentin de tous metaux le pere,
 Entre les mineraux de l'or le mieux aymé,
 Peze vn quarteron iuste, & du blanc sublimé
 Quatrefois d'auantage, & les larmes de l'Arbre
 Du saint Camphre Indien, dans vn mortier de marbre,
 Broy-les moy si menu que tu face des trois
 Vn poussier delié, ton pilon soit de bois,
 Lave-les d'eau de meurte, & les reseche encore:
 Puis d'une fueille d'or ta melange redore,
 Quand du sommeil pressé au liét tu te rendras,
 En huile de lentisque vn peu tu dissoudras,
 Dans le creux de ta main, pour le mettre en vsage:
 Mais laue toy premier d'eau rose le visage.
 A la mesme heure encor' vne lame de fer
 Sur vn brasier ardent te conuient eschauffer,
 D'un vin tout pur d'Aniou ayant la bouche enslee,
 Epluy-le sur le fer halene soufflee:
 Le fer petile & crie, & le feu murmurant,
 Vne espesse vapeur engendre en se mourant.
 Penchant la teste en bas sous vn voile enfermee,

De la face reçoÿ la vineuse fumee.

Approche de rechef ta lame pres du feu,

Pendant que de la myrrhe on brise peu apeu,

Sur le fer mugissant ceste poussiere verse,

Reçoÿ comme premier la vapeur blanche & perse.

Ce faict, tu t'en iras mettre au liect emplumé

Le visage couuert d'un linge parfumé.

Qui par huiect iours suiuan garde ceste ordonnance,

Les pas il rallentit de l'aage qui s'auance.

L'huile gommeux extraict de l'inceste Myrrha,

Par la moitte froideur cela mesme fera.

Qu'au matin & au soir, toy qui ne veux qu'on voye

Les signes apparens d'un trop chaleureux foye,

La face laue-toy d'onde où seront bouillis

Les ongnons escaillez des racines du lis:

Le coulis de noyaux de la pesche qu'on casse,

Et des grains de la courge au teint roux dōnent grace:

Et qui d'une pucelle vser voudroit de l'eau,

De la vieille Pirrha raiuniroit la peau.

Si tost que le bouton de la fueille de l'orme,

Perse l'escorce tendre vne bourse s'y forme,

Cresselue, inegale, où s'engendre un humeur,

Qui en mousche s'enuole aussy tost qu'il est meur,

Qui s'enhuile le cuir du baume, qui decoule

Quand de la main serree on escrase l'ampouille.

(Qui croyroit telle force estre en telle liqueur)

Rend le lustre luyfant au teint morne & obscur.

De l'espine du bouc qui detrempe la gomme,

Dans un bassin plein d'eau, & s'en laue, ainsi comme

De celle où le mastic sera defaict aussi,

LA COSMOTIQUE.

Faict vn fard precieux, comme faict cestuy-cy,
 Va vne once choisir du plus fin blanc d'Espagne,
 Qu'en quatre fois autant d'eau de morelle bagne:
 Prends autant de vinaigre, adioustes-y encor
 Pareille quantité de la litarge d'or:

De camphre clair & blanc que son arbre degoutte,
 Quand le ciel courroucé croule la terre toute,
 Et l'encombre d'esclairs, tu y ioindras vn peu:
 Mets-y du souffre vif frere germain du feu.
 Mets-y du sel, de l'ambre, & de la myrrhe encore,
 Et l'encens achepté de l'Arabesque More.

Que tout trempe en eau rose, & du vase en vaisseau,
 De l'un plus haut que l'autre, on face engoutter l'eau
 Le long d'un feutre espais, duquel le bout plus large
 Moüille au tymbre d'en haut qui au bas se discharge
 Qui vse de ce laict, virginal appellé,
 Oste le deshonneur de son front maculé.

Vn autre à moindre frais on brasse en ceste sorte:
 On detrempe, on confond du souffre à l'odeur forte,
 Des os de seche en poudre, & l'aigreur du limon,
 De la blanche ceruse, & le ius d'un ongnon,
 Camphre, son, & alum, qui le visage arrose
 Auecque leur degout, essuy' la goutte-rose.

La fondree appliquant d'huile extraicte du lin
 Fera la peau'estendre au front, & au tetin:
 Et mieux, si tu y joins la gommeuse resine
 De Chio, d'Arabie, & de la Tragantine,
 Et le camphre indien: du mesme huile le marc
 Efface en pluy' fondu des ans passez le trac.
 Si de sang tu en duys de poule au blanc pennache.

Le front lentiginieux, tu abolis ta tasche.
 L'alum broyé, confus, & cuit au blanc d'un œuf,
 Au radottant Æson peut rendre un corps tout neuf.
 L'huile de tartre gris, des lupins la farine,
 D'une cheure le fiel, la poudre cristalline
 D'alum, & de limons le suc aigre brouillez,
 Repolissent la peau des visages rouillez
 De rides, de rouisseurs, & de dartres volages,
 Et tout ce qui honnist l'honneur des beaux visages.
 La ré de la bourrache estant maschee à iun,
 Sur le visage enduite esclarcist le teint brun:
 Si tu crains que Phœbus ne le brusle & le gaste,
 Fais du blanc amy-don, d'œufs d'aubins une paste.
 Arme-toy de ce fard au logis reuenu,
 Oste ce deffensif, monstre ta face à nu,
 Du hasle tu es seur si du gras mucilage
 De mauues & de coins tu armes ton visage.
 Qui pain de bouche prent emmiété menu,
 Les grains de cent couleurs du fasiol cornu,
 De chascun une liure, une courge detranche
 En mille taillerins, & dans la tresse blanche
 D'une cheure les trempe en un vaisseau bien clos,
 Autant que de la nuit dure le doux repos.
 Quand Phœbus de retour sera de l'autre monde,
 De l'arbre persien trois onces d'os emonde,
 Et autant de pinons sous l'escaille reclus,
 De grenes de melons il y faut deux fois plus:
 Melange les ensemble, à ceste paste molle,
 Joins un pigeonneau blanc qui tremousse, & ne volle.
 Mets-y la plume avecq, qui se pousse dehors:

LA COSMOTIQUE.

Mais ostes-luy le ventre, & n'en prens que le corps,
 A l'humide chaleur la quinte euaporee,
 Qui est du corps terrestre vne essence etheree,
 Que tu verras couler par le conduit tortu,
 Pour te maintenir ieune & belle, a grand' vertu.

Fay ton cas en secret, ô quiconque te farde,
 De n'y estre surpris il te faut prendre garde:
 De peur qu'un suruenant te prenant sur le faict,
 Ne prenne pour la face vn masque contrefaict.
 Qui sa Ceruse pale, au vermillon eschange,
 De peur d'estre accusee, aulx ny cumin ne mange:
 Et de la Coriandre euitte la vapeur,
 Ardente elle descouure à tous le fart trompeur.
 Le temps donc plus commode est lors que la nuit sombre
 Cele tout ce que font les mortels sous son ombre.

Qui trois & quatre fois abstrait d'un mesme vin
 L'onde viuifiante, & son esprit diuin,
 Où tremper il fera du rosmarin la cime,
 Qu'avecques l'alembicq' encor' vn coup sublime,
 Vne fois en huit iours, qui s'en est abbrevué,
 S'estant d'eau & de vin le visage laué:
 Qui deux dragmes a beu de ceste puissante onde,
 Vne grace il aqiert qui plaist à tout le monde.
 Ou bien sil ayme mieux dans le moust angeuin,
 Face les fleurs boiillir du mesme rosmarin,
 En boiue le bouillon quand l'Aube saffranee
 Reueille les mortels pour faire leur iournee:
 Et qui de l'Agaric blanc & leger a beu,
 Qui ordinairement s'est de cices repeu,
 A qui on a l'hissope en breuuage donnee:

Et qui

Et qui sobre a mangé mainte figue grenee:
 Et qui soir & matin hume, & prend le bouillon
 Où cuire on aura faict fleurs & fruits du oublon:
 Qui des boutons vermeils de l'esglantine rose,
 La bourre nettoyant qui est dedans enclose,
 Mange à iun la conserue, ou la boit dans du vin,
 Dés le premier de Mars iusqu'au dernier de Iuin,
 Et de la cichoree amerement ingratte:
 Ou le moirobolan, ou l'egyptien datte
 Qui souuent mangera, sa iunesse entretient,
 Et retient en arrest la vieillesse qui vient.
 Mais si trop de blancheur (la perfection mesme
 Est preiudiciable, & ne peut plaire extreme.)
 Eblouissoit les yeux d'un esclat violent,
 De ses admirateurs la veuë epointelant:
 Ainsi que tout obiect, qui quand l'organe touche,
 Impetueusement son propre sens rebousche.
 En ce cas mince & pile en poussier bien subtil,
 Mille & mille coupeaux du barbare bresil:
 Et la racine encor de la rouge orcanette,
 Detrempe l'un & l'autre avecque de l'eau nette,
 En laquelle on aura roche d'alun fondu,
 Soit un peu de ceste eau sur la nege espandu
 De la iou palissante: à cela mesme on use
 Du vermillon flambant faict de plomb & ceruse.
 Qui sçait d'un iuste poix le blanc & le vermeil
 Bien proportionner, peut faire un teint pareil
 Au rougissant coral, vne Hecube fardee
 Passer en plein midy pour la greque Ledee.
 Qui d'une rude main iouë, & leure a frotté

LA COSMOTIQUE.

Du vermeil tourne-sol, ou du cuir affecté
 Du Tam phœnicien, teint sa face blefmie
 Du fard duquel se peint de Cephale l'amie.

Pour les pales couleurs prens du rouge santal,
 Bois precieux & cher du crud oriental:
 En la vineuse aigreur qui six fois la retorte
 Aura reuerberé pour la rendre plus forte,
 Trempe-le, & le recuy lentement sur le feu,
 Et de l'alun en roche adioustes-y un peu,
 Un peu d'ambre, ou de musq' si ta iouë en est peinte
 Tu recouure l'honneur de ta couleur esteinte.
 Et si la vierge pas le a seulement frotté
 Sa iouë au genoillet, voyla ce teint osté.

Qui a honte se voir arriuer au saint aage,
 Et se voir honorer d'une vieillese sage,
 De la grand' mer humaine, ô vieillese, heureux port,
 Où l'homme sa misere est pres de mettre abord,
 Et paye l'interrest d'une trop longue vie,
 Sauué de mains dangers, de fortune & d'enuie.
 Qui veut sa barbe grise honneur des hommes vieux,
 Reteindre, & redorer l'argent de ses cheueux:
 Cheueux nez de vapeur gluante, humide & grosse,
 Que le cerueau fumant hors de la teste pousse,
 Que le froid estrange, le cuir, & les os froids,
 Font durcir en issant hors des pores estroicts:
 Ou nez d'un excrement terrestre aride & sale,
 Qu'enleue la vapeur qui de noz corps exale.
 Un reste demeurant du dernier aliment,
 (Chasque membre s'estonne nourry suffisamment)
 Du dedans au dehors que la nature enuoye,

Et d'en bas en amont, par la secrette voye
 De la veine, & artere, y estant arriué,
 Au suc pituiteux dessous le cuir trouué,
 Vers les plus chauds endroicts s'accompagne & assemble:
 Le poil à l'un des deux, ou plus ou moins ressemble;
 Selon qu'il participe à l'un ou l'autre humeur,
 (L'un de ces deux est noir: l'autre a blanche couleur.)
 Pareille à la matiere est la tresse engendree,
 Noire, blonde, rougeatre, ou rousse ou bien cendree.
 Le poil cresspe sera, si sec & chaud est l'air,
 Comme celuy du more, ou bien avec le fer.
 On le gredille & frise, ou bien par voye oblique,
 Hors de la peau sortant, se retort & riplique.
 Ou bien c'est la chaleur qui pousse foiblement
 De son exhalaison le fumeux excrement.
 L'air moyen, le cuir mol, l'exhalation forte
 Fait que hors de la peau le poil droictement sorte.

Si tu la sçais, dy moy, je te pry' la raison,
 Pourquoy aux vieilles gens est le cheueux grison?
 Le Stagyrite tient, & de Pergam' la gloire,
 Que quand du feu natal l'exhalation noire,
 Qui engendre & fournit nourriture au cheueu,
 Par la chaleur debile estre cuitte n'a peu:
 Ell' raiust & pourrist, qu'adoncq' la cheueleure,
 Moysist relement se tourne en chancisseure.
 L'autre contre eux soustient, que quand ce feu defaut,
 Plus ne peut. sa fumee estre portee en haut,
 (Viuant nous desséchons: nostre chaleur s'allente,
 Car la vieillesse n'est qu'une mort douce & lente.)
 Alors le phlegme blanc enduit sous le cuir froid,

LA COSMOTIQUE.

Plus que l'autre abondant, par le pertuys estroict,
 Engendre, & boutte-hors au menton, en la teste,
 A la barbe, aux cheueux ceste blancheur moleste:
 Ainsi le phlegme blanc, qui surcroict és gens vieux,
 De sa couleur depeint la barbe & les cheueux.
 Honorables cheueux, plus que chose du monde,
 Et barbe venerable, où la prudence abonde:
 A qui on fait honneur ny plus ny moins qu'aux dieux.
 Le senat composé est des plus blancs cheueux,
 Deuant qui la iunesse, or que gaillarde & forte,
 Se leue, & reuerence ainsi qu'aux peres porte.
 Qui les derniers leuez, sont les premiers assis,
 Quoy que leur teste bransle ils ont les sens rassis:
 Comme ils ont le poil blanc leur ame est aussi blanche:
 De couleur de leur poil on depeint la foy franche.
 Qui leur monstre à ne dire & à ne faire rien
 Indigne & mal-seant de leur poil ancien.
 Thresor des ieunes gens, où des choses passees
 Pour eux fidellement se gardent amassees.
 Ce sont les cheueux gris qui sous les saintes loix
 La terre ont balancé d'un iuste contre-poix.
 La vieillesse est le but de la carriere humaine,
 La porte pour entrer au celeste domaine,
 Que l'homme en ces bas lieux va cerchant; mais en vain,
 Pour fin de ses desirs & comble souuerain.
 Pourtant sages vieillards, laissez vos barbes croistre,
 Et faictes vous grisons par la vertu cognoistre:
 Et pour dix ou douze ans qui vous restent encor,
 Faussaires, ne changez vostre argent en de l'or.
 Doncq' qui honteusement les grisons tant desdaigne,

Qu'il paruienne à telle aage & honneur n'est pas digne:
 Mais ieune & fol ensemble, & plus noir qu'un corbeau,
 Sans nom & sans honneur merite vn noir tombeau.
 Mais puis qu'il a enuie à chacun faire accroire
 Auecq' vn fard menteur que sa barbe soit noire,
 Qu'il prenne du vinaigre, y mince du Cyprés:
 (Cypres arbre sacree au gendre de Ceres)
 Du lentisq' flechissant prenne la feuille encore,
 De l'aspre au goust sureau prenne la grene more.
 Mais l'huile, qui se faiçt des petits vers venus
 Du grand ventre fecond de la terre tous nuz,
 Le poil mort regenere, & de couleur plus belle
 Le chef gris raieunist d'une toyson nouvelle.
 Si d'estre appellé vieil il te semble fascheux,
 La nege secouer tu peux de tes cheueux,
 Assemblant cire & glu, & la larme espandue
 Du montagnard sapin, par l'escorce fendüe.
 Tulle, quiconque soit de ce dire l'auteur,
 Ou de tous les Romains le plus grand Orateur,
 Dont la langue Latine est encor' honoree,
 Ou autre quel qu'il soit, tient pour chose aueree.
 Que si on veut bloquer son poil noir à vn blond
 Que les cices reduicts en onguement le font:
 Et si la femme enceinte enuieusement mange
 Une soury captiue, ô appetit estrange,
 L'enfant qui en naistra, cas plus prodigieux,
 Noire, dit-il, aura la prunelle des yeux.

Or apprendre te veux comme on peut t'aindre en iaune
 Les cheueux noirs ou blancs: Pren racines de l'eaune,

LA COSMOTIQUE.

D'esclairer au lait orin, du resort quant & quant,
 Celles-là du chardon à cent testes piquant,
 Du buis les blonds coupeaux, la plus douce racine,
 La racine & l'escorce à la vineuse espine:
 Et la racine encor' du glayeul florentin,
 Et le guy engendré premier dans l'intestin,
 De l'oysseau qui le seme, en l'arbre qui le porte,
 Et le bourru cetrac chiqueté de la sorte
 Que le verd Polypod', qu'aussi faut mettre avec
 Les lupins tres-amers, le cornu fenugrec,
 La fleur de la stœchade au blond soleil pareille,
 Tout ainsi qu'à la lune est pareille la feuille:
 Du sandal citronné prens les eschantillons,
 Les iaunissantes fleurs des cottonnez bouillons,
 Le pastel rouargoys, la garence carree,
 Et du froment l'epy, & la paille doree.
 Cuire feras les vns dans les ondes du ciel,
 A leurs bouillons conioins le rossoyant miel:
 Y meslant du scauon en feras vne oincture,
 Dont froter conuiendra la noire cheueleure.
 A pres que du lierre auras le bois bruslé,
 Ou l'Indien gaiac, bois saint au corps greslé,
 Ou les sarments tortuz reduicts en cendre grise:
 Fais en vne lexine, où d'alun sera mise
 La crystaline roche, arrosez en du chef
 Et du menton le poil, oins, essuy' de rechef
 Barbe & cheueux mouillez, quand la nuit tu repose.
 Ou bien ton chef penché au beau soleil expose,
 Ou prens fleurs de caprier, semence de resort,
 Qui pour les appetits reueiller pique & mord:
 Du mineen encens, fumees de l'ronde.

Et du souffre vivant ioins y la mine blonde,
 Et d'un taureau tout blanc l'humeur roux & frelleux:
 Mais premier de lexieue arrose les cheueux.
 De ceste mixtion si tu les frotte & gresse,
 On verra sur ton chef flamber l'or de la tresse.
 Que si d'un lustre orin tu les desire encor,
 Tant naturellement à un chacun plaist l'or:
 Que qui n'en peut auoir, à tout le moins en porte
 La tres-riche couleur, qui son desir conforte.
 Six onces prens adoncq' d'alun luyfant & clair,
 Quatre de vitriol auccq' y faut mesler,
 Deux de salpêtre blanc, tires en l'eau, & plonge,
 Pour tes cheueux mouiller, vne legere esponge:
 Ou de l'humeur glayreux, argentín, clair & lent,
 Des rouges limaçons confits en sel coulant:
 De la ré troglodite & du catay barbare,
 Que l'espiciér fidelle hors ne iette la tare.
 Ains infuser la face en lexieue ou en l'eau,
 En laquelle a bouilly du guy fueille ou rameau.
 Lave toy de ceste eau la barbe blanche ou noire,
 Qu'à vne esponge seche il faut faire reboire:
 D'huile de tartre blanc, des noyaux de pescher.
 Vn ongnement melange, au soleil fay secher
 De la terrestre iris, la ré blanche & massiue,
 Pour la poudre y mesler ioins y de la lexieue
 D'alister produissant fruiçt si doux au manger
 Que pour luy son Itaque Uli's voulut changer:
 Et le ius verdoyant exprimé de la branche
 Du plant dont l'on faisoit iadis la laine blanche:
 Et dont le nom il porte, herbe utile au foulon:

LA COSMOTIQUE.

Du lentisque le suc, celui des gresillons,
 Garde d'y oublier, pour plus puissant le rendre,
 Du tartre grisonnant y faut mettre la cendre.
 L'eau de l'ard distillé fait barbe & cheueux blonds:
 D'Auronne masle aussi les rend blondement longs.
 Et qui distille encor les boutons de la Capre,
 Pendant que tendre elle est, brusquement verte & aspre,
 En verd il changera son poil blond, blanc ou noir,
 Seché par le soleil, chose plaisante à voir.
 Que si le noir t'agree, & te plaist d'auantage:
 Couleur qui sied le mieux en l'œil, & au pelage,
 Comme le docte Horace, & Pindare ont chanté,
 Iuges trespertinents de l'humaine beauté.
 Fay cuillir, fay bouillir du figuier du laurier,
 Du meurte noir la fueille, escorce du palmier,
 Et du saul & du houst, des noix la robe verte,
 Et celle dont Iupin a son arbre couuerte:
 La gale, l'artichaut la ronce, & le bouton,
 De l'espineux caprier, & l'auant-fruit, chaton
 Du persique noyer, d'ophris la double fueille,
 La fueille du sumach à la grene vermeille:
 Les fauats, & lyeuse, & le liege habillé
 D'épaisse & double escorce, il faut de l'un bruslé
 Faire lexieue, ou bien le ius de l'autre epreindre,
 Et de l'un & de l'autre, & barbe & cheueux peindre:
 Un peigne dentelé mouillé souuent & teint,
 En leur decoctions, ou dans leur suc epreint,
 Haut & bas le menant, que ta greue partisse:
 Ou du pegne de plomb, ou d'estaing la noircisse
 Qui en huile cedrin long temps aura trempé.

*Ainsi le plus rusé pourroit estre pipé: ...
 Et prendre un capete, un Codrus sur sa fosse,
 Pour Neree au poil blond, à la leure de rose.
 Avec saouon françois, pren vitriol Romain,
 De pierre noire un peu, d'ambre gris quelque grain:
 Ou quelque grain du musq' par les flambes dissoudre,
 En cendrés fay le plomb, le machefer, en poudre:
 Qu'à la liquide poix tous ces simples soient ioincts,
 Et de leur mixtion & barbe & cheueux oincts.*

*Si d'un ordre inegal tu veux tes tresses blondes
 Crespes autour du front faire flotter à ondes,
 Laue les en lexiue, où le bois iaunissant
 Du buys, qui porte fueille à iamais verdissant,
 A quitté sa vertu, & la puissante escorce
 Du citron surmontant du noir venin la force,
 D'un Roy Ilirien l'herbe portant le nom.
 De la chastaigne encor brule le herison,
 Et sa cendre y employ, la racine testuë
 Du plaisant Aphrodil faiçt la tresse crespüë.*

*Que ton poil ne grisonne empescher si tu veux,
 Et vieillard maintenir l'honneur de tes cheueux:
 Puis que rongner ne puis l'ele du temps volage,
 Enduy-les barbe & tout de l'oline sauuage,
 Ou d'un ieune chien arrose les de l'eau:
 Qu'y a-til qu'on ne face à fin de paroïr beau?
 Si en lieu de ton corps le poil epés te fasche,
 Qui ce qu'il faiçt beau voir, deshonnestement cache,
 Un front large, un sourcil d'Hebene façonné,
 Comme un ieune croissant rondement arçonné:
 Oins moy tous ces endroiçts d'huile où la scolopendre*

LA COSMOTIQUE.

Morte est, joins y avec cendre de salamandre.
De l'oysseau de Pallas, du malheur messenger,
En flammeches le corps par le feu fais changer:
La maritime ortie, herbe, poisson ensemble
Du reueille matin l'humeur blanc y assemble,
Et l'humide gelé dessous le sec sablon
En sel blanc couverti és longs deserts d'Ammon,
Et le cumin aussi: mais ces drogues parfume
Du cheureul porte musq' y meslant l'apostume:
Du violent orpin tu mesleras parmy,
Et les œufs foisonnants de la sage formy.
Le lieure de la mer meschante nourriture,
De la soury, qui vole en la faueur obscure
Des brunissantes nuités, le massacre sanglant:
Le sang de la tortue à petits pas allant,
Des fugeres naissant és chesnes, la racine,
L'eau coulant, en brulant du sarment de la vigne,
Du lierre la gomme on doit mettre en ce rang.
Ards le chou, brule encor' la sansüë ayme sang,
En lexiue ou vinaigre estants tous mis ensemble,
Ou chacun d'eux à part, le poil de noz corps emble.
Ou bien si tu dissous ou boust legerement,
En du lexicf commun chaut viue & orpiment:
Qu'on laue les endroiets que le poil deshonore,
Par où passe ceste eau comme vn feu le deuore.
Et à fin qu'importun ne regerme iamais,
Enduy, frotte & refrotte, & sus la place mets
Du chat l'orde fiente en poussiere reduitte:
Ou ius de hane banne, ou bien son huile enduite,
Le ius de la cigue extremement trop froid

L'engarde de renaistre enduit au mesme endroict.
 Mais si tu aymes mieux estre barbu que sage,
 Et sage estre tenu par ce seul tesmoignage:
 Comme c'est qu'il faut faire or de moy l'apprendras.
 Les cendres d'une taupe auuegle tu prendras,
 Des freslons bourdonnants, de syringue, l'amie
 De Pan, qui fut changee en vne chalemie:
 De la mouche à miel, & des noyaux vestus,
 Du datte Idumeen, des herissons pointus
 De chasteignes, ioins y les cendres de nouzilles,
 Apres auoir brulé leurs petites coquilles,
 Des cheueux de Venus & du noir & du blanc:
 Et de la taupe encor prens la peau & le sang,
 Du cabaret adionste à cest amas la grene,
 Dont la fleur emboittee est fecondement plene:
 Le persil sauoureux, du rouge ongnon le ius,
 Qui contrainct distiller le cerueau par les yeux.
 Au suc de patience adionste la racine
 Du lis blanc, du refort, & de la couleurine:
 Et la myrrhe Arabesque, le resineux Ledom.
 Vne crasse attachee aux barbes du menton
 Des boucs broutants le cyste, on y ioint les fumees
 De la soury pillarde, & huiles exprimees,
 De l'amande plus douce, & de la noix encor,
 Que gland de Iupiter appelloit l'aage d'or.
 Du souef-flairant aspic par le verre tiree,
 De l'herbe portant fleur comme Iris coloree.
 Gras de Tesson, & l'huile au geneurier poignant:
 Beurre frais mets auccq', de tous fais vn unguent,
 Dont qui se frotera d'une belle venue,

LA COSMOTIQUE.

Reuerra bourgeonner la barbe en la chair nuë,
 Le lendemain d'apres que le menton gressé
 Sera de ton vnguent simple ou bien composé,
 L'au le de rechef du bouillon de parelle,
 Où la rosine fleur feras cuire avecque elle,
 Et la fueille, & le fruiet du meurte paphien,
 Les coupeaux tronçonnez du bois saint Indien:
 Quand de retour sera la gayè primeuere,
 L'au toy le menton d'eau tiede & le fay raire.

Mais laissons ceste barbe, & voyons si dedans
 La bouche il y a rien qui honnisse les dens.
 Qui a-t'il mieux seant, quelle plus belle chose,
 Que de voir enchassez au milieu d'une rose
 Deux beaux rancs d'unions qu'on decouure en riant,
 Qui rauallent le pris des thresors d'orient?
 A doncques s'il aduient que la dent qui l'iuoie
 Doit passer en blancheur, soit rance, iaune ou noire:
 Tu y remediras, les frottant les lauuant,
 Leur rouilleure curant, qui les gaste cauuant,
 Par les ius, par les eaux par la poussiere ou cendre
 De l'herbe seche: ou verteor sus donc te faut prendre
 L'origan candiot, le pouliot trainant,
 Et l'hissope branchu, & l'oluiuer poignant,
 Le flairant rosmarin, & de Pluton l'amante,
 Fille de l'eau Coccite, & la branche odorante
 Du meurte tapissant les costes de la mer:
 Le glutineux lentisque, & le plant tres-amer
 De l'herbe sarrasine, & la sauge y accouple,
 Et l'aspre staphis aigre, & le tamaris souple,
 La souefue mariolaine, & souchet doux sentant,

Es lieux marescageux soy-mesme se plantant.
 En poudre bien menue il faut l'amande amere,
 La serpentaire aussi, & la parietaire,
 La teste d'un regnard, & d'un lieure leger,
 Marbre, perle, & les os de seche rediger.
 Joins-y la dent indique, alun, sel, & cinabre,
 Et l'empierre corail, qui autre-fois fut arbre.
 Du cerf peureux la corne, & du cheual la dent:
 Que tous brusler feras dans un creuseu ardent.
 Broye pour mieux faire encor' la pierre arabiennne
 De l'escreuisse, avecq' d'esponge, & samienne.
 La ponce, l'emeril, des tritons les cornets,
 Et de la pourpre aussi dont les Roys sont ornez:
 Des moules, d'escargots mille coques diuerses,
 Que trouuent les plongeurs dessous les vagues perses.
 Du mastic candiot n'oubly d'y mettre avec
 Du poiure, & du pyretre, & d'aloé le bois sec.
 Crouste de pain de segle, & les especes mesle,
 Du gyroffle odorant, du nard, de la canelle.
 Aromatise-les de la musquine noix,
 Que Badam nous enuoye, & du parfum indois.
 Des uns reduits en cendre on frotte la genciue,
 Des autres distillez en vin blanc en eau viue
 La bouche on gargarise, ou les mastiqueras
 Par le moyen gluant de l'odorant storax:
 Ou de la gomme arabe, & en fais vne paste,
 Dont racle de la dent la rouille qui la gaste.
 Pour-ce encor' fay bouillir le triacle vanté,
 Dans le suc du raisin, que Bacchus a planté,
 De l'herbe, dans le ius du serpent approuuee

Et dit-on pour tout vray que la bouche lauee
 De l'eau qui cuitte aura la racine au plantain,
 Aura les dents d'ivoire: on tient pour tout certain
 Que qui avecq' charbon de la vigne pucelle
 Dont encor' on n'a veu aucun fruit issu d'elle,
 Les cure, mariez au miel triomphant,
 Blancheront celles de l'Elephant.
 Pour la fin, la racine on seche de la mauue,
 Mauue qui les mortels de mille langueurs sauue:
 On la fera tremper en l'onde vn iour entier,
 On la recuira moytte es feuilletts d'un papier,
 Soubs le brasier cendrier: prens mon serment pour pleige,
 Que la dent qu'elle escure honte faict à la nege.

C'est assez pour les dents, faut chanter de la main,
 Le membre plus parfaict de tout le corps humain:
 Et dont autant, ou plus, necessaire est l'usage
 Que du diuin cerueau, du cœur, & du visage.
 Sus mains descouurez vous, à fin qu'on puisse voir
 De vostre grand ouurier l'admirable sçauoir.
 Où doi-ie commencer à chanter vostre gloire?
 Vostre beauté confond ma langue & ma memoire.
 Mais s'il vous plaist, Madame, ô des Dames l'honneur,
 A qui Dieu a esté si liberal donneur
 Du plus beau qui le mieux orne le corps & l'ame,
 Que la perfection de la vostre, Madame,
 De mon creon i' imite, aisé il me seroit.
 Ah qu'ay-ie dict aisé: comme aysément pourroit
 Des deserts libiens ma main conter l'arene?
 Et les herbes des prez, les espics de la plene?
 Comme il est mal aisé mesurer la vertu,
 Dont Dieu a vostre espoux diuinement vestu:
 Autant m'est-il aisé de vostre main aymee

Du pauvre souffreteux, en cinq beaux doigts ramee,
 Les beautez louer, doigts, en l'extremité,
 Desquels un bel oniche est richement anté.
 Hé qui a-il plus beau, plus docte & pitoyable
 Que vostre blanche main, sçauante & secourable?
 A laquelle ceder, Minerve, tu ne dois,
 Et leurs beautez quitter de l'Aurore les doigts,
 Or que l'aube les ait vermeils comme la rose.
 Qu'es'il faut sur la gaze animer quelque chose,
 Ou bien faire parler doctement le papier,
 De toy faut que Minerve aprenne son mestier.
 Au grand entrepreneur favorable est fortune:
 Si toutes ie ne puis, i'en chanteray quelqu'une.

Entre tous animaux que la terre a nourry
 L'homme seul fut du ciel cherement fauory,
 Meritant d'estre dict seul diuin, & seul sage:
 C'est pourquoy il a eu tout seul des mains l'usage,
 Les autres ont des pieds deux fois autant que luy:
 Leurs corps aussi auoient besoin de double appuy,
 Ont permis que les pieds les mains meuuent & tiennent,
 Les pieds tant seulement le corps pesant soustiennent.
 L'homme seul a des mains, qui sont les instrumens
 Prompts à effectuer tous les commandemens,
 Et les conceptions, que l'ame ose entreprendre.
 Ses armes sont ses mains, par qui, braue, deffendre
 Se peut en temps de guerre, & qui l'ose offencer,
 Peut, premier assillant, l'iniure repousser.
 En temps de paix il n'a que les mains, pour aquerre
 Ce qu'utile luy est, soit par mer, soit par terre.
 De tous les instrumens la main est le premier,
 Ainsi que la raison est le premier ouurier,
 Et art deuant tous arts, qu'il exerce & manie.

LA COSMOTIQUE.

Car l'ame au corps descend de tous arts desgarnie.
 Le corps de l'homme naist d'outils & d'armes nu:
 Des autres animaux, l'un naissant est cornu,
 L'autre de la dent ioue, & qui s'arme d'escaille,
 A cest autre le cuir sert de cuirasse ou maille.
 Qui armé ne sera aura les pieds legers,
 L'autre fin par nature escheue les dangers:
 De tous les animaux la nature diuerse,
 Une chascune à part, un art certain exerce.
 L'airegne tist son ré, l'abeille sa maison,
 Le formy pour l'yuer faict sa prouision:
 L'homme seul n'aura doncq armes pour se deffendre?
 N'a-il peu, ains que naistre, un art, pour viure, apprendre?
 Qui le croit, il s'abuse, il est bien mieux pourruu,
 Pour estre ignorant né la raison il a eu:
 Et pour estre né nud la main il eut adextre,
 Par lesquelles il peut dompter, se faire maistre
 Du cheual braue & prompt, du lion, du sanglier,
 Et peut sous mesme ioug les onces accoupler.
 La main seule de l'homme artistement imite
 Ce que la beste faire est par nature induitte,
 Et cent fois d'auantage: il trouua les outils,
 Pour tout faire & ouurer, par ses cinq doigts subtils.
 Il a son corps vestu de dras tissus, de toiles,
 Aux ondes & aux vents commandant, à de voiles
 Les pins sur mer élé, sur la terre a dompté
 Les plus fiers animaux, pour maistre estre porté
 Triomphant sur leur d'os, sur les chars, ou pour fendre
 La terre, & l'obliger à rapporter & rendre
 L'usure cent pour cent des biens ensemensez,

Qui seront l'an d'après par la main ramassez:
 Ell' a planté la vigne, ell' a anté les arbres,
 Les mines a caué, taillé rochers de marbres,
 Pour esleuer palais, des Roys plaisant seiour,
 Et de la terre entiere elle arpenle le tour.
 Combien que de la main petite soit la prise,
 Si a-elle des cieux l'infinité comprinsé,
 Par un petit quadran qu' elle mesme a dresseé
 Ell' a de bord en bord toutes les mers passé,
 Trouué un nouueau ciel, gès nō veuz, l'autre mōde,
 Et sçeu toute la terre estre habitable & ronde.
 La main iuste a les loix par escript redigé,
 Et les plus furieux dessous ses loix rangé,
 Ell' a basty autels, & engrané, hardie,
 Esleué, taillé, peint, mille dieux qu' ell' dedie.
 Le prescheur sur ses doigts de son sermō les points
 Deduit de point en point: il les faut auoir ioints
 Quand le pecheur priant avecque Dieu s'accorde:
 La main est l'outil saint de la misericorde,
 Et de la charité, de la iustice aussi,
 Soit qu'il faille punir ou bien prendre à mercy.
 De la sainte amitié la main est le symbole,
 Et de la foy encor' gage de la parolle:
 On la presente aussi, entre les plus humains,
 En signe d'obeissance on se baise les mains.
 Ne fait elle parler les trespassez, & viure
 En pierre & en papier, en erain & en cuiure,
 Mille ans apres leur mort & rechanter les bois
 Melodieusement, en differentes voix?
 Les dents de l'instrument sont les cordes qu'on touche,

LA COSMOTIQUE.

La gorge en est la rose, & le fust c'est la bouche.
 La langue sert d'archet: les leures font le son,
 La main est la raison, qui dicte la chanson.
 Ainsi la main sera la raison corporelle,
 Et la raison de l'ame est la main eternelle.
 La main sçait par ses doigts, autant que peut monter,
 Des celestes flambeaux la grand' somme, conter.
 Et par engins encor, dont elle est docte ouuriere,
 Loing à loing transplanter mainte montagne entiere.
 En l'air n'a elle faiët pigeons de bois voller?
 Vne teste d'erain disertement parler?
 De Iupin coleree elle imite le foudre,
 Menassant les humains, & leurs citez en poudre.
 Les monts thessaliens, rocher dessus rocher,
 L'un sur l'autre entassa pour des cieux approcher:
 Et d'attaquer les dieux main à main eut l'audace.
 Qui a-il que la main n'entre-prenne & ne face?
 Ou pour donner plaisir, ou pour chasser la faim,
 Conseillere mauuaise, hors l'estomach humain:
 Qui singe de Nature, imite tout ouurage,
 Faisant beaucoup mieux qu'elle, & beaucoup d'auãta-
 Telle est doncq' de la main le souuerain pouuoir, (ge.
 Et le diuin sçauoir, qui n'est moins belle à voir,
 Qui sçauante & puissante, estant beauté nommee,
 Vne proportion bien complexionnee,
 Qu'on voit quand son deuoir ell' faiët parfaitement,
 Non pas vne blancheur, mollesse, ou autrement,
 Qui n'est qu'une beauté mensongere & fardee,
 Faiëte tant seulement pour estre regardee.
 Puis doncquesque la main est de l'attouchement
 Et de la prise encor le naïf instrument.

Disons ores comment, & de qu'elle matiere
 Le tout-puissant ouurier feist la main tout ouuriere,
 Pour cōprēdre tous corps courbez, cauez & droitz,
 Plus grās ou moindres qu'elle: elle fut en cinq doigts,
 En diuerses façons sagement diuisee,
 Commode n'eust esté autrement, n'y aysée,
 Elle n'eust peu sans doigts s'eslargir n'y ouuir, (urir.
 Ny les corps plus grās qu'elle & les moindres cou-
 Et forma chasque doigt la prudente Nature,
 De trois ronds offelets, & à triple ioincture:
 Non sans os, n'y d'un os alongé seulement,
 La main se figurer n'eust peu si promptement
 En chacune action, ou soit qu'elle s'enstende, (de.
 Ou se ferme, empoignāt chose moindre ou plus grā-
 Le poulce qui tout seul peut, aux quatres opposé,
 Autant que tous les quatres, au dessus fut posé.
 Pour seureté meilleure, & bien la prise faire,
 Il falloit que le poulce aux quatres fust contraire,
 Et que des doigts les bouts également vnis,
 En se diminuant, d'ongles fussent munis
 D'ongles ny durs, ny mous: pour les grans corps comprendre,
 Et les petits pincer, cueillir, serrer & prendre:
 D'un exquis artifice ouallement tournez,
 Pour fermes retenir, & pour n'estre escornez,
 Ny cassez, ny rompus: car la ronde figure,
 Bien plus patiemment que l'anglure endure.
 Et d'autant que tousiours l'ongle s'y va usant,
 Tout autant qu'il s'en pert il en vient renaissant,
 Ainsi que des cheueux, leur seconde racine,
 Reiette de nouueau ce que l'usage mine.
 Nature, qui n'a fait en l'homme rien en vain,

LA COSMOTIQUE.

N'a surchargé de chair le dessus de la main,
 Ny des doigts l'entre-jointe: ouy bien la part profonde,
 Pour mieùx s'accommoder à la figure ronde.
 Et les costez encor', ainsi n'escoule point,
 Quand on creuse la main le doigt au doigt conioinct,
 L'humeur qui sy retient: si vne suffisante
 N'est assez, pour leuer vne charge pesante,
 Vne autre à son secours vient de l'autre costé:
 Ainsi des deux ensemble vn grand faix est porté.
 Pour faire vne entreprinse hardie, il faut de l'ayde,
 Auecque vn fin Vlisse, vn vaillant Diomedé.
 Mais pourquoy est-ce encor', Nature, que tu tiens,
 Des cinq doigts, deux petits, vn grãd, ou deux moyès?
 Affin qu'en cinq là main inegale fenduë,
 Vn cerne egal peust faire estant large estenduë.
 Et mieùx enuironner de tous corps la grandeur.
 Est-il rien plus capable és corps que la rondeur?
 Seroit-ce point aussi qu'elle creuse & profondé,
 Coupe retenir peust & le poussier & l'onde.
 Et le cuir de dedans rayé de mille traictz,
 Qui sont les plis du poingt naturellement faictz:
 Ou le peuple ignorant, ceste beste commune,
 Va cherchant, mais en vain, le cours de sa fortune.
 Ce cuir, di-ie, qui est rendu interieur,
 Tient tellement la taille entre le mol & dur,
 Que le dur, pour durer est faict à la besongne
 Affin que la main dure estroitement empongne:
 Et le mol pour sentir, & donner iugement
 Des qualibres diuers du lourd atouchement.
 C'est iustement icy que de la chose dure,

Et de la molle encor, gist la droicte mesure.

Ce beau compartiment qui de l'ame & du corps
Est l'outil principal, tient a mille ressorts:

Soit qu'il le faille clorre, ouurier, ou bien estendre,
Ou qu'il faille bailler, ou bien qu'il faille prendre,
Ou faire artistement mille ouurages diuers.

Ces ressorts sont tendons, cartilages, & nerfs,
D'ossets vn regiment, dont le muscle est le guyde,
Faisant la volonte de l'ame qui preside.

Le muscle est maistre icy, comme en vn astelier,

Où volontairement il commande, & premier

A la besongne marche, vn chacun de sa suite

Sa tasche y faict à part, par le muscle conduite.

Main tu retiens ma main, & la bouche me clos:

Car se taire il vaut mieux que mal chäter ton los.

Il n'y a plus qu'un mot, ô main propre & experte:

Te t'auise, d'audant que tu es descouuerte,

Que tu soys tousiours belle, aussi blanche que laiçt,

Que la nege, l'yuoire, & qu'en toy il n'y ait

Rien qui puisse desplaire à l'œil & à la touche,

Et qui puisse mal faire au cœur, ou à la bouche.

Qui telle ne t'aura qu'il vienne icy chercher

Ce qui ta honte peut honnestement cacher.

L'onde d'un melon meur, sa semence pilee,

Par le chaut alembic à gouttes distillee:

De l'aigras le ius vert, & le megue du laiçt

De la cheure recuit en effacent le laid.

Si au suc du limon le sel commun tu brouille,

Et de l'ouuriere main la tache tu en mouille,

Tu l'efface en partie, & du tout, si on ioinçt

LA COSMOTIQUE.

Aux simples ia nommez la limaille au bois saint:
 La miette d'un pain, avecque la racine
 Du cocombre sauvage, & de la serpentine;
 De l'herbe, qui de l'arc celeste a les couleurs:
 Du rosier Rhodien les albastrines fleurs,
 Et celles, qui du sang d'Adonis sont vermeilles:
 Celles qui n'ont au monde en blancheur leurs pareilles,
 Du beau lis verdoyant, & les beaux fleurons blancs,
 De la Nymphe qui faict sa demeure és estangs,
 Des œufs, & d'une cheure adiouste le laictage.
 A lembique les vns, ou tous pour cest usage,
 En l'eau que le ciel verse en la terre benin,
 De l'alun fais tremper, & le sel crystalin,
 Sept ou huit iours durant en la saison ardente.
 Qui s'en laue, il aura la main blanche & luyfante:
 Ce sera pour le soir, mais pour le lendemain
 Matin, se faut froter & l'une & l'autre main
 De cest autre onguement, & desdictes eaux prédre
 Certaine portion, & sur la chaude cendre
 Les reduire à demy: & dans le demourant
 Adiouste l'aigre ius du limon odorant,
 Le rayon Narbonnoys, l'huile d'amere amande:
 Mesle-les, brouille-les tant qu'en cuisant les rende
 En forme humide & molle, il y faut mettre encor
 La cire elabouree & iaunissant comme or.
 Si enflée est ta main pour la grande froidure,
 D'un canard près la gresse, & la crasseuse oincture
 D'une toison laineuse, avecques qui soient ioincts
 Muccilages de lin, de mauues, & de coings:
 Huiles de moyeux d'œufs, d'anel, & de la rose.

De cire & d'amidon, un autre unguent compose,
 Des cices amoureux de farine, & du ris,
 Du miel, & du scauon, & de my' de pain bis,
 Et d'un beuf assommé de la colere rousse,
 Du seneué mordant, de la chair la plus douce.
 Des figues, des pinons du Cybelien Pin:
 De la resine encor' du montagnard sapin,
 Et du terebentin de la luyfante gomme.
 De ces unze meslez unis en une pomme:
 Qui se frotte, & après se relaue en de l'eau,
 A ses mains il rendra mollette & blanche peau.
 Pour blanchir, pour polir, & la main tenir nette,
 Et la face & la dent, d'une seule recette:
 Quatre onces fay pezer d'hermes vif sublimé,
 Du liquide & du crud, par lequel consummé
 Est tout autre metal, moytié d'une once esteincte:
 Que tant de foys piller te faut qu'elle soit teincte
 En laiçteuse couleur, qui vser en voudra,
 Qu'il en prenne une part, que cuire il conuiendra
 En onde fonteniére, ou en l'onde celeste:
 D'une part qu'il s'en l'ave, & en garde le reste.
 En restet-il encor? n'est il temps de cesser?
 Quand on pense auoir faict c'est à recommancer.
 I'aurois plustost les eaux goutte à goutte, une à une,
 Conté, qui se vont rendre au giron de Neptune:
 Du printemps les amours & tous ses passe-temps,
 Pierres, mineraux que porte dans ses flancs
 La grand' mere commune, & chan'é les ramages
 Des oyseaux gazouillâts, & leurs diuers plumages,
 Que de nombrer les fards que les Latins & Grecs,

LA COSMOTIQUE.

Et toutes nations inuenterent expres,
 (Et mesme l'Amérique Androphage inhumaine)
 Pour embellir le corps de l'ame le domaine,
 Il n'est de femme né, & n'a le cœur de chair:
 Ains est fils d'un Caucase, ou d'un autre rocher,
 Aletté d'une tygre, horriblement farrouche,
 S'il ne sent la beauté qui doucement le touche:
 Pour elle seulement nous sont donnez les yeux,
 Qui font l'ame iouir du bien qu'elle ayme mieux.

SONNET TRADVICT DV LATIN.

Triginta hæc habeat quæ vult formosa videri.

Celle qui veut paroïr des belles la plus belle, (blancs,
 Ces dix fois trois beautez, trois longs, trois courts, trois
 Trois rouges & trois noirs, trois petits, & trois grands,
 Trois estroicts, & trois gros, trois menuz soient en elle.
 Longue la taille soit, le poil & main iumelle:
 Courte oreille & le pied, des dents les doubles rangs:
 Le poil blond & le teinct, & l'yuoire des dents:
 Rouge ongle, leure & ioue: & le nom que l'on cele,
 Et les sourcils soient noirs, prunelle des yeux.
 Teste, nez & tetin, petits: ample entre deux
 Des sourcils, & le sein, la fesse: estroicte l'aine,
 Et la bouche & le flanc: enflé soit l'embompont
 Des cuisses, de la fesse & ce qu'on ne dit point:
 Leures, doigts & cheueux menuz, tell fut Helene.



LE SINGE.

N Est-ce vne ingratitude grande,
 Digne que la pareille on rende,
 A quiconque me faist ce tort,
 Se rire & gossier de ma mort?
 En lieu de me pleurer & plaindre,
 Laisser ma memoire esteindre?
 Et pourcent mille gentils tours
 Que pour toy i ay faict en mes iours,
 Pour mainte gaye singerie,
 Faut-il ingrat, que tu te rie
 Des trespassez? est-ce le dueil
 Que tu mene sur le cercueil,
 (Pour t'auoir à force de rire,
 Contrainct lascher qu'on n'oze dire)
 O ingrat, mal-recognoissant
 De mestre Ian singe plaisant,
 Que la-coqueluche n'aguiere
 Feist guer. des morts la riuiere,
 Remplissant d'un gros phlegme & froid
 Son cerueau, qui par le destroict
 Que l'on void au fond de la bouche,
 Descendant aux poulmons, les bousche:

Si que ne pouuant respirer,
 Force luy fut l'ame expirer.
 Maudite sois-tu maladie,
 Qui r'auir m'as cuydé la vie,
 Et me faire le compagnon
 De ce bel & gentil guenon :
 Et es cause que n'ay peu rendre
 Encores à sa froide cendre,
 Le piteux & dernier deuoir
 Que meritoit tel singe auoir.
 Singe, ie dy, quant à l'espece:
 Mais presque homme quant à la dresse.
 Voire qu'on l'eust pris bien souuent
 Pour quelque Docteur bien sçauant,
 Ou pour quelque sage personne,
 Tant il auoit la trongne bonne,
 Auecque vn accoutrement long,
 Une cornette, vn bonnet rond:
 Et n'eust on conue l'imposture
 Sinon à lors qu'à sa nature
 Il retournoit, qu'on luy iettoit
 Des nois, ou qu'on luy presentoit
 Ce que tout Singe plus appette.
 A volée, ce qu'on luy iette,
 Friant, receuoit & haussé,
 Comme iouant au pot cassé,
 Comme qui iouè à la pelotte,
 Il grippe, romp, brise, marmotte:
 Il epluche, prent le meilleur:
 Et plus leger qu'un bastelcur,

Qui d'une hardiesse folle,
 En l'air, dessus la la corde vole.
 Il fait de sa chesne à l'entour
 Souplement maint tour & retour.
 Et d'un maniment qui ne cesse,
 De mainte gaillarde souplesse :
 Sans se lasser, se gambadant,
 Eblouissoit l'œil regardant :
 Et faisoit venir la berluë,
 Par ses mouuements, à la veüë.
 Si un coup s'estoit apperceu,
 Qu'il estoit par quelqu'un deceu,
 Ou bien auoir pris l'un pour l'autre :
 O Dieu sçait quelle patenostre,
 Grinçant entre ses dents disoit,
 Grondant quelle mine il faisoit :
 Reseruant à son aduantage,
 A faire le moqueur plus sage,
 Et luy apprendre vne autrefois,
 Ne prendre plus singes aux noix.
 Maistre Ian auoit le cors sage
 Si dispos, si vifte, & volage,
 Qu'en moins d'un rien, tout d'un plain saut,
 Des arbres grimpoit au plus haut :
 Estant depestré de sa chesne.
 Ainsi qu'on voit de chesne en chesne,
 Et de branche en branche, leger,
 L'escurieul bondir, voltiger,
 Et l'arbre estant de fruiçt chargée,
 Se sentoit soudain deschargee.

LE SINGE.

En moins de quatre ou de cinq coups,

Tout le fruit en estoit secous:

Et eust fait tomber plus de pommes,

Qu'une demy douzaine d'hommes.

Le glan estoit par luy batu,

Comme d'un orage abbatu.

A-il faict, le voyla par terre,

Ou le fruit abbatu reserre,

Tornant, virant, vireuoltant,

De chacun il alloit tatant:

Et quoy que maistre Ian fust beste,

Si estoit il autant honneste

Que maint homme usant de raison.

Ceux qui venoient à la maison,

Maistre Ian sçauoit bien cognoistre

S'ils estoient amis de son maistre.

De l'amy alloit au deuant,

S'autant, l'embrassant, le suiuant,

Dt d'une voix gresle & menuë,

Il saluoit sa bien venuë.

Mais ceux qui ne rendoient l'honneur,

Qu'on doit porter à son seigneur,

On deuinoit à sa grimace

Qu'il les mettoit hors de sa grace.

Car grumelant & rechignant,

Son derrier leur alloit tournant,

Et eust pris volontiers vengeance,

Sur le champ, sans la reuerence

Qu'à son maistre portoit, de ceux

Qui se monstroient trop paresseux.

Quel plaisir c'estoit voir ce Singe,
 Affubl   & co  ff   d'un linge,
 La chambriere contrefaisant,
 A qui l'amour on va faisant:
 Et qui d'une folastre ruse
 Veut qu'on le prenne, & le refuse.
 Maistre Iean n'estoit mal-faisant:
 Vieilles & laides hayssant,
 Ne caressoit que les plus belles.
 Maistre Iean auoit des querelles
 Aux petits enfans d'alentour,
 Qui tousiours quelque mauuais tour
 Taschoient luy faire, & le surprendre:
 Mais bien il le leur s  auoit rendre,
 Les esgratignant ou mordent,
 Ou de la griffe, ou de la dent.
 Ne pouuant son noble courage,
 Faire, ny endurer outrage.
 Maistre Iean filoit au ro  iet,
 Maistre Iean aux tables io  oit,
 Aux eschets, aux Dames, de sorte
 Que tousiours sa part estoit forte.
 Maistre Iean dan  oit & balloit,
 Tousiours    la cadance alloit:
 Le Singe maistre Iean en somme,
 Faisoit ce que peut faire un homme.
 Aussi cil qui le Singe a faict,
 Emprunta la grace & le traict
 Dessur nostre humaine Nature,
 Moulant la singesse figure.

LE SINGE.

Il auoit les pieds & la main
 Contrefaits au creon humain:
 Et le bras en toute maniere,
 Manioit deuant & derriere.
 Le visage auoit rondelet,
 Le sourcil courbe en arcelet,
 Et de l'une & l'autre paupiere
 Ombrageoit des yeux la lumiere:
 Ses yeux comme à l'homme tournez.
 Camusét il auoit le nez,
 L'aureille courte & rondelette,
 La dent d'uoire blanche & nette,
 Qu'il monstroit riant, rechignant,
 Caressant, ou bien desdaignant:
 Les faisant craquer dans sa bouche,
 Comme vn clavier d'orgues qu'on touche.
 Cheueux en teste, & son ment on
 Filoit vn grisastre cotton.
 La poitrine esleuee & large,
 Qui de poil non trop dru se charge.
 Le col rond, l'espaule & les os,
 Comme à l'homme, arrangez au dos:
 La cuisse ronde & hanche estroite.
 Du Singe la personne droite
 Se tenir debout sans faillir,
 Cheminer, courir & saillir
 On voyoit, & mettre grand peine
 D'imiter la parole humaine.
 Et si d'un rasoir affilé
 A maistre Iean on eust taillé

Le fil qu'il auoit sous la langue,
 Il nous eust fait mainte harangue.
 Car faisant ses leures trembler,
 Monstroit qu'il eust voulu parler:
 Mais on l'entendoit à ses mines,
 Au remument de ses babines.
 Quand d'auanture il trouuoit
 Plume & papier, il escriuoit:
 Se morguant pour sa lettre lire,
 Qui se fust peu garder de rire?
 Maint Singe, maint malade au bas,
 A gardé de passer le pas:
 Et leur plaisante singerie
 Mainte maladie a guerrie.
 Si n'estoit que le Singe fait
 Fut deuant le diuin pourtraict:
 Je dirois le Singe, Singe estre
 De l'animal diuin-terrestre,
 Ou bien que nostre humanité,
 Singesse, du Singe a esté:
 Tant l'un à l'autre se rapporte,
 Figurez d'une mesme sorte.
 Si Nature luy a donné
 Un corps sur l'humain façonné:
 L'ame gaillarde & fretillante,
 Gentile, ioyeuse & mouuante:
 Sans nul repos en action,
 Riche de mainte inuention.
 Et pour rire expres façonnée,
 Elle luy a aussi donnée.

LE SINGE.

A le corps redicul & plaisant
 L'esprit folastre estoit d'ysant,
 Qui par le haut estoit conforme,
 A la droite & humaine forme:
 Et du nombril ce qui restoit,
 Vn parfaict, & vray Singe estoit.
 Quant à ce qu'il n'a point de queuë,
 Deuinez qu'elle est deuenüë.
 Pour le rendre du tout semblable,
 A l'homme, croyez ceste fable,
 Sa grand' queuë on luy a osté:
 Car le bruit est, que Promethé,
 Apres auoir de main habile,
 D'une grasse & bourbense argile;
 (Prenant du beau chef d'œuvre hu-
 Desur soy-mesme le dessein) (main.
 Pestry l'homme qui deuoit estre
 De ses creatures le maistre:
 Pour ne le laisser estonné,
 Seul sur la terre abandonné,
 Et d'une course vagabonde
 Errer seulet parmy le monde.
 Pour se r'engendrer de ses reins,
 D'enfans beaux fecondement pleins,
 Et peupler la terre nouvelle:
 Il luy voulut d'une femelle
 Gracieuse & belle pourvoir,
 Pour ayde & compagnie auoir.
 Il fist doncq' sur les yeux de l'homme.
 Pluuoir vn engourdissant somme,

Comme il dormoit profondement
 Ouvrit son costé finement,
 Finement luy desvobe & oste,
 Sans que rien en sente, & ne coste,
 Pour d'elle la femme former.
 Pendant qu'il s'amuse à fermer
 La playe qu'à l'homme avoit faite.
 Le Singe ceste coste aguette,
 La sent, l'engoule, & puis s'enfuit:
 Promethee aussi tost le suit,
 Il court apres, en fin l'attrappe,
 Par la queuë longue le happe:
 Le Singe à la queuë arresté,
 Tire à soy, de l'autre costé
 Crie & tire aussi Promethee,
 Taschant r'avoit sa coste ostee:
 Mais le Singe qui de la dent
 Est sa coste ferme mordant,
 Pour son haut crier ne s'effroye
 Et n'entend point quitter sa proye:
 L'autre tient ferme, mais en vain,
 Voicy miracle, dans sa main
 La queuë luy demeure seule,
 Au Singe la coste en la gueule:
 Mais iamais ne fut si fesché,
 Qu'on luy a la queuë arraché
 Pour n'avoit point voulu démordre,
 Qu'eust-il fait? plus n'y avoit ordre
 (Car le Singe au fiste vola,
 Du plus haut arbre qui fust-là)

Recouurer la coste perduë,
 Promethee fasché, de ta queuë
 Vieux Singe, & dit, escourté,
 Au lieu de l'os que m'as osté,
 O veil magot, marmot infame,
 Par despit ie feray la femme,
 A fin que ton cas soit cogneu
 A iamais, desormais tout nud,
 Monstre ton derrire & endure
 Pour punition mainte iniure.
 Or est-il mort encoqueluché
 Maistre Iean que chacun fasché,
 Pleure encor', deplore & regrette,
 Sinon vne trouppes foulette
 D'enfans fascheux, qui maint tourmēt,
 Luy donnoient importunément,
 Mais de loïn : car s'il pouuoit mettre
 Sur quelqu'un d'eux la patte adextre,
 Pour cognoistre qui l'a moqué,
 Pour six mois demouroit marqué :
 Ou la leure ensemble & la iouë
 Alongeant leur faisoit la moüe,
 S'il ne leur pouuoit faire pis.
 A ces vieux marmots accroppis,
 Et qui font si laide grimace,
 Sans plaisir contenance & grace,
 Qui ne sçauent honneur ny bien
 Maistre Iean ne sembloit en rien :
 Que par moy peust estre chantée,
 La louange qu'as meritee,

Extrait du Priuilege du Roy.



A R grace & priuilege du Roy, il est permis à Abel l'Angelier, Libraire Iuré en l'Vniuersité de Paris, d'imprimer, ou faire imprimer, & mettre en vente vn liure intitulé *L'Escalape, ou de la Generation de l'homme, avec plusieurs autres poesies, par René Bretonnayau Medecin, Angoumois.* Et sont faites tres-expresses desfenfes à tous Libraires & Imprimeurs d'imprimer, ou faire imprimer, vëdre ny distribuer desdits liures, sans le consentement dudit l'Angelier: & ce iusques au terme de neuf ans finis & accomplis, sur peine de confiscation desdits liures, & d'amende arbitraire enuers ledit l'Angelier. Et voulons qu'en mettant à la fin ou au commencement du liure le present extrait du priuilege, il soit pour deuëment signifié: comme plus amplement est déclaré és lettres donnees à Paris, le huietième d'August, mil cinq cens quatre vingts trois. Signé,

Par le Conseil, DE NEUFVILLE.



AV ROY.



*Vx pieds des Maïestez, mon treshumble deuoir,
La Generation, vn tout diuin ouurage,
I'offre, vouë & apens, pour vn certain presage,
Que le Ciel leur fera de beaux enfans auoir.*

*Face doncq' l'Eternel la Royne conceuoir
D'un Dauphin aussi beau comme ell' est belle & sage,
Ie ne souhaiteray de viure d'auantage,
Quand mes yeux auront veu ce qu'ils s'attendent voir.*

*Andromache sacra son œuure de vipere,
Les humains preseruant de la poison amere,
Au plus cruel tyran des Empereurs Romains.*

*Et moy ce mien ouurage humblement ie vien rendre,
Qui enseigne aux humains comme l'homme s'engendre,
Au Roy le plus humain d'entre tous les humains.*



EIVSDEM.



Visquis nosse voles quàm Spiritus incolit arcē
Quodque hac inclusus munus obire solet:
Arcis quæ vera est symmetria corpus, vt or-
tum,

Hinc trahit, ac quis nam nexus vtrumque ligat:
Affectus qui sint a nimi, quibus ille mouetur
Fluctibus, illius functio quæque fiet,
Perlege quæ in lucem profert Chyronis alumnus
Hæc arcana Dei reddet aperta tibi.

Christus quò me vocat.



SONNET.

Comme Polux estant fils d'un immortel pere,
Immortel partagea son immortalité,
Avec Castor son frere, estant fils réputé
D'un œuf mortel éclos d'une mortelle mere:

Ainsi mon Bretonnayau, maugré la Parque amere,
Est mon Polux, qui tient de la diuinité,
Et moy autre Castor, luy suis, luy ay esté,
Et sans fin luy seray autant ou plus que frere:

De mon cher Bretonnayau, que i'aime autant ou plus
Que Castor Laconide aimoit son cher Polux,
De l'oubly du tombeau ie rachapte l'ouurage:

Et mon cher Bretonnayau, qui m'aime plus encor'
Que Polux Tindaride aimoit son cher Castor,
Son immortalité avecques moy partage,

R. G. Conseiller.

Je rendrois ton los immortel
 Si les Cieux m'auoient formé tel
 Que celuy qui chanta la gloire,
 Pour vne eternelle memoire
 De Belant & de Peloton,
 Tous deux faits hostes de Pluton.
 Je te mettrois entre les bestes
 Qui marquent les signes célestes,
 Mais tes trop soudains mouuements,
 Y feroient trop de changemens:
 Et le Lion qui au Ciel erre
 Comme celuy qui erre en terre,
 Dont l'orgueil tu punis, moqueur,
 De t'y voir auroit mal au cœur;
 Et seroit cause ta presence
 De faire en haut quelque insolence:
 Vray est qu'on te pourroit loger
 Auecques le Croissant leger,
 Estant d'une mesme nature
 Qui iamais ferme ne demeure.
 On dit aussi que le Croissant
 Est les Singes resiouissant,
 Qu'ils deuiennent tristes & mornes
 Quand le decours monstre ses cornes:
 Mais mon vers ne vole si haut,
 Et pourtant maistre Jean il faut
 Que ton Ombre és lieux bas & sombres
 S'aille enrouller entre les Ombres
 Des bestes, cependant couuert

LE SINGE.

*Soit cy ton corps d'un gazon vert:
Une exemple à toute ta race,
Qu'il n'y a mouë ny grimace,
Gambade, soupplesse ny saut
Qui le sauue quand mourir faut.*

ADVERTISEMENT AV LECTEUR.

I'E V S S E désiré, amy Lecteur, faisant imprimer ce liure, autant plaisant que docte, à fin qu'il t'aggreast d'auantage, l'auoir peu rendre si entier & correct qu'il n'y eust eu rien à redire: mais estant asseuré de l'humanité & douceur dont tu as accoustumé vser à l'endroit de ceux, qui n'espargnans leurs moyens, taschent te faire voir tousiours quelque chose de nouveau, & qui t'apporte avec le plaisir quelque vtilité, comme i'ay tousiours fait, ie croy que tu le receuras de bon œil, excusant les fautes qui s'y pourront trouuer, suruenues en l'impression tant à cause de la copie, laquelle estoit assez mal transcrite, que pour l'absence de l'Aurheur, qui n'a eu moyen ny reuoir la copie, ny assister à l'impression pour le corriger: ioint aussi qu'il n'est celuy pour expert soit-il, qui ne sommeille quelquefois: esperant te le représenter en meilleur estat, & le restituer à la seconde impression. Ce pendant, ie te prie prendre en gré l'intention que i'ay de te plaire, de laquelle ie seray plainement satisfait & content, & me donneras occasion de t'aggreer de plus en plus, si ie scay que tu y prennes plaisir, A Dieu.